

F 749
1976

14135320
1976



ಪ್ರಕಾಶಕ

1976 5

24



მეცოდნე



მხატვრული თარგმანისა და ლიტერატურული ურთიერ-
თობების საქმეთა მთავარი საკრედიტო კოლეგია

შინაარსი

კროზა

იური ტრიფონოვი. სხვა ცხოვრება. მოთხრობა. დასაწყისი. რუსულიდან თარგმნა ეთერ კეჭალმაძემ	5
ცირილ კოსმაჩი. საუვირისა და ღრუბლის ბალადა. რომანი. დასასრული. თარგმნა ნათელა ლორთქი- ფანიძემ	67
კარლუს ფუნტესი. თოჯინა-დედოფალი. მოთხრობა. თარგმნა თამაზ ჩიქვანაიამ	139
არვო ვალტონი. მოთხრობები. ესტონურიდან თარ- გმნა ამირან კალაძემ	154

ლიტერატურული მემკვიდრეობა

ჰომეროსი. ილიადა. პოემა. ძველბერძნულიდან თარგ- მნა რომან მიმინოშვილმა	167
ბიკენტი ვერესაევი. ეჭივის ჩანაწერები. გაგრძელება. რუსულიდან თარგმნა რამაზ კობიძემ	202

სსრკ-ის ლიტერატურის ორთვიური
ალმანახი

1976

შინაარსი

ზარლ ბოდლერი. ლექსები. წიგნიდან „ბოროტების ქვაპილები“. ფრანგულიდან თარგმნა მამუკა ცეცხლაძემ	184
წერილები. ფრანგულიდან თარგმნეს ედიშერ გიორგაძემ და გიორგი ლოლაძემ	189

კრიტიკა, კუბლიცისტიკა

სამარი ველიკოვსკი. ინტელიგენციის თვითშეზღვევა. რუსულიდან თარგმნა მამუკა ცეცხლაძემ	219
ლევან ბრეგაძე. „სამბრონიანი ოპერა“ მართულად	227
იუმორი. შეკრიბა და თარგმნა შოთა ამირანაშვილმა	234
სხვადასხვა ამბები	236
ჩვენი ავტორები	239

გარეკანზე: ვ. მ. ბაზარიკინი. იაკობა საღმურე

კ. მარქსის სახ. საქ. სსრკ.
სახელმწიფო რესპუბლიკის
ბიბლიოთეკა



მთავარი რედაქტორი: კონსტანტინე ლორთქიფანიძე.


სარედაქციო კოლეგია: მზია ბაქრაძე, ბაჩანა ბრეგვაძე, ნანა ღარჩია (პასუხისმგებელი მდივანი), მამალი თოდუა, ნოდარ კაკაბაძე, კარლო კალაძე, მიხეილ კვესელავა, ზურაბ კიკნაძე, ვახუტი კოტიბიშვილი, რომან მიმინოშვილი, ოთარ ნოდია, ნიკო ყიასაშვილი, თამაზ ჩხენკელი.

მოთხრობა

რუსულიდან თარგმნა მთერ კეჭალაძემ

ღამით ისევ გაეღვიძა, როგორც ეღვიძება ახლა ყოველდღე, თითქოს ვიღაც ბრაზიანად მუჯლუგუნს ჰკრავდეს და ეუბნებოდეს: დაფიქრდი, ჰო, დაფიქრდი, ეგებ მიხვდე და ამოხსნა! ქალს კი ეს არ შეეძლო. თვითგვემის მეტი არაფერი ძალუძდა. მაგრამ ის გრძნობა, ღამით რომ აღვიძებდა, ჯიუტად ჩასციებოდა: ჰო, ეცადე მიხვდე, ამოხსნა, ხომ უნდა იყოს მიზეზი, ხომ უნდა იყვნენ დამნაშავენი, ყოველთვის ახლობლები სცოდავენ. არა, ასე ცხოვრება არ შეიძლება. დაე, თვითონ მოკვდეს, ოღონდ ეს ერთი გააგებინა: პირადად მას რა დანაშაული მიუძღვის? კიდევ მეორე ფარული, სამარცხვინო ფიქრიც ემატებოდა ამას: ნუთუ ამით დამთავრდა ყველაფერი? „რა სულელი ვარ, სიკვდილზე როგორ უნდა ვიფიქრო, როცა შვილი მყავს“.

და მაინც ეადვილებოდა სიკვდილზე ფიქრი, ეს მისთვის უსიამოვნო. მაგრამ გარდაუვალი აუცილებლობა იყო, ისე როგორც, ვთქვათ, საოპერაციოდ კლინიკაში დაწოლა. სიკვდილზე ფიქრი მოგონებებზე გაცილებით ადვილი იყო, მოგონება ტკივილს ჰგვრიდა, ეს კი არაფერს, გარდა წამიერი ჩაფიქრებისა. აი ახლაც უკვე მოეძალა ეს მტანჯველი მოგონებანი: წინათ, მუზეუმში მუშაობისას, ხელფასის აღების შემდეგ სერიოზუა შინ შეზარხოშებული მოდიოდა ხოლმე. უმეტესად მუზეუმის მახლობლად მდებარე „სევანში“ დადიოდა ან სულაც ფედოროვი შეითრევდა თავისთან და წრუპვას შეჰყვებოდნენ. შინ მოსვლისთანავე წვებოდა და მაშინვე იძინებდა. ღამით კი, ასე სამ-ოთხ საათზე, ყოველთვის გაიღვიძებდა, როგორც ახლა თვითონ იღვიძებს. წაფრატუნდებოდა სამზარეულოში წყლის დასალევად თუ მაცივარში შედგმული რაიმე



სასმელის გამოსაღებად. ოჰ, როგორ ბრაზდებოდა, როგორ ლანძღავდა ხოლმე ქმარს ძილგამკრთალი ქალი. იმ წუთებში, მგონი, ეზიზღებოდა კიდევც: „მინც რა ეგოისტი ხარ!“.

ზოგჯერ სერიოზულად ოსტატურად მალავდა სიმთვრალეს. საზრიანად, ეშმაკურად ეჭირა თავი, მარჯვედ მსახიობობდა. ქალი კი ვერც სუნს გრძნობდა და ვერც წამოწითლებულ თვალებს ამჩნევდა, სჯეროდა ქმრის სიტყვები: „დავიღალე, არაქათი აღარა მაქვს“. ებრალებოდა, სასწრაფოდ გაუშლიდა ხოლმე ლოგინს. სერიოზულად საბნის წახურვისთანავე ამოუშვებდა ხვრინვას. მაგრამ შუალამისას კი, გათენებამდე კარგა ხნით ადრე, გაიღვიძებდა და ამით გათქვამდა ხოლმე თავს. ახლა თვითონ ემართება ასე, ოღონდაც ამის მიზეზი მოგონებანი და გულის ტკივილია და არა სიმთვრალე. ქალი დღისით გულდაგულ მალავდა თავის განცდებს, არ უნდოდა შეემჩნიათ არც სამუშაოზე და არც შინ, არც ირინკას და არც დედამთილს. მეტადრე დედამთილს რომ შეემჩნია, ტკივილი გაუძლიერდებოდა. ჰოდა, დღისით მთელ ძალას ამის დამალვას ანდომებდა, მაგრამ ღამით კი საამისოდ ძალა აღარ ჰყოფნიდა.

ხანდახან სერიოზულად მთვრალი არ იყო და მაინც იღვიძებდა, — უბრალოდ ისე, ღმერთმა უწყის, რატომ, რა მიზეზით. ახირება ჰქონდა ასეთი. აბა ბებერი ხომ არ იყო. უძილობა მოხუცებს აწუხებთ. ქალი ღიზიანდებოდა, ფხიზელი ძილი ჰქონდა და როგორც კი ქმარი ხვნეშას, წრიალს დაიწყებდა, განსაკუთრებით თუ საათის დახედვას მოინდომებდა, მაშინვე ეღვიძებოდა. საათი საწოლის თეთრეულის ყუთზე იდო. ჰოდა, როცა თვალთან მიიტანდა ხოლმე საათს, ყუთის თავს უთუოდ ბალთას მიახლიდა და ააწკარუნებდა. რამდენჯერ შელაპარაკებულან ამ წკარუნის გამო. ქალი ბრაზობდა. ოჰ, რა სისულელე იყო ეს ყველაფერი. საწყალი, როგორ ცდილობდა ჩუმად აელო საათი, მაგრამ რატომღაც არაფერი გამოსდიოდა. ბალთას აუცილებლად მიახლიდა იმ თეთრეულის ყუთს — და აი, ატყდებოდა წკარუნი, ღამის სიჩუმეში ასე მკაფიოდ რომ ისმოდა. ქალი შეკრთებოდა, რადგან უკვე ეღვიძა (ეღვიძებოდა კი, როგორც ქმარი ხვნეშას დაიწყებდა) და გატრუნული, გულდამძიმებული ელოდა ამ წკარუნის ხმას.

დედამთილი კვლავ მასთან ცხოვრობდა ერთ ბინაში, ან კი აბა სად წავიდოდა?

ამ ქალს ურყევად სწამდა, რომ შარშან ნოემბერში გულის შეტევით გარდაცვლილი მისი ორმოცდაორი წლის ვაჟიშვილის სიკვდილის მიზეზი ცოლი იყო. რძალ-დედამთილის ერთად ცხოვრება ჰირდა. ბარემ უნდოდათ განცალკევება, სამუდამოდ გაყრა, მაგრამ ერთი ამბავი აბრკოლებდათ: დედაბერს თექვსმეტი წლის შვილიშვილ ირინკას მეტი აღარავინ ჰყავდა და მას რომ დაშორებოდა, უცხო ადამიანებს შორის უნდა ამოხდომოდა სული (მისი და დაღისშვილი მაინცდამაინც კალთებს არ ახევდნენ და არც თვითონ ალექსანდრა პროკოფიევნა ისურვებდა მათთან ცხოვრებას). გარდა ამისა, ოლგა ვასილიევნას ანგარიში უნდა გაეწია შვილისთვისაც. გოგონას ბებია უყვარდა, უმისოდ კი მოხუცი სულ მთლად უპატრონოდ რჩებოდა. ყველაფერი ეს ისე იყო ჩაკვანძულ-ჩახლართული — გამოსავალი არ ჩანდა: გაიღვიძე შუალამისას და, სასოწარკვეთილმა, იმტვრიე თავი, დღისით კი გაიქეცი სახლიდან, გაუჩინარდი. ახლა თვითონ ისწრაფოდა, მივლინებებში რაც შეიძლება ხშირად წასულიყო. გრძნობდა, სწორად არ იქცეოდა, ხასიათის სისუსტე იჯაბნი-

და. ირინკას ახლა უფრო სჭიროდა მისი თავი, ვიდრე ოდესმე. არც მას შეეძლო შვილის გარეშე. მივლინებებში ყოფნისას ირინკას დიდი უფლეთდა გულს. ჩქარობდა შინ დაბრუნებას. ყოველ საღამოს ტელეფონით ლაპარაკი თითქმის ხუთი მანეთი უჯდებოდა. ჩამოსვლის შემდეგ კი ირკვეოდა, რომ თავისი საქმეებით გართული ირინკა მშვენივრად გრძნობდა თავს უმისოდ. ეს ამბავი. ცოტა არ იყოს, ამშვიდებდა, მაგრამ ტკივილს უძლიერებდა და კვლავ შინიდან გაქცევას, თავის შველას ლამობდა, თუმცა წინასწარვე იცოდა, ხსნას ვერსად ჰპოვებდა. ეჰ, როგორ შეიბრალებდა, როგორ დააფასებდა მოხუცს, სადმე შორს რომ ცხოვრობდეს! მაგრამ ამ პატარა ოთახებში, ამ ციციქნა დერეფანში, სადაც განვლილი წლები ისე ცხადლივ, მიჯრით ჩარიგებულყოფიერ თმანეთის გვერდით, როგორც ნახმარი საშინაო ფეხსაცმელები სერიოჟას ზელით ნაკეთებ ტანსაცმლის საკიდის ქვეშ მდგარ ხის ყუთში, ამ სივიწროვეში სიბრაულისთვის ადგილი არა რჩებოდა. მაგალითად, დედამთილს შეეძლო ეთქვა: „როგორც მახსოვს, ასეთი კრენდელები წინათ არ გიყიდი. სად იყიდე. კიროვის ქუჩაზე?“ ეს ერთი ფრაზა წამსვე აქარწყლებდა მისხალ-მისხალ ნაგროვებ სიბრაულს. ეს ხომ იმას ნიშნავდა: ქმარს კრენდელებით არ აფუფუნებდი, ახლა შენთვის კი ყიდულობო. აი ასეთი სისულელე, ასეთი სასაცილო, უმნიშვნელო რამ ხანჯალივით უსერავდა გულს.

მსგავსი წამება მოჰყვა ტელევიზორის შეძენასაც. ჯერ კიდევ სერიოჟას სიცოცხლეში უნდოდათ ძველი ტელევიზორის ნაცვლად ახალი, დიდი ტელევიზორი ეყიდათ და ფულს აგროვებდნენ. ოლგა ვასილიევნა ხშირად ბრაზობდა, — იქნებ არ უნდა ექნა, მაგრამ, ღმერთო ჩემო, ახლა რაღას უშველის, — ბრაზობდა სულ ტყუილუბრალოდ, უსამართლოდ, მაგრამ თავს ვერ ერეოდა; ახლა ეს მოგონებანიც წამებად ექცა — სერიოჟას საათობით შეეძლო თავდავიწყებით ეცქირა ყოველგვარი უაზრო სპორტული გადაცემისათვის. ჩაჯდებოდა მწვანე სავარძელში, გაირჭობდა პირში სიგარეტს, გვერდით იატაკზე დაიდგამდა მრგვალ საფერფლეს, ფეხს ფეხზე გადაიდებდა და მიწებებულებით ველარც დაძრავდი იქიდან. ვერც ვერას ჰკითხავდი და ვერც ვერას გააგონებდი. მაინც რა აყურებინებდა ყველაფერს მიყოლებით? ნუთუ ყველა გადაცემა ერთნაირად საინტერესო იყო?

— მე ვისვენებ! — გაბრაზებით იტყოდა ხოლმე სერიოჟა. — ბოლოს და ბოლოს ნომ მაქვს დასვენების უფლება? — განრისხება, ცოტა არ იყოს, ყალბი იყო: სურდა ყველას სცოდნოდა, რომ სამსახურში მეტისმეტად იღლებოდა.

იგი მართლაც იღლებოდა, ჰქონდა უსიამოვნებაც, მაგრამ ეს ხომ ყველას მოსდის. მას არ ჰყოფნიდა თავშეკავება. თანაც ყველაფერს მალავდა, ფარავდა. ბევრი რამ მერე გამოჰყდავნდა. ოლგა ვასილიევნა თავის საწუხარს არა მალავდა, ჰოდა, შვებასაც პოულობდა. ის კი არ ამხელდა, საკუთარი მარცხისა რცხვენოდა. აი მაშინ, ტელევიზორის წინ ვითომ ხუმრობით რომ თქვა:

— ბატონებო, ჩემი ნერვული უჯრედები დასვენებას საჭიროებენ. ძროხები ძოვენ ბალახს, ინტელიგენცია უსმენს მუსიკას, მე ვუყურებ სპორტს. — ესაა ჩემი მკურნალობა, ჩემი ბრომი, ჩემი ესენტუჯი, ღმერთმა დასწყევლოს თქვენი მიუხვედრელობა, ბატონებო...

რა თქმა უნდა, პამპულაობდა, როგორც ყოველთვის, მაგრამ ალექსანდრა პროკოფიევნა უმაღლეს გამოექომაგებოდა ხოლმე შვილს. ზოგჯერ მხარის ასაბმელად გვერდითაც მიუჯდებოდა და ჰოკეისა თუ ფრენბურთს ან სულაც სხვა



რამეს უყურებდა, მისთვის ხომ სულ ერთი იყო. თან ვაყიშვილს საკუთარ აზრებს უზიარებდა. ამის გამგონე ოლგა ვასილიევნას გადახარხარებას არაფერი ერჩია. ზოგჯერ სერიოჟაც მალულად, ისე რომ მხოლოდ ოლგა ვასილიევნა მიმხვდარიყო, ტელევიზორთან მიმჯდარ ალექსანდრა პროკოფიევნას მოსწრებულად ამასხრებდა. მოხუცი კი ჯიუტად იფერებდა, ვითომ სპორტი დიდად აინტერესებდა. თუმცა ორმოცი თუ ოცდაათი წლის წინ ეს ქალი დიდად გატაცებული გახლდათ მოგზაურობით. არც ისე დიდი ხანია მას შემდეგ, საგანგებოდ რომ ჩაიცივამდა ხოლმე თავის ძველისძველ ხაკის შარვალს, სამხედრო კომუნიზმის დროინდელ ქურთუკს, უკან ზურგჩანთას მოიგდებდა და სულ მარტოდმარტო ელექტრომატარებლით სადღაც გაუყვებოდა. სერიოჟა ამ ამბავს არხეინად უყურებდა, არც სხვას აძლევდა ნებას მოხუცისთვის დაეცინა ან თუნდაც მის ზურგს უკან უჩუმრად გაეღიმა. მოხუცი ქალი, მგონი, ისევ იმ ადგილებს ნახულობდა, სადაც დიდი ხნის წინ თავის ქმართან, სერიოჟას მამასთან ერთად იყო ნამყოფი. მისი ქმარი, მათემატიკის ცნობილი პროფესორი, ხეტიალის დიდი მოყვარული, მგლისმუხლა მოგზაური და ფოტოგრაფი გახლდათ. სახალხო კომისარ კრილენკოს დროინდელ სამოგზაურო ტანსაცმელში გამოწყობილი დედამთილი სასაცილო და საცოდავი სანახავი იყო. თვითონ ოლგა ვასილიევნასაც კი ეჩოთივებოდა ეს ამბავი, აბა ირინკა ხომ პირდაპირ იტანჯებოდა. ბებიას დასცინოდნენ სადარბაზოს სულელი დედაკაცები. სერიოჟას მამა ორმოცდაერთში მოხალისე მოლაშქრეებს შეუერთდა და შემოდგომაზე დაიღუპა კიდევ მოსკოვის მისადგომებთან. ოლგა ვასილიევნასათვის გასაგები იყო მოხუცის ეს მწარე, სევდიანი ახირებანი, მაგრამ რატომ მას ვერ უგებენ? რატომ ვერ ხედავენ მის მწუხარებას? ამ ყოველად გონიერ, იურიდიული განათლების მქონე ქალს ვერა ძალით ვერ დააჯერებდი, რომ ოლგა ვასილიევნასაც ჰქონდა მწუხარების უფლება.

— ჰო, რასაკვირველია, ტელევიზორი უნდა იყიდოთ, ამას რალა ფიქრი უნდა, იყიდეთ! — უთხრა დედამთილმა, როცა ოლგა ვასილიევნამ, მისდა სამწუხაროდ, რჩევა ჰკითხა.

ირინკამ მართლაც სული შეუწუხა დედას, გინდა თუ არა დიდი ტელევიზორი ვიყიდოთო. ოლგა ვასილიევნასათვის სულ ერთი იყო, იყიდდა თუ არ იყიდდა, მაგრამ იქვე ახლოს უნივერსიტეტში, სადაც წამდაუწუმ, ყოველ წვრილმანზე დარბოდა ხოლმე ირინკა, ძალიან კარგი ტელევიზორები მოიტანეს. ასეთი ტელევიზორები მართლაც იშვიათად მოდიოდა და შეძენის საკითხი ახლავე უნდა გადაწყვეტილიყო.

— აკი გეუბნებით, იყიდეთ-მეთქი! რატომ უნდა მოიკლოთ სიამოვნება.

— სულ სასიხარულოდ არა მაქვს საქმე? — უპასუხა ოლგა ვასილიევნამ.

— მე მესმის, მაგრამ, მეორე მხრივ, როგორც ვიცი, არც მონასტერში აპირებთ გამოკეტვას!

— არა, მონასტერში ნამდვილად არ ვაპირებ.

ოლგა ვასილიევნამაც განგებ უპასუხა ასე, მოხუცს რომ გული სტკენოდა, — მანაც ხომ „სიამოვნება“ რძლის გულის სატკენად ახსენა.

— ჰოდა, ნულარ იტანჯებით, გამოიტანეთ ფული, განა სერიოჟა ამისათვის არ აგროვებდა, ეს მისი სურვილი იყო...

ალექსანდრა პროკოფიევნას ბებერი თათრის ქალივით ბრტყელ, დაწვმა-

ღალ პირისახეს თავაზიანი ღიმილი შეეყინა, ხოლო თვალები — სერიოზულად და
ჭუტულად ცისფერი თვალები — ცივად, უღმობლად იყურებოდნენ.


ამ მწარე-მწარე ჩანისკარტებით განრისხებულმა ოლგა ვასილიევნამ დე-
დაბრის ჯიბრზე ტელევიზორის ყიდვა გადაიფიქრა. შეუყვარა აღრიალეზულ
ირინკასაც, მაგრამ შემდეგ, როცა კიდევ უფრო მოერია ბრაზი, კვლავ შე-
იცვალა გადაწყვეტილება და ტელევიზორი იყიდა. მთელი ოთხი თვის მანძილ-
ზე დედამთილს ტელევიზორისაკენ არ გაუხედავს. ამბობდა, თვალებს ვუფრ-
თხილდები და გამოსხივებისაც მეშინიაო, მაგრამ იგი განგებ არ უყურებდა.
ოლგა ვასილიევნას ნაცნობები ამშვიდებდნენ, არა უშავს, შეეწყობით, შეეთ-
ვისებით, ერთი გაქვთ მწუხარება, ერთი გყავთ გოგო, ორთავეს რომ ასე
გიყვართო. ოლგა ვასილიევნასაც ეგონა, ნელ-ნელა ალბათ მოვრიგდებითო,
მაგრამ ერთმა შემთხვევამ სამუდამოდ დაუკარგა იმედი. მიხვდა, ეს არასოდეს
არ იქნებაო.

სერიოზა ორი თვის მკვდარი იყო, აუტანელი ტკივილი უსერავდა გულს.
სიცოცხლე აღარ უნდოდა. უძილობისგან განაწამები ოლგა ვასილიევნა ლა-
მით წამოდგა, სამზარეულოში გავიდა და იქ იხრჩობოდა ცრემლებით. ხან
ვალოკორდინს სვამდა და ხან ჩაის ცივ ნაყენს. უცებ ალექსანდრა პროკოფი-
ევნას ფრატუნი შემოესმა. მასაც გაკრთომოდა ძილი. გულში ლახვარივით მოხვ-
და ეს ფრატუნი — ნაცნობი ფრატუნი. სერიოზაც სწორედ ასე დაფრატუნებ-
და იმავე ფოსტლებით. მოხუცმა ეს ფოსტლები რატომღაც თავის ოთახში წა-
იღო და ჩაიკვა. ოლგა ვასილიევნას მოეჩვენა, თითქოს სერიოზა მოდისო. მო-
აგონდა, სერიოზა სამზარეულოს კარს რომ მოადგებოდა, ხელს მაღლა ასწევ-
და და იტყოდა: „მოგესალმებით, ჩემო საწყალო ხალხო!“ თავზე კი ქალაღლის
ქუდი ეკოსა. ირინკა, რა თქმა უნდა, სიცოცხლით იჭაჭებოდა. სერიოზა ცდილობ-
და როგორმე შეეთვისებინა, დაეახლოებინა ისინი, თუნდაც წამიერად, თუნ-
დაც ოხუნჯობით, პამპულობით. ჰოდა, აი ამ ფრატუნმა ანაზად აღ ისე ააღელ-
ვა, თავი ვერ შეიკავა და აღრიალდა. ასეთი საქციელი კი მიუტევებელი, საში-
ნელი დანაშაული იყო — ოლგა ვასილიევნას ცრემლი არავის არ უნდა ენახა.
ალექსანდრა პროკოფიევნა სამზარეულოში ღამის პერანგის ამარა შემოვიდა.
ჭაღარა თმა ჩამოშლოდა, უკმაყოფილო პირსახე ჩაყვითლებოდა, — შეხედა
ოლგა ვასილიევნას, მიადგა ბუფეტს, გადმოიღო ფინჯანი და ჩაიდნიდან წყალი
გადმოასხა. არა, ოლგა ვასილიევნასათვის კი არ მიუწოდებია, წყალი თავად
უნდოდა. მოხუცს თითქოს არც დაუნახავს, არც გაუგონია რძლის ქვითინი და
ჩვეულებრივი ბუზლუნა ხმით იკითხა:

— სოდა სად არის?

ოლგა ვასილიევნას პასუხი არ გაუცია, ისე გავიდა სამზარეულოდან.

ამ შეკითხვის, ამ უჩინო თვალების დავიწყება შეუძლებელი იყო: უეც-
რად აშკარა გახდა ის, რაც დღისით იფარებოდა. ღამით შიშვლდება ჭეშმა-
რიტება. ოლგა ვასილიევნა ტიროდა, მოხუცი კი სიძულვილით შესცქეროდა.
საერთოდაც ყველაზე მწარე შელაპარაკებები ყოველთვის ღამით ხდებოდა.
ერთხელ სერიოზამ უთხრა, ირინკა რომ არ გვყავდეს, უსათუოდ გაგეყრებო-
დიო. ეს კი ისეთ მომაკვდინებელ სიმართლედ ეჩვენა, გათენებამდე ძლივს მი-
აღწია. დღისით სერიოზა კვლავინდებურად ოხუნჯობდა, ენამახვილობდა, სი-
სულელეებს ჩმახავდა, არაფერი ახსოვდა. ასე რომ ღამის დავაც კომმაროვით
უკვალოდ გაქრა. რამდენიმე თვის შემდეგ ისევ ღამით წაიკინკლავეს, სწორედ



ახალი წლის წინ. სერიოჟამ უეცრად დასასვენებელ სახლში წასვლა განიზრახა. ქმრის ამ სურვილმა ქალი შეაშინა, არ უნდოდა მისი მარტო გაშვება, თხოვდა, მეც წამიყვანო. მაშინ ძნელი არ იყო უხელფასო ათდღიანი შვებულების აღება, მაგრამ უმაღვე ირინკას დატოვების ამბავმა გააძნელა საქმე. დედამთილი ცოტა შეუძლოდ იყო, როგორც იტყვიან, უქეიფოდ გახლდათ, რძლის წასვლა სერიოჟასათვის რომ ყოფილიყო საჭირო, უსიტყვოდ გაუშვებდა, მაგრამ როცა გაიგო, წასვლა რძლის ახირება არისო, ცივი უარი განაცხადა. ყველაფერი თეთრი ძაფით იყო ნაკერი. საგანგებოდ ვერა პროკოფიევნა და მისი ქალი თამარაც მოიწვიეს. სერიოჟას დეიდაშვილი თამარა დახურული პოლიკლინიკის ნევროპათოლოგი გახლდათ. ოლგა ვასილიევნას ეს ქალი არ უყვარდა და არც მისი სიტყვა სჯეროდა. სწორედ ამ თამარამ ილაპარაკა ბევრი ალექსანდრა პროკოფიევნას ავადმყოფობაზე, აშკარად აჭარბებდა, თვალს უხვევდა. ოლგა ვასილიევნამ საუბრის გამწვავება აღარ ისურვა, გაჩუმება არჩია, თუმცა აღმამფოთებელი შეთქმულების მოწმე იყო. ღამით კი თავი მაინც ვერ შეიკავა. მძინარე ქმარი გააღვიძა და ჰკითხა:

— გამოტყდი, რომ ვილაცა გყავს და სწორედ მასთან აპირებ დროს გატარებას?

ქალს ისეთი საშინელი განცდა ჰქონდა, როცა ირგვლივ ყველაფერი ტრიალებს, როცა ფეხთით ნიადაგი გეცლება.

— ჰო, მყავს, მყავს, — ჩუმი ხმით წაილაპარაკა უეცრად გამოღვიძებულმა სერიოჟამ, — ის ვილაცა — მე ვარ თვითონ. საკუთარ თავთან მინდა ყოფნა. მინდა თქვენგან დავისვენო, შენგან, დედაჩემისგან, ყველასგან, ყველასგან...

წამით მართლა დაიჯერა, როგორც სჩვეოდა ყოველთვის, მაგრამ შემდეგ კვლავ საგონებელს მიეცა! ვითომ მართლა სჭირდება განმარტოება? განა რა ისეთი მიზეზი ჰქონდა მოსკოვიდან მარტოდმარტო ას კილომეტრზე გაქცეულიყო. და აი. თითქოს დაიჯერა და არც დაიჯერა. მართალია, ცოტა დამშვიდდა, მაგრამ სულ მთლად მაინც ვერა. მაინც ტანჯავდა ფიქრი: „ნაღდად ვილაცა ჰყავს“.

სერიოჟას ტანმორჩილი, ქერა ქალები მოსწონდა. ეს ამბავი სრულიად შემთხვევით აღმოაჩინა. დიახ, პატარა ქალებისკენ ილტვოდა, ხელში აყვანილს რომ უნანავებდა. ერთხელ ოლგა ვასილიევნას ნაზად გადაუკრა:

— რა საწყენია, ჩემო დედაკაცო, ასე ტანსრული რომ ხარ, არადა როგორ მინდა ხელით გატარო ხოლმე.


და მაინც ყველა ქალი ტანსრული ჰყავდა. უბრალოდ, შემთხვევით მოხდა ასე. სერიოჟას ხუთ ქალთან ჰქონდა ურთიერთობა, ოთხთან მასზე ადრე, მეხუთე თვითონ იყო. იქნებ სხვებიც იყვნენ, უთუოდ იქნებოდნენ, მაგრამ ეს ოთხი კარგად იცოდა. სხვებზე თვითონ ვარაუდობდა, ეჭვიანობდა, სამაგიეროდ იმ ოთხზე ყველაფერი დაწვრილებით დასტყუა. სახელებით იხსენიებდა — ვალკაო, სვეტლანკაო. შემთხვევას არ გაუშვებდა, ეს ქალები და სერიოჟაც მათთან ერთად არ წაეკბინა, რაიმე საწყენი, დამამცირებელი არ ეთქვა, ვერ იტანდა იმ ნამუსგარეცხილ, კახპა დედაკაცებს. ორი მათგანი ასაკით სერიოჟაზე უფროსი იყო და ყოველგვარ სისაძაგლესაც ასწავლიდნენ. ერთი ზუსტად მისი კბილა გახლდათ, თავი რომ ფრიად განათლებულ არსებად მოჰქონდა. სინამდვილეში კი ეს გახრწნილი დედაკაცი ყოველ ღონეს ხმარობდა, როგორმე თავი შეეჩივებინა სერიოჟასათვის, მაგრამ, მადლობა

დმერთს, იგი ანკესს არ წამოეგო. მოიქცა გაბედულად, შესაძლოა არცთუ მთლად კეთილშობილურად, მაგრამ იმაზე ყველაფერი ახი იყო, ჰყავდა კიდევ ერთი თეთრყირმიზა ქალი, მასთან მუზეუმში რომ მუშაობდა. ეს ჩერჩეტი, ტყლარჭია არსება მართლაც ძალიან ლამაზი იყო. ქალი ვითომ ერთთავად სადღაც გაურბოდა, სერიოჟა კი კალთებს აგლეჯდა. ერთხელაც მოსწყინდა — ქალი იმ სახლიდან გაექცა, სადაც ერთმანეთს ხვდებოდნენ. ჰოდა, სერიოჟა აღარ დაედევნა და ყველაფერიც ამით დამთავრდა. ეს მეოთხე დედაკაცი კარგა ზოობა აღნაგობისა იყო და სერიოჟა ბრუნჰილდას ეძახდა. უთქვამს კიდევ, მძიმე, მათლაფებივით მრგვალი ძუძუები აქვსო. ოღვა ვასილიევნას ეს ქალი განსაკუთრებით ეჯავრებოდა. სერიოჟას არასოდეს ჰყოლია პატარა ტანის, ქერა ქალი. ვინ იცის, იქნებ ამიტომაც მიილტვოდა მათკენ. ერთხელ სერიოჟა მოულოდნელად პერესვეტოვოში გაემგზავრა თორმეტი დღით. ოღვა ვასილიევნას ისევ მოეძალა მტანჯველი ფიქრები. არა, არ უნდა აპატიოს, იმიტომ კი არა, რომ უთუოდ ღალატობს იქ, პერესვეტოვოში, უბრალოდ იმიტომ, რომ არ შეისმინა მისი ვედრება, გაეცალა, გაექცა. მაგრამ სამი დღის შემდეგ ტელეგრამა მოუვიდა: „ჩამოიყვანე ირინკა, აქაურობა შესანიშნავია“. სამსახურში ერთი დღე ითხოვა და ირინკასთან ერთად პერესვეტოვოში გაემგზავრა. რა თქმა უნდა, სერიოჟას ყველაფერი აპატია და ფინური ციგებით გორაკიდან მხიარულად ისრიალეს. მეორე დღეს ელექტრომატარებლით უკან, მოსკოვში რომ ამგზავრებდა, წვერგაუპარსავმა სერიოჟამ ლოყა მიადო ქალს და ჩურჩულით უთხრა: „რა სულელი, რა სულელი ქალი ხარ!“

განა სულ ახლახან, საკურორტო ბარათი რომ აიღეს, ექიმმა არ დაუწერა: „ჯანმრთელი არისო“. ყველაფერი რიგზე ჰქონდა: ანალიზები, გული, წნევა. მაინც რა მოხდა ამ ცოტა ხანში? როგორ იცხოვროს უმისოდ? ან აქამდე როგორ მოაღწია? უკვე ხუთი თვე და ოცდახუთი დღე გავიდა. თვითონაც ვერ მიმხვდარა. ყველაფერი უაზროდ მიიზღაზნება, უაზროდ ცოცხლობს, არსებობს...

მალვიძარა შვიდზე დარეკავს. ბურანში წასული მერე კიდევ საათნახევარს იწრიალებს ლოგინში, — განა ძილის ბურანში, გამქრალი ცხოვრების ბურანში, — ბოლოს ზღაზვნით წამოდგება, ჩაიცვამს სერიოჟას ნაჩუქარ ნეილონის ხალატს ან სულაც პერანგისამარა, თმადაუვარცხნელი, წალასლასდება სამზარეულოსაკენ. ახლა იგი უკვე აღარ კოხტაობს. ქურაზე ჩაიდანს შემოდგამს, ერთ ქვაბს ფაფისათვის დადგამს, მეორეს კვერცხების მოსახარშად. მაცივრიდან ხაჭოსა და კეფირს გამოიღებს, რომ ცოტა შეთბეს, ვიდრე ის და ირინა დაიბანენ და ჩაიცვამენ. ჩართავს ბუფეტის თავზე მდგარ რეპროდუქტორს. მაგრამ რასაც უნდა აკეთებდეს, რაზეც უნდა ფიქრობდეს, ზურგს უკან მაინც ყოველთვის სიცივესა და სიცარიელეს გრძნობს.

იყო ერთი ყოველად კეთილი და კარგი, ცოტა უნდილი, ნიჭიერი ყმაწვილი ვლადი. ფართო, ნაყვავილენი პირისახე ჰქონდა, ოდნავ წამოზიდული თვალები კი მხოლოდ სიდინჯესა და ერთგულებას გამოხატავდნენ. ერთთავად ბრტყელ-ჩარჩოიანი სათვალე ეკეთა. სიცილისას — თუმცა ძალიან იშვიათად და ყოველთვის მოულოდნელად იცინოდა — პირზე ხელს იფარებდა, რადგან ზედა ტუჩი, ცოტა არ იყოს, ზომამზე მეტად აუდიოდა მაღლა. მთლად კურდღლისტუჩააო, ვერ იტყოდით, მაგრამ ცოტათი მაინც წააგავდა. ერთმა ძველმა ხუმარა მეგობარმა ვლადს „ნახევარკურდღელა“ შეარქვა. ვლად პოლისაევი სამედი-



ცინო ინსტიტუტის სტუდენტი იყო და ჯერ კიდევ მაშინ მედიცინაში დიდ მო-
მავალს უწინასწარმეტყველებდნენ. ოლგა ვასილიევნას დედისთვის გარეგ-
ნობას, შესახებ დაობას — იქნებოდა ეს ადამიანი, პალტო, კარადა,
ფარდა თუ ყვავილების თაიგული — არავითარი ფასი არა ჰქონდა. მისთვის
მთავარი იყო ის, რაც ერთობ სადაო გახლდათ, რასაც თვითონ შინაგანად ხე-
დავდა და არსს ეძახდა. ჰოდა, აი, დედას ძალიან უნდოდა მისი ქალიშვილი
ვლადს გაჰყოლოდა ცოლად. ოლგა ვასილიევნას კი ვერა და ვერ გადაეწყვი-
ტა, თუმცა დედაზე ნაკლებად როდი გრძნობდა ვლადის ღირსებებს, მაგრამ
არ უნდოდა მთელი სიცოცხლე ვლადის ბრტყელი, ნაყვავილევი, ყვრიმალმა-
ღალი პირისახისთვის ეცქირა...

ორსა თუ სამ წელიწადს მაინც გაგრძელდა ეს უღიმღამო არშიყობა თუ
სანახევროდ ბავშვური მეგობრობა, ყოვლად უიმედო ვლადისთვის, ყოვლად
უხალისო ოლგა ვასილიევნასათვის (იმ დროს კიდევ ერთი თაყვანისმცემელი
უწვრილებდა გულს, სულ მთლად უვარგისი ყმაწვილი, ვინმე ინჟინერი გენ-
დლინი, თუმცა ოლგა ვასილიევნას დედა იმასაც სწყალობდა).

მაგრამ აი, დადგა უამი — ოლგამ სწავლა დაამთავრა, შეუდგა დამოუკი-
დებელ ცხოვრებას. პალიხაზე მდებარე სკოლაში მასწავლებლად დაიწყო მუ-
შაობა, უკვე ოცდაოთხი წლისა გახდა, სხვა გზა არ ჰქონდა. ის შეჩვენებული
მეგობარი გოგოებიც დათხოვდნენ. და აი, ერთ მშვენიერ დღეს ვლადიმ ვი-
ლაც ახალგაზრდა კაცი მოიყოლა: ზამთარში სტუდენტთა ბანაკში გაეცნო ზვე-
ნიგოროდში და დამეგობრებულიყვნენ. ვლადი საერთოდ დიდი ჰუმანისტი
გახლდათ. უცებ შეუყვარდებოდა, გააღმერთებდა ვილაცას. თუმცა ისიც უნდა
ითქვას, მაინცდამაინც კარგად როდი ეხერხებოდა ადამიანების გამოცნობა. მა-
გალითად, სერიოჟას დედას უკეთილშობილეს ადამიანად თვლიდა, ლამის ცახ-
ცახებდა მის წინაშე, ენა ებმოდა მხოლოდ და მხოლოდ იმიტომ, რომ ალექ-
სანდრა პროკოფიევნა სამოქალაქო ომის დროს ფრონტზე რაღაცას აკეთებდა,
ჯარის პოლიტნაწილში მანქანაზე უკაკუნებდა. მაგრამ ეს იყო შემდეგ. სერი-
ოჟას გამოჩენამდე კი ხან ვილაც მფრინავი მოიყვანა, ხან მაიმუნის სიფათიანი
ჩემპიონი მოჭიდავე, ხან ვილაც წიგნების გადამყიდველი, ვითომ ყველაფრის
მცოდნე ლაქლაქა მორფინისტი. ვლადის ეს ახალი ნაცნობი ისტორიკოსი აღ-
მოჩნდა. სწავლა ახალდამთავრებული ჰქონდა, რომელიღაც დაწესებულებაში
მუშაობდა რაღაც სხვა განხრით. როგორც ვლადიმ წარმოადგინა, ეს ახალ-
გაზრდა ისტორიკოსი ზვენიგოროდის რაიონის აბსოლუტური ჩემპიონი იყო
„ბაღდას“ თამაშსა და სიტყვების უკუღმა წარმოთქმაში.


მართლაც, ამ ჭაბუკმა პირველსავე საღამოს გააოცა ოლგა ვასილიევნა
თავისი შეუდარებელი ხელოვნებით. აღფრთოვანებული ვლადი სიტყვებს
აწვდიდა: „სასადილო“, სტუმარი კი წამსვე პასუხობდა: „ოლიდასას“, „პორ-
თფელი“, იძახდა ვლადი, „ილეფთროპ“, ისმოდა მაშინვე. „მანქანათმშენებ-
ლობა“, მაცდურად სთავაზობდა ვლადი და, მეგობრის შეუმცდარი პასუხით
დაიმედებული, გულში ფარულად ზეიმობდა. სტუმარი თითქოს წამით შე-
ყოვნდა, მაგრამ არა. „აბოლბენეშმთანაქნამ“, — მოისმა საჩქაროდ. „როგორ,
როგორ? — გაჰყვიროდა ვლადი, — გაიმეორე, გენაცვა! შემოწმებაა საჭი-
რო!“ — შეამოწმეს, ყველაფერი ზუსტად გამოვიდა, შთაბეჭდილება დიდზე
დიდი გახლდათ. აბა ვლადიმ ხომ მთლად ცაში აიყვანა: „რა სათქმელია: გენი-
ოსია! ნაღდი გენიოსი...“ მაშინ სერიოჟა ხმელ-ხმელი, ქოჩორა, ტანადი ყმა-

წვილი იყო. მხიარულად და უცნაურად ლაპარაკობდა. ოლგა ვასილიევნას არც ერთ ნაცნობს არ ჰგავდა. ქალს გული აუჩქროლდა და მღელვარების დასაფარავად მანაც მიაწოდა სიტყვა „გამოხედვა!“, „ო, ეს ძალიან ძნელია!“ — დაიძახა ვლადიმ. სტუმარმა ქალს წამით თვალი შეავლო, თითქოს ვლადის ეთანხმება, მართლა ძნელი სიტყვააო, და ჩუმად, მაგრამ მტკიცედ წარმოთქვა: „ავდებომაგ...“

იღუმალი სიტყვა ისარივით მოხვდა ქალის გულს. იქნებ სულაც ცხოვრების გამსაზღვრელი პაროლი იყო ეს არსად თქმული, არსად გაგონილი, უცნაური სიტყვა — „ავდებომაგ“, ანარეკლი იმ სხვა, ჭეშმარიტი სიტყვისა, მას ასე უსაზომოდ რომ სწამდა — „გამოხედვა“. სწორედ ეს თამაში, ეს სასაცილო, შემთხვევითი გაცნობა, ეს უცნაური საუბარი, როცა შპროტსა და არაყს მიერთმევდნენ, სამუდამოდ ჩაეჭვდა მეხსიერებაში, რადგან სწორედ მაშინ აიტანა ოლგა ვასილიევნა შინაგანმა შეშფოთებამ, ბედის შეტრიალების წინათგრძნობამ. და იყო კიდევ: გაზაფხულის დასაწყისი, ის მღელვარე, ისევე გამოუცნობი ხანა, ვით სიტყვა „ავდებომაგ“, როცა ირგვლივ ყველა სუნთქვა-შეკრული ელის რაღაცას, ყველა ვარაუდშია, ჩურჩულებენ, კამათობენ.

დედას პირველივე საღამოს არ მოეწონა სიტყვების უკუღმა წარმომთქმელი, არ მოეწონა იმიტომ, რომ სერიოჟა მაშინვე არაყის მოსატანად გაიქცა. მერე, უფრო ახლოს გაცნობის შემდეგ, ოლგა ვასილიევნა მიხვდა, რომ არაყის მოსატანად გავარდნა მეტისმეტი მორცხვობით იყო გამოწვეული. ახირებული საქციელისაკენ რომ უბიძგებს ხოლმე ადამიანს, და არა სპირტიანი სასმელის სიყვარულით. დედამ დიდხანს ვერ დაივიწყა სერიოჟას faux pas. „ხომ გახსოვს, პირველსავე საღამოს არაყზე რომ გაიქცა?“ — ეტყოდა ხოლმე სიძის რაიმე საქციელით უკმაყოფილო. არსში ჩაწვდომის დიდად მოსურნე დედა ვერა და ვერ მიხვდა, რომ ეს სასაცილო საქციელი სულაც არ გამოხატავდა ადამიანის ბუნებას. დედას მტკიცედ სწამდა, რომ სხვა თაყვანისმცემლებზე მეტად მის ქალიშვილს ვლადი შეეფერებოდა: სწორედ ეს გახლდათ თავი და თავი. საწყალმა დედამ, შვილისადმი უზომო სიყვარულის მიუხედავად, მაინც ვერ მოახერხა დაეძლია მისთვის დამახასიათებელი გულუბრყვილო თავკერძობა — გულუბრყვილო იმიტომ, რომ აროდეს აზრადაც არ მოსვლია თავისი საქციელი ოდნავ მაინც თავკერძობად მიეჩნია. პირიქით, დედას ყოველთვის ეგონა, რომ მუდამ სხვებისთვის ცხოვრობდა, და თითქოს ასეც იყო. თუმცა კარგად თუ ჩაუკვირდებოდი, ეს „სხვები“ მხოლოდ ერთი კაცი, გიორგი მაქსიმოვიჩი გახლდათ. დედას ეგონა, ქალიშვილის ბედზე ვზრუნავო. როცა არწმუნებდა, სხვებს ვლადი ჯობია. უკეთესი ქმარი იქნებაო. სინამდვილეში კი თავის თავზე ზრუნავდა. ვლადი თვითონ მას ერჩია. დედას არ მოეწონა სერიოჟა, არც სიტყვების უკუღმა ტრიალი, არც ის, სერიოჟამ ვლადისთან ერთად ფსიქიატრიულ საავადმყოფოში წასვლის ამბავი რომ მოჰყვა. სერიოჟა კი ჭეშმარიტად გენიალურად ჰყვებოდა. სახელოსნოდან ჩაის დასალევად გამოსული გიორგი მაქსიმოვიჩიც დაბღვერილი იცქირებოდა.

დედისა და გიორგი მაქსიმოვიჩის ურთიერთობა ყოველთვის გასაოცრად თანხმიერი იყო. დედა მსჯელობდა. გიორგი მაქსიმოვიჩი კი დასტურის ნიშნად თავს აკანტურებდა და მოკლე-მოკლედ ურთავდა: „სწორედ რომ მასეა“. ანდა „ვფიქრობ, მართალი ხარ“. ოლგა ვასილიევნას მამა დიდი ხნის წინ მოუკვდა, მაშინ იგი ექვსი წლისა იყო. გიორგი მაქსიმოვიჩი დედამ ევაკუაციაში ყოფნი-



სას გაიცნო, ერთ ქარხანაში მოხვდნენ: დედა საგეგმო განყოფილებაში მუშაობდა, გიორგი მაქსიმოვიჩი — კლუბის მხატვრად. იგი მხატვარი იყო, რეჟოლუციამდე ვიღაც სახელგანთქმულ ბერძენთან სწავლობდა, იყო საზღვარგარეთ, გამოფენებში არაერთხელ მიუღია მონაწილეობა, მაგრამ მერე რატომღაც, შეუტეეს, გააკრიტიკეს, ახლებურად აღზრდა დაუპირეს, ჩრდილში მოაქციეს. ისიც თანდათანობით ჩაქრა, მოტყდა. ჰოდა, ეს მხატვარი კაცი გუდამშიერ თხუპნიად იქცა, ლუკმაპურს ლოზუნგებისა და პლაკატების ხატვით შოულობდა. მაგრამ შემდეგ, როცა ახალი ოჯახით, ცოლითა და ოლგა ვასილიევნათი მოსკოვში დაბრუნდა, მხატვართა სახლში ოთახი და სახელოსნო მისცეს, შეამჩნიეს, აღიარეს, როგორც მხატვარი. გაზეთების ფურცლებზე უკვე ხშირად იხსენიებდნენ, დაუდეს ხელშეკრულებები, მისცეს შეკვეთები. როგორც შემდეგ გამოირკვა, ევაკუაციაში ყოფნისას დრო უქმად არ დაუხარჯავს, თავაუწევლად, ვირივით ემუშავა. გიორგი მაქსიმოვიჩის საყვარელი მწერლის რენარის თქმისა არ იყოს — ხელოვნებას ვირივით შრომა ქმნისო. მანაც მთელი გალერეა შექმნა ზურგის მშრომელთა „ურალის ფოლადის“ სახელწოდებით. ეს ნახატები მრავალჯერ გამოფინეს, დაიბეჭდა მათი სურათებიც, საფოსტო მარკებადაც გამოუშვეს. გიორგი მაქსიმოვიჩს თავისებური აღორძინების ხანა დაუდგა, მეორე ახალგაზრდობა ანუ, როგორც თვითონ ამბობდა, „გაფურჩქვნის ხანა“. ყველაფერი დიდებულად იქნებოდა, რომ სწორედ მაშინ, ორმოციანი წლების დასასრულს ავადმყოფობას არ შემოეტია. ჯერ თავის ტკივილები აწუხებდა, მერე თვალეზმაც უღალატა. აუკრძალეს მუშაობა, დადიოდა სანატორიუმებში, ბოლოს გულის შეტევები დაეწყო და, სერიოჟას გამოჩენამდე ცოტა ხნით ადრე, ინფარქტიც მოუვიდა. რამდენი წლისა იყო მაშინ? კარგა გვარიანი ხნის. დედა ჩვიდმეტი წლით უმცროსი გახლდათ. სერიოჟას გამოჩენის დროისათვის დედა ორმოცდასამი წლისა შესრულდა. ესე იგი გიორგი მაქსიმოვიჩი სამოცი წლის კაცი იყო.

ჯერ კიდევ გამართული დადიოდა, შეხვედრისას ხელს ღონივრად ართმევდა ხალხს. ჩვეულებად ჰქონდა: ახალგაცნობილს ჯიუტად დაკვირვებოდა, უბოდიშოდ აეხედ-დაეხედა. ახალგაცნობილთ კი ასეთი მოქცევა ეჩოთირებოდათ. მერე სერიოჟაც გამოტყდა, გიორგი მაქსიმოვიჩთან პირველმა შეხვედრამ, ცოტა არ იყოს, შემაცბუნაო.

— ისე მიყურებდა, თითქოს რაღაცა მომეპაროს.

გიორგი მაქსიმოვიჩს კიდევ ერთი სხვა ჩვეულებაც ჰქონდა: ახალგაცნობილს ძირისძირობამდე რომ შეისწავლიდა, განუცხადებდა, „მეტად საინტერესო სახე გაქვთ“ და, მაშასადამე, „მეტად საინტერესო“ დასახატიო. ეს იყო სხვა ადამიანებზე მალლა მდგარი ხელოვანის მფარველური კილო და ყველასათვის სასიამოვნო უწყინარი პირფერობა. სერიოჟასათვის გიორგი მაქსიმოვიჩს ასეთი რამ არ უთქვამს. დაძაბულობა პირველივე წუთებიდან იგრძნობოდა. კაცმა რომ თქვას, გიორგი მაქსიმოვიჩი აქ დამოუკიდებლად როდი მოქმედებდა, მგრძნობიარე მემბრანასავით იჭერდა ხოლმე, დედა რა განწყობილებაზე იყო. დიახ, ისინი მართლაც მშვენივრად ეწყობოდნენ ერთმანეთს. ჰოდა, ძალიანაც კარგი! მადლობა ღმერთს, ოლგა ვასილიევნა არ ეჭვიანობდა, მამა ლანდად ახსოვდა. გიორგი მაქსიმოვიჩი დედას კარგად ექცეოდა, ეტყობა, უყვარდა კიდევ. საწყალი დედა ხომ ლამის აღმერთებდა. წლების განმავლობაში ჩამოუყალიბდათ ერთნაირი გემოვნება, ერთნაირი შეხედულებანი

ადამიანებზე, მხატვრობაზე, წიგნებზე, ფულზე, ყველაფერზე. დედა ეყოფა ვად ჩაფლული იყო ქმრის საქმიანობასა თუ მოვლა-პატრონობაში. ცხოვრებისათვის უბრალოდ აღარ ეცალა. ირინკა რომ დაიბადა, პირველ ხანებში ლამის გაიგლიჯა ქმარსა და შვილიშვილს შორის. უნდოდა ორივესთან ყოფილიყო, ორთავეს გამოდგომოდა, მაგრამ ძალა აღარ ეყო და ადგილი მეორე ბებიას დაუთმო. ოლგა ვასილიევნამაც შეუხნდო. ერთხანს დედასთან და გიორგი მაქსიმოვიჩთან ერთად სუშჩევსკაიაზე ცხოვრობდა, სადაც გიორგი მაქსიმოვიჩს მეზობლებთან ზიარი ბინა და სახელოსნო ჰქონდა. მერე დედამთილს დიდი მწუხარება დაატყდა თავს — მოუკვდა გამორჩევით საყვარელი, გაუთხოვარი, ავადმყოფი, ბედისგან გაუხარელი ქალიშვილი. ჰოდა, აი, შაბოლოვკაზე დედამთილის ოროთახიან ბინაში გადმოსვლა გადაწყვიტეს. ამ ბინაში გაატარა სერიოჟამ ბავშვობა. მისთვის აქ ყველაფერი ახლობელი და საყვარელი იყო. ოლგა ვასილიევნამ გადმოსვლისთანავე იგრძნო, რომ დედამთილთან სიამტკბილობით ვერ იცხოვრებდა, მაგრამ რა ექნა, როცა სერიოჟას ძალიან უნდოდა ეს ამბავი და დედაბერსაც — თუმცა დედაბრობა რა სახსენებელია, მაშინ იგი ქოთქოთა, ფუსფუსა, ხანში შესული ქალი იყო. ამიტომ უნდა დაჰყოლოდა მგლოვიარე დედის სურვილს, შვილიშვილით მაინც გაეხარებინა. მძიმე იყო საკუთარ დედასთან დაშორება, მაგრამ სხვა არა ეწყობოდა რა. მოხდა ისე, როგორც უნდა მომხდარიყო. ყველაფერი კი სწორედ იმ საღამოდან დაიწყო, როცა ოლგა ვასილიევნას ეს თმაგაჩეჩილი ყმაწვილი გამოეცხადა და სიტყვების უკუღმა ტრიალითა და ოხუნჯობით მოხიბლა.

მერე იყო გაზაფხული, ეზოები, ჭიშკრები, სადარბაზოები, კაფეები. ვლადი ვერაფერს ხვდებოდა. შემდეგ დადგა ზაფხული. უნდა ეშოვათ ფული. და ჰა, სამხრეთისაკენ მიმავალი მატარებელი, სიცხე, თავისუფლება. ისინი ოთხნი იყვნენ: ოლგა ვასილიევნა, მისი მაშინდელი, მერე კი უკვალოდ გამქრალი მეგობარი რიტა, ვლადი და სერიოჟა. ვლადის ჰყავდა ნაცნობი, უფრო სწორად, ეს კაცი მამამისის, სამედიცინო სამსახურის გენერლის ნაცნობი იყო. იმ კაცს გაგრაში საკუთარი სახლი ჰქონდა. ის შეპირდა, ოთახებს დაგიქირავენთო, ერთს ოლგა ვასილიევნასათვისა და რიტასათვის, მეორეს კი — სერიოჟასა და ვლადისათვის. რატომღაც ამ კეთილი ნაცნობის სახლში ცხოვრება არ შეიძლებოდა. ზაფხულის პაპანაქება იდგა. გაგრაში საოცრად ცხელოდა.

მაგრამ აღმოჩნდა, რომ ვლადის ნაცნობს, ახლა აღარ ახსოვს, პორტუგალი ნიკოლაევიჩი ერქვა იმ კაცს თუ პარფენ მიხაილოვიჩი, რატომღაც ერთი ოთახი დაექირავენინა. ეს უცნაური, ახლა უკვე პენსიონერი კაცი ერთ ღროს თურმე მოსკოვში მუშაობდა საკმაოდ პასუხსაგებ თანამდებობაზე, ახლა კი გაგრაში ცხოვრობდა განცალკევებით მდგარ საკუთარ სახლში. დაქირავებული ოთახი ზღვიდან ძალიან შორს იყო და საკმაოდ ცუდიც გამოდგა. ეტყობა. მასაც ეუხერხულა და ახალგაზრდებს საკუთარ ბაღში მდგარი ქოხი შესთავაზა. ნაქირავენ ოთახში ბიჭები მოთავსდნენ, გოგოებმა კი იმ კაცის ეზოში ზედ ზღვის პირას მდგარი ქოხი აირჩიეს. ეს იყო ფაცხის მაგარი ნაგებობა ანუ, როგორც ახლა ეძახიან, „ბუნგალო“. პირველად ყველაფერი აღფრთოვანებას ჰგვრიდათ, მაგრამ შემდეგ უკვე ისე აღარ მოსწონდათ: წყალი და საპირფარეშო დიდ სახლში იყო და იქ მისასვლელად მთელი ბაღი უნდა გაევლოთ. გარდა ამისა, სახლის მდგმურები, ნათესავები, ახლობლები თუ პორტუგალი მიხაილოვიჩის შორეული ნაცნობები, საკუთარი მანქანებით რომ სულ ახალ-ახალ

ჯგუფებად მოედინებოდნენ, მეტად დამღლეულ, ხმაურიან ცხოვრებას ეწეოდნენ. ყოველ ცისმარე დღეს სვამდნენ, ქეიფობდნენ, ხმამალა მღეროდნენ, აყვირებდნენ რადიოლას, ცეკვავდნენ ვერანდაზე, ბაღში აშიშინებდნენ მწვადებს, საღამოობით ჯგროდ ჩადიოდნენ ზღვაზე საბანაოდ. სახლი ზღვის პირას იდგა და ჭიშკრიდან პირდაპირი ბილიკით ჩადიოდნენ რიყე სანაპიროზე.

პორფირ ნიკოლაევიჩის მომღვინი. მხიარული საზოგადოება სუფრასთან ხშირად იპატიჟებდა სერიოჟას, ვლადის და გოგოებს. ბიჭებს თავპატიჟი არ დაუწყიათ, რადგან ფული გამოზომილი ჰქონდათ. გაგრაში ყველაფერს ცეცხლის ფასი ედო და არც არაფერი იშოვებოდა. იქ კი გულუხვად მასპინძლობდნენ. ხვანჭკარა და ჭაჭის არაყი რამდენიც გინდოდა. ჰოდა, მოსკოვში სიმარტოვით თავმოებურებული ეს შეუხედავი ეშმაკი რიტა იმ, ცოტა არ იყოს, საშიშ, მაგრამ მომაჯადოებელ მორევისკენ ილტვოდა.

ოლგა ვასილიევნამ კი მტკიცედ გადაწყვიტა: „არა“. ღამღამობით ბაღში მოხეტიალეთა შორის ბევრი თავხედიც ერია. ერთი-ორჯერ შუალამისას ვილაცამ ქოხში შემოჭრაც კი სცადა. კარს ეჯაჯგურებოდა. თავქარიანი რიტა ხითხითებდა. ოლგა ვასილიევნა მიხვდა, რომ რიტასათვის არ იწუხებდნენ თავს. „ჰეი, ამაყო ქალიშვილო! — ყვიროდნენ გარედან, — წამოდი ჩვენთან ერთად საბანაოდ!“ განრისხებული ოლგა ვასილიევნა მილიციით ემუქრებოდა იმ თავხედებს.

დილით ეს ამბავი ვლადს შესჩივლა. ვლადიც მაშინვე სახლის პატრონთან გაიქცა და დიასახლისი მოიყვანა. პორფირი ნიკოლაევიჩის ცოლი ტანადი, თმაჭალარა, თეთრკაბიანი ქალი იყო. თითებზე თუ ყურებში ოქრო უბრწყინავდა, სიცილის დროს დიდი პირიდანაც ოქროს ბზინვარება გამოკრთოდა: „გოგონებო, გთხოვთ შეუნდოთ ამ ჩემს ხულიგნებს. ხომ იცით, სამხრეთელები არიან, სისხლში მზე უღულთ... მზე კი ადამიანებს გონებას აკარგვინებს...“

სერიოჟა ღმერთივით ცურავდა, ყვინთავდა, ხტებოდა კოშკურიდან. ის და რიტა შორს, ტივტივას იქით მიდიოდნენ, ოლგა ვასილიევნა და ვლადი კი იქვე, ნაპირთან ჭყუმპალაობდნენ. ცხოვრებისეულ საქმეებში, ადამიანებთან ურთიერთობაში ყოველად მოუქნელი და მორცხვი სერიოჟა დიდი ფიზიკური გამბედაობის ყმაწვილი იყო. მაგრამ იმის კითხვა კი, თუ რამდენი უნდა გადაეხადათ ქოხის ქირა, ან იმის თქმა, გოგოებს თქვენი სახლის ბინადარნი წყალს ხუ უკეტავენო — ვერა და ვერ გაებედა, განაწყენებას ერიდებოდა. დღესხვალებობით იძვრენდა თავს. აი, სტუმრებთან ვერანდაზე ჯდომასა და ხვანჭკარის გადაკვრაზე კი უარს არ იყო. ოლგა ვასილიევნა სინანულით ამჩნევდა სერიოჟას ამ მერყევ, არამამაკაცურ თვისებებს, თუმცა ამავე დროს სერიოჟას შეეძლო პლაჟზე ყოველგვარ ჩხუბსა და აყალმაყალში ჩარეულიყო; ვითომდა აქაც არაფერიო, ისე გადმომხტარიყო ცხრამეტრიან კოშკურიდან. ოლგა ვასილიევნასათვის თანდათანობით ცხადი გახდა, რომ გაება, გაება ისე, როგორც არასოდეს. აღარ იყო სხვა ცხოვრება, გაქრა ყველა სხვა ფიქრი და აზრი. გავიდა მხოლოდ რამდენიმე დღე — თითქოს რა უნდა შეცვლილიყო? ქალს კი ყველაფერი შეცვლილად ეჩვენებოდა: ზეცის ფერი, ზღვის სურნელება, მწვადის გემო. რაღაც დაემართა, რაღაც ისარი შეერხა სულის სიდრმეში, ყველაფერი უცნაური სისწრაფით დატრიალდა. გაუჩნდა მეტად ამაღელვებელი, სრულიად ახალი გრძნობა, გულზე დააწვა უცხო სიმძიმე. მაგალითად: უკვე ველარ იტანდა, როცა სერიოჟა პორფირის სახლში შედიოდა და იქ დიდხანს

რჩებოდა. თითქოს რა იყო ასაღვლებელი, — არაფერი. ის კი იტანჯებოდა: რატომ არის იქ? ვისთან არის? ვისი სიცილი ისმის ვერანდიდან? მამაკაცების სიცილი ქალების სიცილზე ნაკლებად როდი ხვდებოდა გულზე, ერთნაირად აღიზიანებდა. მაშასადამე, იქ უფრო მოსწონს, იქ ურჩევნია, ვიდრე აქ, მასთან. ეს იყო უცნაური წამება, გონებისგან განცალკევებული, მხოლოდ ზეშთაგონებას მორჩილი. ის ხომ ქმარი არ იყო, არც არავითარი სიახლოვე ჰქონიათ ჯერ. ეს ყველაფერი მხოლოდ მერმე უნდა მომხდარიყო, მხოლოდ ფარულად ოცნებობდა ამაზე, მაგრამ ისეთი გრძნობა, ისეთი ტკივილი ტანჯავდა, თითქოს უკვე ყველაფერი მოხდა. ერთხელ თავი ვერ შეიკავა და სერიოჟას გამოსაძახებლად ვერანდაზე ავიდა. სერიოჟამ ჭადრაკი იქ წაიღო, მათ კი პლაჟზე ჩასვლა დააპირეს და თამაში უნდოდათ. ოლგა ვასილიევნა ჭადრაკის თამაშს სწავლობდა. უნდოდა ყველაფერი სცოდნოდა, რასაც სერიოჟა აკეთებდა. ის კი არა, შიშიც კი დასძლია და სამმეტრიან კოშკურიდან გადმოხტა. ჰოდა, როცა იმ სახლის მინიანი კარი შეაღო, უხვად გაწყობილი მაგიდის ირგვლივ შემომსხდარი რამდენიმე ქალი და კაცი დაინახა. ყველა სერიოჟას მიჩერებოდა. ისიც ცოტა განზე, გამოსაჩენ ადგილს დამდგარიყო და ვიღაცას აჯავრებდა. ეს გამოჯავრება სერიოჟას მართლაც ბრწყინვალედ გამოსდიოდა, განსაკუთრებით „ძველი მეაფთიაქე“ და „დინამოს გულშემატკივარი“; საერთოდ სერიოჟა მრავალმხრივი ნიჭის მქონე გახლდათ. ხატავდა, შესანიშნავად მღეროდა, გიტარაზე დაკვრაც თვითონ, დამოუკიდებლად ისწავლა.

მაშინ კი, ვერანდაზე ოლგა ვასილიევნამ საშინელი ზიზღი იგრძნო, ლამის გული აერია — შეეზიზღა სერიოჟაც და მას მიშტერებული ეს კეთილად მომღიძარე, გამომთვრალი, მხიარული ადამიანები. რა ძალიან გაბრაზდა. სხვები კი ტაშს უკრავდნენ, ყვიროდნენ: „ალავერდს შენთან გადმოვდივარ, სერგო!“ უჯახუნებდნენ ჭიქებს, ქალმა კი ბრაზიანად უთხრა:

— ახლა დააბრუნე რომელიმე სიტყვა უკუღმა, მაგალითად, პამპულა, და დაემშვიდობე. ჩვენ პლაჟზე გველოდებიან.

გაოცებულმა სერიოჟამ წვრილი ცისფერი თვალები ოლგა ვასილიევნას მიაშტერა, პირიც კი გააღო რალაცის სათქმელად. ღმერთმა უწყის, შეპასუხება სურდა თუ მართლა „პამპულა“ უნდა წარმოეთქვა უკუღმა. მაგრამ ქალმა ხელი ჩაჰკიდა და ისიც უსიტყვოდ დაემორჩილა. სერიოჟა და ოლგა ვასილიევნა ოთახიდან გავიდნენ.

პლაჟისკენ მიმავალ გზაზე შეგონებებით გამოუჭედა ყური. სერიოჟა ღუმდა, ქალს სიამოვნებდა ეს ღუმილი და ლამის დედური სიმკაცრით კიცხავდა:

— გაიგე, სირცხვილია, საზიზღრობაა, საკუთარ თავს იმცირებ. იმ მთვრალი სიფათების გამრთობი მასხარა იყავი და მეტი არაფერი. ეს ინტელიგენტი კაცი აცინებდი, ართობდი იმ ვაჟბატონებს, იმ ყალთაბანდებს.

სერიოჟამ საკმაოდ უწყინრად სცადა თავის დაცვა:

— შენ მეტისმეტი მაქსიმალისტი ხარ... იცოდე, მაქსიმალიზმი კარგს არაფერს მოგიტანს, მითქვამს, როგორც ისტორიკოსს...

სერიოჟას თითქოს მოსწონდა კიდევ ქალის საქციელი: ისიც, ხელჩაკიდებული რომ მიჰყავდა, ისიც, მის მაგივრად შეურაცხყოფილად რომ იგრძნო თავი. ვინ იცის, იქნებ სწორედ მაშინ ჩამოუყალიბდა ქალს გონებაში მათ დამოკიდებულებაზე ის წარმოდგენა, მრავალი წლის განმავლობაში ერთადერთ



ბედნიერებად რომ თვლიდა და რისკენაც მთელი ძალით ისწრაფოდა. ვიშნაკ სერიოჟას კი ისე ეჭირა თავი, თითქოს მართლა ემორჩილებოდა, სინამდვილეში მეტად შორი და გულგრილი იყო. პლაჟზე ცხარე კამათი გაჩაღდა. ვლადიმ ქალის საყვედურებს მოჰკრა ყური და ამხანაგის დასაცავად თავი გამოიღო: „შენ არ გესმის აქაური ადათ-წესი. აქ ვერ გააწბილებ, როცა გპატიუებენ“.

გულში უკვე განაწყენებული რიტა რა ხანია გრძნობდა, რომ არც ვლადის და არც სერიოჟას იგი არაფრად ეპიტნავებოდა და ამიტომაც თანდათან ოლგა ვასილიევნას სიძულვილი შეეპარა. ოლგას საწინააღმდეგოდ ამკარად, ხმამაღლა გამოაცხადა: ოლგამ ასე იცის საერთოდ, ბუზს აქლემად გადააქცევს, რაც შეეხება პორფირის და მის სტუმრებს, ჩემი აზრით, ფრიად კეთილი, უბრალო ადამიანები არიან და სიძულვილს სულაც არ იმსახურებენ... რა საჭიროა ამპარტავნობა... ღმერთო ჩემო, რა მოხელე ხალხია? ან საიდან აქვთ ასეთი ზღაპრული მასპინძლობის საშუალება? ეს რა ჩვენი საქმეა. საერთოდაც უხერხულია სხვის ჯიბეში ფულების თვლა, ეს ულამაზო საქციელია. თაღლითები კი არ არიან. ასე რომ იყოს, ციხეში იქნებოდნენ გამომწყვდეულნი, ისინი კი ღმერთივით ცხოვრობენ. ასე მსჯელობდა ეს სულელი გოგო, ვინც ოლგა ვასილიევნამ რატომღაც ცოტა ხნით დაიახლოვა.

რიტა ხმელ-ხმელი, წითური, ქერათმიანი გოგო იყო. ცისფერი თვალები, თეთრი, ჭორფლიანი პირისახე და წვეტიანი ცხვირი ჰქონდა. თავი ულამაზეს ქალად მიაჩნდა. წელთა სვლაც ვერ უქარწყლებდა გაოცებას: რატომ ვერაგინ ამჩნევსო ჩემს სილამაზეს?

უცნაური კი იყო ამ ოთხის ერთად ცხოვრება. ყველგან ერთად დადიოდნენ: ბაზარში, კინოში, კვამლიან სახაჭაპურეში, სადაც წვრილთავა სქელ-სქელი დათიკო მაჭრითა და მსუყე ხაჭაპურებით უმასპინძლებოდათ. აქ, ამ ზღვისპირა მთავარ ქუჩაზე ირეოდა ადამიანების თეთრი ჯგრო. სალამობით ჩოგბურთის კორტს ეწვეოდნენ ხოლმე, სადაც ჩინებული ოსტატები თამაშობდნენ, სერიოჟა და ვლადი ხარბი თვალებით შესცქეროდნენ იმათ თამაშს. ბოლოს მათაც მისცეს ხტუნვის უფლება. ისინი მხოლოდ ახლა სწავლობდნენ თამაშს. მწვრთნელი ოტო იანოვიჩი მითითებებს იძლეოდა.

ვლადი უნიჭო გამოდგა. სერიოჟას კი ძალიან კარგად, მარჯვედ გამოსდიოდა. სულ უკეთ და უკეთ თამაშობდა, შეეძლო ნამდვილი ჩოგბურთელი დამდგარიყო. მისი ნიჭის პატრონს რა არ შეეძლო გამხდარიყო: მოცურავე, მუსიკოსი, მხატვარი, ფიზიკოსი. ოტო იანოვიჩიც ამბობდა, „შესანიშნავი ნახტომი აქვსო“, მაგრამ მათ არც ჩოგნები ჰქონდათ და არც ბურთები. ყველაფერი ძალიან ძვირი ღირდა. უკან დასაბრუნებელ გზის ფულს ზოგავდნენ. ოლგა და რიტა ალვის ხეების ჩრდილში გრძელ სკამებზე ისხდნენ და იქედან შესცქეროდნენ მოთამაშეებს. უყურებდა ოლგა თეთრქუდიან, პერანგისამარა სერიოჟას, მის მზემოკიდებულ, გამხდარ სახეს, წინდებწამოცმულ ოდნავ მსხვილ ფეხებს და გული რატომღაც ბედნიერად უცემდა. ეს ნაქსოვი წინდები სერიოჟამ მოსკოვიდან საგანგებოდ წამოიღო, ფრენბურთის თამაშის დროს კედლებზე ჩავიცვამო. არ იცოდა, ჩოგბურთის თამაში თუ მოუწევდა. ფრენბურთს კი ჭეშმარიტად კარგად თამაშობდა. ოლგა ტკბებოდა სერიოჟას ცქერით, გრძნობდა, როდის იყო იგი ადგზნებული თუ დაძაბული, გახარებული თუ გულნატყენი. სერიოჟა კი ვერ ხედავდა მას. ერთხელ ოტო იანოვიჩმა, ამ წვეროსანმა

ქონდრისკაცმა ოლგა ვასილიევნას შეუმჩნევლად წერილი შეაჩვენა. მანაც წერილი რიტასგან მალულად წაიკითხა: „მობრძანდით ხვალ დილის ცხრა საათზე. მე სრულიად უსასყიდლოდ გამეცადინებთ, რამდენ ხანსაც ისურვებთ“. ქონდრისკაცი კი საათში კაი გვარიან ფულს იღებდა და, როგორც ამბობდნენ, მდიდარი კაციც იყო. ოლგა ვასილიევნამ გაუცინა და თავი გააქნია. დიდი წყენის ნიშნად ოტო იანოვიჩი საოცრად დაიძანჭა. ოჰ, მაინც რამდენი გამოუჩნდა იმ ზაფხულს ასე უფასოდ, უსასყიდლოდ, დროის დაუზოგავად სწავლების მსურველი!

დიახ, მაშინ მართლაც კარგი სანახავი იყო. მკვრივი, მოქნილი, მოხდენილი ტანი ჰქონდა. მართალია, ცურვა არ იცოდა, მაგრამ ქურციკივით მსუბუქად დარბოდა, თამაშობდა ფრენბურთს, ვარჯიშობდა. აბა ახლა სინჯე, თუ ქალი ხარ! მაშინ კი ვითომც არაფერიო, ისე თავისუფლად გამოსდიოდა ყველაფერი, თუნდაც ათჯერ ზედიზედ ერთიმეორის მიყოლებით. პლაჟზე მამაკაცებს თვალები ებრიცებოდათ. იმ წლებში საოცრად ჩქარა და თანაბრად ეკიდებოდა მზე, შემდეგ რატომღაც დაჰკარგა ეს უნარი. საათობით იწვა თაკარა მზეზე, არ უფრთხილდებოდა გულს, რა სულელი იყო! მაშინდელი მოდის მიხედვით მხრებამდე სცემდა ჩამოშლილი თმა. „მედუზის თავი გაქვსო“, ეუბნებოდა სერიოჟა. ნამდვილად ძალიან უხდებოდა გრუზა, ფაფუკი, ქერა თმის ტევრი, გაშლილ-გადატკეცილი მრგვალი შუბლი. ალბათ ის წელი ყველაზე უკეთესი იყო მთელ მის ცხოვრებაში, მისი გაფურჩქვნის წელი. ამას მამაკაცების გამოხედვაზეც ატყობდა. მისი მზირალი კავკასიელები მოურიღებლად აწკლავუნებდნენ ხოლმე პირს, როცა კი წყლიდან ამოვიდოდა. უსინდისოდ დასდევდნენ, ძალად ეკიდებოდნენ მეგობრად, სთხოვდნენ, კინოში გამოგვეყვი, ჩვენთან ითამაშეო ფრენბურთი. სერიოჟა და ვლადი ერთთავად ჩხუბის მოლოდინში იყვნენ.

გაიცნეს ვიღაც ლენინგრადელები, ვიღაც კაპიტანი, პორტირის სტუმარი, გვარად ცნაკისი, მზეზე შავად გახუხული ესტრადის მსახიობები. ერთ-ერთ მათგანს სერიოჟა ეჩხუბა კიდევ. რეზინის გასაბერი დელფინი უთავაზა და, მგონი, კანი გაუფხაჭნა. ჰოდა, ატყდა ერთი ალიაქოთი, მოვარდა მილიცია. სერიოჟა ისევ პორტირმა იხსნა. იყო კიდევ პორტირის ერთ-ერთი სტუმარი, წენგოსფერი, ხანში შესული, სასაცილო კაცუნა. იგი ერთდროულად რიტასაც ეარშიყებოდა და ოლგა ვასილიევნასაც. ეს საოცრად თავაზიანი კაცი დილდობით თვითონ დადიოდა ბაზარში, მოჰქონდა მწვანილი, მაწონი, ხილი. სერიოჟასა და ვლადის მამაშვილურად ექცეოდა. ეტყობოდა, იმათ საშიშ მეტოქეებად არ თვლიდა. მიუჯდებოდა ქალებს პლაჟზე და თავისი მოსაწყენი საუბრით გულს უწვრილებდა. აღარ იცოდნენ, როგორ მოეშორებინათ, ნამეტნავად ზრდილი და თავაზიანი გახლდათ. ერთხელ ამ კაცმა დიდად საიდუმლოდ რიტას სამედიცინო მოწმობა უჩვენა, თან ფიცი ჩამოართვა, არ გამამხილოო. მოწმობა მკითხველს ამცნობდა, რომ ესა და ეს კაცი იყო ნორმალური სქესობრივი პოტენციისა, მაგრამ დაკარგული ჰქონდა გამრავლების უნარი, ამ მოწმობას პოლიკლინიკის მთავარი ექიმი ადასტურებდა. რიტამ, რა თქმა უნდა, საიდუმლო არ შეუხანა, ახალი ამბავი ყველას უამბო. იყო ერთი სიცილი და ხარხარი. წენგოსფერი კაცი იმდღიდან სადღაც გაქრა, უკვალოდ გადაიკარგა.

სერიოჟა ოლგა ვასილიევნას ცურვას ასწავლიდა და ორივეს ძალიანაც



მოსწონდა გაკვეთილები. მოსაწყენიც იქნებოდა, მასაც რომ სერიოზოსავე სცოდნოდა ცურვა. ვაჟს ხელებზე ეწვინა ქალი. ოლგა ფართხალებდა, კისერზე ეკიდებოდა, ხარხარებდა, იძირებოდა, შხეფებისგან თვალთ უბნელდებოდა და მაინც ყოველთვის გრძნობდა ვაჟის ხელებს, წყალში რომ ასე ემატებოდათ გაბედულება. ზღვაში უსათვალოდ შესული ბეცი ვლადი ერთთავად მათკენ იყურებოდა. უნდოდა გამოეცნო, რა ხდებოდა იქ, იმ ადგაფუნებულ წყალში, რას ყვიროდნენ. ზოგჯერ თვითონაც შეუთავაზებია:

— თუ გინდა, ახლა მე გასწავლი. იქნებ სერიოზოს მობეზრდა...

საწყალ ვლადს თვითონ უჭირდა ცურვა, მაგრამ იგი რაინდი გახლდათ. მას ატყუებდა სერიოზოს თითქოს გაბრაზებული, უხეში შეყვირება: „რა მიუხვედრელი ხარ, ქალაუ! ფეხები აი ასე, ბაყაყივით უნდა ამოძრაო!“ როგორ უყვარდა მაშინ ეს სიტყვა „ქალაუ“, გეგონებოდა, მთელი ცხოვრება ერთად გაეტარებინოთ. ამას მოჰყვა სხვა საალერსო სიტყვებიც, მაგალითად, „სპილო“, „სპილუკა“. ნაცნობებს უკვირდათ, ქალი ასეთ ულამაზო მიმართვას რომ არ თაკილობდა. ოლგას კი მოსწონდა: იცოდა, როდის, რა წუთებში, რით იყო გამოწვეული. ზოგჯერ ვლადიც მიცურდებოდა ხოლმე მათთან, ცდილობდა თავადაც ესწავლებინა. ისინიც იცინოდნენ, ხარხარებდნენ. მაინც რა სასაცილო ეჩვენებოდათ ყველაფერი! თავგამოდებულ ვლადის ლოყები ებერებოდა, ვერაფერს ვერა ხვდებოდა და ვერც იცილებდნენ. რიტა კი, რა თქმა უნდა, ყველაფერს ხვდებოდა და გულში ბრაზდებოდა. მისი აზრით, სერიოზო სამხრეთში მხოლოდ მისი გულისათვის იყო მოპატიჟებული და ყველაფერს, რაც ახლა მის თვალწინ ხდებოდა, ღალატად თვლიდა. სერიოზო და ოლგა თავად იყვნენ ერთმანეთის გართობის მხიარული წყარო. ყოველ სიტყვაზე, ყოველ სულელურ ბავშვურ ხუმრობაზე სიცილსა და ხარხარს სტეხდნენ.

ღამით რიტამ ჩხუბი წამოიწყო, ფანჯრის დაკეტვა მოითხოვა. ოლგა არ დათანხმდა, ცხელა, სული მეხუთებაო.

— მე კი მცივა! — ჯიუტად გაიძახოდა რიტა.

— რას ამბობ, დავიხუთებით.

— სწორედ რომ არა მსურს შენი წყალობით ფილტვების ანთება ავიკიდო!

— კი მაგრამ, როგორ დავიძინებთ?

— მშვენივრად დაიძინებ. შენი დარდი არა მაქვს...

ასე იკინკლავეს კარგა ხანს. რა თქმა უნდა, რიტამ თავისი გაიტანა: ფანჯარა დაკეტა. ოლგა ძლიერ და ბედნიერ არსებად თვლიდა თავს. რიტას გაბრაზება კი არ ცხრებოდა, ოლგას თავკერძობას საყვედურობდა:

— რა სულელი ვიყავი, შენთან წამოსვლას რომ დავთანხმდი! შენ მხოლოდ საკუთარ თავზე ფიქრობ. ათი დღეც კი აუტანელია შენთან ცხოვრება, წმინდაწყლის ეგოისტი ხარ.

ოლგა ისმენდა ამ დაუმსახურებელ საყვედურებს, მაგრამ არც გული მოსვლია და არც პასუხის გაცემა უცდია: გულის სიღრმეში ებრალებოდა კიდევ რიტა. თუმცა აბა რით უნდა დახმარებოდა? რა კარგი იქნებოდა, ვლადი მაინც რომ გაარშოყებოდა. მაგრამ ვლადი რიტას მხოლოდ ამხანაგურად ექცეოდა. ეს კი სულ სხვა რამ იყო.

— არ მესმის, რატომა ვარ ეგოისტი, — ღიმილით მიუგო ძილმორეულმა ოლგამ, — მოდი, დავიძინოთ, მეძინება.

— რა თქმა უნდა, გეძინება, რასაც შენ ხტუნავ, რასაც შენ ხარხარებ და ყვირი, — ბუზღუნებდა რიტა. — სწორედაც რომ ეგოისტი ხარ, განა ყველაფერს შენკენ არ მიითლი. სხვებზე არა ფიქრობ... ამაზე საშინლად ჩემ დღეში არ დამისვენია... ნამდვილი წამებაა... სატანჯველი.

ბოლოს ღრიალიც მორთო. ოღვა პორფირის სახლში წვეთებისათვის გაიქცა, წყალი მოიტანა, დააღვიძა ხალხი. რიტა იწვა, თავზე სველი ტილო ეფინა და საწყლად იხვეწებოდა, მოსკოვში გასამგზავრებელი ბილეთი მიშოვეთო. ლანძღავდა საკუთარ თავს, სწყევლიდა თავის ბედსა და იღბალს. ოღვა დასამშვიდებლად რაღაცას ჩმახავდა, გულში კი ფიქრობდა: ხვალ ისევ ვიცურავებთ ზღვაში... სხვისი ცრემლი თუ უბედობა ვერ ჩრდილავდა მის სიხარულს.

მერე რიტა ახალ გაგრაში ვიღაც ნაცნობ ქალს შეხვდა და მასთან გადასახლდა. დაინახეს კიდევ იმ სქელ-სქელ, არცთუ ახალგაზრდა, ქერა ქალთან მკლავგაყრით მიმავალი. გვერდით ორი პიუამოიანი მამაკაცი მოჰყვებოდათ. მაშინ სამხრეთში მამაკაცები ზოლებიანი პიუამოებით დასეირნობდნენ ქალაქში. ოთხივე ხმამაღლა ლაპარაკობდა. რიტამ წამით გამოიხედა, თავი ძლივს დააქნია და უცხოთაგანით ჩაუარა.


ახლა ქოხში მხოლოდ ოღვა დარჩა. მარტო წოლა ვერ იყო მაინცდამაინც სასიამოვნო. ჰოდა, ვერც დაიძინა, თითქმის გათენებამდე ფხიზლობდა, ესმოდა წყლის ტლაშუნი. ხან შიში აწამებდა, ხან სიხარული, ხანაც, ღმერთმა უწყის, რა. ვიღაცეები ბაღში მიმოდრიოდნენ, ჭრიჭინებდნენ ჭრიჭინობლები, გუდგუდებდა ავტომობილი. ჭიშკრიდან ვიღაცა მანქანით გავიდა. მაინც სად მიდიან ამ შუალამისას? — ფიქრობდა გუნებაში, — მედუქნესთან ღვინისათვის?

ღილით ბიჭებს შესჩივლა, შიშით მთელი ღამე თვალი ვერ მოვხუჭევო. ტყუილი კი თქვა: ძილი გაუსაძლისმა ლოდინმა, გაურკვეველმა ფიქრებმა გაუკრთო.

სინამდვილეში მარტო დარჩენის პირველსავე ღამეს ელოდა სერიოზულ მოსვლას. აკი უთხრეს ბიჭებმა, შენი მცველები ვიქნებითო, ღამით საბანაოდ წავალთო.

კუნაპეტი ღამე იდგა, სამხრეთის უმთვარო ღამე, თითს თვალთან ვერ მიიტანდი, ღრუბლებიც ჩამოწვა. სუნთქვა ჭირდა. პლაჟიდან ლაპარაკის ხმა და ქვების ხრაშუნი ისმოდა. ბევრი მოაგარაკე ბანაობდა ღამით, დროს არ აცდენდნენ. ჩუმად საუბრობდნენ, ზოგი ჩურჩულებდა. ჰაერში რაღაც იდუმალემა გაღვრილიყო. ოღვას სისხლი აუჩქროლდა, მაგრამ იფიქრა, ალბათ მეჩვენებო. შემდეგ გამოირკვა, რომ ხალხი მართლა ჩურჩულებდა, იდუმალემა მართლაც იყო, ოღონდ მისგან დამოუკიდებლად. ოღვას თავბრუ დაეხვა, ფეხები მოეკვეთა, აწამებდა სიბნელე. ეს დახუთული ჰაერი, ეს იდუმალემა. ისეთი წყვილიანი მეფობდა, შეგედლო ტიტველს გებანავა. ნაპირთან მისული ოღვა ზღვასაც კი ვერ ხედავდა. არასოდეს, არც მანამ და არც შემდეგ. არ უბანავია ასეთ თბილ წყალში. ალბათ ოცდაექვსი გრადუსი იქნებოდა. ზღვა გატრუნულიყო. არ ღელავდა. თითქოს ზღვა კი არა, აუზის თბილი წყალი იდგა. ამ წყვილიანში მხოლოდ ჩუმი ტლაშუნი და ხალხის გაურკვეველი ბუბუნი ისმოდა.

ქალმა იგრძნო, ეს ღამე უჩვეულო რომ იქნებოდა. ვლადი სადღაც წავიდა. იქნებ სადმე ახლოსაც იყო, მაგრამ ხმას არ იღებდა, თავს არ ამყლავნებდა. სერიოზულ ოღვას ხელი წაავლო და წყლის სიღრმისაკენ წაიყვანა. ერთმანეთს ვერ ხედავდნენ. მხოლოდ მაშინ შედგნენ, როცა წყალი ქალს მხრებამდე



მიწვდა. ეს წმინდა განბანვას ჰგავს, — უჩურობულა სერიოჟამ, რომელიც ტროპიკულ მდინარეში ან განგის წყალში ან სადმე იორდანიის, სადაც წყალი ახალმოწველილ რძესავითაა. რუსი თავადი ვლადიმირი დნეპრში ნათლავდა ხალხს, იქ კი, ცოტა არ იყოს, უფრო გრილია წყალი. ქალს გაეცინა.

— ნეტა ყველაფერი საიდან იცი?

— გინდა ცურვა გასწავლო? — ჰკითხა უეცრად სერიოჟამ.

ქალს გაუკვირდა: დღისით მეტს აბა რას აკეთებდნენ. უმაღვე სერიოჟას მიუახლოვდა და კისერზე მოეხვია. კარგა ხანს იდგნენ ასე, მერე აკოცეს ერთმანეთს. ეს მოხდა პირველად და ისე ბუნებრივად, თითქოს მრავალჯერ ეკოცნოთ. მხოლოდ ერთი რამ იყო უცნაური: ირგვლივ ადამიანები ეხვიათ და მაინც ვერავინ ხედავდათ. ვლადი სადღაც შორიდან იძახდა. ოლგას ეუხერხულა, თავის დაღწევა სცადა. სერიოჟა ერთხანს ეურობოდა, მერე ორთავენი ამოვიდნენ წყლიდან და ლოდზე გაწვნენ.

ლოდი თბილი იყო, მაგრამ ქალს მაინც შესცივდა, კანკალი დააწყებინა.

— სადა ხართ, წყეულებო? — ყვიროდა ვლადი.

სერიოჟამ ქალს პირზე ხელისგული ააფარა, მაგრამ თავი ვერ შეიკავეს, ორივეს სიცილი წასკდა და ლოდიდან გადმოცვივდნენ.

— შეხე... სად დამალულან... — ვლადი მძიმედ დაეშვა და ქალ-ვაჟს გვერდით მიუჯდა. — მე, ჩემო კარგებო, ბილეთზე უკვე მოველაპარაკე.

ქალს აძაგძაგებდა, ამიტომაც ვერ გაბედა ეკითხა, რა ბილეთი ახსენა ვლადმა. არ სურდა შეემჩნიათ, ასე რომ კანკალებდა. მართლაც უცნაური იყო სიციხით გათანგულ ღამეში ძაგძაგი. არ უნდოდა ვლადი მიმხვდარიყო მის გასაჭირს. მოსკოვის პირველი მედიცინისტიტუტის კლინიკასთან შეთანხმებული ვარ, აგვისტოში უნდა ვიმუშაო, — უთხრა ვლადმა მეგობრებს. იგი მაშინ ჯერ კიდევ მეხუთე კურსის სტუდენტი იყო, თუმცა სერიოჟასა და ოლგაზე სამი წლით უფროსი გახლდათ. გვიან დაეწყო სწავლა.

ქალმა ვლადს ხმაზე შეატყო, რომ იგი ყველაფერს მიხვდა. ძალიან შეებრალა ვლადი, ენას ველარ ატრიალებდა, გაურკვევლად ბუტბუტებდა, გამგზავრებასთან დაკავშირებით რაღაც უბადრუკ დავალებებს აძლევდა. ღამის ორ საათამდე გაგრძელდა ეს მტანჯველი საუბარი. მერე ოლგა გამოტყდა, მეძინებო. კაცმა რომ თქვას, სულაც არ ეძინებოდა, პირიქით, აღგზნებული იყო, მაგრამ რაღაცამ უკარნახა ასე ეთქვა: უბრალოდ, სამივეს ერთად ჯდომა უკვე აღარ შეიძლებოდა. ვლადიმ ჰკითხა, გაცილება ხომ არ გჭირდებაო. მიუხედავად ყველაფრისა, იგი მაინც რაინდად დარჩა. რა კარგი ქმარი იქნებოდა, რომ... ოლგა ვასილიევნას დედის აზრით, ვლადი რაღაცით ბეზუხოვსა ჰგავდა. პიერ ბეზუხოვი მისი საყვარელი გმირი იყო და ვლადი რომ ბეზუხოვს მიაგვანა, ეს ბევრს ნიშნავდა. გიორგი მაქსიმოვიჩი კი ამტკიცებდა, ვლადს მორდოველთა ღმერთის, კერემეტის სახე აქვს და მეტად საინტერესო დასახატიაო. აკი ხატავდა და აწვალებდა კიდევ საწყალ ვლადს. დიახ, გიორგი მაქსიმოვიჩსაც ძალიან უნდოდა ოლგასა და ვლადის საქმე გაჩარხულიყო. „უკეთეს მეგობარს ვერ იშოვი“, — უმეორებდა ხშირ-ხშირად. ახლა ვლადი დოცენტია, განყოფილებას ხელმძღვანელობს, ჰყავს სამი შვილი და ჩასუქებული, მხარბეჭიანი, ულაზათო ცოლი — ექიმი-რენტგენოლოგი. აი მაშინ კი მიწასთან გასწორებული, უბედური კაცი იყო, ხმაჩამწყდარმა რომ იკითხა, გაცილება თუ გჭირდებაო.

ორთავენი წავიდნენ, ოლგა-მარტო დარჩა. სველი საბანაო კოსტიუმი მზის მოლოდინში ფანჯრის რაფაზე მიფინა. აღარ ეძინებოდა, გაუქრა შიში, აღარც ფეხის ხმა ესმოდა და აღარც არავის საუბარი. თვალგახელილი იწვა, გული უფართქალებდა. იცოდა, მალე მოვიდოდა, გათენებას აღარაფერი აკლდა. ოცი წუთიც და სერიოჟა მოვიდა. ქალი კვლავ შეაშფოთა ვლადის გახსენებამ. ვინ იცის, შეამჩნია კიდევ სერიოჟას წამოსვლა, მიხვდა, სადაც მიდიოდა.

— ხვალამდე მოგეცადა, ბარემ ვლადი წასულიყო, — მოსვლისთანავე უთხრა ოლგამ.

— რაში გენაღვლება ვლადი?

მართლაც არ ენაღვლებოდა ვლადი.

— ხვალამდე მოცდა არ შემეძლო.

არ ყოფილა არც ლაპარაკი, არც დაპირება, არც ფიცი. ქალმა უბრალოდ ირწმუნა მისი, ირწმუნა სამარადქამოდ.

შემდეგ იყო კიდევ ბევრი სხვა ღამე, ურიცხვი ღამე, ქალაქშიც და აგარაკზეც, ზაფხულშიც და ცივ შემოდგომაზეც, როცა ჯერ კიდევ არ ათბობდნენ და ოთახში რეფლექტორი ენთოთ. თითქმის ყოველღამ ცოლ-ქმარი იყვნენ. ოლგას თავისი ამხანაგი გოგოები ხშირად უზიარებდნენ ხოლმე საკუთარ ამბებს, თვითონ კი არასოდეს. კიდევაც რომ მოეთხრო, არ დაუჯერებდნენ, ისეთივე ტყუილად ჩაუთვლიდნენ, როგორსაც თავად თხზავდნენ. საქმის არსი აქ უბრალო იყო: ის, რაც აკლდა ერთს, ჰქონდა მეორეს, ხოლო ის, რაც ორივეს ჰქონდა, ერთიანდებოდა, ერთმანეთს ავსებდა, ერთმანეთს ერწყმოდა. მაგრამ ამას, რასაკვირველია, მაშინვე არ მიმხვდარან, არც პირველ ღამეს და არც პირველ წელს. ოლგა მხოლოდ მერე მიხვდა, რომ სხვასთან არ შეიძლებოდა ჰქონოდა ის, რაც სერიოჟასთან ჰქონდა. მაშინ იქ, ქოხში კი — დახუთული ღამე იყო, თავდავიწყების ღამე...

ვლადიმ მათთან ერთად კიდევ ერთ დღეს იბორიალა. ზღვაში სერიოჟა ერთხელაც აღარ მისულა ოლგასთან, სულ ვლადისთან იყო, თითქოს გაურბოდა კიდევ ოლგას. შეშინებული ქალი თავს იმშვიდებდა: ეშმაკია, განგებ იქცევა ასე. განა ოლგამ არ იცის, რომ ღამით ისევ მოვა მასთან. მერე ვილაც კაცმა ვლადი ზღვაში გაიხმო, სიღრმეში შეიყვანა და რაღაც ცუდი ამბავი აუწყა. დაირბა ათასგვარი ჭორი. ახლა აღარ ახსოვს, სახელდობრ რა. ის კი აგონდება, სერიოჟა და ვლადი საოცრად რომ შეშფოთდნენ და პორტირთან გაქანდნენ. მაგრამ მოსამსახურე ქალმა მოკლედ მოახსენა, პორტირი მოსკოვს გაემგზავრა, დიასახლისი კი ავად არის და არავის ნახვა არ შეუძლიაო. სტუმრებიც წასულიყვნენ, ბაღში არც ერთი მანქანა აღარ იდგა.

დღისით იყვნენ ქალაქში, ბაზარში, შეიარეს მალაზიებშიც. როგორც კი ვლადი წამით მოშორდებოდათ, ან სულაც მიბრუნდებოდა, სერიოჟა ქალს თითებზე უჭერდა ხელს, მიხუტებას, მიახლოებას ცდილობდა. ვლადმა და სერგეიმ იმ დღეს განსაკუთრებით ბევრი იკამათეს. დაობდნენ, ხმამაღლა როხროხებდნენ. ოლგა კი ერთთავად ღამეზე ფიქრობდა, რა იქნება ღამით. ბაზარში საადრეო ყურძენს ჰყიდდნენ. ქალი, რასაკვირველია, ხვდებოდა, ახალი ამბავი ალბათ ძალიან საინტერესოაო, მაგრამ მის სულს სხვა გრძნობა ავსებდა. ცოტა არ იყოს, უკვირდა კიდევ: როგორ შეეძლო სერიოჟას ასეთ დღეს სხვა რამეზე ეფიქრა, სხვა ამბით გართულიყო. ის კი არა, ზოგჯერ არც კი უსმენდა, როცა რამეს ეკითხებოდა.

ულვაშა ბერძენი მოსამსახურე ქალი ბაღში ფოცხით დაფრატუნობდა, ნაგაზსაც მოსწყენოდა, პარმალზე წაწოლილს დრუნჩი თათებზე დაედო. ყველა სადღაც გაქრა, გაუჩინარდა. ის ტანადი, ლურჯტუჩა ქალიც სადღაც გადაკარგულიყო. ჭეშმარიტად კარგი იყო მაშინ ის ზღვისპირა სახლი და ბაღი! ხუთი დღე იცხოვრეს მეორე სართულის ვერანდაზე. ბერძენ ქალს ეშინოდა მარტო ღამის გათევისა და ამათ უხმო. სახლში ყველაფერი დიდი, ბუმბერაზული ზომისა იყო. ღვინის მყავე სუნით გაჟღერებულ ოთახებში ოდნავ ძაღლის სუნიც იგრძნობოდა. ვერანდაზე კი გამასავათებელი და კვლავ ისევ გამაცოცხლებელი ზღვაური ქროდა. საუბრობდნენ დღისით, ღამით, ხარბად სწავლობდნენ ერთმანეთს. მაშინვე ისე იქცეოდნენ, თითქოს ყველაფერი დიდი ხნის წინათ ჰქონოდათ გადაწყვეტილი. ოქტომბერში ვლადის გაოცებას საზღვარი არ ჰქონდა, ქორწილზე რომ მიიპატიყეს. მაინც არ ეგონა, საქმე ასე შორს თუ წავიდოდა და, რაც მთავარია, ასე მალე გადაწყდებოდა.

მათ ხომ სულ ახლახან გაიცნეს ერთმანეთი — და აი, ზღვა, ვერანდა, აღარავითარი საიდუმლო, ერთმანეთისთვის ყველაზე ახლობელნი გახდნენ.

მერე აგვისტო, სერიოჟას დედასთან უსიამოვნო, მძიმე საუბრები, მაგრამ ეს უკვე აღარაფერს ცვლიდა. პერხუშკოვო, შემოდგომა, შეხვედრები საგარეუბნო სალაროებთან, საღამოს ელექტრომატარებლები. მაშინ ამოტივტივდა სვეტლანას სახელიც, ეს წარმოუდგენელი კომმარა. ეს სახელი კარგა ხანს არ გამქრალა და ოლგას ღამის სული გააფრთხობინა.

მაინც როდის გაიგონა პირველად ეს სახელი? სერიოჟას დედისგან?

არა, როცა დედამისმა ეს სახელი ახსენა, ოლგა ვასილიევნა შეკრთა: მისთვის უკვე ნაცნობი იყო იგი, უკვე ეჯდა თავში, ნამცეცა ხიწვივით შეჭრილი, კანს უღიზიანებდა და ყრუ ტკივილს ჰგვრიდა. სერიოჟა პატიოსანი, ერთი მოუზომელი კაცი იყო, ზედმეტად ბევრს ყბედობდა. ჰოდა, სწორედ მისგან გაიგონა ამ სათვალისანი სვეტლანას სახელი. ეს გომბიო არაფერს ერიდებოდა სერიოჟას შესანარჩუნებლად. თავდაპირველად ამ ამბისათვის ოლგას დიდი ფასი არ დაუდგია, ბოლოს და ბოლოს წარსულის გარეშეც არ იქნებოდა. მასაც ხომ ჰქონდა წარსული: თუნდაც გენდლინი, ახლა სულ მთლად რომ გადაავიწყდა და ფარაონ ტუტანჰამონის მსგავსად ათასწლეულთა მტვერმა დაფარა. გენდლინი კონსერვატორიაში გაიცნო, მგონი, ინჟინერი იყო. მაღალი, ტანადი კაცი გახლდათ, როგორღაც უცნაურად დადიოდა, გეგონებოდა, ყოველი ნაბიჯის გადადგმაზე მუხლებში იკეცებო. დედის საყვედურით სავსე ხმა: „გენდლინმა ისევ დარეკა“. პასუხად დანაშაულის შეგრძნება, გენდლინის კი არა, დედის მიმართ. გენდლინის ჩამოშორება სულაც არ იყო ძნელი. შემოდგომის ქარისგან მოწყვეტილი ფოთოლივით თვითონვე ჩუმად მოსწყდა. მაგრამ ოლგა მაინც ამაყად აცხადებდა: „აი მე, გადაჭრით ვუთხარი, ნულარ დარეკავ, საჭირო აღარ არის-მეთქი და ისიც მიხვდა — მორჩა და გათავდა. მტკივანი კბილივით ერთბაშად უნდა ამოიძრო“. მაშინ ოლგა ჯერ კიდევ არ იცნობდა ქმრის მერყევ, ახირებულ ხასიათს: სერიოჟას მორჩილი თავის კანტური, ხელდახელ დათანხმება სულის სიმშვიდეს ჰგვრიდა ქალს, თუმცა ეს სიმშვიდე დიდხანს არ გაგრძელებულა. სადედამთილოსთან პირველივე საუბარმა გააქრო იგი.

ოლგა გააოცა სერიოჟას ბინამ. დიდი დარბაზის ამ ექვსკუთხა ჩამონაჭერს უჩვეულოდ მაღალი ჭერი ჰქონდა, ნაძერწი ანგელოზები შეუბრალებლად და-

ეტხრათ, ერთი ფეხი და ერთი ფრთა ამ ექვსკუთხა ოთახში იყო მოქცეული, მეორე ფეხი და ისრიანი ხელი დერეფნის ჭერს მიბჯენოდა. ანგელოზებს თავები არ უჩანდათ, ტიხრებში მოეყოლებინათ. მუქი შინდისფერი შპალერით გაკრულ კედლებზე უამრავი სურათი ეკიდა. სერიოჟამ ოლგა ვასილიევნა ერთ-ერთი სურათის წინ შეაჩერა: ფრენისა და ფარაჯებში გამოწყობილი ფაფახიანი ულვაშა მამაკაცების პირამიდა, კიდეში ძლივს შესამჩნევი, თეთრთავ-საფრიანი ქალი.

— ეს დედაჩემია, არმიის პოლიტგანყოფილებაში ათას ცხრაას ოც წელს მუშაობდა.

მაშინვე მიანიშნა ოლგას, სხვა დედებს რომ არა ჰგავდა, უბრალოდ ხანში შესული ქალი კი არა, ისტორიის შემქმნელი გახლდათ. ოლგა ვასილიევნა ისედაც დიდი სიმპათიით უყურებდა ამ სახედაღარულ, წვრილტუჩა, მაღალლაწვიან ქალს, გულით უნდოდა ჰყვარებოდა, არა იმიტომ, რომ ისტორიის შემქმნელი იყო — ყოველგვარ რელიქვიებს, გარდასულ დროთა მოწმე ნანგრევებს ოლგა ვასილიევნა გულგრილად ეკიდებოდა — უბრალოდ მხოლოდ იმიტომ, რომ სერიოჟას დედა იყო. სვამდნენ ჩაის ყოვლად იაფფასიან, ლამის საბავშვო ფინჯნებით. მოვიდა სერიოჟას დაც, დედაბერივით თავშალმობვეული, მსუქანი უშნო ქალიშვილი. ვერაფრით ვერ იტყოდი, სერიოჟას დააო. რაღაც გაცეცებული, მრავლისმეტყველი ღიმილი ჰქონდა. საუბრისას როგორღაც ცალყბად იღიმებოდა და განზე იხედებოდა. სერიოჟაზე სამი წლით უფროსი იყო.

ამ სახლში ყველაფერი: კედლები, ჭერი, ჭურჭელი, ავეჯი, თვით ადამიანებიც რაღაც უცნაურად შეუსაბამონი იყვნენ და მაინც როგორ შეიყვარა ყველაფერი! სერიოჟა მაღაზიაში გავარდა ქართული წითელი ღვინის საყიდლად, გაგრაში ყოფნისას რომ ასე მიეჩვივნენ.

მერე, როცა სერიოჟას და მეორე ოთახში გავიდა, ხოლო ოლგა ვასილიევნა მარტო დარჩა, სადედამთილომ მაშინვე ჰკითხა:

— თქვენ რამე გსმენიათ სვეტლანაზე?

ოლგა ვასილიევნა გამოტყდა, რომ გაუგონია, მაგრამ ყურმოკვრით.

— ჰოო, მე კი გარკვევით გეტყვით, — წარმოთქვა ქალმა და ლურჯი თვალები სარძლოს ჯიქურ მიაპყრო, — დიახ, ეგ სვეტლანა, ვისი არსებობაც ჯერ კიდევ გუშინწინ არ ვიცოდი, სერიოჟასაგან ბავშვს ელოდება.

თურმე თვითონ სვეტლანა მისულიყო, წვრილად ჩაეკაკლა, გაელიზიანებინა (მერე ყველაფერი ჩვეულებრივი შანტაჟი აღმოჩნდა, სულელების გამოსაჭერად გამიზნული). მაგრამ მაშინ თვითონ მას მოუწყვეს სასამართლო — ეს უმგვანო სასტუმრო ოთახი ანაზღად ტრიბუნალად იქცა, ტყავის ქურთუკი და ხისბუდიანი მაუზერი აკლდა მხოლოდ.

— თქვენ დარწმუნებული ხართ, რომ სხვა ადამიანის უბედურების ფასად გაბედნიერდებით?

ოლგა ვასილიევნა ხმადაბლა ბუტბუტებდა:

— მე არ ვიცი... თქვენ კი ხართ დარწმუნებული, რომ ეს სიმართლეა?

ლურჯთვალება ქალი ცივად აქნევდა თავს.

— ჰო, მაგრამ სიყვარული... თუ უყვართ... თუ ტოვებენ, შორდებიან... — შესაბრალისი ხმით ლულულულებდა ოლგა ვასილიევნა.

— თქვენ ლაპარაკობთ არამზადებზე, ჩემი ვაჟი კი არამზადა არ გახლავთ. იგი უბრალოდ უპასუხისმგებლო ბიჭია.



უეცრად სერიოჟას და შემოვიდა. ყველაფერი გაეგონა. უცნაური ღიმილით პირმოღრეცილმა, გაბრაზებით წარმოთქვა:

— ნუ მიაქცევთ ყურადღებას დედაჩემის ლაპარაკს, ამას ყოველთვის ყველაფერი სქემამდე დაჰყავს! — მერე დედისაკენ მიბრუნდა და საკმაოდ ღვარძლიანად და გარკვევით უთხრა: — კვლავ სისულელეს ჩმახავ! შენმა მსმენელმა ყურები უნდა დაიციოს.

მოხუცი მოიკუნტა. ამასობაში სერიოჟამ ღვინო მოიტანა. ოლგა ვასილიევნა ტირილისაგან თავს ძლივს იმაგრებდა. სერიოჟა ყველაფერს მიხვდა და დედას გამოკითხვა დაუწყო. ოთახში ისევ და შემოვიდა, მაგრამ ახლა დედას გამოესარჩლა. ვის როგორი დამოკიდებულება ჰქონდა იმ გველისწიწილა სვეტლანასთან, ოლგა ვასილიევნამ მაინც ვერ გაიგო. იგი თითქოს არც არსებობდა. სამთავე მხოლოდ პრინციპის გამო დაობდა ასე ცხარედ, თვითეული თავის სიმართლეს იცავდა. ერთს კი, მგონი, ნაღდად მიხვდა: ქალებს ოლგა არ უნდოდათ. ამ ადამიანებს შეუსაბამობა ბუნებით მოსდგამდათ, მათი ნათქვამისა და საქციელის მიხედვით დასკვნების გამოტანა ნაჩქარევი იქნებოდა. სერიოჟა იფიცებოდა, სვეტლანა სტყუისო. ოლგა ვასილიევნას სჯეროდა მისი. მაგრამ რატომღაც საოცრად გაძნელდა ქალის მოშორება. სვეტლანა აშინებდა, თავს მოვიკლავო. სერიოჟაც იტანჯებოდა, დადიოდა მის მშობლებთან, შეხვდა მის მოკრივე ძმასაც, ნახა ექიმები, მივიდა ლაბორატორიაშიც. ანალიზებმა ფეხმძიმობა არ დაადასტურა, მაგრამ სვეტლანა პირწავარდნილი აფერისტივით მოქმედებდა, დედამთილზე კი ყალბი ადამიანები ყოველთვის ახდენდნენ ზეგავლენას. თუმცა ოლგა ვასილიევნამ ბოლოს მაინც დაასკვნა, რომ დედამთილს სვეტლანა კიდევ უფრო არ უნდოდა, ვინემ თვითონ იგი.

ეს კოშმარი სექტემბერში მთელი სამი კვირა გაგრძელდა. იყო დრო, როცა ეგონა, სვეტლანამ თავისას მიაღწია, სერიოჟა წამართვაო. მართალია, თვითონ ვერ დაიბრუნა, მაგრამ მე მაინც ჩამომაცილაო. გადაწყვიტა, მეტად აღარ შეხვედროდა სერიოჟას — ისეთი მომაკვდინებელი ლახვარი ჩასცა. იმ ძუკნა გოგომ, — მაგრამ რაღაცამ იხსნა, გაუძლო. დიახ, გაუძლო.

ღამის თორმეტ საათზე კარზე უეცრად ზარის ხმა გაისმა. კართან იდგა ვიღაც უსახური, თმაგაჩეჩილი, ფეხმონგრეული სათვალისანი გოგო. თქვენა ხართ ოლგა? მე გახლავარ. ოლგამ მაშინვე იაზრა, ვინც იყო და სისხლმა აასხა თავში. ჰოი, როგორ სძულდა ეს გაწრიბული გომბიო: მოკიდოს უნდა ხელი კაცმა და კიბეზე ცხვირ-პირის მტვრევით ჩააგოროს. მაგრამ არა, თავაზიანად შეიპატიჟა, დერეფანში ისაუბრეს. სვეტლანა ირწმუნებოდა, სერიოჟას არ უყვარხარო, საერთოდაც არ შეუძლია სიყვარულიო. თავი რატომ უნდა მოიტყუოთ, თქვენისთანებს იგი ვერ იტანსო. „უბედური ქალი იქნებით, თუ გონს არ მოხვალთ“. ჰოდა, და კიდევ ბევრი ამის მსგავსი აბდაუბდა ილაპარაკა. ოლგა ვასილიევნა გრძნობდა, როგორ მოეწურა შიგნით ყველაფერი, ენა ჩაუვარდა. შეჰყურებდა ქალის გამხმარ, ნიკაპწვრილ სამკუთხა სახეს, რაღაც უცნაურად რომ ეღრიცებოდა. სათვალისანი კი სიცხიანი ავადმყოფივით გაფართოებული გუგები მოუჩანდა. თავის სიმართლის დასამტკიცებლად სვეტლანამ ისიც უთხრა, — თუმცა სწორედ ამის სათქმელად იყო მოსული, — რომ სულ ახლახან, აგვისტოში, სამხრეთიდან დაბრუნების შემდეგ, სერიოჟამ ორი ღამე მასთან გაატარა.


— სტყუი! — ახლა უკვე მტკიცე ხმით უთხრა ოლგა ვასილიევნამ.

წუთითაც არ დაუჯერებია, მაგრამ ქალმა ღვარძლიანი კმაყოფილებით ისეთი წვრილმანი უხსენა, რაიც სხვა შემთხვევაში არამც და არამც არ შეეძლო სცოდნოდა.

და მაინც არ ეჯერა, ისეთი სულელი, ისეთი გულუბრყვილო ვინმე იყო! მეორე დღეს თავსხმაში „მეტროპოლის“ გვერდით წიგნის მაღაზიისკენ სეროიუასთან შესახვედრად გარბოდა. ვითომ უნდა შეერისხა, თავიდან მოეშორებინა, თუმცა გულში მაინც უცნაურ სიმშვიდეს გრძნობდა. ფარულად სწამდა — აი, სეროიუა აღშფოთდება, აუხსნის, თავს გაიმართლებს, გაუქარწყლებს უეცრად თავდატეხილ საშინელ ეჭვებს. ცხოვრებაში ამდაგვარი არაფერი განუცდია. დედისა და მამინაცვლისთვის გული არ გაუხსნია. მარტო იბრძოდა. ყველაფერი რამდენიმე წამში უნდა გადაეწყვიტა. სეროიუას პირსახე ჩაუმუქდა და აღელვებით წარმოთქვა: „იგი საძაგელი გოგოა, მაგრამ სიმართლე უთქვამს, თუმცა ორჯერ კი არა, ერთხელ ვიყავი“.

ღმერთო ჩემო, მაინც რატომ, რატომ იყო მასთან? კიდევაც რომ მართალი იყოს, რატომ ეუბნება? „შემეცოდა, ვიცოდი, ვშორდებოდი და შემებრალა“. იგი შეიცოდა, საყვარელი ქალი კი სატანჯველად გაიმეტა, ყველაფერი დაუფარავად უამბო. იმ თავსხმაში „მეტროპოლის“ გარშემო მთვარეულივით დაბორილებდნენ, ეჯახებოდნენ გამვლელებს, ლაპარაკობდნენ, ლაპარაკობდნენ, ცდილობდნენ აეხსნათ, გაეგოთ, — იქ კი რაღაცას აშენებდნენ თუ დებადნენ, სახლი ხარაჩოების ტყეში იდგა. ძალიან რომ წამოაშენდა, ამ ხარაჩოებს აფარებდნენ თავს. რა ქნას, რა გადაწყვიტოს, სამუდამოდ დაშორდეს თუ პირიქით. მას დაუკავშიროს მომავალი ცხოვრება? ვერა და ვერ გადაეწყვიტა. ხან ასე ფიქრობდა, ხან ისე. დაშორდეს და დასწყევლოს მისი გზა და კვალი — მაგრამ ამ ნაბიჯის გადასადგმელად თანდათან აკლდებოდა ძალი. ჰოდა, უეცრად გაიფიქრა: თუ ამ განსაცდელს დაძლევა, გაუძლებ, — მაშასადამე, ბედნიერი იქნები. ბოლოს ყველაფერი რესტორან „მეტროპოლში“ შესვლით დაგვირგვინდა. სწორედ იმ დღეს აეღო მუზეუმში სეროიუას ხელფასი და ნახევარი იმ სადილს მიახარჯა.

ქორწილი ერთი თვის შემდეგ, ოქტომბრის ბოლოსთვის დაინიშნა. მზიანი, ცივი ამინდები იდგა. სტუმრებს რომ არ შესცივებოდათ, ფანჯრის ჭრილები გაზეთის ქაღალდებით დააწებეს. მეზობლისგან რადიოლა და ფირფიტები ითხოვეს. ქორწილი, იტყვის კაცი, — მაგრამ აბა რა ქორწილი ეთქმოდა ჩვეულებრივ თავშეყრას — სუფრაზე ელაგა საუზმე, მახლობელი რესტორნიდან მოტანილი კატლეტები, არაყი. სეროიუამ სასაცილო მოსაწვევი ბარათები შეადგინა და თვითონვე დაბეჭდა მანქანაზე. „ძვირფასო მეგობარო! თუ გსურს სულიერად დაისვენო, დაივიწყო ოჯახური, სამსახურებრივი სიძნელეები, დაივიწყო, რომ დღეს უნდა იმეცადინო (რაც ზედმეტია, წაშალეთ), მობრძანდით ჩვენთან შინაურულ ქორწილ-კონცერტზე“. პროგრამა ძალიან სასაცილოდ იყო შედგენილი. სეროიუა ხომ ასეთი საქმეების ნამდვილი ოსტატი გახლდათ. ჰქონდა რაღაც მიმიკური ნომრები, თვალისდახამხამებაში ატრიალებდა სიტყვებს უკუღმა, მღეროდა სუფრულ სიმღერებს, კითხულობდა ექიმ პოლისაევის ლექციას შიმშილის სიკეთეზე. ახლა ყველაფერი დაავიწყდა, ვეღარ გაუხსენებია, მაგრამ არა, ზოგი რამ კვლავაც შემორჩა მეხსიერებას. თუნდაც ეს ფრაზა: „ჭამა-ყლაპვაზე პასუხისმგებელია პატარძლის დედა, შემდგომში სიღედრად წოდებული“. ახსოვს იმიტომ, რომ სწორედ ამ სი-



ტყვების გამო შემდეგ, შუალამისას, პატარა წალაპარაკება მოუხდათ. ოლგას დედა, თვითონ ოლგა და მოსახმარებლად შემოსული მეზობლის ქალი კურკელს რეცხდნენ, გიორგი მაქსიმოვიჩი ამშრალედა. უგონოდ მთვრალი სერიოჟა იქით, ოთახში ხვრინავდა.

გიორგი მაქსიმოვიჩმა გაკვირვება გამოთქვა: მაინც რას ნიშნავს ეს ჭამა-ყლაპვა? ვითომ იუმორია? ან თუნდაც რა საჭირო იყო „სიდედრის“ ამდენჯერ ხსენება. სიდედრზე ყველა ხუმრობა ჯერ კიდევ ცხრაასიან წლებში ამოიწურა. დედას დამცინავად გაეღიმა: სულაც არა მწყინს ეგ თქვენი იუმორი, იოხუნჯეთ, რამდენიც გენებოთ. კიდევაც რომ სწყენოდა, მაინც არ გამოტყდებოდა. ისე კი, როგორც შემდეგ გამოირკვა, დედას არ სიამოვნებდა, სიდედრად რომ იხსენიებდნენ. არ უყვარდა ეს სიტყვა. გასტრონომიულ ოსტატობაზე ხომ სულაც არ იღებდა თავს.

ყოველი ქორწინება თურმე ორი ადამიანის შეერთება კი არ არის, როგორც ფიქრობენ ხოლმე, არამედ ორი ბანაკის, ორი წრის ერთმანეთთან ან შეთვისება ან დაჯახებაა. დიახ, ეჯახება კოსმოსში ერთმანეთს ეს ორი სხვადასხვა სისტემა და გაუთავებელი სამკვდრო-სასიცოცხლო ბრძოლა ჩაღდება. ვინ ვის? ვინ რისთვის? ვინ რით? აი, მოვიდნენ სასიძოს ნათესავები, მისი წრე და უზომო ცნობისმოყვარეობით ჭყიტეს თვალები. დაინახეს საპატარძლოს ნათესავები, მისი წრე. თუმცა მათი ერთად ცხოვრების მთელი ჩვიდმეტი წლის მანძილზე მეტად არასოდეს მომხდარა ასეთი დიდი შეხვედრა, ასეთი აშკარა დაპირისპირება, მაგრამ შეხლა-შემოხლა სწორედ მაშინ დაიწყო და მთელი ამ ხნის მანძილზე დაუსრულებელივ გრძელდებოდა. ხშირად ფარულად, ყველასთვის უჩინრად. აი, ახლა სერიოჟა აღარ არის, ძველი ომი კი გრძელდება.

კაცმა რომ თქვას, მაშინ ომი არც ყოფილა. ყველაფერმა მშვიდად და წყნარად ჩაიარა, თუ არ ჩავთვლით სუსტ მიწისქვეშა ბიძგებს. ოლგა ვასილიევნა კი ღელავდა. სადედამთილოს ადრევე შეამჩნია უხეში, ჩხვლეტია ეკლები, მის უცნაურ მულსაც შეეძლო წაეკბინა ადამიანები. აქეთ საკუთარი ბიძის — დედის ძმის, ძია პეტეას შიშიც ჰქონდა: თვითონ ძია პეტეაცა და მისი ოჯახის წევრებიც უკმეხი, მყვირალა ადამიანები იყვნენ.

სუფრასთან დასხდომამდე გიორგი მაქსიმოვიჩმა სტუმრები თავის სახელოსნოში მიიწვია. იქ მისვლამდე კი გრძელი დერეფანი უნდა გაგველო. მარჯვნივ მხატვართა სახელოსნოები იყო, მარცხნივ ზიარი სააბაზანო, ზიარი სამზარეულო, ზიარი საპირფარეშო — ყველაფერი ზიარი მთელი იმ მესამე სართულის მობინადრეთათვის. სახლი ოციან წლებში იყო ნაგები და, უნდა ითქვას, ყოვლად უაზროდაც. ბაკუნით მიმავალი სტუმრები დერეფანს გაუყვნენ. ზიარი სამზარეულოსა და ზიარი სააბაზანოს კარებთან ცნობისმოყვარე მეზობლები ატუზულიყვნენ — მხატვართა ცოლები, დედები თუ ბავშვები. ფეხის ხმის გაგონებაზე თვითონ მხატვრებმაც კი გამოაღეს თავიანთი სახელოსნოების კარები. მხატვართა მეუღლენი და დედები დიდ სიყვარულს როდი ამჟღავნებდნენ ოლგასა და მისი დედისადმი. ბარე რვა წელი სრულდებოდა, რაც დედა-შვილი ამ სახლში ცხოვრობდა და თითქოს უნდა შეჩვეოდნენ, მაგრამ მხატვართა ცოლებსა და დედებს რატომღაც კარგად ახსოვდათ გიორგი მაქსიმოვიჩის პირველი ცოლი და ვაჟიშვილი სლავა, რომელთაც გიორგი მაქსიმოვიჩი ჯერ კიდევ ომამდე რამდენიმე წლით ადრე გაეყარა.

სტუმართა პროცესია ჩუმად, ხმაამოუღებლად მიედინებოდა. ოლგა უსიამო გუნებაზე დადგა. ზიარი სააბაზანოდან საპნიანი ოხშივარი გამოდიოდა, ეტყობა, სარეცხს რეცხდნენ; საპირფარეშოში წყალი მოშხუოდა. უეცრად სერიოზულად ოლგა ვასილიევნას თითებზე ხელი წაუჭირა და ყოვლად თავხედური ხმით სიმღერა წამოიწყო, მენდელსონის „საქორწინო მარში“. ვიღაცამ ხმა აუწყო, ვიღაცეებს გაეცინათ, ახმაურდნენ და დაძაბულობაც გაქრა. სწორედ ამ დროს, ვარდების თაიგულით ხელში, მხატვარ ვასინის ცოლი, წითელთმიანი ზიკა გამოჩნდა. ქალმა თაიგული ოლგა ვასილიევნას უხმოდ მიაჩეჩა. მერე დაიხარა და ლოყაზე აკოცა. ამ ზიკას ოლგა ვასილიევნა თითქმის არც კი იცნობდა, სამაგიეროდ მერე გაიცნო გვარიანად.

გიორგი მაქსიმოვიჩის სახელოსნოში არაჩვეულებრივი წესრიგი სუფევდა, თუმცა ეს არავის შეუმჩნევია. ყველამ დარბაზის შუაგულში დიდი, ორასსანთლიანი ნათურის ქვეშ მოიყარა თავი. გიორგი მაქსიმოვიჩი კვარცხლბეკად გამოყენებულ სავარძელზე ერთიმეორის მიყოლებით დგამდა თავის ნამუშევრებს. ოლგა ვასილიევნას ეს სურათები დიდად არ მოსწონდა. ალბათ მხატვრობისა არაფერი გაეგებოდა. თუმცაღა ამ სახლის ბინადარნი გიორგი მაქსიმოვიჩზე მეტისმეტი მოკრძალებით ლაპარაკობდნენ, ეკითხებოდნენ რჩევას, აჩვენებდნენ თავიანთ ნამუშევრებს. ოლგა ვასილიევნას აზრით, ზეთის საღებავებით შესრულებული ყველა ეს ტბები, ხრამები, ჭალები, მდინარეები თუ ფანქრით დიდ ფურცლებზე ნახატი მოხუცები, ბავშვები, ძაღლები, ხელები, თავები სხვა მხატვართა მიერ დიდი ხნის წინათ დახატულ სურათებსა ჰგავდნენ. მისთვის გაუგებარი იყო, ვის რაში სჭირდებოდა იმის გამეორება, რაც მსოფლიოში უკვე არსებობდა.

მაგრამ, როგორც ეტყობა, სჭირდებოდათ, რადგან გიორგი მაქსიმოვიჩის სურათებს მხატვართა საბჭო ხალხით იღებდა, იძენდა ხალხი და გიორგი მაქსიმოვიჩიც გაუჭირვებლად, შეძლებულად ცხოვრობდა.

იგი კეთილი, განათლებული კაცი იყო, სწავლობდა პარიზში, პირადად იცნობდა მოდილიანისა და შაგალს. საუბრისას ფრანგული სიტყვების ჩართვა უყვარდა, თუმცა ფრანგულად ძალიან ცუდად კითხულობდა და ლაპარაკობდა. ოდესღაც „რუს ვანგოგს“ ეძახდნენ. ერთი რამ იყო საოცარი: ნუთუ შეიძლება კაცს სხვისი ყველაფერი ასე კარგად ესმოდეს, საკუთარს კი ვერა ხვდებოდეს? ამბობდნენ, ახალგაზრდობისას სულ სხვაგვარად ხატავდაო, მაგრამ ის ნამუშევრები რატომღაც არ შემორჩენია. გიორგი მაქსიმოვიჩს ძალიან უყვარდა ადამიანების სახელოსნოში შეპატიჟება და თავის ნამუშევრებზე ლაპარაკით გაბრუება. როგორც ჩანდა, იმ პატარ-პატარა ტბებითა და პატარ-პატარა ჭალებით დიდად ამაყოფდა. ეს ყველაფერი, რასაკვირველია, შეგეძლო გეპატიებინა დიდებასა და განცხრომით ცხოვრებას მოკლებულ მოხუცისათვის, მაგრამ ქორწილის დღეს სტუმრების სახელოსნოში შეყვანა კი მეტისმეტი იყო. ოლგა ვასილიევნა, ცოტა არ იყოს, გაუნაწყენდა კიდევ მამინაცვალს. მოხუცმა დაურიდებლად ჩამოდგა სავარძელზე სურათების მთელი სერია — ეს იყო დივანზე წაწოლილი ტიტველი ქალი, ქალს განიერი ბარძაყები და გაშლილი თმა ჰქონდა, სახე არ უჩანდა. არავინ იცოდა, რომ ეს ოლგას დედა იყო. ოლგა ვასილიევნას არ ესიაშოვნა ეს ამბავი, ცდილობდა სურათებისათვის არ შეეხებოდა. ყველაფერი კეთილად დამთავრდებოდა — სტუმრები უკვე მოწონების ნიშნად თავებს აკანტურებდნენ და სულ „დიახ, დიახს“ გაიძახოდნენ —



რომ სერგეის დედას ერთი უადგილო შეკითხვა არ მიეცა. შეკითხვა გიორგი მაქსიმოვიჩის შემოქმედებას სულაც არ ეხებოდა, ქალმა რომელიღაც სხვა სურათზე მიათითა:

— თუ შეიძლება გვითხარით, ეს რა სურათია?

— ეს ცნობილი „გერნიკა“ გახლავთ, — სასწრაფოდ უპასუხა გიორგი მაქსიმოვიჩმა, არ სურდა საკუთარ შემოქმედებაზე წამოწყებული საუბარი შეეწყვიტა, — მაგრამ ეს რეპროდუქციაა და არა სურათი.

— მაინც რით არის ცნობილი? მე ეს რაღაც პირველად მესმის.

ალექსანდრა პროკოფიევნას ეს ფრაზა: „მე ეს რაღაც პირველად მესმის“ მერე იქცა სერიოზუს დედის, მისი სისტემის გამომხატველ პაროლად თუ დევიზად. ოლგა და დედამისი ზოგჯერ ერთმანეთს გადახედავდნენ ხოლმე და ჩურჩულით იტყოდნენ: „მე ეს რაღაც პირველად მესმის“, რასაც უსათუოდ სიცილი მოჰყვებოდა. მაგრამ ეს კარგა ხნის შემდეგ იყო.

გიორგი მაქსიმოვიჩმა უხალისოდ მიატოვა საკუთარი ნამუშევრები, იძულებული შეიქნა „გერნიკას“ სახელსა და დიდებაზე ელაპარაკა. ნამდვილად კეთილსინდისიერად, მგზნებარედ დაასაბუთა სურათის ყველა ღირსება. თანდათანობით ყველა სტუმარი დაარწმუნა, რომ ჭეშმარიტად დიდი მცოდნე იყო, თითქოს გაიგეს კიდევ, რის გამოხატვა სურდა დიდებულ პაბლოს, მაგრამ ალექსანდრა პროკოფიევნა მაინც თავისას ერეკებოდა:

— არა, თქვენი ეს დასკვნები დასაბუთებულად არ მიმაჩნია. ქოთნის ნამტვრევებისა და დახეული გაზეთების მეტს მე აქ ვერაფერს ვხედავ.

— დედა, ეს შენი პირადი საქმეა, — ჩაერია სერიოზუს და.

— არა უშავს, მე ავუხსნი, გავაგებინებ, ვფიქრობ, დაძლევეს, გაერკვევა, — დაუმატა სერიოზუამაც.

ალექსანდრა პროკოფიევნა ვაჟის ხუმრობას საკმაოდ მკაცრად გაეპასუხა. მაგრამ სრულიად მოულოდნელად ალექსანდრა პროკოფიევნას მხარი აუბა ნაადრევად შეჭიკჭიკებულმა ძია პეტეამ.

— თქვენ, ჩემო კარგო, ამ საკითხში სავსებით მართალი ბრძანდებით! — ჩაგონებით წარმოთქვა მან და თითი მალლა ასწია. — შენ, ეგორშა, მგონია, გვარიანად გირტყეს მაგ ფორმალიზმისათვის, მაგრამ, როგორც ჩანს, არ გეყო. აქ მაინც რამ გამოგაფენია ეს უაზრობა?

მერე ისევ ალექსანდრა პროკოფიევნამ დაამატა: „თვითონ თქვენ, გიორგი მაქსიმოვიჩ, ხატავთ როგორც რეალისტი; თქვენი ქალი — ქალსა ჰგავს, თქვენს ნახატებზე თავი — თავია, ფეხი — ფეხია“. ამ სიტყვების წარმოთქმისას ალექსანდრა პროკოფიევნამ იმ სურათზე მიათითა, ოლგას ტიტველი დედა რომ იყო გამოსახული, — თქვენ ყველაფერი რიგზე გაქვთ. ასე როგორ იქნება: ქადაგებთ ერთს, ქმნით კი მეორეს?“

მართლაც ცუდ დღეში ჩავარდა გიორგი მაქსიმოვიჩი. გაფითრდა, ჯიბიდან დიდი ლილისფერი ცხვირსახოცი ამოიღო და პირსახეზე მიისვ-მოისვა. აბა რა უნდა აეხსნა იმ ხუთ წუთში, სუფრასთან დაჯდომამდე, არყის გადაკვრამდე, „გორკას“ დაძახებამდე რომ იყო დარჩენილი. ან შეეძლო კი მთელი თავისი ცხოვრების მოყოლა?

ოლგა ვასილიევნას შეეცოდა მოხუცი, მაგრამ მამინაცვლის დასაცავად პირის გაღებაც ვერ მოასწრო, რომ ცოლი გამოექომაგა. „პეტეა, ჩემო ძვირფასო, — მიუბრუნდა ქალი ძმას, — შენ, როგორც ვიცი, მთელი ცხოვრება

მანქანათმშენებლობის საქმეს ემსახურები. საინტერესოა, რას იტყვოდი, ეგორს რომ შენთვის ესწავლებინა, ტანკი როგორ ააგო?“

— რას ვიტყვოდი? გავსრესდი და ეგ იქნებოდა! — ყვიროდა ძია პეტია და გაჩეჩილ, ჭაღარა თავს მრისხანედ აქნევდა. — საკატლეტე ხორცივით დავბეგვავდი! კომბოსტოსავით დავკეპავდი იმ თავხედს, იმას!

ყველას გაეცინა და ეშმაკურად ალექსანდრა პროკოფიევნას გადახედეს. — იცით რა, — წარმოთქვა ბოლოს სერიოჟას დამ, — მოსაწყენი იქნება, ყველამ რომ მხოლოდ თავისი ხელობის მიხედვით დაიწყოს მსჯელობა.

დავა თითქოს ამაზე დამთავრდა. და მაინც ეს იყო ორი სხვადასხვა ბანაკის, ორი სხვადასხვა წრის ადამიანების შეხვედრა, თვითონაც რომ არ იცოდნენ, რაოდენ ღრმად ჰქონიათ გადგმული ფესვები.

დედამთილის ღვიძლი და ვერა პროკოფიევნაც რაღაცას ბუტბუტებდა მხატვრობის თაობაზე. ოლგა ვასილიევნას კი ბედნიერებისა და შიშის გრძნობა დაეუფლა: ვილაცამ ვილაცას ურიგო არ უთხრას, არ გაანაწყენოსო... ბოლოს დადგა ის საზეიმო წამი — რისთვისაც იყვნენ მიწვეულნი სახელოსნოში. გიორგი მაქსიმოვიჩმა ანტრესოლიდან დიდი სურათი ჩამოიღო. ეს იყო ფრანგი მხატვრის დიუვერნუას ნამუშევარი და გიორგი მაქსიმოვიჩმა იგი ახლა ნეფე-დედოფალს უსახსოვრა. სურათზე ძველი პეტერბურგი იყო გამოხატული. მერე, ცხოვრების მძიმე დღეებში, ბევრჯერ დაადგეს თვალი დიუვერნუას ამ სურათს, ერთხელ საკომისიო მაღაზიიდან შემფასებელიც კი გამოიძახეს, მაგრამ მცირე თანხის შემოთავაზებით გაოცებულებმა (თუმცა არცთუ მცირე, მაგრამ იმაზე ნაკლები, მთელი ეს წლები ოცნებით რომ ვარაუდობდნენ), გაყიდვა გადაიფიქრეს. ეს სურათი ახლაც უკიდიათ. როცა სახელოსნოდან გამოსული სტუმრები დერეფანში ერთმანეთს მოწიწებით უთმობდნენ გზას, ალექსანდრა პროკოფიევნამ გიორგი მაქსიმოვიჩს ყურში უჩურჩულა (დედამთილს მოზეიმე კილო ჰქონდა და ოლგას გული შეუტოკდა): „და მაინც, ძვირფასო მძახალო, არ შემეძლია დაგეთანხმოთ...“

ლამით, როცა საერთო სამზარეულოში მეზობლების რიდით ჭურჭელს უხმაუროდ რეცხდნენ, გიორგი მაქსიმოვიჩმა ოლგას გადაულაპარაკა: „დედამთილი გყავს — ჰო-ჰო! ნამდვილი ქვა და რკინა... კიდევ კარგი, ჯერჯერობით ჩვენთან იქნებით...“ მერე, როგორც იცოდა ხოლმე, დიდსულოვნად დასძინა: „საინტერესო პირისაზე კი აქვს, კარგი იქნებოდა მისი დახატვა“.

ღიახ, ისინი სულ სხვადასხვა ადამიანები იყვნენ, დედამიწის სულ სხვადასხვა კუთხიდან.

გიორგი მაქსიმოვიჩი ლმობიერი კაცი იყო. მან მხოლოდ ერთადერთხელ მოაგონა ყველას, რომ სწორედ ის არის ბინის პასუხისმგებელი დამქირავებელი და საოცარი შეუპოვრობაც გამოიჩინა. ეს იყო მაისში, როცა ირინკას გაჩენის საკითხი წყდებოდა, მათი ერთად ცხოვრების პირველი გაზაფხული. ჯერ კიდევ არ იყო ყველაფერი კალაპოტში ჩამდგარი, დაფუძნებული, ოლგა მასწავლებლად მუშაობდა, მაგრამ უკვე სხვა ადგილს ეძებდა. უჭირდა სკოლაში მუშაობა, შორს სიარული. უნივერსიტეტელი მეგობრები კი პირდებოდნენ, სადმე უკეთეს სამუშაოს გიშოვნითო, მაგრამ ჯერ არაფერი ჩანდა. ყოველ დილით შვიდის ნახევარზე ქალაქის მეორე ბოლოში უნდა გასულიყო. სერიოჟას უთანხმოება მოუვიდა მუზეუმის დირექტორთან და იმასაც სამსახურის გამოცვლაზე ეჭირა თვალი. ხელმოკლედ იყვნენ. სწორედ ამ დროს გა-



მოიკვამ, რომ ფეხმძიმედ იყო. დედებისათვის არ გაუმხელიათ. გადაწყვიტეს, სასწრაფოდ თავად ელონათ რამე, რადგან ბავშვის გაჩენა იმეამდ უოვლად შეუძლებელ ამბად მიაჩნდათ. ამ დარგში ნაცნობი ექიმი არ ჰყავდათ, საერთოდაც ექიმებს ნაკლებად იცნობდნენ. ვლადი კი აგერ უკვე ნახევარი წელია აღარ ენახათ, რაც ინსტიტუტი დაამთავრა და კლინიკაში ორდინატორად დაიწყო მუშაობა.

სეროიჟა ფეხს ითრევდა, არ უნდოდა მასთან მისვლა. ქალიც ყოყმანობდა, მაგრამ რადგანაც ვლადი მისთვის არასოდეს არ აფერს არ ნიშნავდა, მაინც გადაწყვიტა სეროიჟასათვის ყური არ ეგდო და ისევ მასთან მისულიყო. რატომღაც ისიც კი ეგონა, ვლადს გაუხარდებოდა მისი გამოჩენა. და აი, დაურეკა ძველ მეგობარს. მისდა გასაოცრად, ვლადს არ გახარებია, ის კი არა, ცოტა დაიბნა კიდევ, თითქოს სახტად დარჩა, თუმცა მალევე დაფაცურდა. როცა მასთან მივიდნენ, ვლადმა ნემსი გაუკეთა. სეროიჟა დივანთან იდგა, ქალის ხელი ეჭირა და გვერდზე იხედებოდა.

სეროიჟა გამოტყდა: რაღაც ერთი წამით ვლადისადმი სიძულვილიც კი ვიგრძენი. ვლადს უარი უნდა ეთქვაო! მაგრამ მისი ვირული კეთილსინდისიერების პატრონი... ნემსმა ვერ უშველა. მერე ვლადმა ერთ თავის ნაცნობ მოხუც ექიმთან ურჩია მისვლა. მაშინ ეს ამბავი აკრძალული იყო და ამიტომ სახლში მალულად, ფარდადაშვებულ, კარჩაკეტილ ოთახში კეთდებოდა.

ოლგა ვასილიევნა იძულებული გახდა დედისათვის გაემხილა. დედამ თავისი მხრით გიორგი მაქსიმოვიჩს აუწყა. დედას ასეთი რამ არასოდეს გაეკეთებინა და მეტად სასირცხვო და თანაც მომაკვდინებელ ოპერაციად მიაჩნდა. ქალიშვილს შეშინებული, ცრემლით სავსე თვალებით შეჰყურებდა და დაზაფრული ჩურჩულებდა: „რა ვქნათ, ჩემო გოგო?“ დედა სიბერის დღემდე ბევრ რამეში საოცრად გულუბრყვილო დარჩა. ოლგა ვასილიევნამ ეს ოპერაცია მერე რამდენჯერმე გაიკეთა, სახლშიაც და საავადმყოფოშიც. მიხვდა, რომ ეს არ იყო ამქვეყნად ყველაზე დიდი ტკივილი, თუნდაც იმიტომ, რომ ამ ტკივილს დასასრული ჰქონდა.

მაგრამ მაშინ, მაისის თვეში ეს ყველაფერი გაურკვეველი იყო. ყველა განაცვიფრა გიორგი მაქსიმოვიჩის განცხადებამ: „მე, როგორც პასუხისმგებელი დამქირავებელი, გიკრძალავთ ამ ამბავს!“ დღემდე აუხსნელი დარჩა: მართლა კანონის დარღვევისა შეეშინდა თუ დედის პანიკური შიში გადაედო...

ასე რომ ირინკა ქვეყნიერებას გიორგი მაქსიმოვიჩის ამ სიტყვების წყალობით მოევილინა: „მე, როგორც პასუხისმგებელი დამქირავებელი...“ მერე ოლგა ვასილიევნა მწარე მოგონებებით იტანჯავდა თავს. გოგონამ არ იცოდა, მისი გაჩენა რომ არ უნდოდათ. ყველამ დაივიწყა ეს ამბავი — სეროიჟამ, დედამ, გიორგი მაქსიმოვიჩმა, ალბათ ვლადიმაც. მაგრამ ოლგა ვასილიევნას ახსოვდა. და აი, შემოდგომის ერთ თოვლჭყაპიან დღეს, გოგოლის ბულვარით არბატის მხარეს მალაზიაში რომ მიიჩქაროდა, უეცრად მუცელში ისეთი ტკივილი იგრძნო, წონასწორობა დაკარგა, კინალამ წაიქცა. ვიღაც კაცმა ხელი შეაშველა, ბულვარისკენ წაიყვანა და სკამზე დასვა. ქალი კი ფიქრობდა: „ღმერთმა ალბათ დამსაჯაო“...

ირინკა შვიდთვიანი დაიბადა. როგორც კი სამშობიაროდან მოვიდნენ, ბავშვს სახვევები გამოუცვალა. სეროიჟა მივიდა, ბავშვს დავხედავო, მაგრამ ოლგამ ყვირილი ასტეხა, ზედ გადაეფარა: „არ დახედო, არ დახედო! მერე გაჩვენებ!“

წადი!“ არ უნდოდა ეს საბრალო, ძვალტყავა სხეული ეჩვენებინა. მხოლოდ რამდენიმე დღის შემდეგ უჩვენა უკვე ბავშვს დამსგავსებული არსება. ახლა ირინკა კლასში, მგონი, ყველაზე მაღალია, სერიოჟა კი აღარ არის ამ ქვეყანაზე. მაინც რა ჩქარა გაიქროლა ყველაფერმა!


თითქოს რა გრძელი ცხოვრება იყო, მეხსიერებისათვის თვალუწვდენი, მაშ რატომ გაქრა ასე ჩქარა? ყველაფერი აირ-დაირია. ის, რაც ასე დიდხანს გრძელდებოდა, ახლა წამს მიაგავს, ახლანდელი წამი კი უაზროდ, უსასრულოდ იწელება. ერთხელ დეკემბერში, იმ დამლუბველი დღიდან არცთუ დიდი ხნის შემდეგ, ქალიშვილს უთხრა — აბა, იმაზე ახლობელი ვინა ჰყავს, რომ პატარა ნუგეში მაინც მიეღო, მაგრამ შეცდომა იყო ქალიშვილისგან ამ პატარა ნუგეშის მოლოდინიც — თუმცა უფრო საკუთარ თავს უთხრა ან იმას, ვინც ვერ გაიგონებდა: „რა კარგი ცხოვრება გვქონდა მე და მამაშენს!“ ეს ამოკვნესა, რა თქმა უნდა, სულ მართალი როდი იყო. შიგ ტყუილიც ერია. უბრალოდ ცხოვრება, კარგი, არც ძალიან კარგი, ცუდი თუ საშინელი, მაინც ცხოვრებაა. ან ცხოვრობ, ან არ ცხოვრობ. შუალედი არ არსებობს. ამქვეყნად ყველაფერი ან ამ ზღვარს იქით არის, ან აქეთ. ვინ იცის, სწორედ აქ იმალება ოლგა ვასილიევნას მუდმივი ტანჯვისა და იმედის მიზეზიც. მაშინ ეს არ ესმოდა, მხოლოდ ახლად ხვდება, ისიც ბუნდოვნად.

გოგონამ ამ ნათქვამის სიყალბე იგრძნო, იმისთვის ნაგულისხმევი, „ვინც ვერ გაიგონებდა“, დედას ალმაცერად გამოხედა და უთხრა: „ხომ გაგიგონია, კარგი ცოტ-ცოტაობითო“.

შვილის სიტყვები ლახვარივით მოხვდა ოლგა ვასილიევნას. პასუხი ვერ მოახერხა. განა ბავშვობის დროინდელმა, ძველისძველმა ამხანაგმა, უჭკვიანესმა ფაინამ არ უთხრა ოლგა ვასილიევნას: შენი ქალიშვილი დიდი თავკერძა ვინმეა. რაც შენი და სერიოჟას, განსაკუთრებით კი ბებუის წყალობაა. მაგრამ საქმე ეს როდია. ახლა იგი შენზე შიშობს და იმიტომ გაფრთხილებს: „კარგი ცოტ-ცოტაობითო“... ფაინას აზრით, სასწრაფოდ გათხოვება იყო საჭირო: „არ გასულელდე, სერგეის ვერ გააცოცხლებ, შენ კი თავს წააგებ. თანაც იცოდე, შენი დრო იწურება: ერთი, ორი წელი და მერე მოგჭამა ჭირი“. სერიოჟას სიკვდილიდან ორი თვეც არ იყო გასული, სადღაც წვეულებაში რომ მიიპატიჟა ფაინამ, მაგრამ ოლგა ვასილიევნამ გააწბილა, — რა მექეიფება. უცხოთა დანახვაზე დარდი ერთი-ორად მაღრჩობსო. მერე საშობაოდ ნოვეგოროდში წაყოლა სთხოვა მეგობარმა, ამაზეც უარი უთხრა. მართალია, ირინკასთან ერთად პანსიონატ „ბერიოჟკაში“ წავიდა, მაგრამ დარდმა იქ უარესად დარია ხელი. ირინკა ახალგაზრდებს დაუტოვა, თვითონ კი სასწრაფოდ გამოიქცა. ჯიუტი ფაინა კი მაინც არ ეშვებოდა.

თვითონ ფაინა ქმრისგან მიტოვებული, ორმოცდასამი წლის ქალი იყო. ვაჟიშვილი ჯარში ჰყავდა, დედა დავრდომილთა თავშესაფარში. ჰოდა, იწვევდა ამხანაგს თავის ნაცნობებთან დროის გასატარებლად: არქიტექტორები არიან, სასიამოვნო, ინტელიგენტი ხალხი და ძველი სტილით ახალ წელს შევხვდეთო. ნუ გეშინია, სულელო, არავინ მოგიტაცებს, მხოლოდ დაისვენებ, მუსიკას მოისმენო.

არა, მას არც სასიამოვნო ადამიანებთან შეეძლო ყოფნა, არც ხეპრეებთან, არც ინტელიგენტებთან, საერთოდ არავისთან.



არ შეეძლო რაიმე პრინციპების, ან სხვა რამ მიზეზის გამო არა, უბრალოდ არ ჰქონდა არავითარი სურვილი.

მაშინ, ქალიშვილის შეუბრალებელი სიტყვების შემდეგ, ფაინამაც არ დაზოგა, მანაც პირში მიახალა სიმართლე. ალბათ იფიქრა, თუნდაც ემწაროს წამალი, ოღონდაც არგოსო: „შენ მართლა გგონია, რომ თქვენ კარგი ცხოვრება გქონდათ?“ „ღიახ“, — უპასუხა ოლგა ვასილიევნამ. აბა რა უნდა ეპასუხა? თქვენთვის უფრო ნათელია, მე არ ვიციო? ამ თავისი საუკეთესო მეგობრის, საუკეთესო მრჩევლის, უპირველესი მოშურნის, ყველა ხანმოკლე ბედნიერებისა თუ უბედობის უახლოესი მეტვალყურის გვერდიგვერდ გატარებულმა მრავალმა წელმა შთააგონა ოლგა ვასილიევნას, თავისი თავი ფაინას ადგილზე წარმოედგინა და ფაინას თვალთ შეეხედა თავისი მდგომარეობისათვის. ფაინა, რა თქმა უნდა, ძალიან უბედური ქალი იყო. მის გვერდით ოლგა ვასილიევნა რატომღაც ყოველთვის უზომოდ, უსირცხვილოდ მდიდარ ქალად გრძნობდა თავს. დროდადრო ეგონა და კიდევ თავს თავს უწყურებოდა იმის გაფიქრებაზე, რომ მთელი სიკეთე და მადლი, თავხედური ქალური კმაყოფილება, რაც ბედს მისთვის მოენიჭებინა, ფაინასაც ეცხებოდა მისგან. უფრო ზუსტად: ფიქრობდა, რომ ასე ჩანდა შორიდან და პირველ რიგში ასე ეჩვენებოდა საწყალ ფაინას.

უეცრად აღმოჩნდა, რომ თურმე ფაინას სულ სხვაგვარი შეხედულება ჰქონია მის ცხოვრებაზე. და აი ახლა, აქამდე შენიღბულ ამ შეხედულებათა წყალობით ოლგა ვასილიევნას გამხნევებაც კი გაბედა. თუმცა მათ ცხოვრებას განა მართლა არ ეთქმოდა მშვენიერი? მათი ცხოვრება — ეს იყო ერთი მთლიანი, ცოცხალი, ასე ვთქვათ, მფეთქავი ორგანიზმი, რომელიც ამ სამყაროდან გაქრა. მას ჰქონდა გული, როგორც ცოცხალ ორგანიზმს, ჰქონდა ფილტვები, შეგრძნების ორგანოები: იგი ვითარდებოდა, იფურჩქნებოდა, ავადმყოფობდა, ნელ-ნელა ცვდებოდა, მაგრამ სიბერით ან ავადმყოფობით კი არ მომკვდარა, არამედ გაქრა ის, რაიც მის სისხლს ამოძრავებდა. ჭეშმარიტად უცნაური იყო მათი ცხოვრება! ვერავინ შეძლო მისი ამოხსნა. ყველანი მხოლოდ ხვდებოდნენ რაღაცას, თავისებურად ხსნიდნენ, რაღაც-რაღაცეებს იგონებდნენ, ბუნდოვნად ვარაუდობდნენ, რომ მათი ცხოვრება ასეთნაირი და ისეთნაირი არის, ამა და ამისგან შედგებაო. თვითონ მათ კი... თვითონ მათ კი სიტყვებით არაფრის გამოხატვა არ შეეძლოთ. ოლგა ვასილიევნა ხან სრულიად გულწრფელად ფიქრობდა, რომ მათი ცხოვრება ჭეშმარიტად კარგი იყო, ხან ნამდვილად უმძიმდა ეს ცხოვრება. ყოფილა ისეთი საათები თუ დღეები, საშინელებადაც კი მოჩვენებია. ახლა კი არც სჯერა, ოდესმე თუ თავში ასეთი აზრები მოსვლია, თუ ზოგჯერ ზიზღსა ჰგვირბოდა მათი ცხოვრება.

მაგრამ ხომ იყო, იყო ასეთი დღეები! თუნდაც იმ ზამთარს, სუშჩევსკაიაზე რომ ცხოვრობდნენ, როგორ გაამწარა სეროიჟამ წითელთმიანი ზიკას წყალობით. ახლა თითქმის დაავიწყდა, მეხსიერებამ განდევნა ყველა ის განცდები, ის სირცხვილი, მაგრამ ხომ იყო — დიდი ხნის, თოთხმეტი წლის წინათ! ესეც ხომ მათ ცხოვრებას ეკუთვნოდა. ოლგას ეჩვენებოდა, რომ სერგეის ზიკა მოსწონდა. აბა ზიკა რომ ეკეკლუცებოდა და მართლა ცდილობდა მის მოხიბვლას, ეს ბუნებრივად მიაჩნდა. ქალებს სეროიჟა ძალიან მოსწონდათ. ოლგამ ეს იცოდა და იტანჯებოდა, მაგრამ ისიც იცოდა, ზარმაცი რომ

იყო და თავის შეწუხება დიდად არ უყვარდა, ჩურჩუტ, კეკლუცა ქალებს გულ-გრილად უყურებდა. ქალთა საზოგადოებას მამაკაცებთან საუბარი ერჩია, როცა არაყს სვამდნენ და თან კიტრს აყოლებდნენ. ერთხელ გამოტეხვა დაუპირა, მითხარი, ჩემთვის თუ გიღალატიაო. სერიოზულ ამოიოხრა: „გახსოვს, ჰემინგუეი რომ წერს: „ნეტავ მათთან ლაპარაკი არ იყოსო საჭიროა!..“

ზიკა ახალგაზრდა, მოსული ქალი გახლდათ, გრძელი ხელ-ფეხისა და ზორბა ტანის პატრონი. პირველ სართულზე მცხოვრები მოქანდაკენი ერთთავად პოზირებას თხოვდნენ ხოლმე, როცა თემატური სამუშაოები ჰქონდათ და მისგან უნდოდათ გამოეძერწათ ბადროს მტყორცნელი თუ ზურგზე კალათმოგდებული კოლმეურნე ქალები. ზიკას ხორციელი ძლიერება შიშსა ჰგვრიდა ოლგა ვასილიევნას: რატომღაც ეგონა, ეს ქალი სერიოზულ მივიწყებულ ბრუნპილდას ახსენებსო. ზიკას საკმაოდ სასიამოვნო ქორფა, მრგვალი, ქერა კულულებით დამშვენებული უბრალო პირსახე ჰქონდა. პირზე ერთთავად ღიმილი დასთამაშებდა. საბავშვო გამომცემლობებში ცოდვილობდა როგორც წიგნის გრაფიკოსი, აკვარელით ხატავდა საკმაოდ უნიჭოდ. მისი ქმარი ვასინი კი ერთი გალუული, შეუხედავი მოხუცი გახლდათ. მაშინ მოხუცად ეჩვენებოდა ოლგა ვასილიევნას ზიკაზე ორჯერ უფროსი ორმოციოდე წლის ვასინი. ჯერ დამეგობრდნენ, ერთმანეთს პატიუბდნენ ხან ჩაიზე, ხან სასმელზე და თან მაგნიტოფონს უსმენდნენ. მაშინ მოდაში იყო ასეთი გართობა. ვასინმა უზარმაზარი, რკინის სკივრივით მძიმე მაგნიტოფონი „დნებრი“ იყიდა. ყველას ხმას იწერდა, ყველას თხოვდა ემღერა, ელაპარაკა, ლექსები წაეკითხა. მერე დიდი აღფრთოვანებით იქვე ისმენდნენ ყველა ამ ჩაწერილ სისულელეს.

ვასინი კაი გვარიან ფულს შოულობდა თავის მეწყვილე არკაშასთან ერთად, ოფიციალურ სურათებს ხატავდნენ. გადაჭიმავდნენ ტილოს ჩარჩოზე, უჯრედებად მონიშნავდნენ და ცინცხლად, ზედიზედ აცხობდნენ სურათებს. ზოგჯერ ზიკასაც იშველიებდნენ. კაცმა თქვას, ვასინი თავისთვისაც მუშაობდა ანუ როგორც თვითონ ამბობდა, „სულის საამებლად“ ხატავდა არცთუ ცუდ ეტიუდებს. გიორგი მაქსიმოვიჩი ვასინს ნიჭიერ, მაგრამ თავაშვებულ კაცად თვლიდა. „ასეთი ნიჭის ხალხს ღმერთი მრავლად გვაძლევსო“, იტყოდა ხოლმე. ვასინი ლოთი იყო.

როცა იტყოდა, სულს უნდა ვაამო, უნდა ვინეტაროო, ეს იმას ნიშნავდა, რომ სადღაც ქალაქგარეთ ელექტრომატარებლით უნდა გამგზავრებულიყო, სიცივეში და წვიმაში ნეტარებით ემუშავნა. საწყალი ვალერა ვასინი! ჯერ კიდევ ჭარმაგი მოკვდა, სამოცსაც ვერ მიაღწია, ლოთობამ მოუღო ბოლო. ზიკამ კი მიატოვა. ჭეშმარიტი მხატვარი იყო. ბურანში ცხოვრობდა და შრომობდა, იღვიძებდა მხოლოდ მოლბერტთან, როცა იმას ხატავდა, რაც ჭეშმარიტად მიაჩნდა და უყვარდა. სტუმრები დიდად არ ეპიტნავენბოდა. შეეძლო მარტოს ეცხოვრა, მარტოს ესვა, მაგრამ ზიკას მოწყენილობა ახრჩობდა და ხალხისაკენ ის ექაჩებოდა. ცოლი ძალიან უყვარდა და ყველაფერზე ეთანხმებოდა, რასაც ის მოისურვებდა.

ზიკა დიდი გაქნილი ვინმე იყო, საოცრად ელაქუცებოდა ოლგა ვასილიევნას, ექლესებოდა, მეგობრად ეტენებოდა. „გინდა ირინკას გავასვირნებ? რძე ხომ არ მოგიტანო? მაღაზიაში მივდივარ...“ თანაც ყველაფერ ამას უბრალოდ, ამხანაგურად სთავაზობდა. ერთხელ ფულიც ასესხა. პირველ ხანებში ოლგა ვასილიევნაც აპყვა, მერე კი გონს მოეგო, აქ მთლად წმინდად არ უნდა

იყოს საქმეო. უკვე თავს არიდებდა ზიკას მოპატიუებებს და უშვებდა მასთან.

სეროიყამ იუკადრისა. მაინც რატომ მზღუდავ? ოლგა ვასილიევნას ახსნა არ შეეძლო. თვითონ კი ვერა ხვდებოდა. ტანჯავდა ეჭვი, ეჭვის მიზეზი კი ისე ნამცეცა იყო, სირცხვილიც იქნებოდა იმაზე ლაპარაკი. და მაინც ოლგა ვასილიევნა თავს ვერ ერეოდა.

— რა მოხდა? ვიცოდე მაინც, რატომ მიკრძალავ ვალერასთან სიარულს?

— გაიგე, არ მინდა, მორჩა და გათავდა.

— ეს მტარვალობაა!

განრისხებული სეროიყა ვასინებთან გარბოდა. მთელი სიცოცხლე იმისი ეშინოდა, ცოლის მონა არ გამხადონო. ეს ის დრო იყო, მუზეუმიდან რომ წამოვიდა. ახალი სამსახურიც არსად ჩანდა. გალიზიანებული და განერვიულებული ადგილს ვერ პოულობდა. ოლგა ვასილიევნა მთელი დღეობით სკოლაში იყო. შინ დარჩენილი სეროიყა ეხმარებოდა სიდედრს, უვლიდა ირინკას, დადიოდა ბაზარში. მოჰქონდა სურსათი, ვედროებით ეზიდებოდა წყალს. დიდი დერეფანი დღეში სამჯერ მაინც უნდა გაევილო, წყალი ზიარი სამზარეულოდან მოჰქონდა.

ოჯახური წვრილმანებით, უსაქმობით, უფულობით და, რაც მთავარია, გაურკვეველი მომავლით თავმოებეზრებულ კაცს საღამოობით კიდევ უფრო უმძიმდებოდა განწყობილება. მუზეუმიდან მოულოდნელად წამოვიდა, ვერ მოასწრო ახალი სამსახურის გამონახვა. წუხდა, არ იცოდა, რა ექნა. ის ახმახი ზიკა კი ჩასაფრებული ჰყავდა. თუმცა ისიც გაურკვეველი იყო, რაში სჭიროდა ზიკას მისი თავი?

ახლა სეროიყა აღარ არის და აღარც არავის ესაკლისება.

ერთხელ ოლგა ვასილიევნა ვასინის სახელოსნოში შევიდა და რას ხედავს: მაგიდას მიმჯდარ სეროიყას ჭუჭყიანი პირსახოცი აქვს აფარებული რესტორნის ხელსაწმენდის მსგავსად და ზიკა თმას კრეჭს. „მაინც რას ნიშნავს ეს?“ — დაინტერესდა ოლგა ვასილიევნა. პასუხად ხარხარი ატყდა. ვასინი დავიდაც მისი მეგობარი ისე ხარხარებდნენ, სიტყვა ვერ დაძრეს. გამოირკვა, რომ სეროიყას პოკერში თმა წაეგო. ზიკამ კი ყოვლად ბუნებრივი, მხიარული ხმით დააწყნარა ოლგა ვასილიევნა: „ნუ ღელავ, ოლეჩკა, ოდნავ ავაჭრი, სულ ცოტას, მხოლოდ სიმბოლურად. კიდევ მოუხდება“.

ოლგა ვასილიევნას გაუკვირდა. სეროიყა ასე ცხვარივით მორჩილად რომ იჯდა.

არავინ იცის. რა იყო მათ შორის. იქნებ იყო, იქნებ არც იყო. ოლგა ვასილიევნამ ზიკას საღამო აღუკვეთა. ზიკა მტრად ექცა. სულ რაღაც ორ-სამ თვეში უახლოესი მეგობრობა უღმობელ მტრობად შეიცვალა. ახლა კიდევაც დაავიწყდა, როგორ დაიწყო ყველაფერი. მოუვიდათ თუ არა წალაპარაკება დერეფანში მომხდარ იმ საშინელ შეტაკებამდე. გაზაფხულზე ოლგა ვასილიევნა უკვე უფროთხოდა ზიკას. ზიკა კი განგებ ჰიუტად მიაჩერდებოდა, ხოლო როცა სამზარეულოში ან დერეფანში შემთხვევით შეეფეთებოდა, გზას არასოდეს დაუთმობდა, ჰიქურ გაივლიდა, ზოგჯერ გვერდის გაკვრასაც კი ლამობდა. მგონი, ოლგა ვასილიევნამ ზიკაზე რაღაც მოსწრებულად და მწარედ იხუმრა, მეზობლებმა გადასცეს ზიკას და სიძულვილიც გაღვივდა. წვრილმა-

ნები უკვე დაავიწყდა, მაგრამ ეს კი ახსოვს, როგორ ეჩხუბებოდა სეროიყას იმ უბადრუკი, იმ არარაობა ზიკას გულისათვის. მაგრამ ოლგა ვასილიევნას მაშინ ეგონა, რომ მისი სიცოცხლე ამ ჩხუბის შედეგზე იყო დამოკიდებული. ნუთუ სეროიყას იმდენად მაინც აღარ უყვარს, იმ მცირე სიამოვნებაზე უარი თქვას, ვასინებთან ჭიქა არყის გადაკვრა რომ ანიჭებს, მით უმეტეს, როცა ასე ევედრებიან? როგორ იტანჯებოდა და როგორ სჯეროდა თავისი სიმართლისა! რა შეიძლება იყოს ამაზე ცხადი, — ფიქრობდა ოლგა: თუ უყვარს, დათმობს. თუ არა და ისევ ივლის. უკეთესი შემოწმება არც შეიძლება. მაგრამ თვითონ სეროიყასთვის ცხადი აქ არაფერი იყო. იგი დამამტკიცებელ საბუთს ითხოვდა. პატიმრობის ორდერს ითხოვდა.

— ათას მეერთედ გეკითხები: რატომ? იქნებ ისე გაგიყდი, ზიკაზე ეჭვიანობ?

— არა, უბრალოდ, გთხოვ! — ლამის ტირილით ეუბნებოდა ოლგა ვასილიევნა. — გთხოვ, გთხოვ, მეტი არაფერი! მუხლმოდრეკით გემუდარები! — ერთხელ კიდევ დაეცა მუხლებზე, სეროიყა შეშინდა და აღუთქვა: დამშვიდდი, ყველა თხოვნას შეგისრულებ, იყოს ნება შენი, იქ აღარ წავალო. ოჰ, როგორ უყვარდა მაშინ სეროიყა, მაშინ, იმ წუთებში. დიახ, გაიგონა ის სიტყვები, რისი მოსმენაც ასე გულით ეწადა. მაგრამ გავიდა სულ რაღაც საათნახევარი — ეს ყველაფერი ხდებოდა გამთენიისას, მთელი ღამე თვალი არ მოუხუჭავთ, — და სეროიყა ისევ თავისას გაიძახოდა: „არა, წმინდა წყლის სიგიჟეა, აუტანელი რაღაცა... ეკლესიის მამებივით ბრმა რწმენას ითხოვ... იწამე, გინდაც აბდაუბდა იყოსო...“ ჰოდა, აი, იმ მოზღვავებული სიხარულის ნაცვლად ქალს კვლავ მტანჯველი აზრები აწამებდა. ცრემლებისა და თეთრად გათენებული ღამეების საფასურად, როგორც იქნა, დათმობა გამოგლიჯა. დიდი ამბავი, ვასინებთან აღარ ივლის! მერე? ყოველთვის ასე მუხლჩაჩოქილმა უნდა იქვითინოს? ხომ შეიძლება უფრო დიდი სათხოვარი გაუჩნდეს. ის კი კლდესავით დადგება.

ტანჯავდა იმის შეგნებაც, რომ იმ ქარაფშუტა გომბიოს გულისათვის ასე სასტიკად, ცრემლისდენამდე ჩხუბობდნენ, მაშინ როცა ის დედაკაცი ზიზლის ღირსიც არ იყო. ჰოი, როგორ გაიხარებდა, ეს რომ სცოდნოდა! რა თქმა უნდა, ყველაფერი სისულელე იყო. დიახ, ოლგა ვასილიევნა ნამდვილად სულელი იყო, ვერ მიმხვდარიყო მთავარს, სისულელის გამო იტანჯავდა თავს...

სეროიყა განაგრძობდა ვასინთან სიარულს. დადიოდა განგებ, სიჯიუტის, პრინციპის გამო. ჰქონდათ მძიმე დღეები. ოლგა ვასილიევნას გაყრა უნდოდა, დედასთან წასვლა. დიახ, ეზიზლებოდა მათი ცხოვრება, და ეს მაშინ, როცა იგი მხოლოდ იწყებოდა.

ახლა ველარ მოუგონია, მაინც რა უძლოდა წინ ზიკასთან დერეფანში შეხვედრას, რამაც დაავიწყებინა მთელი ეს ამბავი. იქნებ რამე ზედმეტი წამოცდა საერთო ნაცნობებთან, იმ ჭორებთან დაკავშირებით, ზიკაზე რომ დადიოდა. ზოგმა შეწყვიტა კიდევ ვასინებთან სიარული. იმ სახლში უკვე ყველამ იცოდა ოლგა ვასილიევნასა და ზიკას მტრობის ამბავი. აღარც ვასინი ესაღმებოდა ოლგა ვასილიევნას, ის კი არა, დედამისსა და გიორგი მაქსიმოვიჩსაც დაეუბრა. გიორგი მაქსიმოვიჩი შემსყიდველი კომისიის წევრი იყო და ვასინს ორი სურათი ჩაუგდო. ვასინიც ერთ მშვენიერ დღეს გამოთვრა, კარებს მოადგა და სულ უშვერი სიტყვებით ილანძლა. ოლგა ვასილიევნამ ქუჩაში



ნამტირალევ ზიკას მოჰკრა თვალი. ახლა, მგონი, მართლა აღარ დადიოდა სერიოზა ვასინებთან.

ოლგა ვასილიევნა დიდ დერეფანში სამზარეულოსაკენ მიდიოდა, რომ უეცრად კუთხიდან ზიკა გამოძვრა. მარტონი იყვნენ. მაშინვე ოლგა ვასილიევნასაკენ წამოვიდა, თვალი თვალში გაუყარა. „ნაღდი გიჟის თვალებია“, — მოასწრო გაფიქრება. ზიკა მიუახლოვდა, პირისპირ დაუდგა, გაფითრებული ტუჩები შეარხია და უთხრა: „მე ყველაფერს მიგიხვდი, შე სულმდაბალო დედაკაცო, შენს ქმარს დაღუპავ და ის იქნება, თუმცა ჯანდაბას მისი თავი, მაგრამ თუ მე და ვალერას არ მოგვეშვები, იცოდე, გაგაქრობ! გაიგე?“ და თავისი ნიჩბივით ხელი მოუქნია.

ოლგა ვასილიევნა უკანმოუხედავად გაიქცა. შიში ცეცხლივით მოედო, გახსენებაც კი ზარავს...

იყო დრო. როცა ჩეხოვისა და სადოვიას ქუჩების კუთხეში ფაინასთან ერთად ცხელ-ცხელ ბუბლიკებს ყიდულობდა. იქ ომამდეც ჰყიდდნენ ცხელ-ცხელ ბუბლიკებს, თითოს ექვს კაპიკად. ახლაც ახსოვს ის წარუხოცელი ბავშვური სიამოვნება: პატარა კვადრატული სარკმელი, გაწვდილი ხურდა და უმაღლვე იმ სურნელოვან სიღრმიდან კეთილი ხელით მოწოდებული თბილი, ახალგამომცხვარი მსუბუქი ბუბლიკი. მერე ლეჭვა-ლეჭვით, უდარდელად ჩასეირნება სადოვიას გაყოლებით ცვეტნოი ბულვარზე. იქ ირეოდა ხალხი — იყო ცირკი, ბაზარი, იდგა ტაქსები, ნახავდი ბოშა ქალებს. იქვე იყო საკომისიო მაღაზია, კინოთეატრი, რა გნებავს, სულო და გულო! რესტორანი „ნარვაც“ ხომ იქვე, გვერდით ჰქონდათ, როცა ერთმანეთის დაწყენარება, გულის გადაშლა უნდოდათ, — ფაინა მაშინ კრასნოგვარდეისკაიას ქუჩაზე კომუნალური სახლის ერთ ოთახში ცხოვრობდა, დედასთან, შვილთან, ქმართან და ვილაც დავრდომილ ნათესავ ქალთან ერთად, ჭიანჭველებივით ამოშუშებულნი, აბა ლაპარაკი იქ სად შეიძლებოდა — ცვეტნოი ბულვარზე მიდიოდნენ. დარდიან გულზე ხან კინოში შევიდოდნენ, ხან ბაზარში. იყიდდნენ ხილს, ხან თაფლივით ტკბილ მსხალ „ბერეს“, ხან საზამთროს, ხანაც ჭიქა მოხალული მხესუმ-შირით იქცევდნენ თავს, გაივლ-გამოივლიდნენ ბულვარში, ერთმანეთს თავის დარდს შესჩივლებდნენ და გულზეც მოეშვებოდათ.

— უსათუოდ რაიონის პროკურორს აცნობე, — ურჩია ფაინამ, — შეატყობინე მის სამსახურს, სადღაც მუშაობს თუ აკვარელით რაღაცას თხუპნის.

ფაინას გაზეთში ვილაც მეგობარი ჰყავდა. იქვე, ბულვართან, ავტომატიდან დაურეკეს და წერილის, უფრო სწორად ფელეტონის დაწერა სთხოვეს. ოლგა ვასილიევნას ბოღმა აღრჩობდა. უნდოდა იმ საზიზღარი, ხულიგნური საქციელისთვის შური ეძია და ერთი-ორი წლით მაინც შეეგდო ზიკა ციხეში. მაგრამ როცა შინ დაბრუნდა, თავის ტკივილსა და, მძიმედ ნაავადმყოფარევით, მოთენთილობას გრძნობდა. გადაწყვიტა, არავისთვის არ გაემხილა. რაღაც უსაშველოდ შეეცოდა სერიოზა: რა დღეში ჩავარდება, ეს ამბავი რომ გაიგოს! ჰოდა, აღარც გაუმჟღავნებია არაფერი. იმ ცარიელი დერეფნის იქით აღარ წასულა ეს ამბავი, დედასაც არ გაუმხილა.

ცდილობდა არ გაეხსენებინა, დაევიწყა! მაგრამ ვასინების, კერძოდ, იმ დედაკაცის დანახვა დერეფანსა თუ საერთო სამზარეულოში ოლგა ვასილიევნას უკვე აღარ შეეძლო. თუმცა ახლა თვითონ ზიკაც გაუბრბოდა, თვალს არიდებდა. მალე შაბოლოვკაზე გადავიდნენ სერიოზას დედასთან. ქალიშვილის

სიკვდილის შემდეგ დედამთილი მარტო დარჩა. სერიოჟამ სთხოვა, დედასთან გადავიდეთო, და ოლგა ვასილიევნაც სიამოვნებით დაეთანხმა: იქ არ იყო ზეთის საღებავებისა და სკიპიდრის სუნით გაჟღენთილი გრძელი, უცნაური დერეფანი, არ იყო ღამის თავყრილობები, ღრიანცელი, არავინ დაობდა ფერებზე, ფრანგებზე, სუპერმატიზმზე, არ იყო გაცხოველებული სირბილი სართულებზე შემსყიდველი კომისიის მუშაობის დღეებში, არ იყო ცემენტის იატაკიანი ზიარი აბაზანა, კედელზე გაკრული წარწერა: „აბაზანაში ფუნჯის გარეცხვა სასტიკად აკრძალულია!“ არ იყო ზიარი სამზარეულო, არ იყო დედა, არ იყო გიორგი მაქსიმოვიჩი, ვისაც ჯერ კიდევ ჰქონდა მთელი სამყაროს თუ არა, სართულის მეზობლების გაოცების იმედი და ბოლოს არ იყო ვასინი და მისი ცოლი ზიკა. სამაგიეროდ, აქ იყო დედამთილი.

— იქნებ დედამთილთან რომ არ გეცხოვრათ... — გამოთქვა თავისი აზრი ფაინამ.

არა, ფაინა არ იყო სწორი. დედასთან ცხოვრება განა სერიოჟასთვისაც მწარე გამოცდას წარმოადგენდა? მიზეზი მოხუცი რომ ყოფილიყო, გული ოლგას უნდა გაჩერებოდა და არა სერიოჟას. თუმცა დედამთილის განუწყვეტელი ჭკუის სწავლება უთუოდ ემატებოდა რაღაც ძირითადას და მთავარს. ორმოცი წლის შემდეგ მამაკაცებს უცნაური რამ ემართებათ, ზოგი საბოლოოდ მშვიდდება, ზოგს კი პირიქით, სულიერი შფოთი აიტანს. სერიოჟა სწორედ ასეთმა სულიერმა შფოთმა შეიპყრო. ყველაფერი შეუმჩნევლად დაიწყო, მას აქეთ, რაც პრასკუხინმა ინსტიტუტში გადაიბირა. მართალია, მუზეუმში არც ფული იყო და არც იმედი რამისა, სამაგიეროდ წარმოუდგენელი სიმშვიდე სუფევდა, ინსტიტუტში კი გაუთავებელი ფორიაქი, დაპირებანი, იმედები, გეგმები, ვნებათაღელვანი, დაჯგუფებები, საშიშროება ყოველ ნაბიჯზე. პრასკუხინი დემჩენკოს ებრძოდა, დემჩენკო კისლოვსკის, იქით გენკა კლიმუკმა წამოჰყო თავი. მერე სადისერტაციო თემის გამოცვლასთან დაკავშირებით ატყდა ერთი ამბავი. სერიოჟა აქეთ-იქით აწყდებოდა, ჯერ ერთი თემა უნდოდა, მერე მეორე, მერე მესამე. ხან მოსკოვის ქუჩების ისტორიაზე შეჩერდა, ხან მეფის საიდუმლო პოლიციაზე, ხან სულაც სხვა თემაზე ეჭირა თვალი. სწორედ ამ წრიალმა დაღუბა. პირველად გატაცებით იწყებდა, მერე გაუქრებოდა ეს გატაცება და ისევ რაღაც ახლისკენ ილტვოდა ეს ნიადაგ საითღაც მიმსწრაფი, უიღბლო კაცი.

ღმერთო ჩემო, განა რა მოხდა ასეთი! იგი ხომ სერიოჟას არასოდეს საყვედურობდა, განა როდისმე მოუთხოვნია შეუძლებელი? არა აქვთ იალტაში წასასვლელი ფული — რა უშავს, ვასილკოვოში იცხოვრებენ დეიდა პაშასთან. არაა ტელევიზორის ფული — არც ამით დაშავდება რამე, რადიოს მოუსმენენ. მთელი ცხოვრება არასოდეს დასცდენია: აი იმან უკვე რას მიაღწია, შენ კი ისევ ისე ხარ, წინ არ წასულხარო. არასოდეს წაუქეზებია, წელებზე ფეხი დაიდგი, თავი შეაკალიო. სხვისი გამარჯვება ოლგას არ აღიზიანებდა.

პირიქით, ყოველთვის იმას ეუბნებოდა: არ გვინდა ეს შენი დისერტაცია! ოღონდაც ჯანმრთელად იყავი. დარჩი უმცროს მეცნიერ მუშაკად. ღვთის გულისათვის, ნუ წვალობ, შუბლით კედელს ვერ გაანგრევ, შენი შუბლი ამას ვერ გაუძლებსო.

სიმართლე თუ გნებავთ, უფრო დედამთილი განიცდიდა, მისი შვილი სხვებივით წინ რომ არ მიიწევდა.



ალექსანდრა პროკოფიევას არ უყვარდა სერიოჟას სკოლის წიგნიერი ამხანაგი. იმათ უკვე რალაც მიზანს მიაღწიეს და როცა სტუმრად მოდიოდნენ, ცოტა არ იყოს, ცივად ხვდებოდა. დედამთილს სწამდა, რომ შესანიშნავი ვაჟი ჰყავდა და უკეთესი ხვედრის ღირსად მიაჩნდა. ოლგა ვასილიევასათვის კი უცხო იყო პატივმოყვრული წუხილი. მას სულ სხვა რამ ტანჯავდა. რა თქმა უნდა, მუზეუმმა სერიოჟას შვიდი წელი უქმად დააკარგვინა, არაფერი არ მისცა, მაგრამ დამნაშავე თვითონ იყო. რად აედევნა ფუჭ ოცნებებს, თუმცა არც ისინი იყვნენ მასთან მართალნი, ისინიც სტყუოდნენ, ვინც გარს ეხვია! სტყუოდნენ უსინდისოდ: არ შეაჩერეს ეს უქმად მბრუნავი ბორბლები...

დაკარგა შვიდი წელი, სწორედ ის წლები, როცა მისი თანატოლები გაფაციცებული ილტვოდნენ, როგორმე წინ წასულიყვნენ. ეს კი ცხოვრობდა ისე, თითქოს წინ ორმოცდაათი წელი ედო. ჰქონდა რალაც გეგმები, იქეჭებოდა არქივებში, უთანხმდებოდა გამომცემლობას მისი წიგნის დაბეჭდვის თაობაზე. იყო ვილაც ილია ვლადიმეროვიჩიც, ამ საქმის წინ წაწევას რომ პირდებოდა, მაგრამ ბოლოს მაინც ყველაფერი უშედეგოდ დამთავრდა.

უამრავი შეხვედრის, ტელეფონით საუბრების, ღვინოსა თუ ჩაიზე ბაასის შემდეგ ილია ვლადიმეროვიჩმა სრული უმაქნისობა გამოამჟღავნა. ალექსანდრა პროკოფიევას ბრაზობდა: „ყველა ოხერი შენ როგორ უნდა აგეკიდოს?“ სერიოჟა თავს იცავდა და იმ გაიძვერებსაც ამართლებდა, ასე ურცხვად რომ ატყუებდნენ: „ჰო, მაგრამ ილია ვლადიმეროვიჩი ხომ გამომცემლობის დირექტორი არ არის, იგი ისეთივე კლიენტია, როგორც მე“.

გადიოდა წლები — ამასობაში ირინკა წამოიზარდა და სკოლაში წავიდა. გამოიცვალეს ბინა, გააკეთეს კაპიტალური რემონტი, დააგეს პარკეტი. თვითონ ოლგა ვასილიევასა ჯერ უფროსი მეცნიერი მუშაკი გახდა, მერე სამეცნიერო საკვლევო ინსტიტუტის ლაბორატორიის გამგედ გადაიყვანეს. სერიოჟას ამდენი წვალემა და ჯახირი წიგნის გამოცემაზე უშედეგოდ დამთავრდა. ვერ გამოსცა „ათას ცხრაას თვრამეტი წლის მოსკოვი“. მართალია, ამ წიგნიდან ზოგიერთი მასალა გამოიყენა დისერტაციის პირველ ვარიანტში, მაგრამ შემდეგ ის ვარიანტიც უკუაგდო. გაუჩნდა ახალი თემა: თებერვალი და მეფის საიდუმლო პოლიცია. აქაც მიადგა რალაც ჩიხს, რალაც გადაულახავ კედელს. მერე ერთმანეთს გადაება ათასგვარი უსიამოვნება, კლიმუკთან წაჩხუბება, სიარული სანაპიროზე მდებარე სახლში და მასთან დაკავშირებული ამბები, კლიმუკის ღალატი...

ოლგა ვასილიევას გამომეტყველებაზე ამჩნევდა ყველაფერს სერიოჟას, სცნობდა მის ნაბიჯებს. ხმა რომ შეეცვლებოდა, იცოდა, მორიგი მარცხი იგემან ახალი ოცნების ბურანში გაეხვიაო.

მაშინ როცა ერთმანეთი გაიცნეს, სერიოჟა, რასაკვირველია, სულ სხვანაირი იყო.

წლიდან წლამდე წარუმატებლობა და მარცხი ნელინელ აცლიდა ძალებს, დრეკდა, აძაბუნებდა, თუმცა რალაც შინაგანი ღერძი ხელუხლებელი რჩებოდა. დიახ, ეს ღერძი ფოლადის წნელივით იღუნებოდა, არა ტყდებოდა. სწორედ ეს იყო უბედურება. არ უნდოდა შინაგანად შეცვლილიყო, ეს კი ნიშნავდა, რომ თუმცა ძალიანაც ტანჯავდა მარცხი, ეკარგებოდა საკუთარი თავის რწმენა, აკეთებდა ისეთ სისულელეებს, იფიქრებდი, უკვე გონება დაუკნინდაო, ეუფლებოდა სასოწარკვეთა და თავის საწყალ გულს ასკდე-

ბოდა, მაინც არ უნდოდა სხვათათვის უხილავი ამ ფოლადისებური ღერძის დამსხვრევა. ოლგა ვასილიევნას კვლავ ძველებურად უყვარდა, ყველაფერს პატიობდა, მისგან კი არაფერს ითხოვდა.


დაკრძალვიდან სამი კვირის შემდეგ ოლგა ვასილიევნას ბეზიაზიჩნი ეახლა. ქალი პირადად არ იცნობდა ამ კაცს, გვარი კი გაეგონა, მაგრამ რასთან დაკავშირებით, ეს ველარ გაეხსენებინა. მგონი, სერიოჟას „საქმის“ განხილვაში მონაწილეობდა, ის კი აღარ ახსოვდა, ვის მხარეზე იყო. როგორც სერიოჟამ თქვა, მაშინ თანამშრომლები სამ ჯგუფად გაიყვნენ. იყო რამდენიმე არამზადა, იყვნენ ისეთნი, თავს რომ იკავებდნენ, და ისეთნიც, ყოვლად უმწიკვლოდ რომ იქცეოდნენ. ოლგა ვასილიევნა ღელავდა, არ იცოდა, რომელი ჯგუფის წევრი იყო ეს ბეზიაზიჩნი და როგორ ელაპარაკა მასთან. ბეზიაზიჩნის ვილაც ხნიერი ქალი ახლდა, გვარად სოროკინა.

— მაპატიეთ, ჩემო ბატონო, მე აქ თქვენს მახლობლად გასტრონომში ვიყავი, — დამნაშავის ხმით წარმოთქვა სოროკინამ და რატომღაც თავის სურსათით სავსე ჩანთაზე მიათითა. ერთი-ორი წამი თვალიც კი აცეცა, სად წაელო ეს ჩანთა. სხვა უკეთესი რომ ვერაფერი ნახა, ფეხსაცმელების შესანახ ყუთს დაადო. ოლგა ვასილიევნამ ჩანთას ხელი მოჰკიდა და ტელეფონის პატარა მაგიდაზე უსიტყვოდ დადგა.

— რა შესანიშნავი გასტრონომი გქონიათ, ჩემო ბატონო! „საექიმო“ ძეხვს ისურვებთ, ჩემო ბატონო, თუ ტკბილ ხაჭოს. ჩვენს გასტრონომში კი იშვიათად ნახავთ, თუმცა ისიც დიეტურ გასტრონომად ითვლება...

ქალი როშავდა ამ სისულელეებს და ოლგა ვასილიევნას საოცრად მგრძნობიარე სახით მიჩერებოდა, ხმასაც ისეთი თანაგრძნობით სავსე კილო მისცა, თითქოს გასტრონომის ქება, რომლის მახლობლადაც არგუნა ბედმა ცხოვრება, ოდნავ მაინც შეუმსუბუქებდა ოლგა ვასილიევნას მწუხარებას. მაგრამ როცა შეამჩნია, ოლგა ვასილიევნა არ აპყვა საუბარში, ქალმა ამოიოხრა. მერე პალტო და ქუდი მოიხადა და ერთხანს კრინტი არ დაუძრავს.

სერიოჟას სამსახურიდან თანამშრომლების მოსვლას ოლგა ვასილიევნა მწარე გულისტკივილით ელოდა, თუმცა ტკივილის მეტს სხვას აბა რას მოუტანდნენ. ყველას ტკივილი მოჰქონდა, გინდაც ზერელედ სცნობოდა სერიოჟა. მაგრამ რა ექნა, უნდა გაეძლო და რაც ჩქარა მოვიდოდნენ და წავიდოდნენ, მით უკეთესი იქნებოდა. ორივენი პროფკომიდან იყვნენ, როგორც ოლგა ვასილიევნა მიხვდა, რაღაც საზოგადოებრივი დავალების შესასრულებლად. კრემაცია და ურნის დასაფლავება უკვე მომხდარი იყო, დამკრძალავი კომისია დაიშალა. ასე რომ, ეს ადამიანები ან „საყოფაცხოვრებო კომისიის“ წევრები იყვნენ ან რაიმე ამდაგვარ საქმეებთან დაკავშირებულნი. მოვიდოდნენ ცოტა ხნით. საუბრის გაგრძელების შემთხვევაში ხაჭოს ამყავება ემუქრებოდა, მაგრამ ოლგა ვასილიევნას არ შეუთავაზებია, მაცივარში მოვათავსებო, თავს ძალა ვერ დაატანა. ბეზიაზიჩნი კარის წინ დაგებულ პატარა ნოხს ტკეპნიდა, აქეთ-იქით იცქირებოდა, რაღაცას გაურკვევლად ბურტყუნებდა. ოლგა ვასილიევნა ვერ მიუხვდა, რა უნდოდა. მერე უეცრად სტუმარმა ფეხსაცმელები გაიხადა და წინდების ამარა დარჩა. აჰა, არ უნდა იატაკი გააჭუჭყიანოს, გარეთ ტალახია, თითქოს ოლგა ვასილიევნას ახლა იატაკისათვის ცხელა.



რა უგრძნობი, მიუხვედრელი ადამიანები არიან! იძულებული შეიქნა იქვე კართან მიწყობილი სერიოჟას საზაფხულო ფეხსაცმელი მიეცა. თუმცა არც, ოღვა ვასილიევნასათვის იყო ეს სასიამოვნო და არც ამ კაცის მხრივ გახლდათ ლამაზი, სერიოჟას ფეხსაცმელი რომ წამოიცვა.

დედამთილი სამზარეულოში რაღაცას აკეთებდა. ოღვა ვასილიევნაც შევიდა და ქურაზე ჩაიდანი დადგა, რაღაცათი ხომ უნდა გამასპინძლებოდა. ალექსანდრა პროკოფიევნამ გამოსვლაზე უარი განაცხადა.

— არავისი დანახვა არ მინდა, ჯერ მოწამლავენ, კაცს სულს ამოხდიან, მერე კი მოდიან თანაგრძნობის გამოსახატავად. არც ვიცი, რაზე უნდა ველაპარაკო, — ბრაზიანად განაცხადა დედამთილმა.

ისე გამოდიოდა, რომ ოღვა ვასილიევნას შეეძლო ლაპარაკი ამ ხალხთან, რადგან, დედამთილის აზრით, ისიც უწამლავდა სერიოჟას სიცოცხლეს.

უნდოდა არ ეპასუხა, მაგრამ თავი ვერ შეიკავა:

— ამ ადამიანებს სულაც არ მოუწამლავთ სერიოჟასთვის სიცოცხლე, რა საჭიროა ზედმეტი ლაპარაკი. ესენი უდანაშაულონი არიან, მოვიდნენ ჩვეულებრივი ყურადღების გამოსახატავად. საერთოდაც, სერიოჟასთვის არავის არ მოუწამლავს სიცოცხლე.

— კი, კი, მოუწამლეს, — წარმოთქვა ალექსანდრა პროკოფიევნამ და სამზარეულოდან გავიდა.

ოღვა ვასილიევნა ტაბურეტზე ჩამოჯდა და ერთი-ორი წუთი გაუნძრევლად იჯდა: გული ამოვარდნაზე ჰქონდა. არა, სერიოჟასთვის არავის მოუწამლავს სიცოცხლე, მას შეუგნებლად ვნებდნენ და ისიც მხოლოდ იმიტომ, რომ ვიდაცეებს თავიანთი მიზნების მიღწევა სურდათ. ეს კი სულ სხვა ამბავია.

ოღვა ვასილიევნამ გაიგონა, როგორ შევიდა ალექსანდრა პროკოფიევნა თავის ოთახში და კარი ჩაიკეტა. უხერხული იყო ამ უცხო ადამიანების წინაშე. თუმცა ჯანდაბას! რაღა მნიშვნელობა აქვს. ოღვა ვასილიევნა წამოდგა და დიდ ოთახში ვაზით რაღაც შეიტანა. ღრმა მწუხარების გამოხატვის ნიშნად პროფკომის წარმომადგენლები მაგიდასთან გაუნძრევლად ისხდნენ. მხოლოდ იატაკზე ერთ წერტილს მიჩერებული ქალი ნელა უქნევდა თავს. უთუოდ ეგონა, ამ თავის ქნევით ჭეშმარიტ თანაგრძნობას გამოხატავდა. „რა სულელი ქალია“, — გაიფიქრა ოღვა ვასილიევნამ.

ბეზიაზიჩნი უმაღვე წამოხტა: ნუ წუხდებით, ჩაი არ გვინდა, ჩვენ მხოლოდ ერთი წუთით შემოვიარეთ. ამ მოკლეთეხება, ლოყაწითელ, ჯანმრთელი იერის კაცს თმა სულ მთლად გაჭალარავებოდა. ვერ გარკვევდი, რა ხნის კაცი იყო, ალბათ ასე ორმოცდაათი წლისა თუ იქნებოდა. დაბამბული, დაჭმუჭნული, განიერი პიჯაკი ეცვა. „ალბათ ზანდუკიდან საგანგებოდ ამოიღო, რომ ქვრივთან ამ შავი კოსტიუმით მოსულიყო“, — გაიფიქრა ოღვა ვასილიევნამ.

— აი, სერგეი აფანასიევიჩის ნივთები მოვიტანე... — სტუმარმა პორთფელიდან ამოლაგება დაიწყო. ამოიღო სიგარეტების ჩასაწყობი რკინის პატარა კოლოფი, სახაზავი, სამგზავრო დასაკეცი დანა, სერიოჟა ალბათ კონსერვის გასახსნელად ან საცობის ამოსაძრობად ხმარობდა განყოფილების „ამფსონებთან“ თავშეყრის დროს, სამი გაქეჩილი წიგნი, გრძელტარიანი სავარცხელი, 1969 წლის ფეხბურთის კალენდარი, „ინოსტრანნაია ლიტერატურას“ ერთი ნომერი და რაღაც ძველთაძველი უბის წიგნაკი. ყოველ ნივთს ისეთი სიფრთხილით იღებდა. გეგონება, შუშაა და გატეხვის ეშინიაო.

ოლგა ვასილიევნა გაშეშებული მიჩერებოდა ქმრის ამ ნივთებს, რატომ-
 ღაც უკან რომ მოუბრუნეს. უყურებდა და ფიქრობდა: „ალბათ ძნელია უცქი-
 რო მკვდარი ქმრის ნივთებს, მაშ რატომღა აკეთებენ ამას?“ უნდოდა ხელი
 დაეგლო და ყველაფერი გადაეგლო, მაგრამ არა, ფრთხილად მოაგროვა და
 ფანჯრის რაფაზე გადააწყო, თვალს მოაშორა.

მერე ბეზიაზიჩნიმ კონვერტი გაუწოდა და რაღაც უთხრა. ოლგა ვასილი-
 ევნამ მადლობა გადაუხადა და ჩაი დაასხა. კონვერტში პროფკომიდან გა-
 მოგზავნილი ფული იდო. ბეზიაზიჩნი თან ჩაის სვამდა და თან ჰყვებოდა, თუ
 როგორ განიცდიან განყოფილებაში სეროიყას სიკვდილს, როგორ აკლიათ მი-
 სი თავი, იქ ხომ სეროიყა ბევრს უყვარდა. ეს სიტყვა გულზე მოხვდა ოლგა
 ვასილიევნას, თითქოს გამოაფხიზლაო. რატომ ბევრს უყვარდა! წესით
 ასე უნდა ეთქვა: „ის ხომ ყველას უყვარდა“, ანდა „ჩვენთან ხომ უყვარდათ
 იგი“ ანდა უბრალოდ ერთი სიტყვა „უყვარდათ“. მაგრამ თქვა სხვაგვარად,
 ბევრს უყვარდაო, ეს კი იმას ნიშნავს, რომ იყვნენ და ახლაც არიან ადამია-
 ნები, რომელთაც არ უყვარდათ და არც ახლა უყვართ, როცა იგი აღარ არის.
 რა თქმა უნდა, ოლგა ვასილიევნას ეჭვიც არ ეპარებოდა, რომ იყო ასეთი რამ-
 დენიმე ადამიანი, მაგრამ მოსვლის პირველსავე წუთებში ქვრივისათვის ამის
 თქმა როგორღაც უცნაურად მოეჩვენა.

ოლგა ვასილიევნა ყურადღებით მიაჩერდა ბეზიაზიჩნის. ცდილობდა რო-
 გორმე მოეგონებინა, როგორ ახასიათებდა ამ კაცს სეროიყა, მაგრამ ვერაფე-
 რი გაიხსენა.

— თქვენ ისე ჰყვებით, თითქოს სერგეი აფანასიევიჩი ბოლო დღემდე
 თქვენთან იყო, თითქოს ინსტიტუტში წასვლის განცხადებაც არ დაეწეროს.
 იგი ხომ სინამდვილეში თავს დათხოვნილად თვლიდა, — ჩაურთო ოლგა ვასი-
 ლიევნამ.

— ოო, ეს კი არ არის სწორი! თქვენ ცდებით! — წამოიძახა ბეზიაზიჩნიმ
 და ხელი გულზე მიიღო. — მე ვიცი იმ განცხადების ამბავი. ჯერ ერთი, სა-
 კითხი ღიად დარჩა იმ, ასე ვთქვათ, უბედურ დღემდე... დირექტორი შვებუ-
 ლებაში გახლდათ. გენადი ვიტალიევიჩს კი ამ საკითხის განხილვა გადაჭრით
 არ უნდოდა...


— ვის არ უნდოდა, გენადი ვიტალიევიჩს? რას ამბობთ, ყველაზე მეტად
 სწორედ მას უნდოდა, მაგრამ სხვისი ხელით.

— მერწმუნეთ, რომ ცდებით.

— არა, არ ვცდები.

ამ კაცს უმიზეზოდ არ უთქვამს, ბევრს უყვარდაო, წამოსცდა ეს
 სიტყვები. უკვე აშკარაა, სეროიყას მტერია, ყოველ შემთხვევაში, მის მტრებს
 თანაუგრძნობდა. ნუთუ ასე სულმდაბლები არიან, რომ სეროიყას მტერს უგ-
 ზავნიან აქ და ისიც ასეთი დავალებით?

— სერგეი აფანასიევიჩი, ჩემო ბატონო, სწორედ ჩვენ სექტორში მუშა-
 ობდა, — მთრთოლვარე ხმით ალაპარაკდა ქალი, სათვალე მოიხსნა, ლაბაბიანი
 ნიკაბი მკერდს დაადო და ცხვირსახოცით სათვალეს წმენდა დაუწყო. ატირე-
 ბული გამომეტყველება ჰქონდა, ხმა თითქმის ჩაუწყდა. — რევოლუცია, ჩემო
 ბატონო, სამოქალაქო ომი. მე და სეროიყა შვიდ წელიწადს ერთად ვმუშაობ-
 დით... იგი შესანიშნავი ადამიანი იყო, ძალიან კეთილი, გულისხმიერი, კარგი
 კაცი...



ლაბაბიანი ნიკაპი უთრთოდა... ოლგა ვასილიევნა ქალს ცივად მიჩერებოდა.

— საინტერესოა, თქვენ ორთავემ ვის მიეცით ხმა, როცა სერიოჟას საქმე ირჩეოდა? — იკითხა ოლგა ვასილიევნამ.

ქალი შეკრთა, თვალები გაუფართოვდა, აცაბაცა წაუვიდა. რა თქმა უნდა, ოლგა ვასილიევნამ უხეშად ჰკითხა, უთუოდ უხერხულ მდგომარეობაში ჩააყენა სტუმრები, მაგრამ ისინიც ხომ სხედან აქ, სვამენ ჩაის, ლაპარაკობენ სერიოჟაზე...

— მე კენჭისყრაში საერთოდ არ მიმიღია მონაწილეობა, მივლინებაში გახლდით პოლონეთში, — თქვა ბეზიაზიჩნიმ და ხელი ჩაიქნია. — საერთოდაც...

მის ხელის მოძრაობასა და კილოში მხოლოდ ეს იგრძნობოდა: ღირს კია იმ სისულელის მოგონება?

— მე კი, ჩემო ბატონო, — დაიწყო სოროკინამ, — ხმა მივეცი, რომ შენიშვნები... — ქალი გაწითლდა, — ეს იყო ერთადერთი, რის გაკეთებაც შეიძლებოდა მაშინდელ პირობებში.

სწორედ ამ დროს ოთახში ირინკა შემოვიდა, უფრო სწორად, შემოვარდა და დედას მანეთნახევარი სთხოვა, თანაც აჩქარებდა, მალე მომეცი, ვიდრე უნივერსალი დაიკეტებაო. სათქმელს რომ მორჩა, სტუმრები მერეღა შეამჩნია, შემობრუნდა და მიესალმა:

— გამარჯობათ!

ოლგა ვასილიევნამ ირინა სტუმრებს წარუდგინა. გოგონამ ალერსიანი, მომხიბვლელი ღიმილი დააფრქვია, როგორც იცოდა, როცა ფულის დაცინცვლა უნდოდა.

ოლგა ვასილიევნამ ხურდა ფულის ძეხნაში კარგა ხანს ქექა ჩანთა.

— ოი, ამას რას ვხედავ! — სიხარულით წამოიძახა ირინამ და რაფასთან მიიჭრა. — რამდენს ვეძებდი! აქ საიდან გაჩნდა? — და მაშინვე გრძელტარიან სავარცხელს წაავლო ხელი.

— ეს მამას სამსახურიდან მოიტანეს. აჰა, შენ მანეთნახევარი.

— ჰოო... — წარმოთქვა გოგონამ და სავარცხელი ისევ რაფაზე დადო, მაგრამ ცოტაოდენი ყოყმანის შემდეგ მაინც იკითხა: — დედა, შეიძლება წავიღო ეს სავარცხელი? ხომ გახსოვს, მე რომ მიყიდე!

— წაილე, — ცივად მიუგო ოლგა ვასილიევნამ.

ირინკა გაიქცა. ეტყობა, ვიღაც უცდიდა შემოსასვლელში, მოისმა ჩურჩული და მერე კარიც გაჯახუნდა. სტუმრები ჩუმად ისხდნენ. ან რალაზე უნდა ელაპარაკათ. გეგონებოდა, ახლა ადგებიან და წავლენო, მაგრამ ბეზიაზიჩნიმ სერიოჟას დაუმთავრებელ დისერტაციაზე ჩამოაგდო სიტყვა: სამეცნიერო საბჭოს აზრით, — არა, ჯერ გადაწყვეტილი არ არის, მაგრამ დაბეჯითებით კითხოვენ — სამუშაო ინსტიტუტმა უნდა დაამთავროს და წიგნად გამოსცეს. გამოყოფენ მუშაკებს. სამუშაო დაგეგმილია და მთელი განყოფილებაა დაინტერესებული. საჭირო იქნება გამოუყენებელი მასალების შერჩევა, უნდა მოიძებნოს ყველაფერი, რაც სერგეი აფანასიევიჩს საქალაქოებში თუ სამუშაო მაგიდაზე დარჩა. ყველას თქვენი დახმარების იმედი აქვს.

ოლგა ვასილიევნა გრძნობდა, თანდათან როგორ წაეკიდა ბრაზი.

— მე ამ საქმეს მხოლოდ მაშინ მოვკიდებ ხელს, როცა საამისო ძალა და დრო მექნება, ახლა ვერაფრის ძეხნას ვერ დავიწყებ.

— რა თქმა უნდა, რა თქმა უნდა! ვსევოლოდ ბორისოვიჩი, ეს თავისთავად იგულისხმება. — აქაქანდა სოროკინა. — როცა ოლგა ვასილიევნა შეეცაძლებს...

— ეს ხომ ოლგა ვასილიევნასათვისაც არის კარგი, — მტკიცედ წარმოთქვა ბეზიაზიჩნიმ.

დერეფანში ბეზიაზიჩნიმ თავის თანამგზავრ ქალს პალტო მიაწოდა და მოულოდნელად უთხრა:

— ბოდიშს ვიხდი, პოლინა რომანოვნა, მაგრამ ვერ გაგაცილებთ. ოლგა ვასილიევნას ორი სიტყვა უნდა ვუთხრა.

ისევ ოთახში შემობრუნდნენ. ოლგა ვასილიევნას არ უნდოდა დერეფანში, დედამთილის ოთახის წინ ესაუბრა, იგრძნო, რაღაც უსიამოვნო უნდა გაეგონა.

ბეზიაზიჩნიმ თქვა, რომ ძალზე ეჩოთირება ამ თემაზე საუბარი, მაგრამ როგორც ურთიერთდამხმარე სალაროს მმართველობის თავმჯდომარე, იძულებულია მაინც უთხრას.

— დიახ, უნდა მოგახსენოთ, რომ სერგეი აფანასიევიჩმა სალაროდან წაიღო ას სამოცი მანეთი იმ პირობით, რომ ნახევარი წლის მანძილზე დააბრუნებდა, მაგრამ გავიდა თითქმის ორი წელი და ფული არ დაუბრუნებია. სალარო ცარიელია. თანამშრომლები პატარ-პატარა სესხებსა გვთხოვენ, დაკმაყოფილება კი არ შეგვიძლია...

ოლგა ვასილიევნა განაცვიფრა სტუმრის სიტყვებმა.

— ამდენი ფული მე არა მაქვს. — წყნარად წარმოთქვა ქალმა.

— კაცმა რომ თქვას, საქმე შემდეგნაირადაა... როგორც მოგეხსენებათ, ჩვენ არა გვაქვს უფლება... ეს მხოლოდ მეპაიეთა საერთო კრებამ უნდა ჩამოგაწეროთ, მაგრამ ისურვებდით კია... — ბეზიაზიჩნი ლულულულებდა, დაჟღავნა პირსახე ისე ემანჭებოდა და ისე ნაძალადევად აცემინებდა ცხვირს, გეგონებოდა, ამ გზით უნდა თავისი დაბნევა გამოხატოსო. — მერწმუნეთ, ძალიან არ მსიამოვნებს... მაგრამ რაკილა მე მევალება...

ოლგა ვასილიევნამ უთხრა, რომ სერიოზუს შემნახველ სალაროში ასი მანეთი ჰქონდა. მაგრამ ამ ფულის გამოტანა ჯერ არ შეუძლია, ვიდრე ძალაში არ შევა მემკვიდრეობის უფლება. ურთიერთდამხმარე სალაროდან გამოტანილი იმ ას სამოცი მანეთის ამბავი კი პირველად ესმის.

— როდის გაიტანა ეს ფული?

ბეზიაზიჩნიმ ჯიბიდან ბლოკნოტი ამოიღო და გადაფურცლა: ფული სამოცდათერთმეტი წლის 5 მარტს იყო გაცემული. საიდან გამოტყვრა ეს ყველაფერი? რაში უნდა დასჭირებოდა ფული? ალბათ ვიღაც ქალისთვის. გონებამ მაშინვე ეს უკარნახა და ალმურიც მოედო, მაგრამ სავსებით მშვიდად უპასუხა:

— მე ნამდვილად პირველად მესმის. საოცარია, ყოველთვის მიმხელდა თავის ვალებისა თუ ხარჯების ამბებს...

ასეთი პასუხი მთლად სიმართლედ ვერ ჩაითვლებოდა, მაგრამ ზოგადად მაინც მართალი იყო.

— თუ ასეა, მით უფრო სამძიმოა ჩემთვის. მაპატიეთ, — ბეზიაზიჩნი ერთხანს დუმდა, მერე დასძინა:

— შევეცდები, ყველაფერი გავაკეთო, დავარწმუნო გამგეობის წევრები,



ავუხსნა მდგომარეობა... შესაძლოა, თქვენ წერილის დაწერა მოგიხდეთ, რასაც შევიძლებ, ყველაფერს გავაკეთებ! — ბეზიაზიჩნი ხელებს გულზე იწყობდა, თავს დაბლა ხრიდა. — ამხანაგების უმრავლესობა სერიოჟასადმი კეთილად იყო განწყობილი, ასე რომ იმედი მაქვს... ზოგიერთებს სულაც წინასწარ მოველაპარაკები...

ასე გულზე ხელის დებითა და ბუტბუტით გავიდა ოთახიდან დერეფანში. თითქოს ყველაფერი ითქვა. ეს ამბავიც მორჩა. მაინც რატომ გადმოსცეს ფული, თუ თვითონვე უკან ითხოვენ? ვერაფერს მიმხვდარიყო. ოლგა ვასილიევნა შესცქეროდა ამ დაბალ, ჭაღარა კაცს, ორმოცდაათიანი წლების დროინდელ შავ დაჭმუჭნულ კოსტუმში რომ გამოწყობილიყო, და რას ლაპარაკობდა, თვითონაც აღარ ესმოდა.

დამშვიდობებისას ბეზიაზიჩნი ისევ სერიოჟას დაუმთავრებელ სამუშაოს დაუბრუნდა.

— მაშასადამე, თქვენ დაგირეკავენ მონოგრაფიის თაობაზე. გთხოვთ როგორმე შესძელით და მონახეთ ის საქაღალდე, როგორც მოგახსენეთ, ვარდისფერი ზონრები რომ აქვს.

წინათ, როცა ოლგა ვასილიევნას რაიმე უეცარი უსიამოვნება გამოუტყვრებოდა, როცა არ იცოდა, როგორ მოქცეულიყო, ყოველთვის სერიოჟას უხსნიდა გულს, ჩვეულებრივ ღამით, ძილის წინ, ირინკა რომ დაიძინებდა და დედამთილიც მიიხურავდა თავისი ოთახის კარს. სერიოჟამ საკუთარ საქმეებს ვერ გაართვა თავი, თორემ ცოლს ჭეშმარიტად საზრიან რჩევებს აძლევდა ხოლმე. ადვილად უამებდა განაწყენებასა და გულის ტკივილს. ახლავის, ვის შესჩივლოს? დედამთილს არ უნდა სცოდნოდა, ნიშნის მოგების მეტს ვერაფერს გამორჩებოდა, საკუთარი შეხედულების დადასტურებად მიიჩნევდა, ერთმანეთის გამგები ცოლ-ქმარი არ იყავით, სერიოჟას საკუთარი ცხოვრება ჰქონდაო. ოლგა ვასილიევნას მტანჯველი ფიქრები მოეძალა. არა, ეს არ იყო ეჭვიანობა, ახლა რაღაც სულ სხვაგვარ განცდას აეტანა: თითქოს ფერფლად ქცეულიყო ეჭვები, თითქოს ხელში სწორედ ამ უცნაური ფერფლით სავსე ურნა შეაჩეჩეს. ეჭვები უკვე აღარ არსებობდა, მაგრამ დაფერფლილი მათი ნეშტი კი გულთან მიკრულ ხელში ეჭირა.

რატომღაც სჯეროდა, რომ აქ ქალი იყო გარეული. ჰო, ფერფლი, ფერფლი, სხვა არაფერი. მაგრამ ხელები მაინც უკანკალებდა. შემნახველ სალაროში ოლგა ვასილიევნას ორას ოთხმოცდაათი მანეთი ჰქონდა თავის წიგნაკზე, ტელევიზორის შესაძენად ორთავეს მიერ ნაგროვები. ახლა ამ ფულის გამოტანა ასეთი საეჭვო ვალის დასაფარავად სისულელედ ეჩვენებოდა.

— დედაკაცო, ნუ ქოთქოთებ! — ეტყოდა ხოლმე სერიოჟა.

ეს გახლდათ მისი საყვარელი სიტყვები, იყო თუ არ იყო საჭირო, დღეში ათჯერ მაინც რომ იტყოდა. ეს ვაჟბატონებიც კარგები ყოფილან! ჯერ ერთი თვეც არ გასულა და ქვრივთან ვექსილით მორბიან! მაგრამ ერთი რამ ქალმა მტკიცედ იცოდა: მას და სერიოჟას ჭეშმარიტი სიახლოვე ჰქონდათ. უფრო ახლობელი სერიოჟას არავინ ჰყოლია. ისე რომ დედამთილს ურჩევნია გაჩუმდეს. ბოლო წლებში დედას აღარაფერს უმხელდა სერიოჟა, უმაღავდა თავის ამბებს. განა ერთხელ უთქვამს:

— ზოგი რამის ახსნა დედაჩემისათვის ვერ მომიხერხებია.

ალექსანდრა პროკოფიევნა ბევრ რამეს მართლაც ვერ ხვდებოდა და ეს

მიუხვედრელობა საოცრად აღიზიანებდა სერიოჟას. მათ შორის კი ეს არ ყოფილა. ოლგა ვასილიევნა ყველაფერს ზედმიწევნით ხვდებოდა. მის უბრალო ამოხვრასაც კი. ჰოდა, კიდევაც რომ ჰყოლოდა ვინმე ქალი, ასე მნიშვნელობა არა ჰქონდა.

ასე არწმუნებდა საკუთარ თავს, ცდილობდა მშვიდი და აუღელვებელი ყოფილიყო, მაგრამ აბა სადღა იყო ეს სიმშვიდე. შველაც არავის შეეძლო. ფაინასაც ვერ მოუყვება, თავისებურად გაიგებს, გულში ალბათ მასაც გაუხარდება. მისი მიზანიც ხომ სწორედ ეგ არის, გამოიყვანოს ოლგა ვასილიევნა ამ მდგომარეობიდან და სერიოჟას თუნდაც ლაქა მოსცხოს. მაგრამ მას არა სჯეროდა, არ სურდა ერწმუნა! აქ რაღაც საიდუმლო იმალებოდა. ამ მტანჯველმა ფიქრებმა თავი აატკივა, ოლგა ვასილიევნამ ჩაიცვა, აიღო ჩანთა და ქუჩაში გავიდა.

ჟინჟლავდა. გასტრონომში უკანასკნელი მუშტრები შედიოდნენ. ოცი წუთი აკლდა მაღაზიის დაკეტვას. ოლგა ვასილიევნა კარაქის, კეფირისა და ირინკასათვის ჩაიზე რამე ტკბილეულის ყიდვას აპირებდა. დამლაგებელი ქალი მყიდველებს ერეკებოდა და ბრაზიანად ბუზღუნებდა. ოლგა ვასილიევნა სალაროსთან პატარა რიგში ჩადგა. მერე რძის ნაწარმის დახლს მიადგა, გონებაში კი კვლავ თავის ფიქრებს უტრიალებდა. რამდენი ხალხია ირგვლივ, რამდენი ნაცნობი, რამდენი მეგობარი, მაგრამ აღარ ჰყავს უახლოესი ადამიანი, მაშასადამე, აღარავინ აღარ ჰყავს. მომავალში კი ყველაზე საშინელი რამ — მარტობა ელის. სიკვდილი და უბედურება უარესის მახარობელია მხოლოდ. როგორ იცხოვროს, როცა აღარ ჰყავს ის ადამიანი, ვისაც გულს გაუხსნის, ფიქრს გაუზიარებს? რიგში მდგარ ჩეკებიან ადამიანებს როგორღაც აფუსფუსებული, გაოგნებული იერი ჰქონდათ, თითქოს აქ შეცდომით შემოეხეტნენო. გასტრონომში საღამო ხანს შემოსულ, თავიანთ ფიქრებში გართულ ამ ხალხს ალბათ შინ აგვიანდებოდა. ასეთ დროს ხომ ჩვეულებრივ, საშინაო ჩუსტებში ფეხწაყოფილნი, ტელევიზორებს უსხედან ან სააბაზანოში წიკამაკოს რეცხენ ანდა სულაც სამზარეულოს მაგიდაზე ბაიკის ძველ საფენზე მოსწავლის ფორმას აუთავებენ. დიახ, ეს საქმეები ყველას წინ ელოდა, მაგრამ არა ჩქარობდნენ. გამყიდველები დინჯად მოძრაობდნენ. პირსახეზე ეტყობოდათ მთელი დღის ფეხჩაუხრელი შრომის კვალი.

ოლგა ვასილიევნას ზურგს უკან ნაცნობი ხმა შემოესმა და მიტრიალდა: ირინკა! მისი გოგონა მაღალ მაგიდასთან იდგა, სადაც ყავასა და ღვეზელებს ჭამენ ხოლმე, მაგრამ ახლა ყავა აღარ იყო, ბუფეტი უკვე დაეკეტათ. ირინკას თავისი მეგობარი ორი გოგონა ახლდა, თან ლაყბობდნენ და თან რაღაცას იღეჭებოდნენ. შეხედა ირინკას გრძელ, გაჩხინკულ ფეხებს, დამოკლებულ პალტოს, — ამ პალტოს დანახვისას ოლგა ვასილიევნას ყოველთვის გული წამიერად შეეკუმშებოდა, მაგრამ ახლის ყიდვაზე კრინტს არ ძრავდა, ირინკაც ღუმდა: აი, შემოდგომა თითქმის იწურება, ზამთრისათვის კი საკმაოდ კარგი ქურჭი აქვს. ქალიშვილის ამ აწოწილი, ოდანვ მოხრილი ტანისა და ახლანდელი მოდის მიხედვით ჩამოშლილი თმის დანახვამ ოლგა ვასილიევნას თავშეუკავებელი მოფერების სურვილი აღუძრა. თანაც ისეთი ძლიერი, კინაღამ სირბილით მიეჭრა. „ჩემი ობოლი გოგო, — გაიფიქრა ლამის აცრემლებულმა. — მას ჯერ კიდევ არ ესმის, რას ნიშნავს ეს, მაგრამ მე ხომ ვიცი!“

ოლგა ვასილიევნამ რამდენიმე ნაბიჯი გადადგა გოგონებისაკენ. ყველაზე

მაღალი, ყველაზე ღარიბულად ჩაცმული, ყველაზე კეთილი, ყველაზე ღამა-
ზი — აი ვინ არის ახლა მისი ყველაზე ახლობელი ადამიანი. მხოლოდ ამას
უნდა გაენდოს, ამას გაუზიაროს ყველაფერი. ამ გოგოზე ახლობელი აღარავინ
ჰყავს. ოლგა ვასილიევნა მაგიდას მიუახლოვდა. ირინას ყველაზე საყვარელმა
ამხანაგმა, აღმოსავლელი ქალივით ფერმკრთალმა, ნუშისთვალემა ღამაზმა და-
შამ ოლგა ვასილიევნა დაინახა და ღიმილი შეცბუნებით შეეცვალა.

— აი თურმე სად ატარებენ დროს! — წარმოთქმა ოლგა ვასილიევნამ. —
საინტერესოა, აქ რაზე მსჯელობთ?

— ჩვენ, ოლგა ვასილიევნა, საზოგადოებათმცოდნეობის გაკვეთილზე
ვსაუბრობდით, სწორედ ხვალ გვაქვს და უნდა განვიხილოთ მეტად საინტე-
რესო საკითხი — პიროვნება და საზოგადოება. ჰოდა, აი, ვბჭობდით, უკეთ
როგორ მოვემზადოთ-მეთქი. — შემცბარი გამომეტყველება დაშას ღამაზ
პირისახეზე დაცივნამ შესცვალა.

მეორე გოგონას სიცილი წასკდა. ირინკა წარბშეკვრით, მაგრამ ფარული
აღტაცებით უყურებდა დაშას: წარბშეკვრა დედას ეკუთვნოდა, აღფრთოვა-
ნება კი, რასაკვირველია, დაშას. მერედა როგორ ძალიან უყვარდა საწყალ
ირინკას ეს ურცხვი გოგო. ოლგა ვასილიევნას კი დაშა არ მოსწონდა, არა-
გულწრფელ, პრანჭია გოგოდ თვლიდა და, რაც ყველაზე ცუდი იყო, დროზე
ადრე მომწიფებულად. ირინკას შემთხვევით წამოცდენილი სიტყვების მიხედ-
ვით ოლგა ვასილიევნამ დაასკვნა, რომ დაშას მეტად დახლართული პირადი
ცხოვრება ჰქონდა, რომ არსებობდა ვიღაც მასზე ბევრად უფროსი კაცი, ვი-
საც დაშა მეგობრად იხსენიებდა. ღმერთმა უწყის, ვინ იყო ან რა მეგობარი
იყო ეს კაცი. ოლგა ვასილიევნა მოხერხებულად ცდილობდა ირინასათვის კი-
დევ რამე დაეცდინა, მაგრამ ვერაფერი გამოტყუა. არ უნდოდა ერწმუნა ამ
ამბის სიმართლე, გოგონები ხომ ჯერ ჩვიდმეტი წლისაც არ იყვნენ. ამ ასაკში
ოლგა ვასილიევნა სწავლის გარდა არაფერზე ფიქრობდა. მერედა რაოდენ პა-
სუხისმგებლობას ითხოვს მეთაე კლასი!

— მგონი, უნივერსიტეტში რაღაც უნდა გეყიდა, ფული იმიტომ გამომარ-
თვი, — უთხრა დაშას თავხედობით გაღიზიანებულმა ოლგა ვასილიევნამ ირინ-
კას. — შენ კი, როგორც ვხედავ, ნამცხვრებსა და სიგარეტებში ფლანგავ. გო-
გოებო, აბა რატომ ეწევით პაპიროსს?

გოგონებმა რაღაც სასაცილო წაიბურტყუნეს, მგონი, განზრახ გაუგებ-
რად და დაცივნით. ოლგა ვასილიევნამ იგრძნო, გოგონებს არ სიამოვნებდათ
მისი იქ ყოფნა. სულელურად დარცხვენილი ირინკა დედას არც უყურებდა,
სამაგიეროდ. ამხანაგების სიტყვებიდან ერთი არ ეკარგებოდა და როგორღაც
არაბუნებრივად კისკისებდა. ირინკას მეორე ამხანაგი ლენა კუკშინა ზანტი,
უსიცოცხლო, დუდრუქანა გოგო იყო. ძალიან შეძლებული ოჯახის შვილს
ზამშის პალტო ეცვა, ფუნთულა ხელზე თვლიანი ბეჭედი ეკეთა — რა სა-
ზიზღრობაა. წინათ ვერც ერთი გოგო სკოლაში ბეჭდის გაკეთებას ვერ გაბე-
დავდა! — მის გვერდით მაგიდაზე ღამაზი დასაკეცი იაპონული ქოლგა იდო.
ოლგა ვასილიევნამ ასეთი ქოლგა ერთ ნაცნობ ქალს უნახა. კუკშინას ეტყო-
ბოდა კიდევ უზრუნველობა და სიმდიდრე. ირინკას თქმით, კეთილი, გულის-
ხმიერი გოგო იყო. მხოლოდ ის არ მოსწონდა, დაშას რომ უძვრებოდა. აბა
დაშა ხომ ამათი ნამდვილი უგვირგვინო დედოფალი გახლდათ, ეს მოლეული
გოგო, ესა; მისი სიტყვაც კანონი იყო.

— ირა, წავიდეთ შინ, ვახშობის დროა! — უთხრა ოლგა ვასილიევნამ და იდაყვზე წაავლო ხელი, ძალით გამოსაწევად კი არა, უბრალოდ, შვილისათვის უნდოდა ხელი შეეხო.

— დედა, მე როცა მომინდება, მაშინ მოვალ, — მკვახედ, უეცარი გაბრაზებით მიუგო ირინკამ.

— რას ნიშნავს, როცა მოგინდება?

— იმას ნიშნავს, რომ როცა მომინდება, მაშინ წამოვალ.

— არა, შენ ახლა ჩემთან ერთად წამოხვალ.

— არა, არ წამოვალ.

ოლგა ვასილიევნამ იგრძნო, როგორ მოაწვა ბრაზი.

— კი მაგრამ, როგორ მელაპარაკები... ასე... ისიც ახლა... — უთხრა მღელვარებისგან სუნთქვაშეკრულმა ქალმა.

— შენ როგორღა მელაპარაკები? იქნებ მეც შემემთხვა უსიამოვნება და გოგოებს მინდა ვუთხრა.

— აჰ, შენც შეგემთხვა, არა? — წამოიყვირა ოლგა ვასილიევნამ, — ეჰ, შე...

ქალი გატრიალდა და მალაზიიდან გავიდა.

ვიღაც დაეწია და მკლავზე ხელი მოჰკიდა.

— ოლგა ვასილიევნა! დაიცადეთ!

დაშა აღმოჩნდა. მისი თაფლისფერი ლამაზი თვალები კვლავ შიშით შეჭყურებდნენ ოლგა ვასილიევნას.

— ირამ მართალი გითხრათ, ერთ მეგობარ ბიჭთან ვერა აქვს საქმე კარგად — თქვენც იცნობთ ალბათ ბორიას. ჰოდა, ცოტა სალაპარაკო გვაქვს. თუნდაც მხოლოდ ათი წუთი. ახლა ისედაც გამოგვეყრიან მალაზიიდან და ბულვარზე ჩავისეირნებთ.

— ირინა საძაგელი გოგოა, — ბრაზიანად წარმოთქვა ოლგა ვასილიევნამ.

მერე, როცა ლიფტით მერვე სართულზე აღიოდა, გუნებაში ფიქრობდა: ჭეშმარიტება აი ეს არის. მარტოდმარტო იმყოფება დახშულ ყუთში. შეგიძლია ლურსმნით ნაკაწრი წარწერები იკითხო, მაგრამ ვერავის ეტყვი შენს გულის ტკივილს. ვერავინ გაიგონებს. რა მნიშვნელობა აქვს, სადმე შახტში მარტოხელა კაცი მალლა მიცოცავს თუ დაბლა, გააჩნია, რას ჩათვლი სიმალღედ. „ვერავინ გაიგონებს“, ხმამალლა წარმოთქვა ოლგა ვასილიევნამ. „ალო? ილაპარაკეთ ხმამალლა!“ ზედ ყურთან მოესმა გუგუნა, უსიამოვნო ხმა.

ქალი შეკრთა: თურმე დისპეტჩერი გამოეპასუხა მესამე კორპუსიდან. როცა გჭირდება, ყვირილსაც ვერ გააგონებ, ახლა კი გაიგონა. მაშასადამე. უნდა ილაპარაკო, იყვირო, თუნდაც ირგვლივ მარტო შიშველი კედლები გერთყას. ვიღაცა მაინც გაიგონებს.

ირინკა ათი წუთის მაგივრად ერთი საათის შემდეგ მოვიდა. ოლგა ვასილიევნამ უკვე აპატია ყველაფერი, როგორც კი კარი შემოაღო და თავდახრილი, სრუტუნ-სრუტუნით შემოვიდა. რა თქმა უნდა, გაიყინა, აბა რას უზამდა იმ თხელ პალტოში მთელი საათი ბულვარზე სეირნობა. როცა დაინახა შემცბარი. დამნაშავე, ბავშვური პირსახე, კვლავ სიბრაღულისა და ალერსის ტალღამ გადაუარა. „რა უსინდისო ვარ! რატომ ვუყვირე? — გაიფიქრა გულაჩუყებულმა ოლგა ვასილიევნამ. — ეს ხომ ობოლი, უმამო გოგოა, არა ჰყავს დამცველი. მე თუ არ შევიბრაღე, მაშ ვილა შეიბრაღებს...“



ოლგა ვასილიევნამ უხმოდ გადაუსვა შვილს თმაზე ხელი. გოგონა უეცრად მიეკრა დედას, ჩაეხუტა. ხან ლოყაზე უსლაგუნებდა თავის გაყინულ ცხვირ-პირს და ხან ყურზე, რაღაცას საწყლად ბუტბუტებდა. ბუტბუტებდა ოლგა ვასილიევნაც, თუმცა ერთმანეთის არაფერი ესმოდათ. ყველაფერი ეს სულ რაღაც ორიოდ წამში მოხდა. მერე, ასევე გადახვეულები, სამხარეულოში გავიდნენ. ცრემლებს ძლივს იკავებდნენ. უნდოდათ მარტო დარჩენილიყვნენ, სულ მარტო, ბებუის გარეშე, იმიტომ რომ ერთმანეთზე ახლობელი ადამიანი მათ არ ჰყავდათ. იქ დიდხანს ისხდნენ, დალიეს ჩაი. ირინკამ ბორიას ამბებიც გაანდო. საერთოდ გულჩათხრობილი გოგო იყო, იშვიათად უზიარებდა გულსნადებს, თვითონ უმკლავდებოდა, თუ რამ გასაჭირი შეხვდებოდა თავის პატარა ცხოვრებაში. ეს განდობა კი ნიშნავდა, რომ მართლა გაუჭირდა, დახმარება სჭირდებოდა. ბორია აღარ ურეკავს შინ, სკოლაშიაც აღარ ეკარება. ირინკას აზრით, ბორიას იმ გოგომ შეუცვალა გუნება, სამხრეთში მასთან ერთად რომ ისვენებდა. დაშა შეპირდა, ყველაფერს გავიგებო. ბორია ერთი უშნო ბიჭი იყო, პარალელურ კლასში სწავლობდა. ირინკას დიდად არასოდეს მოსწონდა, თუმცა ეს მწუხარება უკვე ნამდვილსა ჰგავდა.

ოლგა ვასილიევნა რაღაც საალერსო სიტყვებს ეჩურჩულებოდა, ერთხანს ეფერა. დააწყნარა. მერე ირინკა სააბაზანოში გავიდა თავის დასაბანად. ოლგა ვასილიევნამ მაგიდიდან ჭუჭყიანი თეფშები აალაგა და ონკანის ქვეშ გასარეცხად ჩააწყო. ასე გვიან ცხელი წყალი ცუდად მოდიოდა და არც საკმარისად ცხელი იყო. ჩაიდნით წყლის გაცხელება დაეზარა. იფიქრა, ხვალ შვიდ საათზე ავდგები და დავრეცხავო. უეცრად ტელეფონის ზარი გაისმა. რეკავდა ის ქალი, ბეზიაზიჩნის რომ მოჰყვა.

— მაპატიეთ, ასე გვიან რომ გირეკავთ, მაგრამ ვინემ კუზმინკამდე მოვალწიე. ვინემ, ჩემო ბატონო, მივტრიალდ-მოვტრიალდი, ვინემ რაღაც გავაკეთე... ჰოდა, აი რაზე გირეკავთ: ალბათ ვსევოლოდ ბორისოვიჩმა იმ ურთიერთდამხმარე სალაროს ვალით დაგაშინათ. საშიში კი არაფერია, სერგეი აფანასიევიჩის ვალს ჩამოვწერთ. ეს, შეიძლება ითქვას, უკვე გადაწყვეტილიცაა. გესმით? თქვენ კი გთხოვთ, ჩემო ბატონო, არც ერთი საქალაღე, არც ერთი ფურცელი იმათ ხელში არ ჩაუგდოთ. ჩემთვის სულაც არ არის ხელსაყრელი ეს დარეკვა, მაგრამ მე უბრალოდ დიდ პატივს ვცემდი სერგეი აფანასიევიჩს. მაპატიეთ. ძვირფასო ოლგა ვასილიევნა, ასე გვიან რომ შეგაწუხეთ. კარგად იყავით!

ამ უცნაურმა საუბარმა, თუნდაც ამ სიტყვამ „კარგად იყავით!“ ახალი საფიქრალი გაუჩინა, თუმცა ოლგა ვასილიევნას აზრებს მიმართულება მაინც ვერ შეუცვალა, რადგან ღამით მას მხოლოდ წარსულ ამბებზე შეეძლო ფიქრი და არა მომავალზე.

ამ საქმეს რა ხანია უნდა ჩაჯდომოდა, მაგრამ ნებისყოფა არ ეყო. სერიოზულ საქალაღდეები, ბლოკნოტები, თხელი თუ სქელი რვეულები, ალბომებში ულაზათოდ ჩაკრული გაზეთების ამონაჭრები, ჟურნალებიდან ამოგლეჯილი ფურცლები, დასტებად შეკრული ნაწერი ქალაღდეები ზოგი სად ეწყო და ზოგი სად — ნაწილი სამუშაო მაგიდის უჯრებში ელაგა, ნაწილი კარადის ქვედა თაროებზე. რამდენიმე საქალაღდე კარადის თავზე, ჭერქვეშ იყო შეგდებული და თვეობით არ უწევდა მტვრის გადაწმენდა. ოლგა ვასილიევნა ჯავრობდა და სახლის დალაგებისას ამ „ხარახურის“ სადმე მოთავსებას სთხოვ-

და ქმარს; სულ უკეთესი, ნაგვის ყუთში თუ ჩაადებდა, რადგან თუ „ხარა-ხურა“ არა, არც სხვენზე იქნებოდა შეგდებული. რემონტის დროს სერიოჟას კიდევ ბევრი სხვა ნაწერიც შემოდეს ზემოთ. დიახ, ყველაფერი ეს ჯერ კიდევ მისი სისხლი და ხორცი იყო, მისი სუნი სდიოდა. ამიტომაც უჭირდა, ეძნელებოდა ხელის შეხება. ქალმა იცოდა, ადრე თუ გვიან ეს მწარე განცდა გაუხელდებოდა, მაგრამ ჯერ არ შეეძლო. არც კარადაში დაკიდული მისი ტანსაცმლის შეხედვა და ხელის ხლება ძალუძდა. ფაინამ უთხრა, უნდა გაყიდოო. ყველა ქვრივი ასე აკეთებს, თავი რომ არ გაიმწარონო. მუშტრის მოყვანასაც შეპირდა. რვა წლის წინ დაქვრივებულმა ფედია პრასკუხინის ცოლმა ლუიზამაც იგივე უთხრა, ფედიას ტანსაცმელი მაშინვე ერთიანად გავყიდეო. მაგრამ ოღვა ვასილიევნას ვერ გადაეწყვიტა, ვერ შელეოდა.

კაცმა რომ თქვას, ამ საქმეებისათვის დროც არა ჰქონდა. ლუიზა არ მსახურობდა — მგონი, ახლა დაიწყო სადღაც დამზღვევ აგენტად მუშაობა, იჯდა შინ ბავშვებთან. ძიძაც ჰყავდა და დედაც მასთან ცხოვრობდა. შინ ჯდომამ კი შეიძლება შეშალოს ადამიანი.

აბა მისი სურათების შეხედვა ხომ ყველაზე მწარე ტკივილი იყო. კედელზე ეკიდა სერიოჟას ახალგაზრდობის დროინდელი ძალიან კარგი სურათი. ჩაფიქრებით მღიმარს პირში რაღაც ბალახის ღერი გაერჭო. ოღვა ვასილიევნას ძალიან უყვარდა ეს სურათი და კარგა ხანია, ჯერ კიდევ სერიოჟას სიცოცხლეში დაკიდა. ჰოდა, მიჩვეული იყო. და მაინც ოთახში შესული ოღვა ვასილიევნა ცდილობდა სურათისათვის არ შეეხედა, ანდა წამით უეცრად შეეგლო თვალი. ალბომზე ხომ ლაპარაკიც არ შეიძლებოდა. სადღაც შორს შეინახა. ყოველი შეხება ტკივილს გვრიდა. ცხოვრება კი სწორედ ასეთი შეხებებისგან შედგება, — ვინაიდან ათასობით ძაფია და ყოველ ძაფს ცოცხალი სხეულიდან, ჭრილობიდან გგლეჯენ. თავდაპირველად ეგონა: როცა ეს ნაზი, წვრილზე წვრილი ძაფები დაწყდება, შევბას ვიგრძნობო, მაგრამ ახლა აზრი შეეცვალა. ალბათ არასოდეს დადგება ასეთი დრო, რადგან ძაფებს თვლა არ აქვს. ყოველი საგანი, ყოველი ნაცნობი, ყოველი აზრი, ყოველი სიტყვაც კი, ყველაფერი და ყოველივე, რაც კი არსებობს ქვეყანაზე, ამ ძაფებით სწორედ სერიოჟას უკავშირდება. განა ეყოფა კი სიცოცხლე? აი გუშინ რაღაც საქმეზე ნოვობასმანაიაზე იყო. მეტრო „ლერმონტოვსკაიდან“ ამოვიდა თუ არა, გულში ისარივით მოხვდა, — მოაგონდა, როგორ გარბოდნენ ისა და სერიოჟა სადოვაიას ჩაყოლებით ერთ ყინვიან საღამოს ვილაცასთან სტუმრად. უკვე მეშვიდე თვეა და არავითარი შვება არ უგრძვნია. ზოგი ამბობს, ხუთი წელი უნდა გავიდესო. მაგრამ ლუიზამ ხომ თქვა, რომ შემსუბუქება დღემდე არ უგრძვნია, თუმცა ხუთი წელი რა ხანია გავიდა.

ლუიზა ამას წინათ ქუჩაში შეხვდა, სრულიად შემთხვევით, ძალიან გაუხარდათ ერთმანეთის ნახვა. რამდენი რამ უნდოდა ეთქვა, ეკითხა: როგორა ხარ? რა გუნება-განწყობაზე? რასა გრძნობ? მოგეშვა თუ არა, თუნდაც აი ამოდენაზე, ერთი ნამცეცით მაინც?

ლუიზა უყურებდა თავისი ნაცრისფერი, ჩამკვდარი თვალებით:

— არ ვიცი, რითი გავზომო, არ არსებობს საამისო საზომი...

ოღვა ვასილიევნას იმის კითხვაც კი უნდოდა, თუ გყავს ვინმეო, მაგრამ ვერ გაბედა. ამ ომში ყველა მარტოა, ყველამ თავისთვის უნდა იბრძოდოს. გამოიყურებოდა ლუიზა კარგად. ეცვა თავისი ძველი. უკვე ხანაწმენდი ტყა-



ვის პალტო, ყავისფრის ნაცვლად გამოხუნებული უსიამო ვარდისფერი რომ დასდებოდა.

— როგორა გყავს ბავშვები? — ჰკითხა ოლგა ვასილიევნამ.

— ძალიან კარგად, — უპასუხა ლუიზამ. საერთოდაც ყველა კითხვას ერთნაირი პასუხი გასცა: „ძალიან კარგად“.

რვა წლის უკან, სექტემბრის თვის ერთ ადრიან დილით კარზე გაბმული რეკვა ატყდა. ოლგა ვასილიევნა გაოცდა, როცა კართან გენა კლიმუკი დაინახა, — სერიოჟას ძველი მეგობარი, მაშინ ჯერ კიდევ გენად წოდებული. საკვირველი ის იყო, რომ იგი იმ დროს კოკტებელის რიყიან პლაჟზე დილის ვარჯიშით უნდა ყოფილიყო გართული. კლიმუკს სახეზე წითელი ლაქები ეყარა. ქალს არც კი მისალმებია, ისე ჰკითხა: „სად არის სერგეი?“ შემოსასვლელში შემოვიდა და მხრებით კედელს მიეყრდნო. წვერის გასაპარსად გამზადებული, პირგასაპნული სერიოჟა სააბაზანოდან გამოვიდა.

— სერიოჟა, ლუიზას შენ უნდა უთხრა... მე არ შემიძლია... გესმის... მე ვერ... ვერ.... — და ეს პირმრგვალი, უზარმაზარი კაცი შებარბაცდა, მაგრამ არ დაცემულა, როგორღაც ჩაიჩოქა. მძიმედ სუნთქავდა.

ორი დღით ადრე კლიმუკი და ფედია ერთი კვირით სამხრეთისაკენ გავარდნენ. ფედიამ ის იყო ახალი „მოსკვიჩი“ გამოიყვანა. ეს ყმაწვილები აწყობდნენ ხოლმე ზოგჯერ ეგრეთწოდებულ „მარტოხელა განავარდებებს“. სერიოჟასაც ეპატიყებოდნენ, მაგრამ ოლგა ვასილიევნა ყოველ ღონეს ხმარობდა სერიოჟასათვის ამ „განავარდებაზე“ უარი ეთქმევიინებინა. იმასაც ვერ იტყოდით, მამაკაცების მეგობრობაზე ეჭვიანობსო, არც სერიოჟას ზნეობაზე ზრუნავდა დიდად, თუმცა ძველ მეგობართა წრეს ჯერაც შერჩენოდა ის შეუზღუდავი სტუდენტური ჩვევები. სამივეს ერთად შეყრა და ძველი ჩვევების ხელახლა გაცოცხლება ერთი იყო. უსაქციელობდნენ, ფახიფუხობდნენ, კაცმა არ იცის, რაზე ოცნებობდნენ. ოლგა ვასილიევნას ასეთ წინააღმდეგობას ვერც სერიოჟას ჯანმრთელობაზე ზრუნვას მიაწერდით. უბრალოდ არ უყვარდა, როცა სერიოჟა თვალისაგან ეკარგებოდა. იგი ყოველთვის მის გვერდით უნდა ყოფილიყო, სადმე მახლობლად, მთლად უკეთესი, თუ სულაც ერთ ოთახში. ეს ალბათ მისი ცხოვრების უდიდესი შეცდომა იყო, მაგრამ საკუთარი თავის შეცვლა არ ძალუძდა და არცა ცდილობდა.

ყოველთვის ეურჩებოდა კლიმუკის, ფედიასა თუ სხვების ხრიკებს, წაერთმიათ მისთვის სერიოჟა! ზოგჯერ ძალზე მარჯვედ გამოძებნიდა მიზეზს, მოხერხებულად მოიგონებდა ავადმყოფობას, რომ სერიოჟა მის გვერდით ყოფილიყო. ზოგჯერ კი დაუფარავად და პირდაპირ მოუწოდებდა სინდის-ნამუსისა და დიდსულოვნებისაკენ. კაცმა რომ თქვას, აქ ორი ადამიანის ეგოიზმი ეჯახებოდა ერთმანეთს. სერიოჟას უყვარდა ეს „განავარდება“, რათა ყოველდღიურ გაწამაწიას, საქმეებს, შინაურებს გამოთიშვოდა. განსაკუთრებით მუზეუმში შეძენილ მეგობარ ფედოროვთან „განავარდება“ საიმოვნებდა, ანდა ფედია პრასკუხინთან ერთად მანქანით გასეირნება. თუნდაც მხოლოდ რესტორან „სევანში“ შესვლა. დიახ, ქალმა იცოდა სერიოჟას ეს გატაცება. იქნებ სხვადასხვა მიზეზის გამო იგი აუცილებელიც იყო, მაგრამ საკუთარი თავისათვის ვერაფერი მოეხერხებინა. როცა სერიოჟა ხელიდან დაუძვრებოდა, ოლგა ვასილიევნა ავადმყოფს ემგვანებოდა ხოლმე, ზოგჯერ ჭინჭრის ციებიანივით დააყრიდა, მაგრამ სერიოჟა შეუპოვრად იცავდა თავის დამოუკიდებლო-

ბას და იშვიათად უთმობდა. სწორედ ეს იშვიათი შემთხვევა მოხდა იმ სექტემბერშიც. ინსტიტუტში მთავრდებოდა რემონტი, მუშაობა შეწყვეტილი იყო, ყველა შინ იჯდა. ჰოდა, ფედია და კლიმუკა ზღვაზე ერთკვირიანი გასეირნება გადაწყვიტეს, აგულიანებდნენ სერიოჟასაც. ინსტიტუტში ისეთი არეულ-დარეულობა იყო, აბა ვინ რას ეტყობათ. ანკი ვის უნდა ეთქვა? ფედია პრასკუხინი თავად იყო უფროსი, სწავლული მდივანი.

სერიოჟასაც ძალიან უნდოდა წასვლა. ოლგა ვასილიევნას კი წინათგრძნობამ უკარნახა: არაფრით არ გაუშვაო. არა, წინათგრძნობამ კი არა... უბრალოდ სწყინდა, უმისოდ რომ გაიქროლებდა სამხრეთისკენ, გაერთობოდა და, რა თქმა უნდა, დაღევდა. ქალი იმიზეზებდა უფულობას, იმასაც, რომ არც დისერტაციის საქმე მიდიოდა წინ და არც იმ ყალთაბანდ ილია ვლადიმროვიჩის შემწეობით წიგნის საქმე იძვროდა ადგილიდან. რა თქმა უნდა, ფედია პრასკუხინი და გენია კლიმუკი იქნებიან დროს ტარების ხასიათზე. მათი საქმე სულ სხვაა, მათ სხვა მდგომარეობა შეიქმნეს.

— ან ის ოცდაათი მანეთი რას გეყოფა, ამ მგზავრობისათვის რომ შემიძლია მოგცე. ატორლიალებული მესუფრია გამოხვალ და მეტი არაფერი. არც ეს ამბავი გაშინებს?

— არა, არ მაშინებს, ჩვენ ვაჟკაცური ანგარიში გვაქვს, ქალებივით კაპიკებს კი არ ვუთვლით ერთმანეთს, — სწრაფად მიუგო სერიოჟამ, ის კი არა, ქედმაღლურადაც კი დაუმატა:

— შენ ამას ვერც მიხვდები!

საწყალი, როგორ ცდებოდა. მკაცრი იყო ოლგა ვასილიევნას პასუხიც:

— თუ იმათ ყირიმში წაყვები, იცოდე, გაგეყრები.

ვილაცამ დაურეკა კიდევ, ახლა აღარ ახსოვს, ლუიზა იყო თუ ის სულელი მარა კლიმუკი — კაცებს შეეგულიანებინათ. თხოვდა, მოტყდი, ნუ ჯიუტობ, ნება დართეო. მაგრამ ქალი უდრეკად იდგა. თუ წავა — გავეყრებიო. კი, ბატონო, წაბრძანდი, არავინ გიჭერს, მაგრამ როცა ჩამოხვალ, აქ აღარ დაგხვდები. ნუთუ მართლა წინათგრძნობამ უკარნახა? სერიოჟა გაცოფდა, რამდენიმე დღე არ ელაპარაკებოდა, მაგრამ გამგზავრება მაინც ვერ გაბედა.

ხარკოვის სამხრეთით გამთენიისას შარავზას ვილაც მოხუცი გადადიოდა. ეტყობა, საყვირი ვერ გაიგონა, ფედია კი სიჩქარე ვერ შეანელა და უეცრად მარცხნივ გაუხვია. და აქ მოხდა საშინელება. მათ მანქანას „მაზი“ დაეჯახა.


ფედია სოფლის საავადმყოფოში გარდაიცვალა, ისე რომ გრძნობაზე არც მოსულა. კლიმუკი დაიბეჟა, მაგრამ გადარჩა. თავისი ძლიერი ხელებით კაბინის კედელს მიყრდნობოდა და, თუმცა მანქანა ორჯერ ამოტრიალდა, მაინც საღსალამათი დარჩა.

ახლა კი გაფითრებულ ტუჩებს ძლივსღა ამოძრავებდა...

— ცხედარი ავტობუსით მოაქვთ... მე მივეცი ას ოცი მანეთი...

ლუიზასთან შენ წადიო, ემუდარებოდა. სერიოჟაც წავიდა. დიახ, იგი მართლაც ჭეშმარიტი მეგობარი იყო. ამიტომაც ბევრს უყვარდა. გაჭირვების ჟამს მასთან მოვარდებოდნენ ხოლმე, თუმცა მისი ამ ბუნების წყალობით მეტისმეტსაც აკეთებდნენ.

ოლგა ვასილიევნამ ღამით ვეღარ მოითმინა, თუმცა არავითარ შემთხვევაში არ უნდა ეთქვა, და ყურში ჩუმად ჩაულაპარაკა:



— სერიოზა, ხედავ, როგორ გადაგარჩინე... როგორი მისანი ვყოფილვარ?

სერიოზამ უხმოდ მოიცილა ქალი და კედლისკენ გადაბრუნდა.

ოლგა ვასილიევნა მაშინვე მიხვდა, კარგად რომ არ გამოუვიდა, მაგრამ რა ექნა, გულში ველარ დაიტია განცდები. იწვოდა ფედიას ცოდვით, ეს კაცი ნამდვილად უყვარდა, მაგრამ რაღაც უცნაური, ფარული თვითკმაყოფილების გრძნობა გაჩენოდა და ვერ დაეძლია. ალბათ ამდაგვარი გრძნობა ეუფლებოდათ ომში ადამიანებს, როცა გვერდით ამხანაგს უკლავდნენ, თვითონ კი ცოცხალი და უვნებელი რჩებოდნენ. არა, არ უნდა ეთქვა. ეს სწორედ ის წუთი გახლდათ, როცა ხმამაღლა წარმოთქმა აზრს აყალბებს.

— მეგონა, ენას კბილს დააჭერდი... მაგრამ არა, მაინც თქვი...

რასაკვირველია, არ უნდა ეთქვა, მაგრამ არც სერიოზას უნდა ეპასუხა ასეთი გაბორბტებით. ბოლოს და ბოლოს მართლაც ხომ გადაარჩინა.

მე ასეთი ამხანაგი აღარ მეყოლებოდა, ამბობდა სერიოზა ფედიასზე. ჭეშმარიტად, ნამდვილი მეგობარი იყო. სამთავე ერთ კურსზე სწავლობდნენ — ოდესღაც, ძალიან დიდი ხნის წინ, სერიოზა, ფედია და გენა კლიმუკი. ოლგა ვასილიევნას აკვირვებდა ძველი ამხანაგებისადმი მისი ასეთი გულუბრყვილო სიყვარული, სულ ერთია, სკოლის მეგობრები იყვნენ თუ ინსტიტუტისა. ცდილობდა არ დაენახა მათი ნაკლი, მათი სასაცილო თუ უსიამო თვისებები. „ჩემი სკოლელი“ ანდა „ჩემი კურსელი“ სერიოზასთვის დიდ რასმე ნიშნავდა და ყველა სიკეთეს იტევდა. ამორჩევით კი არა, გარემოებით განსაზღვრული მეგობრობა: ვისთანაც აღმოვჩნდი მერხზე, იმასთან ვმეგობრობ. თუმცა ეს უცნაურობა ყველა მამაკაცს ახასიათებს. არ შეუძლიათ ძველი ძმაკაცების გარეშე. ოლგა ვასილიევნა კი მშვენივრად გრძნობდა თავს უმეგობრებოდ. ოღონდ სერიოზა კი ჰყოლოდა და ფაინასა და სხვა მეგობრებს თუნდაც თვეობით არ ნახავდა. მას მხოლოდ სერიოზა უნდოდა — ეს ერთი კაცი. ლუიზასა და მარას იძულებით ხვდებოდა, რადგან კაცები ვერ სძლებდნენ უერთმანეთოდ. სულ იმას გაიძახოდნენ: „ერთად ვიყოთ“, „ერთად ვიყოთ“, „რაღაც დაგვიძველდა პურმარილი“.

ახლა მათ საერთო ინტერესებიც ჰქონდათ: სამეცნიერო ინსტიტუტი და ამ ინსტიტუტის ამბები. გენა კლიმუკი ხუმრობით იტყოდა ხოლმე და თან თვალს ეშმაკურად ჩააპაჭუნებდა:

— მოდით, ჩვენი პატარა ჯგუფი ჩამოვაყალიბოთ, ჩვენი პატარა ხროვა, ჩვენი პატარა მოყუჩებული ბანდა.

ფედია არ ლაყბობდა, საქმიანად მოქმედებდა, ჭეშმარიტად ეხმარებოდა: ძალით გადაიყვანა სერიოზა ინსტიტუტში, ყოველნაირად ხელს უწყობდა, მოამატებინა ხელფასი. დაარწმუნა ინსტიტუტის დირექტორი, თვალდაუკლიპული ივან ვვდოკიმოვიჩ დემჩენკო, სერიოზამ დისერტაციის თემა უნდა გამოსცვალოსო. იქით თემის ხელმძღვანელი პროფესორი ვიატკინიც მოთაფლა, სულაც რომ არ სიამოვნებდა თემის შეცვლა. ყველაფერი ამის მოგვარება არცთუ იოლი საქმე იყო, მაგრამ მაინც მოახერხა, მოაგვარა. ფედია რომ ცოცხალი ყოფილიყო და კვლავ სწავლულ მდივნად ემუშავა, რა თქმა უნდა, სერიოზას ასე ვერაფერ ატკენდა გულს, იმ სიმწარესაც ააშორებდა, რაც სწორედ იმ ძმაკაცის, ძველი მეგობარი კლიმუკისა და მისი „პატარა ბანდის“ წყალობით იგემა.

გენა ისე უცებ და ისეთი ხალისით ჩახტა სწავლული მდივნის სავარძელ-

ში, იფიქრებდი, ბულგაკოვის ვოლანდის მსგავსად განგებ მოაწყობეს ამბავი, განგებ დააჯახა მანქანები ერთმანეთსო.

თანამდებობა რომ მიიღო, რალაც დაირღვა, რალაც შეუმჩნეველად გაწყდა. ოლგა ვასილიევნამ კარგა ხანს ვერც შეამჩნია ეს ცვლილება. გენა დარეკვისას ძველებურად, მხნედ და მხიარულად მოიკითხავდა ხოლმე. ზოგჯერ მარაც ურეკავდა, უზიარებდა ოლგა ვასილიევნას, რა იყო ახალი ტრიკოტაჟისა და კოსმეტიკის დარგში. იგი ხომ ბრწყინვალე ადგილას, პეტროვკაზე, პასაჟის გვერდით მუშაობდა. და აი, გავიდა რამდენიმე თვე, ვიდრე ოლგა ვასილიევნა მიხვდებოდა, რომ აღარც გენას ხვდება და აღარც მარას. ურთიერთობა მარტო დარეკვითღა იფარგლებოდა. რა ხანია აღარ გაუგონია გენკას მხიარული შეძახილი: „დაგვიძველდა პურმარილი!“ თუმცა როცა ჩაუფიქრდა, ეს ამბავი ფედიას სიკვდილს მიაწერა. ყველაზე ხშირად მართლაც ფედიასთან იკრიბებოდნენ. იქ ხომ ფედიას სხვა ამხანაგებიც მოდიოდნენ: ფიზიკოსი შჩუპაკოვი თავისი ბულგარელი მეუღლით კრასინათი და ექიმი ცოლ-ქმარი ლუჟსკები. ქალი რენტგენოლოგი იყო, ქმარი ფსიქიატრი. კაცმა რომ თქვას, უფრო ამ ლუჟსკების ხათრით დადიოდა იგი ფედიასა და ლუიზასთან. ოლგა ვასილიევნას მედიცინა ძალიან აინტერესებდა და უყვარდა ექიმებთან საუბარი.

მაგრამ ქმრის სიკვდილის შემდეგ ლუიზა უკვე აღარ უყრიდა თავს მეგობრებს. ასე ყველა ერთად მხოლოდ ფედიას ორმოცზე იყვნენ და შემდეგ კიდევ მისი დალუპვის ექვსი წლის თავზე. რაც შეეხება გენა კლიმუკს, იგი არც მანამდე აგლეჯდათ კალთებს, შინ მეწვიეთო. სულ ერთთავად რემონტში, გადაკეთებასა და ბინის გამოცვლაში იყო. ზრდიდა და ზრდიდა ბინის ფართობს, თან სულ უფრო კეთილმოწყობილ რაიონებში. ახლა, მგონი, ახალი არბატის ცათამბჯენში ცხოვრობს, მაღაზია „მელოდიას“ თავზე.

ერთხელ როგორღაც სერიოჟამაც წაიხუმრა:

— ეს ჩვენი გენკა მართლა დიდი ვინმე გაგვიხდა. თვალში მოგხვდება კაცს. როცა ფედია იყო ამ ადგილზე, ვერც კი ვამჩნევდი...

ოლგა ვასილიევნამ ჰკითხა: მაინც რა განდიდება შეამჩნიე? სერიოჟამ ჩაიციხა, მაგრამ არაფერი თქვა. ქალმა იცოდა, ადრე თუ გვიან ვერ მოითმენდა, მაინც ეტყოდა. ასეც მოხდა: რამდენიმე დღის შემდეგ „გასკდა ბუშტი“. პროფკომში საფრანგეთის თერთმეტდღიანი ტურისტული საგზური გაჩნდა. ექვსი დღე პარიზი, ხუთი მარსელი, ნიცა და სხვა მისთანანი. ერთი სიტყვით, მთელი ცხოვრების ოცნება. საგზური საკმაოდ ძვირი ღირდა. ვინაიდან სულ მხოლოდ ოთხი საგზური იყო, პროფკომში, ასე ვთქვათ, ჩუმად განაწილება გადაწყვიტეს. სერიოჟამ ეს ამბავი იგან ევდოკიმოვიჩის მდივანი ქალისაგან შემთხვევით გაიგო და არა თავის ძმაცაც გენასაგან. საფრანგეთში გამგზავრების მოსურნე ბევრი აღმოჩნდა. პროფკომში ჯერ კენჭის ყრა დააპირეს, მაგრამ შემდეგ იმავე კლიმუკმა წინდახედულება გამოიჩინა, წილისყრა ალიაქოტს გამოიწვევსო, შესაძლოა ისეთს ერგოს, სულაც რომ არ უნდა საფრანგეთში წასვლა, ისეთი კი დარჩეს, ვისთვისაც მართლა აუცილებელია იქ გამგზავრებაო. კაცმა რომ თქვას, ეს განმარტება ლოგიკური იყო, ისევე როგორც ყველაფერი, რასაც კლიმუკი იჩემებდა. მაგრამ მთავარი სწორედ ის იყო, ვინ შეაბამდა კატას ეჟვანს, ვინ იტყოდა, ვის სჭირდებოდა ეს საგზური და ვის არა. სერიოჟამ პირდაპირ უთხრა: პარიზი გართობისა და გასეირნებისათვის კი არ მჭირდება — რასაკვირველია, ცოტაოდენ წაითვალთმაქცა კიდევ — არა-



მედ ჩემი სამუშაოსათვის საჭირო მასალების მოსაძებნ-მოსახსრეკადო ყველამ იცის, — კლიმუკმაც მშვენივრად იცოდა — რომ რუსეთის საიდუმლო პოლიციის შესწავლისას ისტორიკოსი გვერდს ვერ აუვლის საფრანგეთს, ემიგრაციას, რუს აგენტებს. შეიძლებოდა ეს ყველაფერი დაბეჯითებით ახსნილიყო, რადგან სეროიჟა მართალი იყო და სრული უფლება ჰქონდა საფრანგეთში გამგზავრება მოეთხოვა, მაგრამ კლიმუკი იწმახნებოდა, ოხრავდა, აზუსტებდა, თუმცა საოხრავი არაფერი იყო, მოთხოვნა სამართლიანი გახლდათ. ჰოდა, სეროიჟასაც აევსო მოთმინების ფიალა და საკმაოდ უხეშად, შინაურულად ამდაგვარი რაღაცა უთხრა: „მორჩი მაგ წილადობილას“ თუ სულაც: „ნუ იბღინძები, თუ კაცი ხარ“.

კლიმუკმა მხრები აწურა და ცივად უბასუხა:

— დაგვიწერე შენი მოსაზრება და სამეული გადაწყვეტს. გაიგე, ეგ საქმე არც ისე იოლია, შენ რომ გგონია.

სიტყვა „გაიგე“ იყო ერთადერთი ადრინდელი და ადამიანური მთელ ამ საუბარში.

სეროიჟა საოცრად გულდამძიმებული ჰყვებოდა კლიმუკთან საუბრის ამბავს.

იქნებ სეროიჟა აზვიადებს, — ფიქრობდა გუნებაში ოლგა ვასილიევნა — წვრილმანები აღიზიანებს, განსაკუთრებით ის ამბავი, რომ კლიმუკი ნაღდი უფროსივით ელაპარაკა. რას იზამ, ამას უნდა შეურიგდე. იგი უფროსია, შენ კი ხელქვეითი.

სეროიჟასაგან მალულად, როცა იგი შინ არ იყო, ოლგა ვასილიევნამ მარას დაურეკა, უბრალოდ ისე, როგორც ახლობელმა. რატომ აღარ რეკავთ, სად დაიკარგეთ, რაა თქვენთან ახალი და მისთანანი.

ოლგა ვასილიევნა მიხვდა, რომ მოქმედება იყო საჭირო. სეროიჟა გულმოკლული ჩანდა, თუმცა ჯერ საკითხი არ გადაეწყვიტათ. რა იქნებოდა მაშინ, როცა მართლა უარს ეტყოდნენ? ოლგა ვასილიევნას გულით უნდოდა სეროიჟას საფრანგეთი მოევლო. იქნებ ამ „განავარდებას“ ძალა მოემატებინა, მისი საქმე შემოებრუნებინა. როცა ადამიანს ერთიმეორის მიყოლებით მარცხი ატყდება, უკეთუ, ატყდება კი არა, უბრალოდ ისე რბილად, ბუნებრივად შემოსახდებიან, როგორც ჩიტები ხეებს, ადამიანს ნელ-ნელა უქვავდება სული, უგრძნობელი ხდება და თანდათან თვითონაც ხევდება.

გამგზავრებისათვის ბევრი ფული იყო საჭირო. ბოლოს ასე შეთანხმდნენ: თანხის ნახევარს სეროიჟა იშოვის, წიგნების ერთ ნაცნობ შემსყიდველს სტეფან ცვაიგის რვატომეულს მიჰყიდის, გამომცემლობა „ვრემიას“ მიერ გამოცემულ წითელ ტყავში ჩასმულ შესანიშნავ ტომეულებს. ოდესღაც ამ წიგნებში ათას ხუთასი მანეთი მისცა ძველი ფულით. მეორე ნახევარს კი თვითონ უშოვის, დედას სთხოვს.

და აი, დაურეკა მარას და ნაძალადევად მხიარული, მეგობრული ხმით ელაპარაკა, თუმცა არ იცოდა, რა გამოვიდოდა ამ ლაყობიდან. უნდოდა ნიადავი მოესინჯა, მაგრამ ვერაფერი მოსინჯა. მარა ჩვეულებრივად გაპრანჭული, თითქოს ალერსიანი ხმით ლაპარაკობდა, რაღაც სისულელეებს როშავდა, უადგილოდ კისკისებდა. ერთი სიტყვით, აუტანელი იყო, მაგრამ ეს ყველაფერი ძველი ამბავი გახლდათ. ოლგა ვასილიევნაც ოდნავ დამშვიდდა. არაფერი არ შეცვლილა, სეროიჟა ტყუილად დელავსო. მაგრამ მარას საკმაოდ

სქელი ტყავი ჰქონდა და ფხიზელი რეაქცია ვერ ექნებოდა. თვითონ კლიმუკთან მოლაპარაკება იყო საჭირო. ოლგა ვასილიევნამაც, ისე რომ თავისი საქციელი თვითონაც უკვირდა, მარა და გენა ვასილკოვოში, აგარაკზე მიიბატიყა. ზაფხულის დასაწყისი იყო, ბანაობის, მზეზე მიფიცების, ტყეში ხეტილის დრო... ჰო, ვითომ რა იქნება, იქითკენ რომ გავისეირნოთ, გნებავთ შაბათს, გნებავთ პარასკევს, როცა იტყვიო. მარა მიბატიყებას სიამოვნებით დათანხმდა, მაგრამ აი გენა რას იტყვის, ეს არ ვიციო. დღედაღამ მუშაობს, აღარსად არ დავდივართ, სულ მთლად ჩავიკეტეთო. გენა მეორე ოთახში იყო, ცოლის პირით მოკითხვა გამოუგზავნა და ჩამოსვლაც შეჰპირდა.

სერიოჟა ბუზლუნებდა:

— ეს რა სულელური რაღაც გამოდის. კაცს თითქმის ყოველდღე ვხედავ და არ ვეპატიყები, შენ სრულებით არ ნახულობ და, მობრძანდიო, კალთებს აგლეჯ.

მაგრამ გულში, მგონი, მაინც კმაყოფილი იყო. არაფერია გაბზარულ მეგობრობასავით მტკივნეული. ოლგა ვასილიევნა ყოველ საღამოს ეკითხებოდა:

— ნახე კლიმუკი? თუ იცი, აპირებენ ჩვენთან ჩამოსვლას?

— კი, ვნახე, მაგრამ არაფერი მიკითხავს... ხომ არ შევუჩინდები...


ის, რაც წინათ ბუნებრივად და ადვილად ხდებოდა, ახლა პრობლემად იქცა. სერიოჟას ენა არ უტრიალდებოდა უბრალოდ ეკითხა: გენა, როდის აპირებთ ჩვენთან ჩამოსვლას, მაგრამ ერთხელ, ინსტიტუტიდან დაბრუნებულმა, ოლგა ვასილიევნას ხალისით უამბო; — კლიმუკი ჩემთან ოთახში შემოვიდა და მითხრა, ვასილკოვოში მოპატიყება თუ ისევ ძალაში რჩება, მაშინ შაბათს გამოვივლითო ცოტა ხნით.

— ცოტა ხნით? — ჰკითხა ოლგა ვასილიევნამ.

— აბა რა ვიცი, ასე მითხრა.

პარასკევს იყიდეს სურსათი: ორი ბოთლი არაყი, ორი ბოთლი ღვინო, რამდენიმე ბოთლი ლუდი, ჩასხდნენ ტაქსში და ვასილკოვოსკენ გასწიეს. ირინკა და დედამთილი მთელი ის კვირა მარტონი იყვნენ დეიდა პაშასთან. სამუშაო დღეს აგარაკზე წასვლა უჭირდა ოლგა ვასილიევნას: სადგურიდან შორს იყო, დილით ძალიან ადრე უნდა ამდგარიყო და მერე ელექტრომატარებლით მთელი საათი ემგზავრა. და მაინც, როცა კი გამოუღწევია სამსახურის შემდეგ, როგორი გაწამებულიც არ უნდა ყოფილიყო მატარებელში მგზავრობით, მაღაზიების რიგებში დგომით, რა მძიმე, ცხენის საპალნეც არ უნდა ეზიდა, — ქილებით, წიგნებით, პარკებით, დატენილი ჩანთები, — როგორც კი ბაქანზე ჩამოვიდოდა, როგორც კი ტყის სასიამოვნო, გრილი ჰაერი მოხვდებოდა, მაშინვე შვეებით ამოისუნთქავდა. გრძნობდა, როგორ თანდათანობით ეცლებოდა დაღლილობა, როგორ ივსებოდა ახალი ძალითა და ენერგიით. რა კარგი იყო, რა სასიამოვნო! მაინც საიდან იკრებდა ამ ძალას, ისეთი დამღლეული, შეუსვენებელი, ქანცისგამცლელი დღის შემდეგ. ზეცისგან, ტყისგან? თუ ის ყოფნიდა, ჩანთებამოჩრილი სერიოჟა გვერდით რომ მოყვებოდა და რაღაცას თავისთვის ბუტბუტებდა ან სულაც სოფლის ახალ ამბებს უამბობდა? — დეიდა პაშამ არაყანი მოიტანა. რიჟიკა ისევ დაერია მეზობლის ქათმებსო...

სერიოჟა ინსტიტუტში განსაზღვრულ დღეებში დადიოდა, დანარჩენ დროს კი, ზოგჯერ სამ-ოთხ დღეს ზედიზედ აგარაკზე ატარებდა. დახვდებოდა ხოლმე ბაქანზე, გამოართმევდა ჩანთებს და, მოაგარაკეთა ტალღაში გარეულე-



ბი, მწვანე ღობეების ჩამოყოლებაზე შარაგზას დაადგებოდნენ. მერე მუხნარის-
კენ შეუხვევდნენ. მოაგარაკეები თანდათან ეფანტებოდნენ, ხოლო როცა მუხ-
ნარსაც გაივლიდნენ და ვასილკოვოს მინდორზე გავიდოდნენ, ერთთავად მარ-
ტონი რჩებოდნენ. მოაგარაკენი სადგურის მახლობლად მდებარე სახლებში
ბინავდებოდნენ ხოლმე, ხოლო თვითონ ვასილკოვოელები ასე გვიან არ ბრუნ-
დებოდნენ მოსკოვიდან. მინდორი დიდი და ოდნავ ამოზნექილი იყო. სოფელი
მინდვრის ბოლოს, ფერდობს გადაღმა მდებარეობდა, თითქოს მინდვრის იქით
ხრამში ჩავარდნილაო. აქა-იქ ქოხების სატელევიზიო ანძებამწვერილი სახურა-
ვებიც მოჩანდა. უხილავი მდინარის გასწვრივ ვერცხლისფრად შრიალებდნენ
ტირიფები, ველოსიპედზე შემჯდარი წითელპერანგა ბიჭი ბილიკს მიუყვებოდა
და მინდორს გეზად სჭრიდა. სადღაც ტრაქტორი გუგუნებდა. ცა ისეთი ნათე-
ლი იყო, გინდოდა სულ მალლა გეცქირა. ქალაქში ცას ვერც კი ამჩნევ, არც
სურვილი გაქვს მალლა ახედვისა.

სოფლამდე სამი კილომეტრი იყო. ჯერ კიდევ ქალაქში ოცნებობდა: ერ-
თი როგორმე მივადწიო, ეს ბარგი-ბარხანაც მივათრიო, საჩქაროდ რაღაც წავ-
ყლაპო ან ჩაი დავლიო და დეიდა პაშას დიდ ოთახში ლოგინზე წამოვგორდეო.
ოთახში ახალმოთიბული ბალხისა და ურცის სურნელება ტრიალებდა, კუთხე-
ებში კონებად რომ იყო გარჭობილი. მაგრამ ყოველთვის სულ სხვანაირად გა-
მოდიოდა: ჩაის დალევის შემდეგ ირინკას ჭალაში მიჰყვებოდა ხოლმე, ათ სა-
ათზე ირინკას აძინებდა, მერე კი ისა და სეროიჟა სეირნობდნენ გვიან ღამემ-
დე. თუ ალექსანდრა პროკოფიევნაც დაემგზავრებოდათ, მაშინ შორს ვეღარ
მიდიოდნენ და უკან ადრევე ბრუნდებოდნენ. კაცმა რომ თქვას, დედამთილი
ხშირად როდი აცხადებდა გასეირნების სურვილს, ხვდებოდა, ცოლ-ქმარს
მარტო ყოფნა უნდოდათ. ზოგჯერ მორევშიაც ბანაობდნენ, ისხდნენ მდინა-
რის ნაპირას, ლაყობდნენ მეზობლებთან. კაცმა არ იცის, საიდან იკრებდა ამ
ძალებს და მერე ძილიც აღარ უნდოდა.

რა თქმა უნდა, იყო წვიმებიც, სიცივეებიც, მთელი მინდორი გაუვალ ჭან-
ჭრობად რომ იქცეოდა ხოლმე. იწყებოდა სოფლური მოწყენა. ალექსანდრა
პროკოფიევნა ვილაცეებს დაუსრულებლად წერდა წერილებს. ირინკა წუწუ-
ნებდა, ხან ყური ტკიოდა და ხან მუცელი. ჰოდა, სეროიჟაც თავსხმა წვიმაში
ექთან აგნიასთან გარბოდა ხოლმე...

კლიმუკი თავისი ძველი „პობედით“ ესტუმრათ და თან ინსტიტუტის დი-
რექტორი კისლოვსკი მოიყოლია. კისლოვსკის არავინ ელოდა. ოლგა ვასილი-
ევნამ შეამჩნია, მანქანიდან გადმოსული კისლოვსკი რომ დაინახა, როგორ და-
ემანჭა სახე სეროიჟას. ქალისათვის კარგად ნაცნობი იყო ტუჩების ეს მოძრა-
ობა, რაც დაახლოებით ამას ნიშნავდა: „ესეც ახალი ამბავი“. კლიმუკს მე-
უღლეც ახლდა. მარას შესანიშნავი მუჭი მწვანე ფერის შარვალ-კოსტიუმში
ეცვა. საზღვარგარეთიდან შემოტანილი ასეთი კოსტიუმები სწორედ მაშინ შე-
მოდიოდა მოლაში. ფეხზე თეთრი ქოშები ეცვა, ხელში თეთრი ჩანთა ეჭირა,
ყურებზე თეთრი საყურეები ეკეთა. ერთი სიტყვით, მოდას აყოლილი თვა-
ლისმომჭრელი არსება გახლდათ, ინის წყალობით ახლა წითურ ქალად რომ
ქცეულიყო. მარას თავით ფეხებამდე ყველაფერი ძვირფასი და ახალი ემოსა.
ოლგა ვასილიევნა გაოცდა, ანკი რა უნდა გახარებოდა: ზიხარ შენთვის შინ
წინსაფრიანი და უცებ გამოგეცხადება შენი, ასე ვთქვათ, კეთილი მეგობარი
ამგვარად გამოპრანჭულ-გატყლარჭული. მაგრამ მარას მაინც არაფერი შეე-

ლოდა, მაინც ეტყობოდა, რომ სულელი იყო. სადმე კუთხეში რომ მიხვდარი-
ყო, თლილ თითებში სიგარეტი გაერჭო და ჩუმად, ხმაამოუღებლად ფიქრიანი
ღიმილი ეფრქვია, მართლაც შეუდარებელი იქნებოდა. მაგრამ არა, მაინცდა-
მაინც საუბარში ჩარევა და თავისი აზრების გამოთქმა სურდა. უფრო მეტიც,
ოლგა ვასილიევნასთან შეკამათებაც კი დააპირა ბიოლოგიის პრობლემებზე.
მიუხედავად ამისა, მარას მაინც არ შეეძლო ოლგა ვასილიევნას გუნება-გან-
წყობილების გაფუჭება.

ეს იმ მეორე ქალმა მოახერხა, კისლოვსკის რომ მოჰყვა. სახელი ახლა
აღარ ახსოვს. ეს როგორღაც მორღვეული, ბოშა ქალივით შავგვრემანი, გამ-
ხდარი, პრანჭია ახალგაზრდა ქალი თავიდანვე არ მოეწონა ოლგა ვასილიევ-
ნას. თავით ფეხებამდე ჟღერიალები ესხა — სამაჯურები, მძივები, თვალისმომ-
ჭრელად ლამაზი და ძვირფასი. მაგრამ სოფელში წამოსასვლელად ამ ზიზილ-
პიპილების ასხმა ნამდვილი უაზრობა იყო და მხოლოდ თავის უგემოვნებას
ამჟღავნებდა.

ოლგა ვასილიევნამ, როგორც კი დრო მოიხელთა, მარას ჩუმად ჰკითხა:
რას წარმოადგენს, სად მუშაობს კისლოვსკის ცოლი?


— ეს ისეთივე ცოლია, როგორც მე შენი ბებია, — უპასუხა მარამ. კაც-
მა რომ თქვას, ოლგა ვასილიევნაც ამდაგვარ პასუხს ელოდა.

მოკლედ რომ ვთქვათ, ეს იყო კლიმუკის მორიგი თავხედობა. ერთხელაც
მოათრია იქ, მოსკოვში ვიღაც საეჭვო გოგოები, ვითომდა ტელევიზიიდან. ყო-
ველგვარი გაფრთხილებისა და წინასწარ დარეკვის გარეშე. სერიოჟა მაინც
აპირებდა ფრანგული კონიაკითა და ნამცხვრით გამასპინძლებას. სწორედ ამ
დროს სამუშაოდან დაბრუნდა ოლგა ვასილიევნა. ყველაფერში უეცრად გა-
ერკვა, აწონ-დაწონა და დაუპატიჟებელი სტუმრები პანლურით გაყარა. კლი-
მუკი მაშინ ძალიან განაწყენდა. მაგრამ ახლა იგი უკვე უფროსად გრძნობდა
თავს. თანაც მოპატიჟებული სტუმარი იყო და ცოლიც გვერდზე ჰყავდა.

— ჩვენ მხოლოდ ერთი წუთით... წყალსაცავზე მივდივართ და გზად გა-
მოვიარეთ... უბრალოდ, წუთით შევისვენებთ... — ისე თქვეს კლიმუკებმა,
თითქოს პატიებას ითხოვდნენ უცხო სტუმრების მოყვანისათვის, თან სტუმ-
რობასაც უგულვებელყოფდნენ, აქაოდა სრულიად შემთხვევით შემოვიარეთ
და მეტი არაფერი.

ოლგა ვასილიევნა გვარიანად დაიღალა, მაგრამ ირინკა წაეშველა, ხელი
წაახმარა დეიდა პაშამაც, სარდაფიდან ხან კიტრები ამოუტანა, ხან კომბოსტო,
ხანაც დამწნილებული სოკოები. იქით თავისი ვაჟი კოლკა პურისათვის სოფ-
ლის მაღაზიაში გააგზავნა. ისიც მაშინვე მოტოციკლს მოახტა და, წაქეიფების
მოლოდინით მხიარულად აფორიაქებული, გზას დაადგა. მხოლოდ ალექსან-
დრა პროკოფიევნა არ მისულა ქურასთან, ხელი არ დაუკარებია ჭურჭლი-
სათვის, იჭდა ტერასაზე და წერილს წერილზე აცხობდა. დედამთილი რომე-
ლიდაც გაზეთის მკითხველებს წერდა წერილებზე პასუხს. გაზეთში იგი სა-
ზოგადოებრივ საწყისებზე „ჩვენი იურკონსულტაციის“ განყოფილებას ხელ-
მძღვანელობდა. იგი ერთ დროს სასამართლოში ვექილად მუშაობდა. ოლგა
ვასილიევნას არა სჯეროდა, მისი დედამთილი როდესმე კარგი და სამართლი-
ანი ვექილი თუ იყო. დიახ, არაფრით არა სჯეროდა, მაგრამ თავისი აზრი სე-
რიოჟასათვის აროდეს გაუმხელია.

ისადილეს ბაღში, სახლის უკან. ზაფხულის თაკარა იდგა. ვაშლების



ჩრდილშიც ალბი წვავდა იქაურობას. სუნთქვა ჭირდა. ყველაზე მეტად ჭის ცივ-ცივი წყალი შეისვა, კოლკა ვედროებით ზედიზედ რომ ეზიდებოდა წყალი კი ვასილკოვოში მართლაც რომ ჩინებულია! უფრო გემრიელი და ცივი წყალი ოლგა ვასილიევნას არსად დაუღევიან. ერევნის წყალი ამასთან ვერ მოვა, თუმცა ძალიან კი ტრაბახობენ, ჩვენი წყალი განსაკუთრებული და შესანიშნავიაო...

ოჰ, რამდენი რამ გაიხსენოს! რაღაც აწვალეზდა, ის გოგო აღიზიანებდა, კისლოვსკის რომ მოჰყვა. გულზე ხვდებოდა, სერიოჟასკენ რომ იცქირებოდა და რაღაცეებს კეკლუცად ეკითხებოდა. არც სერიოჟას სულელური ბღვერა და დაბნეული პასუხები მოწონდა. იქით მარას ლაქლაქი სჭრიდა ყურს. შიშობდა, ვაითუ არ გვეყოს საჭმელი, დაგვაკლდეს ღვინო და სერიოჟამ საფრანგეთში გამგზავრებაზე კლიმუკს ვერაფერი უთხრასო. ან იმ კისლოვსკისთან როგორ დაიჭიროს თავი, იმ თმაგადასლექილ, ცირკის არტისტივით გამოპრანჭულ კაცთან.

და მაინც იყო რაღაც ჭეშმარიტი, ახალგაზრდული, განუმეორებელი — მაინც, მაინც რა? — ბედნიერება უთუოდ. — დიახ, სწორედ ბედნიერება სუფევდა სოფლის იმ პატარა, ნაკელისა და მიწის სუნით გაჟღენთილ ეზოში, საამო სურნელს აფრქვევდა ივნისის თაკარა მზის ქვეშ ახასხასებული მწვანე. უკანა მხრიდან ღრუტუნის ისმოდა, წინა ჭიშკარში კი შუკიდან ლაწუნით შემობაკუნდა ჭკვიანი მათილდა და თავისით შევიდა ბოსელში. შეჭიკჭიკებული დეიდა პაშა მარჯვედ იქნევდა თავის ყავისფერ მჯილს: „დაიკარგოს აქედან ეგ შარახვეტია!“ დღე ჩაილია, დადგა საღამო. ისინი კი ისევ ისხდნენ, სვამდნენ, ბუტბუტებდნენ, ლაყბობდნენ. რა ხანია დაცალეს ბოთლები, კოლკაც აფრინეს თავისი მოტოციკლით სოფლის ბოლოს ბებია კრენდელიხასთან შინნახადი არაყის მოსატანად.

ოთახში შესულმა ოლგა ვასილიევნამ თვალი ჰკიდა, როგორ წაავლო წელზე ხელი პატივცემულმა კისლოვსკიმ თავის თანამგზავრ ქალს და სახლის პატრონის მაღალ საწოლზე გადაყირავება დაუპირა. თანამგზავრი ქალი სამკაულების ჟღარუნით კეკლუცად ეწინააღმდეგებოდა.

ეზოში გამობრუნებული ოლგა ვასილიევნა სერიოჟასთან მივიდა და ყურში უჩურჩულა კლიმუკებთან ლაყბობაში გართულ ქმარს, რომ სწორედ ახლა ოთახში ფრიად უამურ სურათს გადააწყდა.

— რა იცი, იქნებ სიყვარულია? — ჰკითხა ქმარმა და გამოლენჩებული თვალები მიაშტერა. იგი არც ისე მთვრალი იყო, როგორადაც თავს აჩვენებდა. მის გამოხედვაში ბედის მორჩილება იგრძნობოდა.

— ჰო, მაგრამ ასეთი სიყვარულისათვის გარკვეული ადგილი არსებობს და არა დეიდა პაშას ქოხი, — მიუგო აღელვებულმა ოლგა ვასილიევნამ.

დეიდა პაშამ სხვა ვერაფერი გაიგონა, მაგრამ თავის სახელს რომ მოჰკრა ყური, გაცხარებით წამოიძახა:


— რა გინდა დეიდა პაშასთან? შენ დეიდა პაშას თავი გაანებე, თორემ! დეიდა პაშა — მე მოგცემ შენ დეიდა პაშას! — თანაც მუქარით თითს იქნევდა. — სათითაოდ გამოგიტანთ ყველა თქვენს საიდუმლოებას... კოლკა, შენ იქ... უთხარი...

კოლკა ბრიგადირი გახლდათ და ამიტომაც ცოტას როდი იბღინძებოდა. დიდად საიდუმლოდ უმხელდა ყველას ამ ამბავს. საერთოდ კი საბჭოთა მეურ-

ნეობაში დურგლად მუშაობდა. ჩია ტანის გამხდარი ბიჭი იყო. ზოგჯერ, გალუული, ფერმკრთალი სახე ჰქონდა. ზაგორსკელი სემინარიელით გრძელ თმას ატარებდა. გვარიანად უკრავდა გიტარაზე, ყოველ საღამოს ერთ-თავად ქალიშვილების ალყაში იჯდა. დეიდა პაშა ბრაზობდა: ცოლს არ თხოულობს ეს ეშმაკის კერძი, „ტყუილუბრალოდ ხარჯავს ძალ-ღონეს“. ჯანმრთელობის მიზეზით ჯარში არ მიჰყავდათ, გული ჰქონდა სუსტი. სმა სასტიკად ეკრძალებოდა — ერთი სირჩის მეტი არ შეიძლებოდა, მაგრამ ლამის ყოველდღე სვამდა.

ალექსანდრა პროკოფიევნა გულით ზრუნავდა კოლკას ჯანმრთელობაზე. ყოველთვის ტუქსავდა, როცა კი მთვრალს ნახავდა. ისიც უნდა ითქვას, რომ ბიჭი მხოლოდ ამ ქალს უგონებდა. მაინც რა საოცარი თვისება ჰქონდა მოხუცს. შინაურები ჩირად არ აგდებდნენ, ანკი რისთვის უნდა ჩაეგდოთ, ამათ ხომ კარგად იცოდნენ მისი ყველა ღირსება, — მაგრამ აი გარეშე ხალხი კი დიდი მოწიწებით ეპყრობოდა, ის კი არა, ეშინოდათ კიდევ. როგორც ჩანს, მბრძანებლობის რაღაც დაუძლეველი მოთხოვნილება ჰქონდა, რასაც უბრალო, დაბალი გონების ადამიანი მაშინვე ემორჩილება, მოაზროვნე ადამიანი კი დიდ წინააღმდეგობას უწევს.

იმ საღამოს, როცა გაჭიანურებული სადილის შემდეგ ჭალაში სასეირნოდ წავიდნენ, კისლოვსკი ძლივს გამოიტყუეს ოთახიდან. ალექსანდრა პროკოფიევნამ კლიმუკს რაღაც უსიამოვნო, შარბიანი საუბარი გაუბა. საერთოდაც კლიმუკი დიდად არ ეხატებოდა გულზე. გენადი კლიმუკი მას სულ მთლად ჭაბუკი, სტუდენტობის პირველი დღიდან ახსოვდა, როცა ერთი ჩამოხეული, ძვალტყავა მშიერი ბიჭი საერთო საცხოვრებელიდან სერიოჟასთან მოდიოდა ხოლმე („ერთთავად მშიერი იყო, როცა არ უნდა მოსულიყო. ყოველთვის შეეძლო იმდენი შეეჭამა, რამდენიც კი გაგვაჩნდა, ხუთი კატლეტი, რვა კატლეტი, თორმეტი კატლეტი, რაღაც ფანტასტიკური რაოდენობა“). სერიოჟა ხშირად ტოვებდა ღამითაც. შუალამემდე ჭადრაკს თამაშობდნენ, აბოლებდნენ პაპიროსს. ემზადებოდნენ გამოცდებისათვის, ჩხუბობდნენ, რიგდებოდნენ. ალექსანდრა პროკოფიევნა კლიმუკს მაშინ მოფერებით გეშას ეძახდა, ცოტა დოყლაპია. მაგრამ კეთილ ბიჭად მიაჩნდა. სერიოჟა ამეცადინებდა დიამატსა და ენაში. და აი ეს გეშა ისე წაიწია წინ, რომ ახლა სერიოჟას უფროსიც გახდა. ალექსანდრა პროკოფიევნამ პირველმა იგრძნო მისი შვილისა და გენადის ურთიერთობის შეცვლა, თვით ოლგა ვასილიევნაზე ადრეც, რადგან ეს მეგობრობა მის თვალწინ ჩაისახა, როცა მის სამზარეულოში ეს ბიჭები ჩაის ხვრებდნენ და უზარმაზარ პურის ნაჭრებს ვაშლის ჯემს უსვამდნენ. იყო კიდევ ბოხი ხმით მოლაპარაკე მესამე ყმაწვილიც. ყველაზე ადრე დაცოლშვილებული საცოდავი ფეღია. აი ფეღია კი ნამდვილად უყვარდა ალექსანდრა პროკოფიევნას. დედის გული ამჩნევდა, რომ მისი შვილი როგორღაც შეზღუდულად გრძნობდა თავს ამ ტლანქი გეშას წინაშე, თითქოს დარცხვენითაც კი ელაპარაკებოდა, როგორც საერთოდ უმცროსი იქცევა უფროსთან. ეს კი მისთვის ჭეშმარიტად აუტანელი ამბავი იყო, გული სტკიოდა სერიოჟაზე. კლიმუკი თუ იბღინებდა, თუ მართლა გაბერილ ბიუროკრატად იქცა, ისეთად, როგორსაც ჯერ კიდევ ოციან წლებში დასცინოდნენ, სერიოჟამ არამცდარად არ უნდა შეაფერებინოს ეს ქედმაღლობა, ჭკუაზე უნდა მოიყვანოს ეს აყლაყუდა სულელი. ესა! დიახ, ალექსანდრა პროკოფიევნა ხაზგასმულად მიმართავდა შე-



ნობით, ძველებურად ისევ გეშას ეძახდა, ერთი სიტყვით, ყოველნაირად ცდილობდა მის გაბიაბრუებას.

— ჰო, მართლა, დამავიწყდა, როგორ მღალატობს ამ ბოლო დროს მესსიერება! საოცარია, გიმნაზიის წლებიდან მოყოლებული ყოველთვის ვამაყობდი ჩემი მესსიერებით... გეშა, რომელ წელს ჩამოვიდა შენი ძმა კრემენჩუგიდან? მახსოვს, ჩვენთან ცხოვრობდა, ვეჭილიც კი ვუშოვე. რაღაც ფულის დატაცებასთან დაკავშირებული საქმე იყო...

— ალექსანდრა პროკოფიევნა, რა საჭიროა ამ ძველისძველი ამბების გახსენება, — ჩაერია ლაპარაკში ოლგა ვასილიევნა, როცა კლიმუკს გაბუსხვა და გაღიზიანება შეამჩნია.

— არა, მე კარგად მახსოვს, ელიზავეტა მარკოვნას რომ დავურეკე ქალაქის კოლეგიაში. ჰოდა, რადგანაც ელიზავეტა მარკოვნას დავურეკე, მაშასადამე, სამეურნეო საქმე იყო. ასეთი საქმეები იმას უყვარს, უკეთუ უყვარს კი არა, კარგად ერკვევა, შესანიშნავად იცის ბუღალტერია... იქ კი რა არის მთავარი? გაფლანგვის რაოდენობის დადგენა. თითოეულ კაპიკზე უნდა იბრძოლო...

დიახ, მოხუცის რაღაც უცნაურმა ძალამ თვით მთვრალეებიც დაიმორჩილა, ცოტა გამოფხიზლდნენ კიდევ. ყური მიუგდეს მის ლაპარაკს. ქალი ტყუილად საყვედურობდა მესსიერებას, ყველაფერი მშვენივრად ახსოვდა. მოღუშულმა კლიმუკმა უცებ ხარხარი ატეხა:

— დაიცათ, ეს ხომ აბსურდის თეატრია! ღმერთო ჩემო, რა საჭიროა ყველაფერი დაიმახსოვროს კაცმა? არსებობს ასეთი ცნება: ისტორიული მიზანშეწონილობა... თქვენ იცით, ვინ არის ახლა ჩემი ძმა?

ხარხარითა და ტრაბახით მოჰყვა რაღაცას თავის ძმაზე. სხვებმაც სიცილი ასტეხეს. ასე უაზრო სიცილ-ხარხარით მდინარის სილიან სანაპიროს მიადგნენ. დღისით აქ ბავშვები ჭყუმპალაობენ, მზეს ეფიცხებიან მოაგარაკენი, სალდათებივით გაჯგიმული ბიჭები ოსტატურად ხტებიან რკინის ბიგიდან. ახლა კი უკაცრიელ სანაპიროზე სიმშვიდე სუფევდა. ბინდბუნდში ნაცრისფერ სილაზე თეთრად მოჩანდა გაზეთის ნაფლეთები.

წყალი ცივი იყო. იბანავეს მხოლოდ მამაკაცებმა. ქალები ბალახიან ფერდზე ისხდნენ და საუბრობდნენ. მაგრამ ალექსანდრა პროკოფიევნასათვის ბალახიან ფერდზე ჯდომა და მასლაათი მეტისმეტად ქალური და მეშჩანური გახლდათ. მოხუცმა უეცრად ბანაობის სურვილი გამოთქვა, იქით, მამაკაცებისგან განზე, ქალებისგან მოშორებით, — თანაც ითხოვა, მურყნარს აქეთ ნუ გამოხვალთო. დაახლოებით ოცი წუთის შემდეგ სწორედ მურყნარის მხრიდან ყვირილი მოისმა, მიშველეთო: ქალს ვეღარ ამოელწია მდინარის სანაპიროს თიხიან ფერდზე და სერიოჟას ეძახდა, ხელი მომაწოდეთო.

მთელი თავისი სიშტერის მიუხედავად, მარაც კი რაღაცას მიხვდა და ოლგა ვასილიევნას უჩურჩულა:

— გითანაგრძნობ!

ის საღამო სულ სხვა მიზეზმა დაამახსოვრა. სერიოჟა ჩააცივდა კლიმუკის სიტყვებს ისტორიული მიზანშეწონილობის თაობაზე. ეტყობა, რატომღაც გულზე მოხვდა. ჯერ წყალში მშვიდად კინკლაობდნენ, პამპულაობდნენ, პატარა ბიჭებივით წყალს ამხეფებდნენ ერთმანეთს, მერე კამათი თანდათან გამწვავდა. როცა უკან, სოფლისაკენ ბრუნდებოდნენ, უკვე ცხარე დავად იქცა.

ცივ წყალში ბანობამ სიმთვრალე გამოანელა. ერთმანეთს უკმეხად მიმართავდნენ, დავაში კისლოვსკიც ჩაება. დავა სერიოჟას სამუშაოს, სხვა საქმეებსა და საერთოდ ისტორიაზე შეხედულებებს ეხებოდა.

იქნებ სწორედ იმ საღამოს შემდეგ — სინამდვილეში ალბათ უფრო ადრეც, მაგრამ ოლგა ვასილიევნას ცნობიერებაში ის საღამო იყო დასაწყისი — ჩამოვარდა სერიოჟასა და კლიმუკს შორის ის ხანგრძლივი შუღლი, რაც სერიოჟას ასე აწამებდა და რაც ესოდენ უბედურად დამთავრდა. როცა დეიდა პაშას სახლს მიაღწიეს და ჩაის დასალევად აივანზე დასხდნენ, სერიოჟა და კლიმუკი უკვე გააფთრებით ყვიროდნენ. ოლგა ვასილიევნას არ ეგონა, კლიმუკს თუ ასეთი გაცოფება შეეძლო.

აბა სერიოჟას ამბავი კარგად იცოდა: კამათის დროს ნამდვილად შმაგდებოდა, ავიწყდებოდა ზრდილობისა და სულგრძელობის ყველა წესი. მას მხოლოდ ერთი რამ სურდა — თავისი შეხედულების დამტკიცება.

— აი ხომ ხედავთ, დეიდა პაშას ხისჩარჩოიანი ძველებური საათი აქვს! მაინც საიდანა გაქვთ, დეიდა პაშა? — ყვიროდა კლიმუკი და მარჯვენა ხელს ტრიბუნაზე მდგარი ორატორივით იქნევდა.

— აბა რა ვიცი, მამაჩემმა მოათრია საიდანღაც, ასე თქვა. შიმშილობის წლებში გავცვალეო...

— გაცვალა, მოათრია — თუმცა ამას რა მნიშვნელობა აქვს! მთავარი ის არის, რომ დროს ზუსტად აჩვენებს და ყოველ ნახევარ საათში შტრაუსსაც უკრავს. ხომ მართალს ვამბობ, დეიდა პაშა?

დეიდა პაშამ ტუჩები აპრუწა:

— მე არც არაფრად მჭირდება, ჩემო კარგო, მაგრამ იმის უფლება მაინც როდის მოგეცი, დეიდა პაშა მეძახე-მეთქი...

— სწორია, სწორი! მაგრამ არც ამას და არც სხვა რამეს არავითარი მნიშვნელობა არა აქვს, გარდა ისტორიული მიზანშეწონილობისა, — აი მხოლოდ ეს დაიმახსოვრე, დეიდა პაშა, და თუ შეიძლება კიდევ ერთი ჭიქა ჩაი დამისხი. უნდა მოგახსენოთ, რომ ჩემი დედაც თქვენნაირი დეიდა პაშაა, მხოლოდ იმას დეიდა პავლინა ჰქვია და ბელგოროდსკის ოლქის შებეკინსკის რაიონში ცხოვრობს...

— ის ისტორიული მიზანშეწონილობა, რაზედაც შენ ლაპარაკობ, — ჩაუერთო სერიოჟამ, — ფრიად ბუნდოვანი რაღაცაა.

— პირიქით, ეს ერთადერთი გამძლე ძაფია, რასაც უნდა მოეჭიდო!

— საინტერესოა, მაინც ვინ უნდა განსაზღვროს, რა არის მიზანშეწონილი და რა არა? სამეცნიერო საბჭომ ხმის უმრავლესობით?

სერიოჟამ იმდენად შეტოვა, ისიც კი დაავიწყდა, კისლოვსკი რომ სამეცნიერო საბჭოს თავმჯდომარე იყო.

ოლგა ვასილიევნა იმედოვნებდა, მთელი დღის განმავლობაში ღვინის სმასა და სისულელების როშვას აყოლილი ადამიანები ვერ დაიმახსოვრებდნენ, ვინ რას ამბობდა და რატომ. მაგრამ, როგორც აღმოჩნდა, სერიოჟას წამოძახილები ზედ გულის ფიცარზე დაიწერეს. ადამიანებს სიტყვების მნიშვნელობაზე მეტად ნათქვამის კილო სწყინთ, რადგან სწორედ კილო ამჟღავნებს იმ მთავარსა და ფარულს.

დიახ, სერიოჟას გამასხრება „სამეცნიერო საბჭო თავისი ხმის უმრავლე-

სობითო“ და აგდებული სიცილი სიტყვებზე მეტად ეწყინათ. საეჭვოა, კის-
ლოვსკის დავიწყებოდა იგი.

სეროიჟა ყბედი, წინდაუხედავი კაცი იყო. აკი იმრავლებდა კიდეც ირ-
გვლივ მტრებსა და ორგულებს. რამდენი მტერი გაიჩინა თავისი ხუმრობით,
შეკამათებით, გესლიანი წამოძახილებით. გაიჩინა იმიტომ, რომ დროზე თავ-
შეკავება არ იცოდა და არც სიტყვის აწონ-დაწონის უნარი ჰქონდა. მარტო
ის მეტსახელი რად ღირს, კლიმუკს რომ შეარქვა ჯერ კიდეც მანამ, ვიდრე
ერთმანეთს მტრებად მოეკიდებოდნენ. სეროიჟამ გენადი ვიტალიევიჩი აგდე-
ბულად გენიტალიჩად ახსენა. ინსტიტუტში აღფრთოვანებით აიტაცეს ეს სა-
ხელი და პირს უკან გენიტალიჩს ეძახდნენ. ჰო, მაგრამ რა საჭირო იყო ადა-
მიანის ასე გაბოროტება?

შუალამე მოახლოვდა. ისინი კვლავ ისხდნენ და ისხდნენ. მამაკაცები და-
ობდნენ, ყვიროდნენ, აბოლებდნენ, წრუპავდნენ ბოთლში ჩარჩენილ არაყს —
ისევ გზავნიდნენ კოლკას კრენდელიხასთან. ქალები ყვინთავდნენ. ირინკას რა
ხანია ეძინა. ოლგა ვასილიევნა მოუბრუნებლად ამოქნარებდა და არც იმას მა-
ლავდა, რომ უსაშველოდ დაღლილი იყო. ღია ფანჯარაში ბადრი მთვარე იყუ-
რებოდა.

სტუმრები კი არ მიდიოდნენ! არც ისინი ცდილობდნენ თავიანთი დაღლი-
ლობისა და სადმე თავის მიღების სურვილის დაფარვას, უსაშველოდ ამოქნა-
რებდნენ. მერე სეროიჟა და კლიმუკი ეზოს ბოლოში გავიდნენ, რაღაც ილა-
პარაკეს და როგორც კი დაბრუნდნენ, სტუმრები წასასვლელად მოემზადნენ.
ოლგა ვასილიევნა მიხვდა, რომ კაცები ვერ მორიგდნენ: ხელახალი წაქეიფე-
ბის შემდეგ ორთავე როგორღაც კუშტად გამოფხიზლდა. კისლოვსკი ლამის
უგონოდ შეათრიეს მანქანაში. მარა საჭეს მიუჯდა, განგებ არ სვამდა, კაცები-
სათვის ქეიფის საშუალება რომ მიეცა. უცნაური იყო: ეს სულელი მარა ყვე-
ლაზე გონიერი ეჩვენა ამ ოთხეულში. ოლგა ვასილიევნას ლოყაზე აკოცა და
ყურში კმაყოფილმა უჩურჩულა:

— სწორად მოიქცა სეროიჟა, ღამე რომ არ გაათევიანა! ერთი მაგათი. გა-
მომივიდნენ რაღა დიდკაცები!

კოლკამ ბრიგადირის სასტვენით ყველას ყურები გამოუჭედა, მერე მან-
ქანის წინ დადგა და ხელების ქნევით ხმამაღლა ყვიროდა:

— ეს რასა ჰგავს — მთვრალეები საჭესთან? ვინ მოგცათ უფლება, აბა
გადმოდით, მანქანა არ წავა!

სეროიჟა ოლგა ვასილიევნას დაწვრილებით მოუყვა, თუ როგორ ეხვე-
წა კლიმუკი. — კისლოვსკისა და მის თანამგზავრ ქალს ღამე გაათევინეო.
ისინი სწორედ ამიტომაც ჩამოვიდნენ. სეროიჟას გული მოუვიდა და უარი
უთხრა. კლიმუკი თხოვდა, ყოველნაირად არწმუნებდა:

— შენ ხომ მე და მარა ლამისთევით დაგვპატიჟე, ესე იგი ამაღამ აქ ორი
საწოლის უფლება მაქვს. შენ რა გინდა, მე თუ ამ უფლებას ჩემს მეგობარს
დავუთმობ... — მერე მუქარაზე გადავიდა: — სეროიჟა, იცოდე, წინდაუხედა-
ვად იქცევი. ჰოდა, რაც მოგივა, შენს თავს დააბრალე... — ბოლოს ლამის
ცრემლმორეული შეეხვეწა: — თუ ძმა ხარ, ჩემი გულისათვის გააკეთე! ისე
მტკიცედ დავპირდი ამ შენი მოპატიჟების იმედით! რა კაცი გამოვდივარ ასე-
თი გაცრუების შემდეგ?

— უეცარი ზიზღი ვიგრძენი. — თქვა სეროიჟამ, — მივხვდი, ჩემ წინ ვა-

ჭარი იდგა. ჩვენი აგარაკი სჭირდებოდა რაღაც მომავალი გეგმებისათვის, კლიმუკი ამას დაჰპირდა, ის სანაცვლოდ რაღაც სხვას. ახლა კი ეს გარიგება ეშლებოდა... უნდა გენახა, რა ისტერია ასტეხა, როგორ სისინებდა, როგორ ბობოქრობდა გაშმაგებული! „შენ ყოვლად გამოუსადეგარი ამხანაგი ხარ, შენი იმედით კაცი ვერ იქნება. შენ გძულს ადამიანები!“ და ეს ჭეშმარიტი გაცეცხლება მეგობრისადმი თანაგრძნობამ როდი მოგვარა, არა, ეს თვითონ მას წაართვეს რაღაც. მე ის გავძარცვე, გესმის, გავძარცვე!

მაინც რატომ არ შეიძლებოდა იმ წყვილს ღამე იქ გაეთია? ის ბოშური გარეგნობის გოგო, რა თქმა უნდა, საზიზღარი იყო, მაგრამ თუ კისლოვსკი ესოდენ დიდი ვინმეა, თან კლიმუკიც ასე თხოვდა... სტუმრები ოთახში დაწვებოდნენ, მასპინძლები კი აივანზე. მაგრამ სერიოჟა ყველაფერს რაღაც უცნაურად, თავისებურად ეკიდებოდა, თვით პირად ბედსაც კი... აკეთებდა იმას, რაც მოსწონდა, თუ არა და საერთოდ არ აკეთებდა. სწორედ ეს იყო მიზეზი იმ გაუთავებელი გაუგებრობებისა.

— უეცრად მომეჩვენა, რომ მეც ვაჭარი ვარ და იმ მოსაწყენ გარიგებაში ვმონაწილეობ. გული ამერია და უარი ვუთხარი. შენ დაგაბრალე, ვითომდა წესიერების დიდი დამცველი მყავხარ... წავიდეს ერთი მაგისი!

ღმერთო ჩემო, ახლა ხომ აშკარად ჩანს, რა სისულელეებისა და უბადრუკ გამოგონებათა ჯაჭვი იყო ეს ყველაფერი! ისინი აგარაკზე არ უნდა მოეწვიათ, ხოლო თუ მოიწვიეს, არც უდიერად უნდა მოქცეოდნენ, არ უნდა გაენაწყენებინათ. არც იმ საოცნებო საფრანგეთში წასვლაზე უნდა გამოეღო თავი...

ვასილკოვოში, რასაკვირველია, სერიოჟას კრინტიც არ დაუძრავს საფრანგეთზე და სწორადაც მოიქცა, მაგრამ რაღა საჭირო იყო მაშინ ამისთანა გადაგებული მასპინძლობა?

გავიდა ორი დღე. სერიოჟა ინსტიტუტში წავიდა. სალამოს შინ, შაბლოვკაზე მშვენიერ გუნებაზე დაბრუნდა. უამბო ოლგა ვასილიენას, თუ როგორ მეგობრულად, სიყვარულით შეხვდა კლიმუკი, როგორ მოიკითხა ყველა — ოლგა ვასილიენა, დედა, ირინკა, დეიდა პაშა, ბრიგადირი კოლკა. თავზე ხომ არ წამოვიცვით მთვრალეებმა იქაურობაო.

სერიოჟამაც ასევე წახუმრებით მიუგო: ყველაფერი დიდებულად ჩატარდა და დიასახლისსაც სასაყვედურო არაფერი აქვსო.

— ჰო, მართლა, ეღუარდ ნიკოლაევიჩს საყვედური ხომ არ გამოუთქვამს, სასტუმროში ღამის გასათევი ადგილები რომ ვერ ვუშოვეთ?

— არა, არავითარი, ან როგორ იტყოდა, როცა მოსკოვში ჩასვლამდე ენა ვერ დაძრა. მხოლოდ მოსკოვში შესვლისას ხრინწიანი ხმით ერთადერთი სიტყვა წამოისროლა: „მოიტანეს?“ თუმცა ვერავინ ვერ გავიგეთ, რას ნიშნავდა ეს.

— რა ისმის საფრანგეთში წასვლაზე? — ჰკითხა ოლგა ვასილიენამ.

— ჯერ არაფერი გარკვეული არაა თურმე, საერთოდ კი კლიმუკი მოელაპარაკება, სადაც ჯერ არს. ნაღდად შემპირდა. ისე რომ შენ ნუ წუხარ, გენკა მოაგვარებს ყველაფერს, არც ისეთი ძნელი საქმეა.

საქმე ფულის შოვნა იყო. ოლგა ვასილიენა ჯერ ფარულად მოელაპარაკა დედას. დედა ხშირად აძლევდა ოლგას ფულს, ხან სესხად, ხანაც უბრალოდ ისე, ჩუქნიდა. მაგრამ ახლა ქალი გააოცა თანხის სიდიდემ და შეეყოყმანდა.



ამდენი ფული დედას ნამდვილად არა ჰქონდა. გიორგი მაქსიმოვიჩი ყოველ-
თვიურად მხოლოდ სახარჯო ფულს აძლევდა.

— ვითომ ასე აუცილებელია ეს მოგზაურობა? — სცადა ოდნავი შეპა-
ექრება ქალმა. — თქვენს ოჯახს იმდენი რამ აკლია... შენ ქურჭი გინდა, ირინ-
კას პალტო დაუპატარავდა... ესეც არ იყოს, ორივე რომ მიდიოდეთ, კიდევ ჰო!

— ამას არც არავინ გვთავაზობს, მაგრამ ერთად წასვლას ვერც შევი-
ძლებთ, სერიოზოსათვის კი ეს მოგზაურობა ყოველმხრივ სასარგებლო იქნე-
ბა, — მიუგო პასუხად ოლგა ვასილიევნამ.

დედამ მთლად კარგად ვერ გაიგო, რად იქნებოდა ყოველმხრივ სასარგებ-
ლო. მართლაც ძნელი გასაგები იყო. თუმცა, როგორც ყოველთვის, დედამ ახ-
ლაც ირწმუნა ქალიშვილის სიტყვები, შეჰპირდა, გიორგი მაქსიმოვიჩს მოვე-
ლაპარაკებო. მეორე დღეს დაურეკა და უთხრა, — გიორგი მაქსიმოვიჩს სე-
რიოზოს ნახვა სურს და გამოიაროსო.

დარწმუნებული იყვნენ, „გამოიაროს“ ნიშნავდა, მოდით და ფული წაიღე-
თო. შაბათს სამთავენი წავიდნენ. დედა და გიორგი მაქსიმოვიჩი უკვე სამი წე-
ლია ახალ ბინაში ცხოვრობდნენ, იქვე, სუშჩევსკოეზე, წინანდელი ბინის მახ-
ლობლად, სადაც გიორგი მაქსიმოვიჩს სახელოსნო ჰქონდა. ნამდვილად კარ-
გად მიდიოდა გიორგი მაქსიმოვიჩის საქმეები. ეჭირა რაღაც არჩევითი თანამ-
დებობა, რაღაცას გამგებლობდა, სადღაც ასწავლიდა, ცოტ-ცოტას სახელოს-
ნოშიც მუშაობდა. ბევრი მუშაობა ეჭიმებმა სასტიკად აუკრძალეს, თუმცა ახ-
ლაც დილიდანვე უყვარდა სახელოსნოში გასვლა. თუ არ ხატავდა, სურათებს
დაფუსფუსებდა, პატარა ჩაქუჩით ბაგეტებზე ლურსმნებს აჭედებდა, ამაგრებ-
და მუყაოს, აწყობდა ქალაღებს, ნელა, მხედველობის დაუძაბავად. რაღაც-
რაღაცეებს ასწორებდა ან სულაც რომელიმე მეგობარს მოიპატიებდა პირ-
ველი ან მეორე სართულიდან. ქურაზე ადუღებდნენ ჩაის, სვამდნენ და მუსა-
იფობდნენ. მსჯელობდნენ საქმეებზე, იგონებდნენ წარსულს. თან უზარმაზარ
საქალაღდეებად შეკრულ სურათების უმდიდრეს კოლექციას ათვალი-
ერებდნენ.

რომანი

თარგმნა ნათელა ლორთქიფანიძემ

IV

პეტერ მაიცენი წყნარი ბარის მარჯვენა მხარეს იდგა, ზვარს ზემოთ; საყვირი ისევ იმ ნაღვლიან ჰანგს უკრავდა, მაგრამ ახლა ისეთნაირად ისმოდა მისი ხმა, თითქოს პეტერ მაიცენს უხმობს, ეს მყუდრო კუთხე კარგად დაათვალიერეო.

ხეობის სილამაზემ მართლაც ისე გაიტაცა იგი, ყველაფერი დაავიწყდა ამ ქვეყნად.

— აი, ეს წყნარი ბარიც! — ხმამაღლა თქვა მან. — თითქოს ხელისგულივით გადაშლილა. ჰოი, რა ლამაზი, რა მსუბუქი ხელისგულია!..

საყვირის ხმა ტალღებად იშლებოდა და ნელა ეფინებოდა წყნარსა და მშვიდობიან მხარეს.

პეტერ მაიცენი წელში გაიმართა და ღრმად ამოისუნთქა, თითქოს უნდოდა შეესრუტა ამ მიწის მთელი ეს ტურფა სიმწვანე, ცარგვალის ეს ლურჯი სილამაზე — სიმშვიდითა და სიწყნარით სავსე. ფილტვები გაუფართოვდა, გული ბედნიერებით აუჩქროლდა. ბედნიერებას კი ნაღველის ერთი წვეთი უფრო სავსეს ხდის.

— განა მშვენიერი არ არის! — შესძახა მან და ხელები გაშალა, თითქოს სურდა მთელი ხეობა ჩაეკრა გულში. — ვინ იცის, აქ სადმე, იქნებ იმ ზვარის ქვემოთაც დგას ის სტუმართმოყვარე, განმარტოებული თეთრი სახლი. ქერათმიან, შავთვალა, თეთრყირმიზა ქალს რომ ჰგავს. ჰო, კინაღამ არ დამავიწყდა! ჯერ კიდევ მდინარის პირას იმ ტოტებგაშლილ ტირიფებს დავპირდი,



უკან გამობრუნებისას ჩამოგივლით-მეთქი. ჩავალ კიდევ, ერთი იმ ბიბინა ბალახზე გავგორდები. ჯერ აქ ვიჯდები ცოტა ხანს, გავძლები ყურებით. ტემ-ნიკარი დაიცდის, ბოლოს და ბოლოს უკეთესიც იქნება, თუ ეს შადლიანი დოლენის მხარე იმ მკაცრ ტოლმინის მხარეს მომაგონებს.

პეტერ მაიცენი მიწაზე დაჯდა. მაგრამ იმის შიშით, ჩვეულებამ არ მძლი-სო, ანუ გულადმა არ წამოვწვე და უნაყოფო ოცნებამ არ გამიტაცოსო, საჩ-ქაროდ წამოდგა, მუხის ჯირკვზე ჩამოჯდა, გააბოლა და მიდამოს გადახედა.

„ასე!.. ახლა კი დავათვალეერთ აქაურობა! ქვემოთ, ხევში უკიდევანო ველი გაშლილა, მწვანე ბალახის ფაფუკი საბანი რომ აფარია. ზედ მდინარე მიიკლაკნება. სველი ბალახი აქ უფრო მწვანე ჩანს, წყალი კი თითქმის შავი... ნაპირ-ნაპირ: სამი ტირიფი მიაბიჯებს — სამი თმაგაწეწილი დიაცი. არ წასუ-ლან მაინცდამაინც შორს. მორევამდეც კი ვერ მიუღწევიათ“.

პეტერ მაიცენმა თავი გვერდზე გადახარა და მზერა ტოტებგაშლილ რცხილაზე შეაჩერა, მორევის თავზე რომ იდგა.

„და მაინც კაცმა არ იცის, რატომ ერიდება ხალხი ამ ადგილს. ხეც სა-ოცრად დადინჯებული და დაღონებული ჩანს. უძრავად დგას და ჩაჰყურებს მორევის გამჭვირვალე სიღრმეს. რასაკვირველია, ეს მორევი მისია. მისი თვალთა, დიდი, ღრმა, მწვანე თვალი... რა არ უნახავს ამ თვალს! მერე სად არის ის ყველაფერი, რაც მას უნახავს? ზემოთ, ტოტებში? რასაკვირველია, ტოტებში. ამ რცხილის ყოველ ფოთოლში ასარკულა ცოცხალი სურათი იმი-სა, რაც ოდესმე მორევში დაუნახავს... დიახ, დიახ! სწორედ იმ წამში, როცა ახალგაზრდა მრეცხავმა ქალმა თეთრი ზეწრები მწვანე ბალახზე გაფინა და საბახაოდ ტანთ გაიხადა, როცა ქალი წყალში გადახტომამდე წამით შეჩერდა ნაპირზე, რცხილამ ჩუმად გადაიღო წყლის ზედაპირიდან მისი სურათი, დააპატარავა და თავის ხეშეშა ფოთლებში დამალა... ვინ იცის, რამდენ მშვე-ნიერ სურათს ინახავს იგი თავის დაბურულ ფოთლებში. ხოლო როცა რცხი-ლა მარტო რჩება, განსაკუთრებით შემოდგომაზე, მოახლოებული ზამთრის, მისი ცხოვრების იქნებ უკანასკნელი ზამთრის ძილის წინ, როცა თანდათან უფრო და უფრო ნაკლებ წვეწვს იღებს, და უკვე გრძნობს, მის ბებერ ფეს-ვებს როგორ ეცლება ძალა, მაშინ ნელ-ნელა, ფოთოლს ფოთოლზე ჰყრის მორევში, ახლა უკვე მეხსიერების სარკედ რომ ქცეულა, და ყოველი მათგა-ნი იშლება წყლის ზედაპირზე; აი მაშინ ერთხელ კიდევ ცოცხლდება სურა-თი, მერე კი მსუბუქი თრთოლვით სამუდამოდ ქრება, სუნთქვის ნაორთქლი რომ შებურავს სარკეზე რაიმე გამოსახულებას, ისე... ითვლის ბებერი რცხი-ლა გარდასულ დღეებს...“

პეტერ მაიცენმა მწარედ ჩაიციხა და თავი გაიქნია:

„ჰო, ჩემო ძვირფასო რცხილავ, ცხოვრება გრძელია და უღიმღამო, ოქ-რო წამები იშვიათად გამოეჩევა! ჩვენ კი ქარაფშუტულად ვხარჯავთ ამ წა-მებს, როგორც ოქროს ფულს, თუ ხელში ჩაგვივარდა... ვერც ოქროს ვუ-ფრთხილდებით და ვერც ბედნიერებას!“

მან ნამწვი მიწაზე დააგდო და ქუსლით ჩასრისა.

„კმარა. თავი გავანებოთ ამას! ეს სამყარო, ჩვენ თვალწინ რომ გა-დაშლილა, ასევე ოქროსია და ამ სამყაროში ახლა მე ვარ. აი იქ, რცხილის ჩრდილში თეთრი წანწალა მოჩანს. ისე ქათქათებს, ვით თეთრი იხვი, თო-ლია ან თეთრი გედი. შორს, წყალში დგას იგი და მაინც რა ნათელი და

ცოცხალი ჩანს! ღმერთმანი, ცოცხალი! განა საოცარი არ არის, როცა ახლოს არც ადამიანი ჭაჭანებს, არც ცხოველი, უსულო საგნები რომ ზოგჯერ უც-რივ ცოცხლდებიან? მერე რარივ შერწყმიან ერთმანეთს!.. დიახ, ყოველივე ცოცხალია! გზაც ცოცხალია. რა კარგია! რცხილა, მდინარე, ტირიფი, აქვიტი და გზა — ყველა ერთად მშვენივრად ეხამება ხეობის სურათს... ხოლო იქ, ფერდობზე დგას მშვენიერი მუხა. მალა — აყვავებული წიწიბურას ყანაა. როცა იქ აბზუილდება ათასობით ფუტკარი, ისე ირხევა და მღერის ეს ყანა, თითქოს ფერდობზე თეთროსანი ქალწული იწვეს, შესცქეროდეს ლურჯ ცას და თავის სიმღერას უსიტყვოდ აწკრიალებდეს... მაგრამ განვაგრძოთ გზა! ყანის ზემოთ მდებოა, ხოლო მდებოზე — ვილაცის კარ-მიდამო, წითელი კრამიტით გადახურული. ლამაზი სახლი ბებერი ხეხილის ხეებში დგას. ეტყო-ბა, ახლად გადახურულია, რა თქმა უნდა, ახალი იქნება, რაკი მზეზე ცეცხლი-ვით ბრიალებს ახლად გამომწვარი კრამიტი“.

პეტერ მაიცენმა გაიღიმა და ხმამაღლა თქვა:

— წითელი სახურავი ცეცხლივით ბრიალებს მწვანე ხეებში!.. ვერაფერს იტყვი, კარგი შედარებაა, ცოცხალი და... — მან აღარ დაამთავრა სათქმელი. „დიახ, ახლა ეს კარგი და ცოცხალი შედარებაა, მაგრამ არცთუ ისე დიდი ხნის წინ საშინელი სინამდვილე იყო. სახლი ხომ გადამწვარია! კედლები კი ახლაც შებოლილი არის... ალბათ ომის დროს დაიწვა. ცეცხლი წაუკიდეს ალ-ბათ. რა არის გასაკვირი, რამდენი სახლი გადაბუგეს! აკი ტემნიკიც დასწვეს!“

„რაო? ტემნიკიც დაწვეს განა?“

პეტერ მაიცენი დაფიქრდა და მერე თავი გააქნია.

„არ ვიცი... თუმცა ამაზე არც მიფიქრია. და არც უნდა მეფიქრა, რადგან ჩემი მოთხრობა ტემნიკარის დაღუპვით მთავრდება. საერთოდ მე ხომ ტემნი-კარზე ვწერ, უფრო სწორად, მის უკანასკნელ დღეზე: განთიადიდან დაწყე-ბული, როცა გულდამძიმებულმა გაიღვიძა, მზის ჩასვლამდე, როცა ტყვიით გულგანგმირულმა სობში დალია სული“.

„სწორია, მაგრამ...“

„არავითარი მაგრამ!“ — სასწრაფოდ შეესიტყვა თავის თავს პეტერ მაიცე-ნი, რაკი იგრძნო, უკვე იღვიძებდა ის უჩინარი ძალა, რაც აიძულებს სწე-როს. — ტემნიკარის საქციელს რა მოჰყვა, ის რომ დავწერო, მთლად დავარ-ღვევ ნოველის წყობას, ახლა მარტივი კი არის, მაგრამ სამაგიეროდ კარგადაა შეკრული. ყოველივე, რაც ტემნიკში მოხდა მისი სიკვდილის შემდეგ, ამ ჩარ-ჩოებს სცილდება!“


მაგრამ უჩინარი ძალა ყურს არ უგდებდა გონების ნაკარნახევ დასკვნებს, პირიქით — ახალი აფეთქებისათვის ემზადებოდა. პეტერ მაიცენი კი ეწინააღ-მდეგებოდა, რადგან ქვეცნობიერად შიშობდა, რომ ნოველა გაიზრდებოდა, გაიბერებოდა და მერე ხელში შემოადნებოდა. ბევრჯერ დამართნია ასე.

„არა არა! ეს ნოველის ჩარჩოში ვერ მოთავსდება!“ — ჯიუტობდა იგი. მაგრამ გული უფრო და უფრო ძლიერ უცემდა, ნაცნობი თავდავიწყება ეუფ-ლებოდა და თავბრუს ახვევდა.

მან ფარხმალი დაჰყარა.

„მართალია, ტემნიკსაც გადაწვავდნენ“.

„რასაკვირველია, გადაწვეს კიდევ! — პასუხობდა იგი თავის თავს. და იმა-ვე წამს ეს ამბავი სიმართლედ იქცა, ცოცხალ და უცილობელ სინამდვილედ.—



როცა რობში დახოცილი თეთრგვარდიელები და მკვდარი ტემნიკარი იპოვეს...“

„იპოვეს კია?“

„რასაკვირველია! მარტინ ლუჩნიკი თავის ჯარისკაცებიანად უკან არ მობრუნებულა იმ ლაშქრობიდან და არც შობა დღეს უნახავს ვინმეს. ჰოდა, მაშინ ვენც ზაპლატარმა...“

„იმ წყეულმა აყლაყუდამ?“

„დიახ, დიახ, ასე ეძახდნენ იმიტომ, რომ ჭოკივით გრძელი იყო და თუ მონდომებდა, სახურავზე კრამიტებს დაითვლიდა. ოდესღაც ტემნიკარის ქალს — იუსტინას თხოულობდა, ომის დროს კი გარნიზონში თარჯიმნად და მეგზურად დაიყენეს, რადგან ამ მხარეში ყველა ბილიკი იცოდა. მან შეყარა ეს არამზადები და მარტინისა და მისი ოთხი ჯარისკაცის საძებნელად გაუძღვა“.

„მერე?“

„მერე ტემნიკში შემოცვივდნენ და ყველას გაუსწორდნენ, ხოლო ტემნიკარის ცოლი...“

„არა, არა! — ეწინააღმდეგებოდა პეტერ მაიცენი ამ ჭეშმარიტებას, რახან ბოლომდე ჯერ კიდევ არ ჰქონდა კარგად მოფიქრებული, — ეს არ შეიძლება!“

„ჰო, მაგრამ არც ის შეიძლება, რომ ბებერ, ბუზლუნა მარიანასაც ვაჟაკურად დაეჭირა თავი!“

„ჰო, ესეც გაუგებარია!“

„გაუგებარია? განა ცოტა გაუგებარი ამბავი მოხდა ამ ომში! ადამიანმა არც კი იცის, რას შეიძლება. მხოლოდ ყველაზე მძიმე განსაცდელის დროს იხსნება ის ცხრაკლიტული, სადაც იმალება ადამიანთა ფასდაუდებელი გამოცდილება და განუზომელი ძალა. ასე დაემართა ტემნიკარის ცოლსაც... ტემნიკარს რომ ენახა, საკუთარ თვალებს არ დაუჯერებდა, ვერც კი წარმოიდგენდა, რა ძალა ჰქონია ამ ჯარასავით გამხმარ დედაკაცს, ასე ეძახდა ხოლმე ტემნიკარი ცოლს. როცა ქალს შაშხანების ლულები დაუმიზნეს... არა, არა, მანამდე... როგორც კი თვალი მოჰკრა...“

ახლა პეტერ მაიცენმაც მოჰკრა მათ თვალი.

ისინი ისე გაბაწრულიყვნენ დათოვლილ მინდორზე, გეგონებოდა, შავი გველი მოიკლაკნებოთ თეთრ სილაზე. ზამთრის ცივი მზე უძრავად ეკიდა ცივ ცაზე და ცივ სხივებს აფრქვევდა ისე ცივად მბზინვარე ცივ ჩაჩქანებს, ვითარცა მბზინვარებს გველის ცივ ზურგზე მზით გაბრწყინებული ცივი ლაქები.

სწორედ ამ დროს გამოვიდა სამზარეულოდან ტემნიკარის ცოლი „კათედრაზე“. ხელში წყლით სავსე ტაშტი ეჭირა. „კათედრა“ დაარქვა ტემნიკარმა აივანს, სახლის სამხრეთ მხარეს რომ გადიოდა. უყვარდა ქალს აქ დგომა და აქედან ჰკუთის დარიგება ქმრისა, ასედა ასე გააკეთებო. ქალმა უკან გააქანა ტაშტი, რომ წყალი ღობის იქით გადაექცია და უცებ გაქვავდა. წყალი წინსაფარზე ჩამოეწუწა, ის კი მონუსხულივით

მიჩერებოდა იმ შავ გველს, ნელ-ნელა, ჩუმად რომ მოცოცავდა მისი სახლისაკენ.

— მოდიან! — თქვა ქალმა. ყრუ ხმითა თქვა, საოცრად მშვიდად, რამეთუ ამ საშინელმა სინამდვილემ შიშის შეგრძნება დაუკარგა. — მოდიან! — გაიმეორა ისევ ყრუდ და მშვიდად, თუმცა უცნაური მწარე კმაყოფილებაც ერია ხმაში, თითქოს დიდი ხანია მათ მოლოდინში იყო. იგი მართლაც ელოდა მათ გუშინ, ელოდა იმ გაუთავებელ წუხანდელ ღამეს, ტანთ გაუხდელად იწვა ღუმელზე და მზად იყო ყველაფრისათვის. საათის ისარი ჯიუტად მიიწევდა წინ და ამავე დროს ძლივას იძროდა, რადგან ირგვლივ ავი დრო გაქვავებულიყო და თავისი ტორით დაეჭირა ისრები. საათი უჩვეულოდ ხმამალა ტიკტიკებდა და ყოველ მის ჩამოკვრაზე ტემნიკარის ცოლის გულში იღვენთებოდა და ქვავდებოდა სამსალის თითო-თითო წვეთი: ასე ეგონა, რომ საათის ყოველ ჩამოკვრაზე მთელი ტემნიკი კრთოდა, რომ ხუტორი შორდებოდა სოფელს და საცაა სადღაც ჩაინთქმეოდა. ქალი ქვეშეცხნულად გრძნობდა, რომ ბედმა გაწირა, რომ ახლა მთლად მოწყვეტილი იყო სამყაროს. იგი პირაღმა იწვა და თვალნათლივ ხედავდა, როგორ ეხუტებოდა სახლი ციცაბო ფერდობს, ვით ბუდე კლდეს, ხოლო ქვემოთ, უკიდევანო, დათოვლილ მინდორზე, მთვარით განათებულ უდაბნოს რომ ჰგავდა, ნელ-ნელა და ჩუმად მოცოცავდა შავი ქვეწარმავალი. იგი მოშლის მის ბუდეს და ბოლოს მოუღებს მათ. გაყინული ტოტების ლაწალუწი, თოვლით დამძიმებული ძველი ფიცრის ჭრიალი სხვენში აკრთობდა ქალს და შეშფოთებული დაცქვეტდა ხოლმე ყურს.

— მოდიან!


მართლაც სადაცაა აქ გაჩნდებოდნენ. ქალმა ფრთხილად დადო ტაშტი მიწაზე, წელში გაიმართა და გამხდარი ხელი თვალეებზე მიიფარა, თვალს სჭრიდა თოვლით გადაპენტილი მინდორი.

— ოცდაათიოდე კაცი იქნება! — ივარაუდა ქალმა. — ყველა ვიგინდარა და თახსირი. მხოლოდ გერმანელებს ახურავთ მუზარადები.

ქალმა იცოდა, რომ საჩქაროდ უნდა წასულიყო თავის ქალვაჟთან, მაგრამ ადგილიდან არ დაძრულა. გაშეშებული იდგა და უცქეროდა, როგორ მიიმალა გველი ქვემო ყანის მოსახვევში, თითქოს ნელ-ნელა ჩაეფლო ამ ბრჭყვიალა თოვლში. ტემნიკარის ცოლმა მზერა ზემო ყანისკენ გადაიტანა...

— რომ აღარ გამოჩნდნენ! — თქვა ქალმა. მართლაც აღარა ეშველა მათ გამოჩენას, იმიტომ რომ ქალის გვერდით ავი დრო გაქვავებულიყო.

ბოლოს გველი ისევ ამოსრიალდა თოვლიდან, მარცხნივ მოუხვია და ზემო ყანის კიდეს გაუყვა. ახლა კი ტემნიკარის ცოლმა საკაცეს მოჰკრა თვალი.



„ის მოჰყავთ! — გაუელვა თავში. — უბოვიათ!“
 ქალი მიტრიალდა და სწრაფად შევიდა სამზარეულოში. ოთახის კარს მიაწყდა, მაგრამ კვლავ ადგილზე გაშეშდა.

— იგი მკვდარია! — თქვა მან და იმავ წუთს მიხვდა, რომ თავადაც მკვდარია. იგრძნო, როგორ შემოეცალა ხორცი და თანდათან უფრო და უფრო მჩატე გახდა — ისეთი მჩატე, რომ შეეშინდა, არ წავიქცეო, და მუხლებით ღუმელს მიეხვინა. თვალებიც დახუჭა, მაგრამ ყურებმა ისეთი შხუილი დაუწყო, საცა იყო წაიქცეოდა და საჩქაროდ გაახილა თვალები. მერე თავის გამხდარ ხელებს დახედა. თითქოს სხვისი ხელები იყო, მისი არა. ქალმა მუშტები შეკრა, მერე გაახსენდა, რომ მომაკვდავებს უყვართ ხოლმე საკუთარი ხელების ცქერა და წინსაფარში დამალა. შეკრთა, ირგვლივ მიმოიხედა და გამოფხიზლდა, სინამდვილეს დაუბრუნდა.

„იუსტინა! ტონე!“ — მაგრამ იმავე წამს მიხვდა, რომ ორთავე უკვე მკვდარი იყო, ქალმა თვალები დახარა და წამით ყურების შხუილს მინებდა, მერე კი მთელი ძალა მოიკრიბა და კვლავ ისეთი გახდა, როგორიც იყო იმ წუთიდან, როცა ერნეი თვალს მიეფარა, როცა თავადაც მიხვდა, რომ იგი აღარ დაბრუნდებოდა, — გახდა უტყვი და უდრეკი.

ქალი ტანში გაიმართა და აუჩქარებლივ შევიდა ოთახში. ბიჭი იჯდა, მარჯვენა ხელში ფოცხის კბილი ეჭირა და თვალმოჭუტული დასჩერებოდა, ხოლო მარცხენა ხელით კისერს იფხანდა. ქალს მოაგონდა ერნეი და ერთხელ კიდევ ინანა, რომ ტონე მამას არა ჰგავდა, რომ მამამისივით ამ წუთშივე არ წამოხტებოდა, ნაჯახს არ სტაცებდა ხელს. მან შეხედა ღუმელს, სადაც იუსტინა იჯდა და მაქმანსა ქსოვდა; დედა რომ დაინახა, თვალებით მორჩილად შეეკითხა, რა მოხდაო, მაგრამ დედამ თავი ისე დაიჭირა, ვითომც არაფერი მომხდარიყოს. მერე მაგიდასთან მივიდა და ერთხელ კიდევ გადახედა შვილებს. ჯერ იყო და იფიქრა, ისა სჯობს, აქედან ფეხიც არ მოიცივალონ—რატომ შევაშფოთოო, მაგრამ დედურმა გრძობამ სძლია და გულიდან ყვირილი აღმოხდა:

— იგაიქეციოთ! არა! სათივეში შეაფარეთ თავი! თივაში დაიმაღეთ! აბა, ჩქარა!

ტონე ისე წამოხტა, თითქოს ზამბარებმა აისროლესო, იუსტინამ ნელ-ნელა გაუშვა ხელიდან ჩხირები.

— არა! — გადაიფიქრა ტემნიკარის ცოლმა. მიხვდა, რომ ამო იყო ყოველი. „მათ უკვე ძველ ყანასთან მოუხვიეს“, — გაიფიქრა მან შავ გველზე.

— რა მოხდა? — ჰკითხა იუსტინამ და შიშით აახამხამა თვალები.

— საშიში არაფერია! — მშვიდად მიუგო დედამ. — ზემოთ ადით, პატარა ოთახში და წყნარად იყავით!

— გერმანელები მოდიან?

— არ ვიცი... ზემოთ ადით! საშიში არაფერია!
 — მამაც რომ არ არის შინ! — აფლუკუნდა ტონე.
 — წადით-მეთქი, — უთხრა დედამ. — საშიში არაფერია!..
 ყმაწვილები ადგილიდან დაიძრნენ, მაგრამ ზღურბლზე შე-
 ჩერდნენ.

— წადით! წადით-მეთქი, ნურაფრისა გეშინიათ! — დე-
 დამ კარი გაუხურა შვილებს, მერე თვალდახუჭული ადგილზე
 გაშეშდა.

კვლავ ჩაესმა გამაყრუებელი ხმაური, კვლავ მოეჩვენა,
 რომ მთელი სახლი საცა იყო ჩაინგროდა.

— აი, უკვე სკოპიჩნიკამდე მოაღწიეს! — წარმოთქვა ქალ-
 მა და გონებაში დაინახა, როგორ მოხიზავდა ნაკადულის გა-
 ყოლებით შავი გველი. ქალმა თვალეები გაახილა და მიმოიხე-
 და. რაღაც უნდა გადაწყდეს, მაგრამ რა — ეს არავინ იცის.
 წამით დაფიქრდა, მერე ხელები უღონოდ დაუშვა და ღუ-
 მელთან მივიდა.

„აქ დავხვდები მათ!“ — გადაწყვიტა ქალმა და ღუმელთან
 დაჯდა. ხელები მუხლებზე დაიწყო და სივრცეს მიაშტერდა.
 მის უკან, თითქოს გაქვავებულ დროს ჩაქუჩს ურტყამენო,
 ხმამაღლა წიკწიკებდა კედლის საათი.

„ამდენ ხანს რად შეაგვიანდათ?“ — გაიფიქრა ტემნიკა-
 რის ცოლმა და კვლავ დახუჭა თვალეები, კვლავ უცნაურ ხმა-
 ურს მინებდა.

ასე გაქვავებული, დამუნჯებული იჯდა ქალი შობის წინა-
 დღესაც. ვერც ვაჟმა და ვერც ქალიშვილმა ვერ გაბედეს
 კრინტიის დაძვრა. ბოლოს სიჩუმე ისევ იუსტინამ დაარღვია.

— ამდენ ხანს რად არა ჩანს! — თქვა მან.

— აღარც გამოჩნდება ალბათ! — უნებლიეთ აღმოხდა
 ტემნიკარის ცოლს.

— სადმე წავიდა? — იკითხა ტონემ.

— ტყეში! ხომ იცი! — მკაცრად უთხრა დედამ. „მამას
 რომ ჰგავდე, თან გაჰყვებოდი“, გაუელვა ქალს თავში და ჩა-
 ფიქრდა, აქ დარჩენა უჯობდა ჩემს ბიჭს, თუ მამის თანგაყო-
 ლაო. მაგრამ ამის გარკვევა მეტად ემძიმა, ისე რომ შემდეგი-
 სათვის გადადო.

ტონე იჯდა და ფოცხის კბილებს თლიდა. ისე გულმოდგი-
 ნედ ჩაჰკირკიტებდა ხოლმე ამ საქმეს, მამას ზიზღი ერეოდა.
 საოცარია, ახლა დედაც გაღიზიანდა მისი შემყურე. ქალმა
 იუსტინას გადახედა, იქვე ჩხირებით რომ ქსოვდა. იუსტინამ
 ამოიოხრა და ცხვარივით მორჩილად შეხედა დედას. მისი ეს
 მზერა ხშირად აბრაზებდა ხოლმე ტემნიკარს. საოცარია, ახლა
 დედაც გაღიზიანდა. ქალმა ოთახს თვალი მოავლო და საათს
 ახედა. საათი აჭრიალდა და ნელა ჩამოჰკრა რვა. ტემნიკა-
 რის ცოლმა ხელი ასწია, რათა საათის გირი მაღლა აეჭაჩა,
 მაგრამ გირი ქანქარას გამოედო და საათი გაჩერდა.



— იქნებ სულ წავიდა? — კვლავ თქვა იუსტინამ.
 ტემნიკარის ცოლი შეკრთა და ქალიშვილს შეხედა.
 — სად უნდა წასულიყო? — გაეხმაურა ტონე.
 — პარტიზანებთან, — მიუგო იუსტინამ.
 ტემნიკარის ცოლმა ამოიოხრა და ქანქარა შეარხია.
 — პარტიზანებთან? — გაჭიანურებით თქვა ტონემ.
 — მაშ სად? — მკაცრად მოუჭრა დედამ. — ამიტომაც ჩუ-
 მად იყავით!

ჰოდა, მთელი საღამო და მთელი შობა დღე ხმა აღარ გაუღიათ.

ტემნიკარის ცოლს ბევრჯერ გაუელვა თავში, ჩემი ქმარი ალბათ პარტიზანებთან წავიდაო, თუმცაღა გული მაინც უგრძნობდა, რომ ტემნიკარი ცოცხლებში აღარ ეწერა. დროდადრო თავს იმტყუნებდა — უნდა მეყვირა, უნდა გავკიდებოდი, მოსახვევს რომ მიეფარაო. მაგრამ იღუმალი, დაუცხრომელი ძალა უსიტყვოდ აჩქარებდა: დამნაშავე არა ხარ, სწორად მოიქეცი, ტემნიკარს მტკიცე გადაწყვეტილება ჰქონდა მიღებული და თავისი გზით უნდა წასულიყო. ქმარი უზომოდ გაიზარდა ქალის თვალში. გაახსენდა, გამომშვიდობებისას რომ უთხრა: „რა უცნაური ხარ... თითქოს სხვა ვინმე ხარ და არა შენო“. ისიც გაახსენდა, რა უპასუხა ქმარმა: „აი უკვე ორმოცი წელია, ჩემს თავს არა ვგავარ, დღეს კი კვლავ დავემგვანეო!“ მაინც როგორი იყო იგი? ისეთი, როგორიც იყო ნამდვილად და როგორსაც ცოლი არ იცნობდა თურმე.

„ერნეი!“ — ეძახდა ფიქრში ქალი და გულს რაღაც უჩინარი სიტბო უთბობდა. ასე ახლოს არასდროს უგრძნვია ქმართან თავი.

ამ სიახლოვეს ახლაც გრძნობდა, როცა შავ გველს მისი ქმრის მკვდარი სხეული შინ მოჰქონდა. ქალი თვალს არ აშორებდა ხის კოვზს, ქმრისთვის რომ იღო მაგიდაზე, და უცებ ისე ნათლად დაინახა ქმარი, რომ უნებლიეთ ადგა და წყნარად დაუძახა:

— ერნეი!

ზურგს უკან საათმა ჩამოჰკრა. ქალს მოაგონდა, თავისი ქალ-ვაჟი რომ ოთახიდან გაუშვა. რაღაცის გაკეთება უნდოდა. დაელოდა, სანამ სამს ჩამოჰკრავდა, მერე კედელთან მივიდა, გამხდარი ხელი გაიშვირა და საათი გააჩერა.

— ღმერთო, შენ დაუმკვიდრე სამუდამო სასუფეველი! — წარმოთქვა ქალმა სიჩუმეში და ნელა გადაიწერა პირჯვარი.

— შენ არ ასვენებდი! — სიჩუმეში მიუგო თავისივე ხმამ.

ქალი ოთახში აწრიალდა, გული ლამის გასკდომოდა. დიდმა სევდამ შეიპყრო, სევდამ, უსაზღვრო სიყვარულთან ერთად რომ აუვსო გული. და უცებ მიხვდა, როგორ უშხამავდა სიცოცხლეს ქმარს, საკუთარ თავსა და შვილებსაც.

— მე ხომ მიყვარდა იგი! — წაისლუკუნა ქალმა. — სხვა-

ნაირად კი არ შეგეძლო! არ შეგეძლო!..

— არ შეგეძლო! — დაეთანხმა ნალვლიანად ხმა, — არ შეგეძლო, თუმცა გინდოდა კი...

— მინდოდა!.. — ამოიოხრა ქალმა.


იგი ზურგიით მიეყრდნო ღუმელს და წამით თვალები დახუჭა. მაგრამ მხოლოდ წამით, რადგან უეცრად იმ დაუცხრომელმა ძალამ, ქალი რომ დაარწმუნა, ერნეი უეჭველად უნდა წასულიყო, მისთვის ნათელი გახდა — თავადაც უნდა გასცლოდა აქაურობას. რაღაც არ უნდა დასჯდომოდა, რაიმე უნდა ეღონა.

— არა, მაგათ მე აქ არ დაველოდები! — გადაჭრით თქვა ქალმა. — მისი პირველი ცოლი აქ არასოდეს არ დაველოდებოდა, მობრუნებულს ასეთი გზიდან, წავიდოდა და შეეგებებოდა. მეც წავალ და შევეგებები! ღროა...

ქალი წელში გასწორდა, ჭალარა ბუწუწები თავსაფარში შემაღა და წინსაფარი გაისწორა. მერე საჩქაროდ გავიდა ოთახიდან, წინკარი შეაღო და ზღურბლზე დადგა. ამის იქით წასვლის თავი აღარ ჰქონდა. მან ხელები გულზე დაიკრიფა და მზერა მიაპყრო მოსახვევს, ამ ორი დღის წინ რომ მიეფარა ერნეი და საიდანაც ის-ის იყო უნდა გამოჩენილიყო.

— ოჰ! ერნეი!..

ახლა კვლავ მოაგონდა, რა უცნაური ეჩვენა ქმარი შინიდან წასვლისას. მოაგონდა მისი უცნაური სიტყვები, მისი უცნაური ხმა და, რაც ყველაზე უცნაურად მოეჩვენა მაშინ, ხელი რომ ჩამოართვა — მთელი სიცოცხლის განმავლობაში ქმარმა მხოლოდ ერთხელ გაუწოდა ხელი. ეს მაშინ მოხდა, ომში რომ მიდიოდა. მოაგონდა, როგორ დაირცხვინა და როგორ დააპირა უკან დადევნებოდა, მაგრამ ერნეიმ ჭრელასთან შეუხვია და ამიტომ დააცადა, ბოსლიდან გამოვიდესო, იფიქრა. მოაგონდა, რამდენ ხანს იდგა ზღურბლზე და ბოლოს როგორ ჩაილაპარაკა მწარედ: „ძროხისთვის მეტი აქვს სათქმელი, ვიდრე ჩემთვის!“ მოაგონდა, როგორ გამოვიდა ბოსლიდან ქმარი, ჩქარი ნაბიჯით როგორ გაუყვა მესერს, ერთხელაც არ მოუხედავს უკან. ქალს კი ძალა აღარ ეყო, დაეძახნა მისთვის, თუმცა გული გასკდომაზე ჰქონდა. რაღაც უჩინარმა ძალამ წაუჭირა ყელში და ჩასძახა: „გაუშვი, წავიდეს! გაუშვი, თავისი გზით იაროს!“ მოაგონდა, რა უხალისოდ დაემორჩილა ამ ბრძანებას, არ იყო ბრძანების შესრულებას დაჩვეული; მოაგონდა, როგორ თანდათან დაპატარავდა მისი მხარბეჭიანი ქმარი, როგორ თანდათან მიეფარა თეთრ ფერდობს და ბოლოს მთლად გაქრა; ბეწვის ქუდილა მიგორავდა შავი ბურთივით ცოტა ხანს და მერე ისიც უცებ გაუჩინარდა, თითქოს უფსკრულმა უყო პირი. ისიც მოაგონდა, რომ იმ წუთს თავად ესლა თქვა: „აი ახლა კი სკოპინიკისკენ გაუყვა!“ — გაახსენდა, რა მწვავედ უჩხვლიტა რაღაცამ გულ-



ქართული
ენის
სამეცნიერო
ცენტრი

ში, თითქოს ეს შავი ბურთი უხილავი ძაფით მის გულთან და ახლა, უფსკრულმა რომ შთანთქა, ქალის თან წარიტანა. გაახსენდა, რა გულდამძიმებული მოტრიალდა სამზადში და რა უაზროდ მოძებნა ერნეს არნიკი და არაყი მწარე სასმელის მოსამზადებლად, რაც თავის დღეში არ უქნია. გაახსენდა, როგორ ეწოდა გულ-მუცელი და როგორ ეშინოდა ეფიქრა იმაზე, რაც მოხდა, როგორ მოეჩვენა, თითქოს ვიღაც უცხო შემოსულიყო სახლში. როგორ გამოაღო წინკარი, მაგრამ იქ ვერავინ ნახა და ისევ სამზადში დაბრუნდა ისევ იმ მწარე სასმელის მოსამზადებლად. ისიც გაახსენდა, რომ ორჯერ კიდევ გაიხედა წინკარში, მერე კი ღუმელთან იჯდა გატრუნული, თუმცა რატომღაც სულ ეჩვენებოდა, თითქოს ვიღაც უცხო შემოსულიყო შინ.

სწორედ მაშინ ჩასახლდა სახლში უჩინარი და უტყვი სტუმარი — გაქვავებული ავი დრო. ახლა ეს უჩინარი სტუმარი ზურგს უკან ედგა.

„ამდენ ხანს რად არ გამოჩნდნენ!“ — გაიფიქრა ტემნიკარის ცოლმა, თეთრად მოქათქათე სივრცეს რომ მიშტერებოდა. გაიფიქრა და იმავ წამს წაბარბაცდა, წირთხლს მოეჭიდა — თეთრი ფერდობიდან ცივი ჩაჩქნები გამოჩნდა, გველის თვალეზივით ცივად ბზინვარე.

— მოვიდნენ! — წარმოთქვა ქალმა. მას გულიც გაუქვავდა. თუმცა უსიცოცხლო ქვად კი არ ექცა, როგორც შიშმა იცის ხოლმე, მწარეზე მწარე გულისტკივილმა ცოცხალ ქვად, კაჟად უქცია, ყოველ ძარღვში რომ ცეცხლს მალავს. ქალის გული ყველაფრისთვის მზად იყო, ბრძოლისთვისაც და სიკვდილისთვისაც, თუმცა თვითონ ვერც გრძნობდა ამას. ადამიანი ხომ მაშინ არის ჭეშმარიტად დიადი, როცა თავად არც უწყის საკუთარი სიდიადე.

გველი თანდათან მოახლოვდა. მალე მინდორზე მთელი ტანით აღიმართა ოთხი ჩაჩქანიანი გერმანელი ჯარისკაცი. მერე ჩაჩქნებს ზემოთ პატარა თავი აყანყალდა, „დომობრანის“¹ ქუდი რომ ეხურა.

— წყეული აყლაყუდა, — იცნო ტემნიკარის ცოლმა, — ისევ ეს ოხერი ზაპლატარი მოჰყვებათ!

ჩაჩქანიანი ჯარისკაცები გველის ტანს მოსწყდნენ, შაშხანები მოიმარჯვეს და ნელა წამოვიდნენ სახლისკენ. ზაპლატარი გაუბედავად მოჩანჩალებდა მათ უკან. ბოსელთან შეჩერდნენ.

— მარტო ხართ? — დაიყვირა ზაპლატარმა.

ტემნიკარის ცოლმა პასუხი არ გასცა.

¹ დომობრანებს 1941—1945 წლებში სლოვენიაში და ხორვატიაში ეძახდნენ პროფაშისტური მთავრობების ახლად შედგენილი სამხედრო ნაწილების ჯარისკაცებს.



ისინი უფრო ახლოს მოვიდნენ და ზღურბლიდან ნაბიჯზე გაჩერდნენ.

— გამარჯობათ, დედილო! — უთხრა ზაპლატარმა. ამ წყეულ აყლაყუდას არც ხმა ჰქონდა მტკიცე და არც გამოხედვა.

— როგორ მიბედავ და „დედილოს“ მეძახი, შე წყეულო აყლაყუდავ? — მშვიდად ჰკითხა ტემნიკარის ცოლმა. — როგორ მოგიბრუნდა ენა!

ზაპლატარს თითქოს სილა გააწნეს, ისე გაიქნია თავი და ცოტა ხანს მართლაც ვერ მოიბრუნა ენა. მერე კი მუქარით უთხრა:

— რატომ ლაპარაკობთ ასე დღეს?

— კარგა ხნის წინ უნდა მელაპარაკა ასე! — აუღელვებლად მიუგო ტემნიკარის ცოლმა და მზერა კვლავ შორეულ ფერდობს მიაპყრო.

— ჰკუაზე ხართ?

— როგორც იქნა, მოვედი ჰკუაზე!

— ძალიან ნაადრევად ხომ არ მოგვსვლია, ჰა? — გესლიანად ჰკითხა ზაპლატარმა, თუმცა მის ხმაში შიში უფრო იგრძნობოდა, ვიდრე გესლი.

— მოგვიანებით შენი სახსენებელიც აღარ იქნება, შე უბედურო!

— ხმა ჩაიკმიდე! — წაისისინა ზაპლატარმა.

— რას ღრიალებ, შე უბადრუკო! — ქედმაღლურად შეხედა ტემნიკარის ცოლმა. — თავადაც კარგად იცი, რომ უკვე აღსასრული დაგიდგა!

— ჩუმად! — გაცეცხლდა ზაპლატარი. — მიპასუხეთ, მართო ხართ?

ტემნიკარის ცოლმა პასუხი არ გასცა, მალლა იყურებოდა.

— მიპასუხეთ!

— არა, უკვე აღარა ვართ მართო, — მშვიდად მიუგო ქალმა, წარბიც არ შეუხრია.


— რაო? — პირი დააღო წყეულმა აყლაყუდამ.

— აი, იქა დგას შენი გერმანული სიკვდილი! — უთხრა ქალმა და მის თავს ზემოთ მიუთითა.

ზაპლატარმა უკან მიიხედა. სახლიდან ათიოდე ნაბიჯზე, გაუკვალავ თოვლზე გაუნძრევლად იდგა აწოწილი, ჩამომხმარი გერმანელი ლეიტენანტი. ჩაყვითლებულ პატარა პირისახეზე ჩაჩქანი ჩამოფხატოდა, გამხდარი ნიკაპი, გაწელილი თხელი ტუჩები და დიდი შავი სათვალე თვალის ფოსოებივით მოუჩანდა.

— რაო, ნაბიჯის წინ გადმოდგმისა ეშინია თუ რა? — იკითხა ტემნიკარის ცოლმა.

— ზაპლიატერ! — გაისმა სწორედ ამ ღროს გერმანული სიკვდილის უღრიალა ხმა.



ქართული
ენების ინსტიტუტი

— იავოლჰერშტურმფიურერ! — წამოიჩხავლა ზაპლატარმა და აცახცახდა.

— რას ცახცახებ? — ჰკითხა ტემნიკარის ცოლმა.

— ხმა ჩაიკმინდე! — დაიყვირა მოთმინებადაკარგულმა ზაპლატარმა. — თქვით, მარტო ხართ?

— ხომ გითხარი, არა ვარ-მეთქი მარტო.

— რაო?

— ნუ ცახცახებ, წყეულო აყლაყუდავ. გეუბნები, უკვე აღარა ვართ-მეთქი მარტო, ერნეი დაბრუნდა შინ. თუ იმისიც გეშინია?

— ზაპლიატერ! — კვლავ მიაწვდინა ხმა გერმანულმა სიკვდილმა.

— იავოლჰერშტურმფიურერ! — ელვის უმაღლესებზე შემოტრიალდა ზაპლატარი და კვლავ მიხვანა ხმით მოახსენა: — ნიჰსბანდიტენ, ჰერშტურმფიურერ.¹

ლეიტენანტმა სწრაფად ასწია გრძელი ხელი. ტანდაბალმა, ჩამრგვალებულმა იტალიელმა ოფიცერმა, მოშორებით რომ იდგა, დაუსტვინა, გველი შეირხა და იმავ წამს ყოველი კუთხა-დან გამოჩნდნენ შაშხანები და ნაირ-ნაირი ქუდოსანი თავები. ახლა ტემნიკარის ცოლს შეეძლო თვალნათლივ დარწმუნებულიყო, რომ მისი სახლის წინ წმინდაწყლის ჯოდლო-მოდლო ხალხს შეეყარა თავი: აქ იყვნენ გერმანელებიც, იტალიელებიც, ადგილობრივი მოღალატე-გამცემლებიც.

— რამდენი ძალლი მოძუნძულეებულა! — თქვა ქალმა.

— რაო? რა ძალები? — გაცეცხლდა ზაპლატარი.

— ბევრი ძალლი ჰყოლია-მეთქი იმ შენს გერმანულ სიკვდილს, — მშვიდად მიუგო ტემნიკარის ცოლმა. — ყოველნაირი ჯიშისა.

— არ დაგადგებათ კარგი დღე, დედილო! — დაიჩხავლა ზაპლატარმა.

— აკი გითხარი, შე წყეულო აყლაყუდავ, აღარ დამიძახო-მეთქი დედილო! — მრისხანედ უთხრა ტემნიკარის ცოლმა. — აი ახლა კი მე უნდა გკითხო: თავად თუ გიფიქრია, რა დღე გელის? — ქალმა პასუხს აღარ დაუცადა, უცებ თვალი მოჰკრა მისი ილლიდან გამოჩრილ სისხლიან ნაჯახს, — ჯალათად დაგაწინაურეს ეგებ? — უთხრა მან და ნაჯახზე მიუთითა.

— ხმა ჩაიკმიდეთ! — სუნთქვა შეეკრა ზაპლატარს. — ეს თქვენი ნაჯახია.

— ჩვენი? — შეკრთა ტემნიკარის ცოლი და თვალები კინალამ გადმოსცვივდა. ნაჯახი ეცნო. ახლა კი მიხვდა, საითაც გაუხვია ტემნიკარმა. — მაშ იგი რობში იყო? — წამოისლუკუნა ქალმა.

— იყო! ახლა ხომ მიხვდით, რომელია ჩვენს შორის ჯა-

¹ ბანდიტები არ არიან, ბატონო შტურმფიურერო! (დამახინჯ. გერმ.).

ლათი! — კუმტად მიუგო ზაპლატარმა და ნაჯახი მორში ჩა-
არჭო.

— მივხვდი! — ნელა დაუქნია თავი ქალმა. — ჰო, მივხვდი!
ყველა მგელს მწყემსი ჯალათი ჰგონია, როცა მწყემსი ნაჯახით
იცავს თავს.

— რომელ მგელს? — ჩაიბურტყუნა ზაპლატარმა.

— მონათლულს. ლუჟნიკს კი აქ ვერა ვხედავ რატომღაც.
ნუთუ ველარც ვნახავ?

— ვერა.

— გზიდან ჩამოიშორა?

— ხუთივე ამოხოცა! — პირქუშად თქვა ზაპლატარმა.

— მარტომ?

— მარტომ!

— ოჰ, ერნეი! — შეჰყვირა ქალმა, სასოებით დაიჭდო გულ-
ზე ხელები და გორაკისკენ შეტრიალდა.

ოთხმა მოკლეფეხება, ჩამოდონძილმა ჯარისკაცმა საკაცე
ზღურბლთან მიათრიეს და თოვლზე დადეს. ტემნიკარის ცხე-
დარს მისი ძველი ავსტრიელი ჯარისკაცის მაზარა ფარავდა.

— ოჰ, ერნეი! — ჩუმად აღმოხდა ტემნიკარის ცოლს. მაგ-
რამ ხმამაღალი ტირილი არ აუტეხია, ხელები არ დაუმტვრე-
ვია, არც მივარდნილა ქმართან, თუმცა არასდროს ასე ძალიან
არ მონდომებია ეს. გრძნობდა, რომ ახლა ამისი დრო არ იყო.
მისი მწუხარების დანახვაზე მტრები გაიხარებდნენ, ეს კი არ
სურდა, არც ერნეი მოუწონებდა. მას კი უნდოდა ქმრის ღირ-
სი ყოფილიყო. ამიტომაც წელში გაიმართა, ხელი სახლისკენ
გაიშვირა და მბრძანებლურად თქვა: — შინ შეიყვანეთ!

ჯარისკაცები მიუხვდნენ, მაგრამ გაწვრთნილი ძაღლები-
ვით მაინც ჩამრგვალებულ იტალიელ ოფიცერს შეხედეს თვა-
ლებში; მან თავის მხრივ გერმანულ სიკვდილს შეხედა —
ლეიტენანტი ახლა მორთან იდგა და ხელთათმანიანი ხელი
ნაჯახზე ედო.


— ზაპლიატერ!

— იავოლჰერშტურმფიურერ!

ლეიტენანტმა კარისკენ გაიქნია ხელი.

ზაპლატარმა ზღურბლს გადააბიჯა, ოთახის კარი მოფლი-
თა და კიბის საფეხურზე შეჩერდა. მას ჩაჩქანიანი ჯარისკაცი
მიჰყვა და ტემნიკარის ცოლს კონდახი ისეთი ძალით ჰკრა,
ქალი ბუმბულივით გაფრინდა კიბისაკენ და დაეცა. ზაპლატა-
რი დაიხარა, რომ მიშველებოდა ქალს, მაგრამ ტემნიკარის
ცოლმა ხელი ჰკრა, თავად წამოდგა და კედელს აეყუდა. ჯა-
რისკაცებმა ტემნიკარის ცხედარი ასწიეს და სახლში შეიტა-
ნეს.

მერე გერმანულმა სიკვდილმა იტალიელი დამქაში გამო-
იყოლა და მედიდურად შემოვიდა ოთახში. ლეიტენანტმა თა-
ვი დახარა, ჩაჩქანი წინ წამოსწია, მაგრამ ოთახის შუაგულს



რომ მიაღწია, წელში გაიმართა და ფრთხილად მიმოიხედა უცებ მთელი ტანით შეკრთა — ფანჯარას აკაკანებულ ქათამი მიეხეთქა. ეზოდან შეშინებული კრიახი მოისმა — თოვლის სითეთრით თვალმოჭრილი ქათმები ეზოში დარბოდნენ.

ლეიტენანტმა ზიზღით ჩაიციხა. ამ გაყინულმა სიცილმა ოქროს კბილები გამოუჩინა.

— La decapitazione delle galliene!¹ — დინჯად მიუბრუნდა იგი იტალიელს და ხელები გაიქნია.

— La decapitazione delle galline, — მკაცრად გაიმეორა ლეიტენანტმა, თავი დააკანტურა და მაგიდას მიუჯდა. მან იდაყვი გაჰკრა ტემნიკარის ხის კოვზს და კოვზმა ყრუდ გაიკაკუნა იატაკზე. გერმანელმა ნელა მოიხსნა ჩაჩქანი და მრგვალი მოტვლებილი თავი გამოაჩინა. ასევე დინჯად მოიხსნა შავი სათვალე. ღრმა ფოსოებიდან ცივად იელვეს პატარა მწვანე თვალეზმა. მერე ჯიბეში ცხვირსახოცი მოძებნა და დალაქული შუბლი და ხორკლიანი თავის ქალა მოიწმინდა. ჯიბიდან ოქროსბუდიანი სათვალე ამოიღო, გულდაგულ გაწმინდა ცხვირსახოცით და ცხვირზე ჩამოიცვა. მაგიდაზე ოქროს სათუთუნე დადო, სიგარეტს მოუკიდა, ცხვირიდან კვამლი გამოუშვა და ოთახს თვალი მოავლო. მერე ცივი, გამგმირავი მზერა ძველ კედლის საათზე შეაჩერა.

— ზაპლიატერ!

— იავოლჰერშტურმფიურერ!

გერმანულმა სიკვდილმა ღუმელზე მიათითა.

ზაპლატარი ოთახში შემოვიდა. ხან ღუმელს შეხედა დაბნევით, ხან — მაგიდას, არ იცოდა, რა ექნა.

— Die uhr², — აუჩქარებლად წარმოთქვა გერმანულმა სიკვდილმა და ხელით ანიშნა, საათი აამუშავეო.

— იავოლჰერშტურმფიურერ! — სული ძლივს მოითქვა ზაპლატარმა და სასწრაფოდ შეასრულა ბრძანება.

აწიკწიკდა საათი, საოცრად ხმამაღლა, მტკიცედ, ცოცხლად.

„ჰო, მართლა“, — ასევე ძალუმად აუბგერდა გული ტემნიკარის ცოლსაც.

— რად გავაჩერე კედლის საათი? ის ხომ მკვდარი არ არის! არა, ერნეი არ მომკვდარა! — თქვა ქალმა და ოთახში შეიხედა.

ერნეი იატაკზე იწვა. მკვდარი უფრო დიდი ჩანდა. ზურგზე იწვა და ავსტრიელი ჯარისკაცის ძველი ფარაჯა ეფარა. ტემნიკარის ცოლმა მთელი არსებით იგრძნო: ერნეი რომ წევს, სწორედ ამიტომაა ყველაზე მაღალი, ყველაზე დიდი, დაუმარცხებელი, იგი მკვდარიც ისე ძლიერია, ვერა ძალა ვერ გატეხს.

¹ ქათმების თავის წაწყვეტა (იტალ.).

² საათი (გერმ.).



— ოჰ, ერნეი! — ჩუბჩულებდნენ ქალის ტუჩები.

ქალმა იგრძნო, რომ თავად მასაც ვერავინ გასტეხს ამ საოცარმა, გაუგებარმა გრძნობამ უფრო აუჩქროლა გული. მან ირგვლივ მიმოიხედა და მოეჩვენა, რომ ყველანი, ვინც ამ ოთახშია ახლა, დასაღუპავად განწირული საცოდავი არარაობანი არიან. უკვე აღარც თვითონ ადარდებს. დაიდუბება თუ არა. ქალმა თვალთ გაზომა გერმანული სიკვდილი: ლეიტენანტი კედელთან იდგა, ზურგზე შემოწყობილ ხელებში ოქროსჩარჩოიანი სათვალე ეჭირა და ძველებურ, მინაზე დახატულ სურათებს ათვალიერებდა. იგი მშიშარა, საბრალო არარაობა იყო, დასაღუპავად განწირული. ქალმა ახლა ღიბიანი, ჯუჯა იტალიელი შეათვალიერა. მაგიდის ახლოს რომ ტკეპნიდა იატაკს, თან პირმოთნედ მიშტერებოდა სურათებს. ისიც დასაღუპავად განწირული, უფრო მშიშარა და საბრალო არარაობა ჩანდა. მერე ქალმა თვალი შეავლო წყეულ აყლაყუდას. ზაპლატარი იდგა და ფეხს ფეხზე ინაცვლებდა. ეს უკვე ყველაზე დიდი არარაობა ბრძანდებოდა, საცოდავი მშიშარა და სიკვდილსაც ისე გარკვევით დაემჩნია თავისი დადი მის სახეზე, ტემნიკარის ცოლს შეეცოდა კიდევ.

— საცოდავი... — ხმამალლა წარმოთქვა მან.

ზაპლატარი შეკრთა და გაოცებით შეხედა.

— ძალიან მებრალები, შე საცოდავო, — ისე წყნარად, გულში ჩამწვდომად უთხრა ტემნიკარის ცოლმა, ზაპლატარს შეაცახცახა.

— ხმა ჩაიკმინდეთ! — ჩაისისინა მან.

— ზაპლიატერ!

— იავოლჰერშტურმფიურერ! — თითქმის წამოიყვილა წყეულმა აყლაყუდამ და ლეიტენანტმაც მოუხედა. — იავოლჰერშტურმფიურერ!

ლეიტენანტმა თითით მოიხმო იგი, მერე კვლავ კედლისკენ მიბრუნდა და სურათს დააშტერდა. სურათზე წმიდა პავლეს თავის წარკვეთა იყო დახატული.

— Interessante! Molto interessante, — პირმოთნედ დაუკრა კვერი დამქაშმა. — Un bel lavoro!¹

— Un bel lavoro! — გაიკრიჭა ლეიტენანტი და ოქროს კბილები გამოაჩინა. — San Paolo decapitato dai romani!²


— Eh... — იტალიელმა მორჩილად გაშალა ხელები და თავი მხრებში ჩაიძვრინა.

— Und grande popolo i romani!³ — წარმოთქვა ლეიტენანტმა.

¹ საინტერესოა! საინტერესოა! კარგი ნამუშევარია! (იტალ.)

² წმინდა პავლეს თავი წააგდებინეს რომაელებმა! (იტალ.)

³ დიადი ხალხია რომაელები! (იტალ.)



საქართველოს
საბჭოთაო
საზღვრო
საზღვრო

— Un grande popolo! — გაიბადრა მისი დამქაში და თავი მაღლა ასწია.

— Adesso i romani sono piccoli, — წელში გასწორდა ლეიტენანტი და ქედმაღლურად გადახედა თანამოსაუბრეს. — E Sono cristioni. Non tagliano pict le teste ai gant, tagliano le teste alle galline.¹

იტალიელ დამქაშს საქციელი წაუხდა და თავი კვლავ მხრებში ჩარგო.

— ზაბლიატერ! — დაიძახა ლეიტენანტმა და თითი „წმინდა პავლეს თავის წარკვეთას“ ატაკა. ეს თითქოს მიამიტურად დახატული სურათი მართლაც რომ შთამბეჭდავი და შემზარავი იყო.

— იავოლჰერშტურმფიურერ! — ზაბლატარმა ფრთხილად მოხსნა სურათი და კიდევ უფრო ფრთხილად დადო მაგიდაზე, ეტყობოდა, კარგად ესმოდა, სურათს რომ რაიმე მოსვლოდა, იქნებ თავიც წაეგო.

ლეიტენანტმა ორი სხვა სურათიც გადაარჩია, მერე ცხვირზე სათვალე წამოიცივა, მაგიდას მიუჯდა, ხელმეორედ გააბოლა სიგარეტი, მოწყენილი მზერა კედლებს მოავლო და ბოლოს ტემნიკარის ცოლისაკენ გაიშვირა თითი.

— მოდით აქ! — მიუბრუნდა ქალს წყეული აყლაყუდა.

ქალს თავისი უღონობა აღარც ახსოვდა. ჰოდა, როცა უცებ მოშორდა კედელს, კინალამ დაეცა. ზაბლატარი წამსვე წამოხტა მისაშველებლად, მაგრამ ტემნიკარის ცოლის მზერამ შეაჩერა. ქალმა ხელი აუქნია, ძალა მოიკრიბა და მტკიცედ შევიდა ოთახში.

— ზაბლიატერ! — ჩაისისინა ლეიტენანტმა.

— იავოლჰერშტურმფიურერ! — მოიკაკვა ზაბლატარი და ტემნიკარის ცოლს მხრებში ჩაავლო ხელი.

— მაგას რა აღრიალებს? — იკითხა ქალმა. — მე მინდა ერნეის დავხედო მხოლოდ.

ქალმა მხრიდან უცხო ხელი მოიშორა, იატაკზე ჩაჯდა და ნელა გადასწია ფარაჯა. ერნეის სისხლის ლაქები ზედ შეჰყინვოდა, მაგრამ გაყინულმა სისხლმა ოთახში გაღბობა იწყო და ისე ბრწყინავდა ახლა, როგორც ნამის წვეთები ყვავილზე. მიცვალებულს სახეზე ღიმილი შესცივებოდა, ის უცნაური ღიმილი, მთელი სიცოცხლე რომ სტანჯავდა ქალს, მაგრამ ვერ ამოეცნო. ახლა კი ქალი ყველაფერს მიხვდა: წინათ ეს ღიმილი ოცნებით წარმოსახული გამარჯვების ღიმილი იყო, ახლა კი — ნამდვილი გამარჯვებისა, ამიტომაც აღარ დაჰკრავდა

¹ ახლა რომაელები სხვანაირები გახდნენ. თანაც ქრისტიანები არიან. ისინი წმინდანებს აღარ კვეთენ თავებს, ქათმებს თუ წაწყვეტენ მხოლოდ (იტალ.).

იდუმალი იერი, თავდაჯერებულ სიამაყესა და კმაყოფილებას
 ბაზე მეტყველებდა იგი.

— ზაპლიატერ!

— იავოლპერშტურმფიურერ!

ტემნიკარის ცოლი წამოდგა, ერნესტის თვალი არ მოუ-
 შორებია, საათთან ისე მივიდა.

— E gli altui? ¹ — თქვა იტალიელმა დამქაშმა და გა-
 მარჯვებულის იერით გადახედა გერმანულ სიკვდილს.

— ზაპლიატერ!

— იავოლპერშტურმფიურერ! — კვლავ მოიკაკვა წყეული
 აყლაყუდა და ტემნიკარის ცოლს მიუბრუნდა. — ტონე სად-
 ლაა? ან იუსტინა? შინ არიან?

— თავი დაანებეთ იმათ! მე მომიღეთ ბოლო! — მტკიცედ
 უთხრა ქალმა, ოღონდაც ხმაში მუდარა დაეტყო.

— ზაპლიატერ!

— იავოლპერშტურმფიურერ! — ზაპლატარი აპირებდა ნა-
 თქვამი გადაეთარგმნა, მაგრამ ლეიტენანტმა ბოლომდე აღარ
 მოუსმინა და დერეფანში დარჩენილ ჯარისკაცებს მოუხმო.

ოთახში ნალდაკრული ფეხსაცმელების ბრახაბრუხი ატყდა.
 საფეხურები აჭრაჭუნდა, კარები გაჯახუნდა, ჭერი აჭრიალდა.
 გაისმა არაადამიანური ბღავილი.

— ტონე! — გაჰკრა დედას გულში.

თუმცა პირველად ოთახში იუსტინა შემოაგდეს. დედამ
 გულში ჩაიკრა შვილი.

— საშიში არაფერი არ არის! — უმტკიცებდა იგი გოგოს
 და ხელზე ხელს უჭერდა. — მხოლოდ წყნარად იყავი! საშიში
 არაფერია!

იუსტინას ბალღური ნდობა ეხატა თვალებში, მორჩილად
 მისჩერებოდა დედას.

მერმე ორმა ჯარისკაცმა ტონე შემოათრია. ჯარისკაცები
 ცდილობდნენ ფეხზე დაეყენებინათ ტონე, მაგრამ ბიჭს თით-
 ქოს სხვისი ფეხები გამობმოდა, უკან რჩებოდა. ჯარისკაცე-
 ბი ხელისკვრით მოათრევდნენ და ტომარასავით უწყალოდ
 აჯანჯლარებდნენ.


გერმანულმა სიკვდილმა ზიზღით ჩაიქნია ხელი. ჯარისკა-
 ცებმა ხელი გაუშვეს და ტონე იატაკზე დაეცა. ბიჭი ავზნი-
 ანივით იკრუნჩხებოდა და ნაწყვეტ-ნაწყვეტად სლუკუნებდა.

— ტონე! — ტემნიკარის ცოლმა ჩაიჩოქა. — ტონე!.. სა-
 შიში არაფერია!.. მხოლოდ წყნარად იყავი! არაფერია სა-
 შიში!

უცებ ტონე მოიკაკვა, ტანი დაეკრუნჩხა, ერთი დაიკვნესა
 და მიჩუმდა.

— გათავდა... — ჩაუკვდა გული დედას. ქალმა ხელისგუ-

¹ დანარჩენები სადღა არიან? (იტალ.).



ლით გადაუწმინდა სველი ცივი სახე შვილს და თვალები და-
უხუჭა. ასე უჯობსო, ფიქრობდა იგი, ერნეი ალბათ ვერ აიტან-
და ამის ყურებას. რაკი მას ასცდა, მე არა მიშავს, მეყოფა
ძალა, რომ გადავიტანო.

— *Morto!*¹ — გაისმა იტალიელი დამქაშის ხმა.

— ზაპლიატერ!

— იავოლჰერშტურმფიურერ! — ზაპლატარმა ტემნიკარის
ცოლს მხრებში ჩაავლო ხელი.

— მადლობა ღმერთს, ცოცხლებში აღარ სწერია! — ამო-
იოხრა ქალმა, უკანასკნელად გადაუსვა შვილს თავზე ხელი და
წამოდგა.

— *Tot!*² — აუწყა ზაპლატარმა.

გერმანულმა სიკვდილმა ცხვირიდან კვამლი გამოუშვა. მე-
რე წინკარში გაიხედა, სადაც ის ვიგინდარა ხალხი ირეოდა,
ერთი სული რომ ჰქონდათ, როდის გვანიშნებენ, ძარცვა-რბე-
ვას შევუდგეთო.

ლეიტენანტმა გაუკრიჭა მათ და მედიდურად დაუქნია
თავი.

მერე კვლავ ატყდა ნაღდაკრული ფეხსაცმელების ბრახა-
ბრუხი და კვლავ აჭრაჭუნდა საფეხურები, გაჯახუნდა კარები,
აჭრიალდა ჭერი, გაიხსნა კარადები, აიხადა ზანდუკების სახუ-
რაგები.

სამ ყაჩაღს ჩალად არ უღირდა ძარცვა-რბევა. ალე-
სილ დანასავით ააბრწყინეს თეთრი კბილები და იუსტინას
ეცნენ. გოგომ იწივლა. ტემნიკარის ცოლმა მოიხედა და იატაკ-
ზე გათრეულ თეთრ შიშველ ფეხებსლა მოჰკრა თვალი. დედა
წამსვე დაედევნა, მაგრამ გერმანულმა ჯარისკაცმა კონდახი
ჩაართვა და ღუმელისაკენ მოისროლა. ქალი იატაკზე დაეცა.

— ჰალტ! — დაიყვირა ზაპლატარმა და იუსტინას გაეკიდა.

— ზაპლიატერ! — გაისმა მკვახე, მუქარით სავსე ძახილი.

— იავოლჰერშტურმფიურერ! — ზაპლატარი წაბორძიკდა
და ოთახში დაბრუნდა.

ტემნიკარის ცოლი ქანდაკივით იდგა კედლის საათთან და
გაქვავებული მიშტერებოდა ქმრის სახეს.

„ოჰ, ერნეი! — ეუბნებოდა ქმარს გუნებაში, — შენ ხომ
ამას არ ხედავ! შენ აგცდა ეს ამბები!.. ხომ ვიცი, რომ შენ
სწორად მოიქეცი. მე ვერ ვიზამდი ამას, მაგრამ ვერც შენ გა-
დაიტანდი ჩემს წილ ხვედრს!“

კედლის საათი ხმამაღლა, ყრუდ ტიკტიკებდა, რადგან
გვერდით გაქვავებული ავი დრო ედგა...

ლეიტენანტმა ერთხელ კიდევ მოავლო კმაყოფილი თვალი
ნაძარცვ დოვლათს, აუჩქარებლად ჩაილაგა სურათები ტყავის

¹ მკვდარია? (იტალ.).

² მკვდარია (გერმ.).

ჩანთაში, მერე თავის ქალაზე ჩაჩქანი ჩამოიფხატა, ხოლო ცხვირზე შავი სათვალე წამოიკოსა.

— ზაპლიატერ! — მოუხმო მან საჩვენებელი თითით.

— იავოლჰერშტურმფიურერ! — წამოხტა ზაპლატარი.

ლეიტენანტმა ტემნიკარის რევოლვერზე უჩვენა, მაგიდაზე რომ იდო, თითი ისე მოკაკვა, თითქოს ჩახმახს გამოჰკრა და იქვე, საათთან გაუნძრევლად მდგარ ქალს ესროლაო.

ზაპლატარი აცახცახდა და შიშით მოხედა ქალს.

— ზაპლიატერ? — გაუკვირდა გერმანულ სიკვდილს.

— ა-ა-ა... — იღვრებოდა ზაპლატარი.

— ზაპლიატერ? — კიდევ უფრო მეტი გაოცება დაეტყო გერმანულ სიკვდილს.

— ა-ა-აბერ, — ჯანჯალებდა ზაპლატარი, მაგრამ რევოლვერს მაინც მოკიდა ხელი და ღუმელისკენ მიბრუნდა.

— Avanti! Coraggio! — გაისმა იტალიელი დამქაშის ხმა.

— მესროლე, ზაპლატარ, მე მზადა ვარ, — უთხრა ტემნიკარის ცოლმა, წელში გაიმართა და თვალები დახუჭა.

— Was? — ჩაისისინა გერმანულმა სიკვდილმა და ტემნიკარის ცოლს შეხედა. მერე მოკაკული თითი ზაპლატარს შუბლზე მიუკაკუნა და გაიცინა: — Nicht die Alte! Die Uhr!²

— Die U-u-uhr... — ლენჩივით ჩაიხითხითა ზაპლატარმა. მერე შვებით ამოიოხრა, ოფლით დაცვარული შუბლი მოიწმინდა და აკანკალებული თითი ჩახმახს გამოსდო.

რადაც გასკდა და დაიწკრილა, კედლის საათმა ზარი ჩამოჰკრა და აღარც შეჩერებულა.

— ზაპლიატერ? — შეეშინდა კიდევ ლეიტენანტს და ზიზღით გაიქნია ჩაჩქანი.

ზაპლატარმა ორჯერ გაისროლა ერთმანეთის მიყოლებით. ძველი კედლის საათი ნაწილ-ნაწილ დაიმსხვრა და მკვდარი ნამსხვრევეები იატაკს მოეფინა. მხოლოდ მოქნილმა ფოლადის ზამბარამ დაუსტვინა ჩიტივით ჰაერში; ოთახის შუაგულამდე რომ მიფრინდა, რამდენჯერმე შეხტა, მერე ტემნიკარის თავთან მიგორდა და კარგა ხანს ხტოდა და წკრიალებდა იქ, თითქოს ამ ზამბარაში იმალებოდა ამ სახლის სული და ვეღარ და ვეღარ გასცლოდა აქაურობას.

— საათი გატეხა! — ჩაილაპარაკა ტემნიკარის ცოლმა, მაგრამ თვალები არ გაუხელია. „ნეტა რად ვერ მომახვედრა ამ უბედურმა?“ — ფიქრობდა ქალი და ელოდა, როდის ესროდნენ, მაგრამ რომ აღარ ესროლეს, თვალები გაახილა.

ზაპლატარი წინ იყურებოდა და იდაყვით სველ შუბლს იწმენდდა. გერმანული სიკვდილი ხელთათმანებს იცვამდა და ოქროს კბილებს კრეჭდა.

¹ წინ! გაბედულად! (იტალ.).

² დედაბერს კი არა! საათს! (გერმ.).



— რა მოხდა? — თქვა ტემნიკარის ცოლმა. — თუჯერ ვერ
მორჩი?

ლეიტენანტი ადგა, ზაპლატარს მხარზე ხელი მოუცაცუნა,
მკვდარ ტონეს გადააღაჯა და ოთახიდან გავიდა. იტალიელი
დამქაში გორაობა-გორაობით მიჰყვა კვალდაკვალ.

წუთით დაძაბული სიჩუმე გამეფდა.

— როგორ მოხდა, რომ ვერ მომახვედრე? — მშვიდად
ჰკითხა ტემნიკარის ცოლმა.

— ხმა ჩაიკმიდვით! — გაშმაგდა ზაპლატარი, — მე საათს
ვესროლე.

— საათს რადა? — გაუკვირდა ქალს. — საცოდავმა საათ-
მა რაღა დაგიშავა.

— არაფერი! ასე იცის ხოლმე იმან.

— სულელი!...

— სულელი! — ხრიწინებდა ზაპლატარი. — ეს არის მაგის
ნიშანი, ყველაფერს მორჩითო...

— მე ხომ ეს ადრეც ვიცოდი! მაგრამ რატომღა არ მო-
მიღე ბოლო?

— მე? მე? — ცახცახებდა ზაპლატარი, თვალი ვერ გაეს-
წორებინა ქალისთვის.

— რად კანკალებ? პირველი ხომ არ არის შენთვის.

— გაჩუმდით! — წამოიყვირა ზაპლატარმა და წაბარბაცდა.
ეზოდან მჭახე სტვენა მოისმა.

სახლი ისევ აზანზარდა; ნადავლით დატვირთულ ყაჩაღთა
ხროვა წინკარს მიაწყდა.

— წადით! — ჩაიხრიწინა ზაპლატარმა და ტემნიკარის
ცოლს ხელზე მოქაჩა. — ახლა ცეცხლს წაუკიდებენ!

— გამიშვი, უბედურო! — მკაცრად უთხრა ტემნიკარის
ცოლმა და ხელი გამოჰგლიჯა. ქალმა ტემნიკართან მიირბინა
და მის წინ ჩაიჩოქა. ხეშეში, დამჰკნარი ხელი შუბლსა და
ლოყებზე გადაუსვა მიცვალებულს და ნელა გადაათარა დაგ-
ლეჯილი ავსტრიული ფარაჯა. შემდეგ ტონესკენ დაიხარა და
იმასაც თავზე გადაუსვა ხელი, მერე უაზროდ მივარდა კარს,
პირსახოცი ჩამოხსნა და ბიჰს სახეზე წაათარა.

— ზაპლიატერ! — მოისმა ეზოდან.

ზაპლატარს შეაძიგძიგა, ტემნიკარის ცოლს ხელი სტაცა
და ოთახიდან გაათრია.

გერმანული სიკვდილი დიდ შავ მორთან გაშეშებულიყო,
ცალი ხელთათმანიანი ხელი ნაჯახზე ედო, ხოლო მეორეთი
შემორაგული ბადისკენ უთითებდა.

— იავოლჰერშტურმფიურერ! — გამოეხმაურა ზაპლატარი
და ტემნიკარის ცოლი გორაკისაკენ წაათრია.

— გამიშვი! — ქალმა კვლავ გამოგლიჯა ხელი და თავისით
ავიდა გორაკზე. იგი გაჩერდა ასკილის დიდ ბუჩქთან, ჩაშა-

ვებულ ფუტურო მესერში რომ მოჩანდა, თავსაფარი გაისწო-
რა და ეზოს თვალი მოავლო.

— იუსტინა!.. იუსტინა სადღაა? ცოცხლად გამოიწვება!..

ზაპლატარი შეკრთა და ნაბიჯი წინ წასდგა.

ქალმა ხელით შეაჩერა, რადგან იმავ წამს სულ სხვა აზრმა
გაუელვა თავში.

— ის ხომ მკვდარია! — მის ხმაში შვეება გაისმა. — ხოლო
თუ მკვდარი არ არის, მაინც სახლში დარჩენა უჯობს. ეყოფა,
რაც გადახდა!

— მე-მე-მე არ-ა ვარ დამნაშავე! — ცახცახებდა ზაპლა-
ტარი.

— ჩუმად, იყავი, უბედურო! ჩუმად-მეთქი, — უთხრა ქალ-
მა ნელი, გულში ჩამწვდომი ხმით.

კარში თმაგაჩეჩილი ჯარისკაცები გამოჩნდნენ. ისინი ეზო-
ში გამოვიდნენ, დადგნენ და ერთგული ძაღლებივით მორჩი-
ლად დაელოდნენ ახალ ბრძანებას.

გერმანულმა სიკვდილმა ასწია ხელი, რათა ებრძანებინა
და მის წინ ყოველივე აღეგავა პირისაგან მიწისა, მაგრამ იტა-
ლიელმა დამქაშმა არ დააცალა. იგი ხელებს იქნევდა და ყვი-
როდა:

— E la figlia? E la figlia, la maledetta puttana.¹

ლეიტენანტმა მედიდურად დაუშვა ხელი და მხრები აიჩე-
ჩა. მისი დამქაში ჯარისკაცებს მიუბრუნდა და სამხრეთელი-
სათვის ჩვეული ხელების ქნევით აუხსნა მათ საქმის ვითარება.
ჯარისკაცები გაიკრიჭნენ და სახლში შებრუნდნენ.

ტემნიკარის ცოლი თვალებით ნთქავდა თავისი სახლის
კარს. სიბნელეში დაინახა, ჯარისკაცები თეთრ, შიშველ სხე-
ულს რომ მოათრევდნენ, სხეული კი იგრიხებოდა და იკრუნ-
ჩებოდა.

— იუსტინა! იუსტინა! საშიში არაფერია!.. — ქალმა ხელე-
ბი გაშალა და სახლისაკენ გაიწია.

— ზაპლიატერ! — გაისმა მკვახე ხმა.


ზაპლატარი ტემნიკარის ცოლს ეცა და ხელი დაუჭირა.

— გამიშვი! — დაუყვირა ქალმა და ისეთი ძალით გაიწია,
ფეხზე ველარ დამაგრდა და თოვლში დაეცა. იწვა გაუნძრევ-
ლად და თავისი სახლის კარს მისჩერებოდა. თეთრი სხეული
მიწაზე მოისროლეს, მერე ჯარისკაცებმა აიღეს და ზღურბლი-
საკენ წაათრიეს. ტემნიკარის ცოლმა ველარ შესძლო ამის ყუ-
რება.

— მოჰკალით! — დაიყვირა მან. — მოჰკალით, თქვე მხე-
ცებო!

თითქოს მის ბრძანებას დაემორჩილაო, გერმანულმა სიკვ-
დილმა ხელი წინ გასწია. გაისმა სროლა. ჯარისკაცები ნადი-

¹ გოგო? ის წყეული კახა გოგო? (იტალ.).



რებივით განზე გაცვივდნენ, თეთრი სხეული ჯიშღუბლზე დარჩა, ქათქათა, დაკლაკნილი, ისეთი უძრავი, თითქოს არც ეცოცხლოს არასდროს.

— მე...მე...მე... — სლუკუნებდა შაპლატარი, ტემნიკარის ცოლისკენ რომ დახრილიყო და მის წამოყენებას ცდილობდა.

— ჩუმად იყავი, უბედურო! არ მომეკარო! — ყრუდ უთხრა ქალმა, მაგრამ ხმა ისეთი მბრძანებლური ჰქონდა, შაპლატარი წამსვე მოშორდა.

ტემნიკარის ცოლი ნელა წამოდგა, ტანსაცმლიდან თოვლი ჩამოიბერტყა. იგრძნო, რომ უკანასკნელი ლოდიც მოეშვა გულ-ლიდან. ახლა მჩატედ იყო, მჩატედ და მარტოდმარტოდ. მარტობამ კი ძალა მისცა, სწორედ რომ უძლეველად აქცია...

„ოჰ, ერნეი! შენ ხომ ეს ამბები არ გინახავს! რომ გენახა, ვერც გაუძლებდი. არა, ვერ გაუძლებდი!..“ — ქალი კარგად გრძნობდა, რომ მამაკაცის გმირობა ისევე განსხვავდება დედ-კაცის გმირობისაგან. როგორი განსხვავებულიც არის მათი დანიშნულება ამ ქვეყანაზე. მამაკაცი — ბრძოლაშია გმირი, ქალი — ტანჯვაში, ტანჯვა კი ძალიან ხშირად ყველაზე მძიმე ბრძოლაზე უფრო საშინელია. ქალს უხაროდა, რომ ერნეი ცოცხალი აღარ იყო.

იგი ბალხაში დაბრუნდა, ისევ ასკილის დიდ ბუჩქთან დად-ვა და მესერს მიეყრდნო. თავსაფარი გაისწორა. საოცარია, მაგრამ კმაყოფილებით გაიფიქრა, ყველაფერი რიგზეაო. ჯერ ერნეი წავიდა, მერე — ტონე, მერე — იუსტინა, თვითონ — ბოლოს წავა, დედები ხომ ყველაზე ბოლოს მიდიან დასასვენებლად... მერე ამოიოხრა და მალლა აიხედა. იქ ცივი, შეუბრალებელი ლურჯი ცა გადაჭიმულიყო, ღრუბლის ნასახიც არ ჩანდა ზედ...

— მე...მე...მე... არ-ა ვარ დამნაშავე! — კვლავ ამოისლუ-კუნა შაპლატარმა.

— ჩუმად იყავი, შე უბედურო, ჩუმად! — ისე უთხრა ტემნიკარის ცოლმა, თავი არც მიუბრუნებია მისკენ.

კარიდან ბოლქვა-ბოლქვად გამოიჭრა სქელი კვამლი. ფანჯრები მეწამული შუქით აფერადდა. აქა-იქ მინები გასკდა. ცეცხლის ალი გარეთ გამოიჭრა, კედლებს ენა აუსვა და ზღაპრული გაუმაძღარი ვეშაპივით მალლა ავარდა, სახურავს ეცა.

„რა ნელა იწვის!“ — გაიფიქრა ტემნიკარის ცოლმა.

დიდხანს მოძვრებოდნენ ფანჯრებსა და ხის კედლებიდან ცეცხლის ენები, დიდხანს ლოკავდნენ, ფლეთდნენ, კბენდნენ ისინი ყოველი მხრივ ჩალის სახურავს...

ბოსელში ძროხები აბღავლდნენ. ვილაცამ ჭიშკარი მოფ-ლითა. სამი ძროხა მინდორში გაიჭრა, ჭრელა სახლის კუთხეს მიაწყდა. უცხოთა დანახვაზე ძროხა წამით გაქვავდა, მერე კი ზმუილით გავარდა ეზოში. ატყდა ყვირილი და ხარხარი, დაიგრგვინა ავტომატის ჯერმა. ჭრელა ფერდობზე მიჰქროდა,



ბალისკენ, მაგრამ უცებ ფეხები მოეკეცა და დაეცა, წითელმა სისხლმა შეღება თეთრი თოვლი.

— ოჰ, ერნეი, არც ეს დაგინახავს შენ! — ჩაილაპარაკა ტემნიკარის ცოლმა.

მერე სახლის ჭერმა დაიგმინა, დაიგმინა ცოცხალი ადამიანივით, საშინელი წამებით რომ ლევს სულს.

— ერნეი! ტონე! იუსტინა!

სახურავი ჩამოიქცა. ცეცხლის ენები მაღლა აიჭრა, თითქოს უცებ ვულკანმა დაადო ხახა. უთვალავი ნაპერწკალი უთვალავი ცეცხლოვანი ფუტკარივით მოედო ყოველ მხარეს, მაღლა აიჭრა. რიალებდნენ ბნელში, ქრებოდნენ, მიწაზე ეშვებოდნენ და შავი მატლებივით ხრავდნენ თოვლის თეთრ ქერქს.

გერმანული სიკვდილი ფერდობზე ასულიყო და ახლა იტალიელ დამქაშთან ერთად ნელ-ნელა ჩამოდირდა ეზოში. შავ მორთან შედგნენ და ირგვლივ თვალი მოავლეს... დამქაშმა დაუსტვინა და ბრბომ წამსვე მოიყარა თავი. ზაპლატარიც შეირხა.

— მე რაღას მიზამენ? — იკითხა ტემნიკარის ცოლმა.

— ჩუმად იყავით! — ყრუდ ჩაიხრიწინა ზაპლატარმა. — იქნებ გადაავიწყდეთ.

— რატომ უნდა გადაავიწყდე? — შეჰყვირა ქალმა და გულზე ხელები დაიჭდო.

— ხმა ჩაიკმინდეთ! — ჩაისისინა ზაპლატარმა და საჩქაროდ წასვლა დააპირა.

— ზაპლატარ!

ტემნიკარის ცოლის ხმა იტალიელს მოესმა და ისიც აჩქარდა:

— E la vecchta? E la vecchta?¹

— Schuss!² — მოღლილად ჩაიქნია ხელი გერმანულმა სიკვდილმა.

სამი ჩაჩქანიანი ჯარისკაცი ჩამწკრივდა და თოფი მოიმარჯვა. სწორედ ამ დროს ლეიტენანტმა უკან მოიხედა და ეზოში ჩამომავალი ზაპლატარი დაინახა. ლეიტენანტს თხელი ტუჩები საზიზღარმა ღიმილმა დაუმაწკა.

— ზაპლიატერ!

— იავოლპერშტურმფიურერ! — თითქოს წაბორძიკდაო, ზაპლატარი ბილიკზე გაქვავდა.

— Schuss! — ცივად წარმოთქვა ლეიტენანტმა და გრძელი ხელი ტემნიკარის ცოლისკენ გაიშვირა.

ზაპლატარი აცახცახდა.

ტემნიკარის ცოლი წელში გასწორდა და თვალები დახუჭა.

¹ დედაბერი? დედაბერი? (იტალ.).

² დახვრიტეთ! (გერ.).



— Schuss! — გაიმეორა ლეიტენანტმა და ოქროს კბილე-
ბი გამოაჩინა.

— ა...ა... აბერ... — სლუკუნებდა ზაპლატარი და ძლივს
იდგა ფეხზე.

— ზა-პლია-ტერ!

— ა...ა...აბერ... — სლუკუნით მოიხსნა ზაპლატარმა ავტო-
მატი.

ისევ დამქაში მოგორდა:

— Fucilare? Ma no! Oggi è santo Stefano. Dovrebbe
essere lapidata!¹

— Was?

— Lapidare! Lapidare! — იმეორებდა იტალიელი, მერე
ტალახიანი თოვლის გუნდა უჩვენა, აქაოდა, ტემნიკარის ცო-
ლი უნდა ჩაიქოლოსო.

— Zapidare? — ქედმაღლურად შეიკრა წარბი გერმანულ-
მა სიკვდილმა. — Giustizia romana!² — ზიზლით გაიქნია მან
თავი. მერე ხელთათმანიანი ხელი მტკიცედ დაადო ნაჯახს და
გადაჭრით თქვა:

— Giustizia germanica decapitare!³

— Decapitare? — შეძრწუნდა იტალიელი დამქაში. —
Ma questo è orribile! E orribile!⁴

— De-ca-pi-ta-re! — ფოლადი ჩაიღვარა ხმაში გერმანულმა
სიკვდილმა და უკან მიიხედა. — ზაპლიატერ, — შეჰყვირა მან
და ჯერ ტემნიკარის ცოლზე მიათითა, მერე შეშის საჩეხ
მორზე.

— იავოლჰერშტურმფიურერ... — ენა დაება ზაპლატარს და
ძალა არ ეყო, ადგილიდან დაძრულიყო.

ტემნიკარის ცოლი მიხვდა, რასაც უპირებდნენ. იგი ღო-
ბეს მოსწყდა და ნელი, მაგრამ მტკიცე ნაბიჯებით დაეშვა
ფერდობზე. ზაპლატარს რომ გაუსწორდა, მშვიდად უთხრა:

— ნუ კანკალებ, ზაპლატარ! წავიდეთ! საშიში არაფერია...

— დედავ!.. — ამოისლუკუნა ზაპლატარმა ფეხმოუცვლე-
ლად.

— წავიდეთ! საშიში არაფერია!.. — გაუმეორა ქალმა და
სახელოზე ხელი მოჰკიდა.

მთლად აცახცახებული ზაპლატარი მორჩილად მიჰყვა.

ბრბო ერთბაშად გაყუჩდა და წრედ შეიკრა.

ტემნიკარის ცოლი მორთან მივიდა და გაჩერდა.

გერმანულმა სიკვდილმა თითით მოუხმო ერთ ჯარისკაცს
და ხელებით ანიშნა, ამ ქალს თავი უნდა გავაგდებინოთო.

1 დავხვრიტოთ? არა! ღდეს წმიდა სტეფანეს ღღვა. ქვით უნდა
ჩაიქოლოს! (იტალ.).

2 რომაული მართლმსაჯულება! (იტალ.).

3 გერმანული მართლმსაჯულებაა: თავი მოეკვეთოს! (იტალ.).

4 მაგრამ ეს შემზარავია! შემზარავი! (იტალ.).

ჯარისკაცს გაოცება გამოეხატა თვალებში, მერე თავი ააქი-
ცინა. სამარისებურ სიჩუმეში მან ნაჯახი ამოძრო და მორი-
დან ხელით გადაფერთხა ჩაშავებული თოვლი. მერე ორი-
ოდე ნაბიჯით განზე გაიწია, დაიხარა და ნაჯახის პირი თითით
მოსინჯა.

ტემნიკარის ცოლმა თავი ასწია, ზაპლატარს მიუბრუნდა
და ხმამალლა ჰკითხა:

— გამიგონია, სიკვდილმისჯილს უკანასკნელ სურვილს
უსრულებენო თითქოს?

— რაო, რას ისურვებდით? — ამოისლუკუნა დაბნეულმა
ზაპლატარმა.

— იმას, რომ თავი შენ გამაგდებინო.

— დედავ... — ზაპლატარს ფეხები მოეკვეთა.

— ამას დედასავით გთხოვ, — უთხრა ქალმა, — და ყველა-
ფერს გაპატიებ.

— ზაპლიატერ?

— დედავ!.. — ზაპლატარი კვნესით დაეცა მუხლებზე.

— ზაპლიატერ! — შეხტა ადგილზე გერმანული სიკვდილი.

ტემნიკარის ცოლი ახლა გერმანულ სიკვდილს მიუბრუნ-
და, თითი მის ფეხებთან დაკრუნჩხულ ზაპლატარს ატაკა და
კეფაზე ხელი გაისვა.

ლეიტენანტი ისე გაოგნდა, წუთით კრინტი ვერ დასძრა.
მერე უცნაურმა ღიმილმა დაუმანჭა სახე და თანხმობის ნიშ-
ნად თავი დაუქნია.

ტემნიკარის ცოლი აუჩქარებლად მიუახლოვდა მორს.

ლეიტენანტი წელში გასწორდა და სამიოდე ნაბიჯით უკან
დაიხია. სიჩუმე მისმა ფოლადისებურმა ხმამ გაჰკვეთა:

— ზაპლიატერ!

— დედავ!.. — ბლუკუნებდა ზაპლატარი და ტემნიკარის
ცოლისკენ იწვდიდა ხელს.

— ზა-პლია-ტერ!

ზაპლატარი პირქვე ჩაეცა თოვლში. გერმანელმა ჯარის-
კაცმა მიიბრინა და კონდახი ჩასცხო. მერე მეორე ჯარისკაცი
გამოხტა და იმანაც ჩასცხო კონდახი, შემდეგ ორთავემ ილ-
ლიებში ხელი ჩაავლო ზაპლატარს და ფეხზე დააყენეს.

— ა... ა...აბერ, — გაისმა არაადამიანური ღრიალი.

— ზაპლიატერ! — ჩაისისინა გერმანულმა სიკვდილმა და
დამბაჩაზე ხელი წაივლო.

ჯარისკაცი წყეულ აყლაყუდასთან მივიდა და ორივე ხე-
ლით გაუწოდა ნაჯახი.

— ზაპლიატერ! — გერმანულმა სიკვდილმა ხელი ასწია.

ზაპლატარი წაბარბაცდა და უნებლიეთ გაიწვდინა წინ გამ-
ხმარი მკლავები. ხელში რომ ნაჯახის სიმძიმე იგრძნო, შეაძიგ-
ძიგა და ღმუილი აღმოხდა.



— ნუ ღმუიხარ, უბედურო! — წყნარად ჩაუღაპარაკა ტემნიკარის ცოლმა. — საშიში არაფერია!..

— დედავ!..

ჯარისკაცები ტემნიკარის ცოლთან მივიდნენ, რომ მუხლებზე ჩაეჩოქებინათ. ქალმა თავი დაუქნია, სამარისებურ სიჩუმეში თავსაფარი მოიხადა და მორს გადააფარა. მერე შავ თოვლში ჩაიმუხლა, თავი თავსაფარზე დადო და თვალები დახუჭა.

— ზაპლიატერ! — გააპო სიჩუმე ბრძანებამ.

— დედავ, შემიბრალეთ! — წამოიკვნესა ზაპლატარმა. — შემიბრალეთ...

— ნუ ყვირი, უბედურო! — უთხრა აუღელვებლად ტემნიკარის ცოლმა, თვალებიც არ გაუხელია, ისე. — მე მებრალეები. წამაცლი თავს და ყველაფერი გეპატიება.

— დედავ...

— საშიში არაფერია, ზაპლატარ!..

— ზაპლიატერ! — დაიწივლა ლეიტენანტმა და ჰაერში დასცალა დამბაჩა.

ზაპლატარი ისე შებარბაცდა, თითქოს ტყვია მოხვდაო. მერე უცებ გამართა თავისი გრძელი ტანი, თითქოს უკანასკნელად გაიბრძოლაო. გრძელტანიანი ნაჯახი მალლა აფრიალდა. მას იქ მყოფთა მზერაც თან მიჰყვა. ნაჯახი მალლა აიჭრა, — ასცდა დამწვარ კედელს, ხანძრის კვამლს, უღრუბლო ლურჯ ცას შეერია. მისმა ალესილმა პირმა ცივი მზის სხივებში გაიბრწყინა, გაიელვა და სწრაფად დაეშვა ძირს...

— კმარა! კმარა! — შეჰყვირა პეტერ მაიცენმა და თავი გაიქნია, რომ ეს საზარელი ზმანება მოეშორებინა. — მეყო! მეტი ძალა აღარა მაქვს!.. მეყო, — გაიმეორა უფრო ხმამაღლა, ხელები აიქნია და წამოხტა.

ისე სწრაფად წამოხტა, თავბრუ დაეხვა, თვალები აუჭრებლად, ყურებმა მსხუილი დაუწყო, ფეხები თითქოს მოეკვეთა. პეტერ მაიცენი კვლავ ჰირკზე დაეშვა, ხელისგულები საფეთქლებზე მიიჭირა, თვალები დახუჭა და შეეცადა გონს მოსულიყო. მაგრამ გვიანლა იყო. მსხუილმა იმძლავრა, მბურღავ ტკივილად იქცა და წამით ჩამოწოლილ შავ წყვილიაღში უღმობელი ძალით ნაპერწკლებად გაიფანტა, — ამ ნაპერწკლებში კვლავ ნაჯახის პირმა იელვა.

— კმარა! — ძლივს გასაგონად ჩურჩულებდა პეტერ მაიცენი. მაგრამ ეს მხოლოდ წამით გაგრძელდა. თავბრუსხვევამ გაუარა. მან მაგრად მოისრისა ლოყები და ირგვლივ მიმოიხედა.

ჰო, წყნარი ბარის ზემოთ იჯდა. ირგვლივ საოცარი სიჩუმე გამეფებულიყო. არაფერი იძროდა, როგორც ქარიშხლის წინ იცის ხოლმე. ხეობა მძიმე, მოლურჯო-მოტყვიისფრო სინათლეში ჩანთქმულიყო. იგი გამადიდებელ შუშასავით ახლოს გაჩვენებდა ირგვლივ ყოველივეს, თუმცა ყველაფერს არა-

ბუნებრივ, უსიცოცხლო იერს ჰფენდა, თითქოს ხეობას სიცოცხლე შეეწყვიტა უცებ და ნამდვილი გამხდარიყო.

პეტერ მაიცენმა მკერდში ტკივილი იგრძნო, წელში გაიმართა და ღრმად ამოისუნთქა. მერე მალლა, ზვარს ახედა. ვაზს ისეთი ხეშეში ფოთლები ესხა, თითქოს ჟანგიანი რკინისაგან გამოეჭრათ, არც კი ირხეოდნენ. მერე მწვანე ველსა და ჩაშავებულ მდინარეს მოავლო მზერა, მდინარის გასწვრივ ჩაყოლებულ შავ ტირიფებს, უძირო მორევსა და შავი რცხილის ჩრდილში შეფარებულ თეთრ წანწალებზე გაუჩერდა თვალი. უნდოდა უფრო შორსაც მიეწვდინა მზერა, მდინარის გაღმა მდებარე გზისთვის, დაენახა მარცხენა ფერდობზე ეჟულად მდგარი მუხა, აყვავებული წიწიბურა და წითელსახურავიანი სახლი, მაგრამ გადაიფიქრა და ახლა მდინარეს გახედა, შავი ტყისაკენ რომ მიიკლაკნებოდა, მერე — შავ გორაკსა და მთის შავ თხემებს. ცას არ შესცქეროდა. გრძნობდა, რომ არ უნდა ეცქირა მათთვის; სადღაც გულის სიღრმეში ეშინოდა, ლურჯ ცამდე შემართული ნაჯახი არ მეზმანოსო ისევ. იცოდა, რომ ეს წარმოსახვის ნაყოფი იყო, მაგრამ თავი მაინც მხრებში ჩაიძვრინა და ხელი უნებლიეთ ყელისკენ გააპარა.

„კარგი, გეყოფა“, — უბრძანა თავს, წელში გაიმართა და მალლა აიხედა. ცა კაშკაშა და ცარიელი იყო, მთლად ცარიელი. ნელ-ნელა ააცურა მზერა მის სივრცეში: სილურჯე მოჩანდა მხოლოდ, სილურჯე და კვლავ სილურჯე — უშფოთველი, ცივი და უღმობელი...

— ნაჯახი აღარ არის, ეს კი დარჩა, — ჩაიბურტყუნა პეტერ მაიცენმა. ისე ნაგვემ-ნაწამები იყო, თითქოს ტანჯვის ღამე გაეტარებინოს.

მაგრად მოქაჩა სივარეტი. აუტანელი დაღლა იგრძნო და ბალახზე დაეცა.

— არა, ეს საშინელია! — გაიმეორა მან. — მეტისმეტად საშინელი...

მან ნელ-ნელა ცერად ააყოლა თვალი მარცხენა ფერდობს და მზერა მზეზე მოგიზგიზე წითელ სახურავზე შეაჩერა.


— ჰო, შენს შემხედვარეს მეზმანა ის საზარელი სურათი, — ცოტა არ იყოს ყვედრებით წაილაპარაკა პეტერ მაიცენმა.

მან ფართოდ გააღო თვალები და საკუთარ გულისცემას მიაყურადა. გული ძლიერ უძგერდა, ასე ემართებოდა შთაგონების წუთებში მუდამ. მაგრამ სულისა და ხორცის ამ მიუწვდომელ ტკობას, იმ საოცარ, ოდნავ მოღლილ სიხარულს, ასეთ წუთებში რომ ეუფლებოდა, ის სიწმინდე აღარ ახლდა ახლა; შიგ სამსალა ერია, იდუმალი შიში და სირცხვილი. ასე ხდება, როს საყვარელ ადამიანთან განცდილი სიყვარულის ნეტარება გაივლის და წამიერი ღუმილი დგება.

„რად არის, რომ იმ უდიდეს სიხარულს, რასაც შემოქმედება ბადებს, უეჭველად სიმწარე უნდა შეეერიოს?“

პეტერ მაიცენმა თვალები დახუჭა და დაელოდა, იქნებ გაიაროსო ამან, თუმცა გული შიშით უგრძნობდა, ეს არ მოხდებოდა. სიმწარე არ გამქრალა.

„საიდან, როგორ გეზმანა ეს? — ეკითხებოდა თავს და ამ კითხვის მეტი აღარა აინტერესებდა რა. — საიდანო? მე ხომ მაგდაგვარი არაფერი გამივლია ახრად!.. და არც ყური მომიკრავს არასდროს!... და, რაღა თქმა უნდა, არც მინახავს!“



— მერე ის ორი მოკვეთილი თავი? — მოაგონდა უცებ.

და ყველაფერი გაუცოცხლდა თვალწინ...

ომის დროს პეტერ მაიცენმა ერთხელ ნახა ფოტოსურათი, ტყვედ ჩავარდნილ გერმანელ ჯარისკაცს რომ უპოვეს. ცარიელ მაგიდაზე ორი მოკვეთილი თავი იდო, ერთს სიგარეტი ჰქონდა გაჩრილი კბილებში. მოკვეთილი თავები ზღვისპირელი გლეხებისა იყო. გერმანელებმა მათ ჩვეულებრივ მორზე გააგდებინეს თავები. სურათმა შეაძრწუნა პეტერ მაიცენი და სამუდამოდ დაამახსოვრდა. გლეხების სახეები ისეთი მახლობელი გახდა მისთვის, თითქოს მთელი სიცოცხლე იცნობდა ამ ადამიანებს. თვალს დახუჭავდა თუ არა, ცოცხლად წარმოუდგებოდნენ. უფრო ხშირად ძილ-ღვიძილის დროს ეზმანებოდა ისინი, როცა საშინლად დაღლილი იყო და თვალის მოხუჭვა კი უჭირდა. ზმანებანი ჯერ სადღაც შორს გამოჩნდებოდნენ, ჰაერში რიალებდნენ, თანდათან უახლოვდებოდნენ ერთმანეთს და მერე სულ ახლოს დაუდგებოდნენ წინ: სახე დამშვიდებული ჰქონდათ, გაოცება სამუდამოდ შეჰყივნოდათ პირსახეზე ამ უბრალო ადამიანებს. პეტერ მაიცენმა მალე იგრძნო, რომ ოდესმე უსათუოდ დასწერდა რაიმეს ამ ორ კაცზე. გადაწყვიტა, მოეგლო ზღვისპირეთი, თავისი თვალით ენახა ის ადგილები, სადაც ეს ამბავი მოხდა, გამოლაპარაკებოდა მათ ახლობლებს და ასე შეეკრიბა საჭირო ცნობები. საქალაქში, სადაც შავად ნაწერს ინახავდა, უკვე ედო ფურცელი, ზედ ეწერა „თავმოკვეთილნი“ და რამდენიმე პატარ-პატარა ჩანაწერიც ჰქონდა გაკეთებული. იგი უკვე გარკვევით ხედავდა ახალგაზრდა გერმანელ ჯარისკაცს, თავი რომ მოკვეთა იმ გლეხს. კბილებში სიგარეტი ჰქონდა გაჩრილი, ხედავდა, როგორ ჩამოეყარა შუბლზე გერმანელს რბილი, სწორი, ქერა ქოჩორი, როცა ნაჯახის ასაღებად დაიხარა, მერე როგორ გასწორდა წელში გერმანელი, პატარა ბიჭივით როგორ გადაიყარა თმა უკან, სანამ ნაჯახს აღმართავდა. ასევე გარკვევით ხედავდა ექვსიოდე წლის ბიჭუნას, სახლს უკანა ეულ ლარიქსთან ქანდაკებასავით რომ გაშეშებულიყო, შიშველი მუხლები უკანკალებდა მხოლოდ და ჩალურჯებული ტუჩები უთრთოდა, ხოლო წამწამებზე გაშტერებული თვლებიდან ჩამოწვეთებული კურცხალი დაჰკიდებოდა... ზმანება თანდათან იძაბებოდა, უფრო და უფრო საშინელი ხდებოდა. ისე რომ პეტერ მაიცენს კიდევ ეჭვი შეეპარა, მეყოფა თუ არა ძალა ამ ამბის დასაწერადო. მაგრამ მოკვეთილი თავები არ ქრებოდნენ მისი მეხსიერებიდან. პირიქით, უფრო და უფრო ხშირად ამოტივტივდებოდნენ ხოლმე. ჰოდა, პეტერ მაიცენსაც ქვეშეცნეული რწმენა გაუჩნდა — ისინი მანამ ირიალებენ ჰაერში და იდგებიან ჩემ თვალწინ, სანამ მათ ამბავს ქალაქში არ გადმოვიტანო.

„ჰო, იქნებ ეს მოკვეთილი თავები, აგერ ათი წელიწადია რომ მდევნიან, მართლაც დაერთო ტემნიკარის ამბავს. მათ წარმოშვეს ალბათ ტემნიკარის ისტორია. მაგრამ რანაირად?...“

პეტერ მაიცენი ზურგზე გადაბრუნდა და მის წინ გადაშლილ ლურჯ სივრცეში ჩაიძირა.

„ვთქვით, ეს ცა, უსასრულოდ მაღლა რომ მიემართება, — თავისებური უზარმაზარი რცხილაა. ჩვენს ქვეყანაში, ამ პატარა აუზში საშინელი ამბები მოხდა, ისეთი საშინელი, ღვთის რისხვას და წყრომას რომ იმსახურებს. მერე? ნუთუ მათი ხსოვნა სამუდამოდ გაჰქრა? ან იქნებ ზეცამ გადაიღო მათი სურათი რაღაც კოსმიური ძალების შემწეობით და თავის ურიცხვ ლურჯ

ფენებში ჩამალა? ახლა კი თანდათან აღწევს ეს სურათები შემოქმედთა სულს და ასი წლის შემდეგაც ასევე იქნება... მათ ჩემს სულშიაც შემოაღწიეს. სასტიკ-ირნოდ გამოვედი, სიკვდილზე ფიქრები გულიდან რომ გადამეყარა, დავწყნარებულყავ და გონს მოვსულიყავ. მერე იდუმალი საყვირის ხმამ ამ ფერდობზე შემომიტყუა, თუმცა ისიც არ ვიცი ნამდვილად — საყვირი იყო თუ მომეჩვენა მისი ხმა და აქ შემოვრჩი; აღარც საყვირი მახსოვდა, ბუნების სიმშვენიერით ვტკბებოდი. მერე ის იყო, ეს გადამწვარი და ხელახლა აშენებული სახლი დავინახე და ისევ გამიცოცხლდა უცებ წითელი სახურავის ამბავი. ჩემი გულის მორევის მიწყნარებულ ზედაპირზე დაეცა ფოთოლი, წყალმა გაშალა იგი და თვალწინ ახალი სურათები დამიდგა... მერე როგორი სურათები!..“

პეტერ მაიცენი ფიქრებში ჩაიძირა.

„ჰოდა, რას დავინახავდით, ამ ლურჯ ცას რომ მართლაც ყველაფერი ეჩვენებინა, რაც ჩვენს ქვეყანაში მოხდა? მილიონობით მკვდარს!..“

„მათ შორის ტემნიკარის ცოლსაც!“

„ტემნიკარის ცოლს? — გაკვირვებით გაიქნია თავი პეტერ მაიცენმა — ტემნიკარის ცოლს? არაფერი მესმის!.. ეს ქალი ვულკანივით აფეთქდა და თითქმის ზღაპრულ გმირად იქცა“.

„სწორედ ეს არის მთელი სიძნელე! — ჩაფიქრებით თქვა მან. — რა უნდა ვუყო ამ ქალს? ის ხომ ამბის ქარგას მინგრევს, მაგრამ ეს კიდევ არაფერი. მთავარი ის არის, რომ იგი ტემნიკარს მიჩრდილავს. მყავდა გმირი, სწორედ ისეთი კაცი, როგორიც მინდოდა, მის ირგვლივ მყოფნი რომ მასთან შედარებით გახვრეტულ გროშადაც არ ღირდნენ და აბა უყურე...“

„განა ახლა კი დაპატარავდა ტემნიკარი?“

„არა! რასაკვირველია, არა! — ამოიოხრა პეტერ მაიცენმა. — ამან გული გაუხარა. — სულაც არ დაპატარავდა!“

„მაშასადამე, თავი და თავი ისაა, სად მივაბათ ტემნიკარის ცოლის ამბავი?“

„ჰო, ან იქნებ ისე გავაკეთოთ, თითქოს ტემნიკარს დაესიზმრა ეს ამბავი? მერე როდის?.. ან თვითონ ტემნიკარს რაღა მოუვა? იქნებ შეყოყმანდეს კიდევ. არა, იმას არ ვამბობ, გატყდება-მეთქი, ბედისწერა არ მისცემს ნებას, რომ გატყდეს, მაგრამ ღონე რომ გამოეცალოს... ხომ აღარ იქნება ის გმირი, ერთი მთლიანი ლოდისაგან გამოძერწილი, როგორიც მე მესახებოდა“.

„მაგრამ ესეც უნდა მოხდეს“.

„ჰო, მაგრამ, თუკი არაფერი წარმოიდგინა? თუკი მე მისი ოჯახის აღსასრულს არ დავანახებ?“

„მაშინ მართლაც დაპატარავდება... თუმცა ეს სულ ფუჭი ლაპარაკია. განა შენ არა ხარ მისი სულისა და გულის ბატონ-პატრონი? ეს ზმანება უკვე თანა სდევს მას“.

— რასაკვირველია, — წაიბურტყუნა პეტერ მაიცენმა.

„სად არის ახლა იგი?“

„სად არის ახლა?“ — დაფიქრდა პეტერ მაიცენი. — მალნოვის მთასთან კრნოს გამოემშვიდობა და მელინის ტყის გზას დაადგა“.



„ მაშ, საცაა რეიჩევის ბილიკზე გავა“.

— ჰო, საცაა რეიჩევის ბილიკზე გავა... — პეტერ მაიციენმა ხეობის სიღრმეში გაჭიმულ ველს გადახედა, მზეს რომ ორად გაეყო: განათებულ და ჩრდილიან მხარედ. — აი ახლა გავა რეიჩევის ბილიკზე... — გაიმეორა მან და მზერა ტყისპირისაკენ გადაიტანა. — რეიჩევის ბილიკზე გავა... — მესამედ წარმოთქვა მან და ნაღველი მოერია...

ტემნიკარი რეიჩევის ბილიკზე გამოვიდა. ნელა მიდიოდა, მოღლილობა ეტყობოდა. სახეზეც დაბერებული ჩანდა, დაპატარავებულიყო კიდევ. წელში მოხრილი, მძიმე ტვირთს მიეწიდებოდა თითქოს.

ტყის პირას შეჩერდა. წინ რეიჩევის სავალი გადაიშალა... ზუსტად მის შუაგულზე გადიოდა შუქისა და ჩრდილის საზღვარი. ცალ მხარეს თოვლს ვერცხლისფერი გადაჰკრავდა, მზეზე ბრწყინავდა, თბილი და ცოცხალი გეგონებოდა, მეორე მხარეს კი მოლურჯო ნისლს შეეებურა და თოვლიც ცივი და მკვდარი ჩანდა.

ტემნიკარს შეამცივნა, სულშიაც სიცივე გამეფებოდა, თუმცა არ სურდა ეს დაეჯერებინა. მან მათარისკენ ხელი წაიღო, არაყი მოყლურწა და კვლავ ჩრდილს გახედა.

— მალე თორმეტი იქნება, — წარმოთქვა მან თავის დასამშვიდებლად. — კარგია!.. ის ძალღატაკი თხუნელები ახლა მიაღწევენ მხოლოდ რავნიშის მდელოს. ან იქნებ იქამდე არც არიან ჯერ მისულნი.

მან ოფლით დაცვარული შუბლი მოიწმინდა და კვლავ არყით დაიამა გული.

— ესეც ასე. ახლა გავსწიოთ! — უბრძანა თავის თავს, მაგრამ ხმა ისე მტკიცე აღარ ჰქონდა.

ტემნიკარი წელში გასწორდა, ღრმად შეისუნთქა და პირდაპირ შუქჩრდილის საზღვრისაკენ გააღაჯა. მერე ისე გაშეშდა, თითქოს უფსკრულის პირას იდგა. ერთხანს გაუნძრევლად იყურებოდა წინ, მერე თავი ასწია:

— წავალ!

თოვლით პირი მოიბანა და მზეს შეხედა.

— ახლა წავალ... იქით... იმ მხარეს... — ჩუმად უთხრა თავის თავს და ჩრდილზე მიუთითა.

მზე ოდნავ შეტორტმანდა.

— წავალ... ასე მოხდა, უნდა წავიდე... მე და შენ ვეღარ ვნახავთ ერთმანეთს!..

მზე ისევ შეტორტმანდა.

— აღარასოდეს გაანათებ ჩემთვის... აღარასოდეს!..

მზემ თავი დაუქნია.

— მაგრამ შენს სხივებს დღეს კიდევ დავინახავ. იქ... —

ტემნიკარმა მრგვალ გორაკზე მიუთითა, სადაც სათიბები იდ-
გა, — იქ, ბრეზში ვნახავ. თუმცა მათ ჩასვლას სადამოთი ვერ
დავინახავ, თავად ჩემი მზე ჩაესვენება მანამ... გაიგე?

მზემ თავი დაუქნია.

— აბა, ახლა კი წავალ... გადავაბიჯებ... ე-ე... არა, ეტყო-
ბა, არც ისე იოლია მზიანი მხრიდან ჩრდილში გადაბიჯება.
ხომ გჯერა?

მზემ კვლავ თავი დაუქნია.

— არაფერი გაქვს ჩემთვის სათქმელი? — წყენით უთხრა
ტემნიკარმა.

— გეტყვი, — მისივე ხმით მიუგო მზემ. — თუ შენ არ გა-
დააბიჯებ ჩრდილში, იცოდე, ჩრდილი თავად გადავაბიჯებს.

ტემნიკარმა გაიხედა და დაინახა, რომ მოლურჯო ჩრდილი
ზედ ფეხებთან მიუცოცდა. ტემნიკარი შეკრთა და ორი ნაბი-
ჯით უკან დაიხია.

— ეს რაღა არის? — წაიბურტყუნა მან და შეტორტმანდა.
იგრძნო, გულზე თითქოს ლოდი დააწვა. — რა არის? — გა-
იმეორა და საჩქაროდ მათარას მისწვდა, თუმცა იცოდა, არაფერი
ახლა ვერ უშველიდა. — რა არის?

შორიდან ზარის რეკა მოესმა.

„შუადღეა! შინ უკვე მელოდებიან! — გაუელვა თავში. —
აი, თურმე რა მიმძიმებს გულს! რატომ არ ვიფიქრე ამაზე?...
ხვალ რაღა იქნება? მთელ დღესასწაულს ჩავუმწარებ!.. რა-
ტომ არ შეიძლება ყოველივე ცოტათი ადრე ან ცოტათი გვიან
აღსრულდეს!..“

„ნუ ფიქრობ მაგაზე! — უთხრა თავის თავს. — აბა ვის
ედღესასწაულება დღეს!.. მტერი უქმე დღესაც სწვავს სახ-
ლებს და ხოცავს ხალხს! წინ-მეთქი!“

ტემნიკარმა წასვლა დააპირა, მაგრამ ფეხებმა არ გაუშვეს.

„ღმერთმა იცის, რა მოხდება, მე რომ მიპოვნიან? — მო-
იბუზა იგი. — იქნებ სახლ-კარიც გადამიწვან...“

„ბევრს გადაუწვეს უკვე! — უპასუხა თავის თავს. — ყვე-
ლას რომ ჩემდენი ეფიქრა ამაზე, კარგა ხანია ამოუღებდნენ
ხალხს! წინ-მეთქი!“

მაგრამ ფეხები მაინც ვერ დაძრა.

„იქნებ აწამონ... მოკლან!“..


ამის პასუხი ტემნიკარმა ვერ იპოვა.

„მოკლან!“ — თვალწინ დაუდგა, როგორ იძიებდა მტერი
შურს, გადაბუგავდა ყველაფერს.

„შინისაკენ! — შეცახცახდა ტემნიკარი — შინისაკენ!“..

გამალეებული მოტრიალდა და მელინის ტყისკენა ჰქნა პირი.
მაგრამ ოციოდა ნაბიჯი რომ გადადგა, გაშეშებული
შედგა.

— სალამოს ხომ ჩარევის გამოქვაბულში თორმეტი მკვდა-



რი იქნება, — გაისმა სიჩუმეში წყნარი ხმა, ეს ხმა თავად ტემნიკარისა იყო, — სალამოს ხომ ჩარევის გამოქვაბულში თორმეტი მკვდარი იქნება! — გაიმეორა ტემნიკარმა და თვალები დახუჭა.

დიდხანს იდგა გაუნძრევლად ერთ ადგილას. ბოლოს მოტრიალდა, მაგრამ კაცი ვეღარ იცნობდა: ეს აღარ იყო წინანდელი ტემნიკარი. ახლა სამოცდაათისას კი არა, ათასი წლისას ჰგავდა, თითქოს მთელი თავით გაზრდილიყო. სახე ჩათეთქვოდა და გაქვავებოდა, მხოლოდ თვალები არ მიუგავდა ძველი ქანდაკებების მსგავსად ორ ნახვრეტს, შიგ ცეცხლი უგიზგიზებდა, გაქვავებულ ლოყებზე კი ნელ-ნელა ჩამოსდიოდა ცრემლები.

ცრემლები პეტერ მაიცენსაც ჩამოსდიოდა პირისახეზე.

— ჩემი ტემნიკარი მე აღარ მეკუთვნის! — ამოიოხრა მან და თავი გააქნია. — ახლა იგი უკვე გასცდა ჩემთვის მისაწვდომ და ჩემ მიერ შეძლებისდაგვარად წარმოსახულ სამყაროს. იგი გასცდა ამ საზღვრებს და ბედისწერის ზენარ ტრაგიკულ კანონებს ემორჩილება, იქამდე კი მე არ მიწერია ამაღლება.

ტემნიკარი კვლავ შუქ-ჩრდილის საზღვარს მიადგა.

— ახლა რობში წავალ! — თქვა მან ფოლადის ხმით და მზეს ახედა.

მზემ თავი დაუქნია.

— მათ სახლ-კარი გადამიწვეს, მომიკლეს ცოლი, ვაჟი და ქალი! გესმის?

მზემ კვლავ თავი დაუქნია.

„რაო? — გაოცდა პეტერ მაიცენი. — განა ეს უკვე მისთვის სიმართლედ იქცა? მაგრამ მართლაც ასე რომ მოხდა?...“

ტემნიკარმა ხელები გაიწვდინა, მზემ ხელისგულებზე დააცხუნა. მერე ისე მომუშტა ხელები, თითქოს უნდოდა მზის სხივები დაეჭირა.

იმავე წამს საყვირის ხმა ჩაესმა.

— მოვდივარ, მოვდივარ! — წარმოთქვა ტემნიკარმა და



ხელისგულით პირისახე მოიწმინდა, თითქოს მზით მოიბანა პირი.

ისევ გაისმა საყვირის ხმა.

ტემნიკარმა მზეს ხელი დაუქნია, წელში გასწორდა და მტკიცედ გადააბიჯა შუქ-ჩრდილის საზღვარს.

— მშვიდობით! — ჩაიბურტყუნა პეტერ მაიცენმა და გულისტკივილი იგრძნო იმის გაფიქრებაზე, რომ ტემნიკარი მასაც გამოემშვიდობა სამუდამოდ. — მშვიდობით! — გაიმეორა მან. — გიჯობნია და ეს არის. შენ რობში მიდიხარ, ბრძოლაში, მე კი...

მან ველარ დაასრულა სიტყვა, საყვირის ხმამ ფეხზე წამოაგდო. გონს მოეგო და ყური მიუგდო. საყვირი იქვე, სადღაც მის გვერდით უკრავდა.

პეტერ მაიცენმა ირგვლივ მიმოიხედა. ზვარს ზემოთ, ბილიკზე ქალიშვილი მიდიოდა, თავზე გარეცხილი თეთრეულით სავსე ვარცლი შემოედგა შავი კოფთა და მწვანე ქვედაკაბა ეცვა.

— ეს ხომ ის გოგოა! — შეჰყვირა პეტერ მაიცენმა და თვალები დააჭყიტა. — ისაა, ნეკერჩხალთან რომ იდგა. ისაა, ნეკერჩხალა! ასეც უნდა დავარქვა: ნეკერჩხალა...

პეტერ მაიცენი ბილიკზე დაეშვა, რომ ქალისათვის გზა გადაეჭრა.

— გამარჯობა, ქალიშვილო! — მიესალმა იგი.

ქალმა პასუხი არ გასცა, არც კი შეჩერებულა. ლამაზ პირსახეზე გაოცება და რაღაც უცნაური იღუმალი გამომეტყველებაც ეხატა. ნაღველი და სიამაყე, იმედი და სასოწარკვეთილება — ყველაფერი ერთად აღბეჭდოდა სახეზე ქალს.

— მორევისკენ მიდიხართ? — ჰკითხა პეტერ მაიცენმა და ჯოხი ტოტებგაშლილი რცხილისაკენ გაიშვირა.

ქალიშვილს არც ახლა ამოუღია ხმა და არც შეჩერებულა. თეთრი ხელე-ბით ვარცლს ჩასჭიდებოდა და ჯანმაგარი სხეული სიმივით დასჭიმვოდა.

— მაპატიეთ, რომ ასე გაწუხებთ! — განაგრძო პეტერ მაიცენმა და ქალიშვილს გვერდში ამოუდგა. — ვინ უკრავს საყვირზე?


ქალიშვილმა არც პასუხი გასცა და არც შეჩერდა, ეს იყო მხოლოდ, ოდნავ მიიბრუნა თავი მისკენ და მედიდურად გადახედა უძირო ლურჯი თვალებით.

— ნუთუ ნამდვილად არ არსებობს ეს წყეული საყვირი? — გაუკვირდა პეტერ მაიცენს.

ქალიშვილმა არც ახლა გასცა პასუხი, შეჩერდა. პეტერ მაიცენი მის თვალებს ველარ ხედავდა, რადგან ქალმა ზვარს შემოუარა და ხეობისკენ დაეშვა.

— რა უბედურებაა! — ჩაიბურტყუნა პეტერ მაიცენმა და ბებერ ტირიფთან შედგა. — ისე მიდის, გეგონება, ტყის ალი იყოს და უბრალო მოკვდავთ არად აგდებდეს... თუმცა ეს ალი რაღაც ვერა ჩანს გულმხიარული...

ქალიშვილი თვალს მიეფარა, მაგრამ ჰაერში მაინც ნაღველის მწარე სურნელი იგრძნობოდა.



„რა დაემართა ამ ქალს? — თავის თავს ეკითხებოდა პეტერ მაიცენი. მე რა მჭირს დღეს?.. თანდათან ნალველით მევსება გული...“

მან ისევ უკან მოიხედა და შეაკანკალა. ირგვლივ ყველაფერი ისევ უცნაურ ზმანებად ეჩვენა. გორაკები და ხეები, გადაშლილი მინდვრები და ბებერი ტირიფები, სახლის სახურავი და გზა, თეთრი გველივით რომ შემოხვეოდა ფერდობს, ბებერი მუხა და ტოტებგაშლილი რცხილა, მორევი და წანწალები, შავი წყალი, ახლა რომ უხმოდ მიწანწყარებდა შავ ბალახებში, ყველაფერი ჩამკვდარი და ცარიელი გეგონებოდა. ცარიელი ჩანდა ზემოთ ლურჯი ცა, ღრუბლის ფთილასაც ვერ მოჰკრავდი ზედ თვალს! — ცარიელი იყო მის ფეხქვეშ მიწა, სიცარიელე ედგა გულშიაც. პეტერ მაიცენი მარტოდ-მარტო იყო.

ენით უთქმელი მარტოობის გრძნობა კარგა ნაცნობი იყო პეტერ მაიცენისათვის.

„დავიღალე, — იმშვიდებდა თავს, — გული გამიტყდა... ზმანებებმა დამღალა... და ეჭვებმა...“

იგი ბებერი ტირიფის ხორკლიან ტანს შუბლით მიეყრდნო და თვალები დახუჭა.

„მაგრამ მარტო მე არა ვარ ამ დღეში, — განაგრძობდა პეტერ მაიცენი. — ახლა...“

უცებ საყვირის ხმა ისე ძლიერად ეტაკა ზურგში, რომ წაბარბაცდა, თვალდაჭყეტილი ელოდა, როდის აყდერდებოდა ისევ. საყვირმა კვლავ დაუკრა, თანაც ახლოს, იქვე. მის გვერდით, ზვარში.

პეტერ მაიცენს გულზე მოეშვა. იგი ახლოს მივიდა და ბუჩქები გადასწია. იქვე, სამიოდე ნაბიჯზე მოხუცი დაინახა, საყვირს რომ უბერავდა. ტანმორჩილი, ჯმუხი მოხუცი იყო, ბრტყელი ცხვირი და დაბერილი ნესტოები ჰქონდა, ნიკაპზე რუხი წვერი გაბარდნოდა, მელოტზე ჯაგარა თმა გვირგვინივით შემოვლებოდა, ხშირი წარბები გაფანჩვოდა, პირისახე ლურჯი ძარღვებით დასეროდა, წყლიან თვალებში სევდა ედგა, დაღარულ ნაოჭებში ნალველი ჩაბუდებოდა.

„ბებერი პანია“, — გაიფიქრა პეტერ მაიცენმა.

მოხუცის გვერდით ხუთიოდე წლის პირმრგვალი ბიჭუნა იდგა, ცისფერი თვალები და ქერა ხუჭუჭა თმა ჰქონდა. ბიჭსაც თვალები დასევდიანებოდა და ტუჩებზე ნალველნარევი ღიმილი აღბეჭდოდა.

„ნორჩი პანია“, — გაიფიქრა პეტერ მაიცენმა.

ბებერმა პანმა ნალვლიანი ხალხური სიმღერა დაუკრა საყვირზე და დაძარღვული ხელის ზურგით სქელი ტუჩები მოიწმინდა.

— კიდევ! — უთხრა ნორჩმა პანმა და ვედრებით ასწია ხელი.

ბებერმა პანმა ნალვლიანად შეხედა და თავზე ხელი გადაუსვა. მერე ფილტვებში ჰაერი დაიგუბა და საყვირი ტუჩებზე მიიღო..

ნორჩმა პანმა ხელი ჩაიქნია და საყვირიც აგუგუნდა.

პეტერ მაიცენს უცებ ამ სიმღერის სიტყვები მოაგონდა:

სიკვდილი კარს მომდგომია,
გათავდა ჩემი ამბავი...

თითქოს მძიმე ლოდი მოსწყდაო პეტერ მაიცენს. და თუმცა საყვირი ნაღვლიან ჰანგს უკრავდა, იმ ხალხური სიმღერის სიტყვებიც სევდიანი იყო, არც მოხუცსა და ბიჭს ეტყობოდათ მხიარულება და ერთი შეხედვით არამიწიერ არსებებსაც ჰგავდნენ, პეტერ მაიცენმა მაინც შვეებით მოითქვა სული. ფეხქვეშ კვლავ იგრძნო ნიადაგი, ბუნებაც გამოცოცხლდა.

ძლივს არ დაინახა საყვირი, ამდენ ხანს რომ სულს უშფოთებდა. გულ-დაწმენდილი, მადლობის თვალთ შესცქეროდა ბიჭს და ბერიკაცს. უნდოდა ხმა მიეწვდინა მათთვის, ახლოს მისულიყო, მაგრამ ჩუმად, გაუნძრევლად კი იდგა თავისთვის, არ სურდა დაერღვია მათი ტკბილი ჭუჭუჭი და თანხმობა, საყვირი რომ ასე იღუმალ იერს ჰფენდა.

— კიდევ დაუკარი, — ბიჭმა თხოვნის ნიშნად ხელი ასწია.

— განა უკვე სამჯერ არ დავუკარი! — ალერსიანად უთხრა ბერიკაცმა და ხუჭუჭა თმაზე ხელი გადაუსვა.

— კიდევ ერთხელ რა...

— დამაცა ცოტა, სული მომათქმევინე!

მოხუცმა საყვირი ბიჭს გადასცა. იმან კი ფრთხილად, სიყვარულით გულში ჩაიკრა, თითქოს ცოცხალი არსება — კრავი, ბაჭია ან თიკანი იყო. მოხუცმა მხრებზე ხელები მოხვია ბიჭს, თვალეები დახუჭა და ნელ-ნელა დაარწია, თითქოს ამ ნანავით ამშვიდებდეს, ან უნდაო იგრძნოს ბიჭის სითბო. მზეც ასევე ალერსიანად დაჰყურებდა მოხუცსა და ბიჭს და თბილ სხივებს აფრქვევდა.

— იდილიაა! — წაილაპარაკა პეტერ მაიცენმა; იგი მშვიდმა, თბილმა ნაღველმა აიტანა. ასე ემართებოდა ყოველთვის, როცა ადამიანთა გულწრფელ სიახლოვეს დაინახავდა. „ძველისძველი იდილიაა, პაპა და შვილიშვილი. ერთს უკვე სუნთქვა უჭირს, მეორეს კი ჯერ არ ჰყოფნის. ორი თაობა... წარსული და მომავალი, ერთი გაღმა დგას, მეორე გამოღმა, შუაში კი საშუალო თაობა ჯიუტად უსვამს ნიჩბებს და გზას მიიკვლევს ცხოვრების აბოზოქრებულ მღვრიე მდინარეში!“.

— ჰმ, რას იზამ... რაკი გინდა... — ენის ბორძიკით ჩაიბურტყუნა ბერიკაცმა, თუმცა თვალეები ისევ დახუჭული ჰქონდა და ისევ ისე ირწეოდა. მერე ძლივს გასაგონად გააბა თავისი ბოხი, მოგუდული, ჩახლეჩილი ხმით:

სიკვდილი კარს მომდგომია,
 გათავდა ჩემი ამბავი...

— იცოდეთ, კიდევ სამჯერ უნდა დაუკრათ! — ხმამაღლა უთხრა ბიჭმა და თითით დაემუქრა.


— კაი, — მორჩილად დაუქნია თავი პაპამ, — სამჯერ დავუკრავ...

— როგორც ყოველთვის.

— როგორც ყოველთვის...

— მერე ზღაპარი მიამბეთ!

— მერე ზღაპარს გიამბობ... მაგრამ ზღაპარი ხომ მოგიყევი უკვე! — შეკრთა პაპა და თვალეები გაახილა. — არ მიამბნია განა?



ქართული
ბიბლიოთეკა

— კიდევ ერთიც მომიყევით! აკი დამპირდით, ორ ზღაპარს გიამბობთ. ერთს დილით, მეორეს — საღამოთი.

— ჰო, თუ დაგპირდი, გიამბობ კიდევც, — დამორჩილდა ბერიკაცი, — მაგრამ ჯერ მარანში წავიდეთ, ყელი გავისველოთ.

— მხოლოდ იცოდეთ, უეჭველად მომიყვებით, ხომ?

— კაი, კაი, — დაეთანხმა პაპა, — მანამდე კი აქ მეტი მზე უნდა შემოვუშვათ. — მოხუცი დაიხარა და ორივე ხელით გადასწია ვაზის ლერწები. მერე ხელისგულზე სიყვარულით მოსინჯა მტევნის სიმძიმე და ნელა ჩაილაპარაკა: — აი ასე, აქეთ გამოძვერით!... მზეს მიეფიცხეთ! დაგაშაქრებთ, სიტკბოს ჩაგიყენებთ, სიტკბოს...

— მერე როგორ დააშაქრებს მზე ყურძენს? — ჰკითხა ბიჭმა და პაპასთან ჩაცუცქდა.

— როგორ?... აი ასე, ადგება და დააშაქრებს, — ჩაფიქრებით მიუგო ბერიკაცი ისე, რომ თავი არ მოუბრუნებია. — მზე ყველაფერს იძლევა, ძალას... სინათლეს... ცეცხლს... ჰო, ცეცხლსაც იძლევა მზე... მზე იძლევა... ჰო, ჰო: მზე იძლევა მზეს! რაც კი ამქვეყნად მოიძვევება, ყველაფერს იძლევა მზე! კი, კი!

— მერე ვინ აძლევს მზეს შაქარს? — ჰკითხა ბიჭმა.

— ვინ აძლევს? თვითონა აქვს! — კვლავინდებურად უგულისყუროდ მიუგო ბერიკაცი, მას მზის სხივებისათვის მიეშვირა ყურძნის მტევანი. — თავიდანვე ჰქონდა... და მუდამ ექნება... ვიდრემდე... ხოლო მზე რომ გაქრება, აღარც ძალა გვექნება და აღარც სინათლე... აღარც ცეცხლი... მზე ჩაგვიქრება! რას იზამ კაცი!...

სიკვდილი კარს მომდგომია,
გათავდა ჩემი ამბავი...

ბერიკაცი ნელა, ჩაფიქრებით ლაპარაკობდა და ანგარიშმიუცემლად დილინებდა. ეს სიმღერა თითქოს შესისხლხორცებოდა და თავისთავად ყლერდა დროის გამოზომილ შუალედებში. ამიტომაც მხოლოდ პირველ ორ სტრიქონს დილინებდა მოხუცი.

— ბაბუ, მაშ თავად აკეთებს? — გაისმა ბავშვის ხმა.

— რას აკეთებს? — შეხედა ბერიკაცი.

— შაქარს.

— ვინ აკეთებს შაქარს?

— მზე.

— აჰ, მზე...

— თქვენ ხომ თქვით, ყურძენს ის აშაქრებსო! — არ ცხრებოდა ბიჭი.

— მზე? რასაკვირველია, შაქარსაც ის აძლევს და ძალასაც...

— ბაბუ, მარანში წავიდეთ! — შეაწყვეტინა ბიჭმა, ეტყობა, მოსწყინდა აქ ყოფნა...

— წავიდეთ... — ამოიოხრა მოხუცმა და ნელა წამოდგა, ძლივს აითრია ბებერი ძვლები.

— მაგრამ ჯერ დაუკარით, — ბიჭმა საყვირი მიაწოდა, — ხომ მოითქვით სული.

— მოვითქვი... — ნაღვლიანად გაიღიმა პაპამ და საყვირს ხელი მოჰკიდა. — აბა შეხედე, ჩემი ფანჯარა კვლავ დაკეტილია?

ბიჭი ცერებზე შედგა, კისერი წითელსახურავიანი სახლის მხარეს წაივრძელა და თავი დაიქნია:

— დაკეტილია, დაკეტილია.

— ჰმ, დაკეტილია... — გაიმეორა პაპამ და თვალებსა და შუბლზე ხელისგული გადაისვა.

— რა არის, სულ იმას რომ მეკითხებით, ფანჯარა დაკეტილია თუ არაო? — ჰკითხა ბიჭმა.

— ჰო, ისე გეკითხები... — მიუგო პაპამ და ბიჭს თავზე ხელი დაადო. — გეკითხები, რას იზამ კაცი!

მან ამოიოხრა და წაიმღერა:

სიკვდილი კარს მომდგომია,
დამთავრდა ჩემი ამბავი...

— აბა, დაუკარით!

— ახლავე...

— აბა, ჩქარა! — არ ეშვებოდა ბიჭი.

ბერიკაცმა სქელ, ჩალურჯებულ ტუჩებზე ენა მოისვა, მხრებში გასწორდა, ფილტვებში ჰაერი დაიგუბა და საკრავი ასწია. საყვირი მზის სხივებზე ბაჯალლო ოქროსავით გაბრწყინდა.

— აბა! — უბრძანა ბიჭმა და ხელი აიქნია.

საყვირი აჟღერდა.

პეტერ მაიცენს წელანდელივით გულმა რეჩხი უყო, როცა არ იცოდა, საყვირი მართლაც უკრავდა თუ მხოლოდ ეჩვენებოდა. მართალი რომ თქვას კაცმა, დაენანა კიდევ, საყვირი რომ მისი წარმოსახვის ნაყოფი არ გამოდგა. რატომ — თავადაც ვერ იტყოდა; ჰანგი ისევე მგრძნობიარე და იდუმალი იყო. საყვირი ნაღვლიანად ჟღერდა განა მარტო იმიტომ, რომ სიმღერა იყო სევდიანი, მისი ჟღერა თავისთავად ბადებდა უფრო ღრმა, გამოუნელებელ სევდას. ამიტომ მწარედ გაჰკრა იმ ფიქრმა, რომ ეს საყვირი რაღაც საბედისწეროდ აკავშირებს ყოველივეს, რაც მის სულს აფორიაქებს და რაც ირგვლივ ხდება. განა მისმა ხმამ არ ჩააღწია გულში და არ წამოაგდო ზეზე, ვითარცა მისივე ეჭვების, ნაღვლიანი ფიქრების, სიკვდილის წინათგრძნობის დასტურმა. განა მან არ გამოიყვანა სახლიდან გარეთ! ეს ხმა რომ არ გაეგონა, ოთახიდან ფეხსაც არ მოიცივლიდა, წყნარად იჯდებოდა მაგიდასთან და იმუშავებდა. მერე ეს საყვირი მის მოთხრობაშიაც აჟღერდა. ეს ხმა აჩქარებდა ტემნიკარს, წინ უბიძგებდა, აიძულებდა მიეღო გადაწყვეტილება, ემოქმედნა, ბრძოლაში ჩაბმულიყო და სიკვდილს შეგებებოდა. ნუთუ ეს ხმა მართლაც დალუბვას მოასწავებს?

— კიდევ! — ბიჭუნამ კვლავ აიქნია ხელი.

ისევ გაისმა საყვირის ხმა.

— რა გულში ჩამწვდომად ჟღერს! — თქვა პეტერ მაიცენმა. მას კვლავ შეაჟრჟოლა და, საკუთარ თავზე გაცეცხლებული, კვლავ შეეკამათა თავის თავს:



„რა დაღუპვა, რის დაღუპვა? ან რა აქვს საერთო ამ ბერიკაცს ტემნიკართან? სად ტემნიკარი და სად ჩრნილოგარი? ან სად ჩრნილოგარი და სად ეს ბერიკაცი? თუმცა არა! აქ უთუოდ რაღაც კავშირი უნდა იყოს. ჩრნილოგარს ნამდვილად მოესმა საყვირის ხმა, მაგრამ ვითომც არ გაუგონიაო. რატომ წაუყრუა? ან მე რად დამიშალა წყნარ ბარში წასვლა? უცნაურია! ჰოდა, ახლა ყველაფერი გაირკვევა. ყველაფერი. ამ ნეკერჩხალას ამაყი სევდაც გასაგები გახდება“.

— კიდევ! — ეხვეწებოდა ბიჭი და ხელს იქნევდა.

მესამედ აუღერდა საყვირი.

„აბა რა სისულელეა! — თავი გაიქნია პეტერ მაიცენმა, რადგან ავმა წინათგრძნობამ კვლავ გაჰკრა გულში. — აბა რა არის ამაში გასაკვირი? პაპა შვილიშვილს საყვირზე დაკვრას ასწავლის, ჰოდა, შინაურებს რომ თავი არ გააბეზრონ, ვენახში წამოსულან. ეს არის და ეს!.. თუმცა არა, ასე არ არის! ეს რა უბედურება მჭირს, ყველაფერი მეეჭვება, ყველაფერს მნიშვნელობას ვაძლევ, ყველაფერს ერთმანეთთან ვაკავშირებ, ყველაფერი გაურკვეველად მეჩვენება! კმარა! დღეისთვის მეყოფა!.. ერთი-ორ სიტყვას ვეტყვი ბერიკაცს, ბიჭუნას წავეთამაშები, გონს მოვალ, დავმშვიდდები და მერე შინისკენ გავუყვები — მაგიდას მივუჯდები!“

— კიდევ! — არა ცხრებოდა ბიჭი.

— მე ხომ უკვე სამჯერ დავუკარი! — პაპამ ხელი ალერსით გადაუსვა ბიჭს ხუჭუჭა თავზე.

— კარგი, მაშ მარანში წავიდეთ და იქ ზღაპარი მიამბეთ, — თქვა ბიჭმა, საყვირი აიღო და წასასვლელად მიტრიალდა.

— დილა მშვიდობისა! — ხმამაღლა მიესალმა პეტერ მაიცენი და ხუმრობით დაუმატა: — ეს თქვენა ხართ, რომ უკრავთ?

ბერიკაცს და ბიჭს თითქოს არც გაჰკვირვებიათ უცნობი კაცის გამოჩენა.

— ჩვენა ვართ, — წყნარად დაუკრა კვერი ბერიკაცმა, — ჩვენ ვუკრავთ...

— კარგა ხანი კია უკრავთ! — ხუმრობით განაგრძობდა პეტერ მაიცენი.

— კარგა ხანია... — ნაღვლიანად ჩაიღიმა ბერიკაცმა, თითქოს თავს იმართლებდა. — კარგა ხანია. სამი დღეა უკვე...

— ნუთუ მართლა? — გაუკვირდა პეტერ მაიცენს, არ იცოდა, როგორ აეხსნა მისი პასუხი.

— სამი დღეა! — ამოიოხრა ბერიკაცმა. — რას იზამ... ერთ ჭიქას ხომ არ გადაჰკრავდით?

— სიამოვნებით. — დაეთანხმა პეტერ მაიცენი, ახლავდა იგრძნო, როგორ გაშრობოდა ყელი. — არც თქვენ გაწყენდათ, თუკი სამი დღეა უკრავთ! — ღიმილით დაუმატა მან.

— სამი დღეა, სამი დღე! — თავი დაუკანტურა ბერიკაცმა. — რას იზამ, ასეა და! აბა, ახლა წადი! — მიუბრუნდა იგი შვილიშვილს. — შიში ნურაფრისა გაქვს!..

— არც მეშინია არაფრის! — წყენით მიუგო ბიჭმა.

— რისა უნდა ეშინოდეს? — იკითხა პეტერ მაიცენმა. — მეც მაგოდენა ბიჭი მყავს.

— აი, ხომ ხედავ! — ბერიკაცმა გამამხნეველად მოუთათუნა მხარზე ხელი ბიჭს, — ეს ბატონიც მამა ყოფილა. ბიჭი ჰყოლია.

— გოგო არა გყავთ? — დაინტერესდა ბიჭუნა.

— გოგოც მყავს.

— ჩვენსავით, — დააკანტურა პაპამ თავი. — მხოლოდ შინ არაა ახლა! ბიძასთან გავუშვით. ჩვენ კი ვენახში წამოვედით... რას იზამ.

— დაკვრას ასწავლით ბიჭს?

ბერიკაცს ნაღვლიანად გაეღიმა.

— არა, — მიუგო მან და შვილიშვილს კვლავ ალერსით გადაუსვა თავზე ფართო ხელისგული. — მართალი რომ ვითხრათ, ეგ მასწავლის მე. ასეა... ბიჭი თვითონ უკრავს, პირდაპირ შეშლილია საყვირზე. ეს არის, სუნთქვა არ ჰყოფნის ჯერ. მაგრამ ეს თავისთავად მოვა. ასე არ არის, იანკეც?

— მაშ იანკეცი გქვია?

— იანკეცი გახლავთ, იანკეცი, — თქვა ბერიკაცმა და შვილიშვილი გულში ჩაიკრა. — იანკეც ბლაჟიჩი... მეც ბლაჟიჩი ვარ. რასაკვირველია, მოხუცი ბლაჟიჩი. შუათანა ბლაჟიჩი კი შინ არის. წევს...

— ავად არის?

— ავად არის, ავად!... რას იზამ, ასეა და!... აბა, მარანში წავიდეთ!

პეტერ მაიცენს უნდოდა გამომშვიდობებოდა პაპა-შვილიშვილს, მაგრამ უცებ რატომღაც შეეცოდა ბერიკაცი, უფრო კი ეს უდროოდ დადინჯებული და დაღონებული ბიჭუნა. უნდოდა შესაფერისი სიტყვა ეთქვა, მაგრამ ვერაფერი ვერ მოიგონა და ხელილა გაიწვდინა:

— აბა მაჩვენე ეგ შენი საყვირი!

— მამას საყვირია! — უარი სტკიცა იანკეცმა და პაპას შეხედა.

— აჩვენე, აჩვენე, არ შეჭამს ბატონი მაგ საყვირს!

პეტერ მაიცენმა საყვირი აიღო და ყურადღებით დააკვირდა, თუმცა საკრავებისა არა გაეგებოდა რა. იცოდა, რომ სასაცილო შესახედავი იყო, მაგრამ საყვირს მაინც არ უშვებდა ხელს — ასე ეგონა, რომ ამ საკრავში მართლაც ნაღველი იყო ჩაბუდებული და რომ სწორედ ამ საყვირის ხმა მოესმა ტემნიკარს.

— ძველია, ძველი!.. — ჩაილაპარაკა პაპამ.

— რას ეძახით?

— ფრთოსან ბუქს, — მაშინვე მიაგება პასუხი იანკეცმა.

— შორს ისმის მაგისი ხმა, შავ ხეგამდეც კი აღწევს! — თქვა პეტერ მაიცენმა და მოხუცს შეხედა.

— შავ ხეგამდეც ისმის? — შეჰყვირა იანკეცმა და საყვირს ხელი დასტაცა. — დაუკარით, პაპა!

— მერე რა საოცარი ეგ არის! — დინჯად მიუგო ბერიკაცმა, — საყვირი მაშ რისაა... ამიტომ აქვთ ჯარშიაც საყვირი... განკითხვის დღესაცო, ამბობენ, საყვირი დაუკრავსო...

— ოღონდაც თუ თქვენ დაუკრავთ, ჩრნილოგარი ვერ გაიგონებს, — მრავლისმეტყველად თქვა პეტერ მაიცენმა და გაიღიმა.

— რად ვერ გაიგონებს? — ჰკითხა ბიჭმა.

— დღესაც ვერ გაიგონა, — მიუბრუნდა პეტერ მაიცენი მოხუც ბლაჟიჩს, — და როცა მე ვუთხარი, გაოცდა.

მოხუც ბლაჟიჩს სულაც არ გაჰკვირვებია ეს.



— ალბათ მიეჩვია უკვე, — აუღელვებლად გააჭიანურა სიტყვა მან, — იცით, ყური ეჩვევა ხოლმე... ან კიდევ ჩრნილოგარს ცოტა ყურს დააკლდა, თუმცა არც ისე ხნიერია. რამდენის იქნება? ორმოცდაათისა. მეტის არა!.. რას იზამ... თანდათანობით ყველაფერი გაკლდება. ერთს უფრო ადრე, მეორეს — უფრო გვიან; ერთს ეს, მეორეს — ის. მე, მაგალითად, ჯერჯერობით არ მაკლია ყურს. ძალიან კარგად მესმის, ღვთის მადლით! თვალთ კი დამაკლდა... იანკეც, აბა გახედე, ფანჯარა თუ ისევ დაკეტილია...

— დაკეტილია, დაკეტილია! უკვე გავხედე, — მიუგო იანკეცმა და ხელში საყვირი შეაჩეჩა.

— ჩვენ იქ ვცხოვრობთ, აი იქ, — ბერიკაცი მიუბრუნდა პეტერ მაიცენს და საყვირი წითელსახურავიანი სახლისაკენ გაიშვირა.

— ლამაზი სახლია.

— სახლი?.. ლამაზია... რასაკვირველია, ლამაზია...

— როგორც ჩანს, გადაიწვა.

— გადაიწვა, რასაკვირველია, გადაიწვა... რას იზამ, ასე კი მოხდა და...

— ომის დროს გადაიწვა?

— ომის დროს, რასაკვირველია, ომის დროს... რას იზამ!...

— ბაბუ, დაუკარით!

— ახლავე...

— ჩქარა რა!

მოხუცმა ბლაჟიჩმა ტუჩებზე ენა მოისვა და საყვირი ასწია. მერე მკერდში ჰაერი ჩაიგუბა, მაგრამ საკრავში არ ჩაუბერავს. მიუბრუნდა პეტერ მაიცენს, თვალთ შვილიშვილზე მიანიშნა და ჩუმად ჩასჩურჩულა:

— ნუ გაბრაზდებით, ბატონო! ბავშვი მაინც ბავშვია!..

პეტერ მაიცენმა გაკვირვებით შეხედა, მაგრამ ბერიკაცს უკვე ტუჩზე მიედო საყვირი და თვალეზი მიელულა.

— დაუკარით! — ხმამაღლა ბრძანა იანკეცმა და ხელი აიქნია.

სიკვდილი კარს მომდგომია,
გათავდა ჩემი ამბავი...

ჟღერდა საყვირი.

„მართლა ასე ნაღვლიანად უკრავს, თუ მე მაწევს გულზე ნაღველი და მეჩვენება? — თავის თავს ჰკითხა პეტერ მაიცენმა. — კი, ბატონო, ჩემი გამოგონილი იყოს ყველაფერი! მხოლოდ ის კი ვერ გამიგია, რად უნდა გავბრაზდე ან რად უკრავენ პაპა და შვილიშვილი სამი დღე ზედიზედ? ან ფანჯარა რად უნდა იყოს დაკეტილი. ან იქნებ ეს ყველაფერი ამ ბერიკაცის ახირებაა? ვერ გამიგია. ვერაფერი ვერ გამიგია. მართლაც ასე მოხუცი და გამოყრუებულია ეს კაცი თუ გონება მისი ერთ აზრს დაუპყრია და წუთითაც ვერ ეთიშება? უცნაურია! ჩრნილოგარი დედაბერივით ყბედია და ცნობისმოყვარე, ამ ბერიკაცს კი არც აინტერესებს ახალმოსული კაცი — ვინ არის, საიდან მოვიდა ან რას აკეთებს ამ მიყრუებულ მხარეში“.

პეტერ მაიცენმა ირგვლივ მიმოიხედა. მზერა მორევზე შეაჩერა. ნეკერჩხალა უკვე იქ იყო. სარეცხს რეცხდა; ზეწარი დაასველა წყალში, დაგრიბა და თეთრ წანწალებს დასცხო. მერე უცებ წელში გასწორდა და მათკენ გამოიხე-



და. „მგონი, ყურს უგდებს საყვირს. ვინ იცის, რა მოგონებებს უღვიძებს ეს საკრავი სულში?“ — გაიფიქრა პეტერ მაიცენმა. ვერც ამ ქალის ამბავი გაიგო. თუმცა ან რა უნდა გაეგო? ქალი თუ ტყეში ხეს მიეკრა და მასთან ლაპარაკი არ მოისურვა, რა საოცარი ამბავი ეს არის?

„ღმერთმანი, ყველაზე საოცარი რამ დღეს ეს მოჩვენებებია!“ პეტერ მაიცენმა ცას ახედა და კვლავ თეთრი ღრუბელი შეამჩნია. ისე გაუხარდა მისი დანახვა, კინალამ ხმამაღლა მიესალმა. საყვირის ხმა თანდათან ყრუდ და ყრუდ ისმოდა. ხმა ნაღვლიანი იყო, მაგრამ ალერსიანი ჰანგიც ისმოდა შიგადაშიგ. კაცმა რომ თქვას, ღრუბელსაც ჩემმა ფანტაზიამ შეასხა აზრი, — ჩაიცინა პეტერ მაიცენმა, — ეს მიხარია კიდევ. რის იმედს მაძლევს იგი? რომ მუშაობას შევუდგები? რასაკვირველია, იგი მიბრძანებს, შინ წავიდე და მაგიდას მივუჭდე. მეც ავდგები და წავალ. ახლავე წავალ. მხოლოდ ერთს შევიხედავ მარანში და ნახვამდისაც ვეტყვი ამათ“.

— კიდევ! — თქვა იანკეცმა.

— მე ხომ უკვე სამჯერ დავუკარი, — ალერსიანად უთხრა პაპამ და საყვირი ისევ ბიჭს მიაწოდა.

ისინი ქვემოთ დაეშვნენ, ვენახისაკენ. მოხუცი ბლაჟიჩი რამდენჯერმე შეჩერდა, აქ ლერწი პალოზე მიამაგრა, იქ ხელისგულზე აწონა მტევანი. იანკეცი ფრთხილად მიდიოდა, საყვირი მაგრად ჩაებლუჯა. პეტერ მაიცენი წყნარ ბარს გადასცქეროდა და მორევზე უშტერდებოდა თვალი, სადაც დიდი ყვავილივით ირხეოდა ნეკერჩხალა.

— რა მშვენიერი ხეობაა! — თქვა მან.

— აჰ, ხეობა? — ჩაფიქრებით შეუბრუნა კითხვა ბერიკაცმა: — მშვენიერი ხეობაა. რასაკვირველია, მშვენიერი ხეობაა...

— ირგვლივ სიწყნარეა, ყველაფერი კრიალებს, ყველაფერი ლამაზია: ველი, მდინარე, მორევი, და ეს ტოტებგაშლილი რცხილაც.

— აჰ, რცხილა?.. რცხილაც ლამაზია, რასაკვირველია, ლამაზი რცხილაა...

— გოგოც გვარიანია! — ანცად თქვა პეტერ მაიცენმა და გაიღიმა.

— აჰ, გოგო! — ისევ ისე ჩაფიქრებით წაილაპარაკა მოხუცმა ბლაჟიჩმა, თუმცა ირგვლივ არც მიუხედ-მოუხედილა. — გოგოც გვარიანია, რასაკვირველია, გვარიანია.

„ეს ბერიკაცი ჭკუაზე ვერ არის, — გაიფიქრა პეტერ მაიცენმა, — ეტყობა, უკვე დაავიწყდა, გადაგაკვრევინებო, რომ დამპირდა. იქნებ გამოვემშვიდობო ამათ?“

მაგრამ სანამ სათქმელს მოიფიქრებდა, სახლსაც მიუახლოვდნენ.

— ოჰო, ეს ხომ ჩემი მარანია! — განგებ მხიარულად წამოიწყო პეტერ მაიცენმა, — ამ ცოტა ხნის წინ ხეობიდან გამოვეცქეროდი. ალერსიანად მიდი-მოდა ამ ფერდობიდან.

— ალერსიანად, ალერსიანად... — თავს აკანტურებდა მოხუცი ბლაჟიჩი. იგი კედლის ნაბზარში აფათურებდა ხელს და თან ჩუმად ღიღინებდა თავისთვის:

სიკვდილი კარს მომდგომია,
გათავდა ჩემი ამბავი...

- გასაღებს ეძებთ? — ჰკითხა პეტერ მაიციენმა.
- გასაღებს, რასაკვირველია, გასაღებს...
- გასაღები ხომ კარშია...
- აჰ, კარშია?.. ჰო, აკი თავად დავტოვე კარში! — ღრმად ამოიოხრა ბერიკაცმა და თავი გააქნია, — რას იზამ კაცი!..

მან ნელა გააღო რკინით აჭედელი მძიმე, ჩაქანგული კარი. კარმა გაიჭრიალა. მარნიდან ღვინისა და ობის სუნით გაჟღერებულმა საამო სიგრილემ მოჰბერა.

პეტერ მაიციენი ზღურბლზე ჩამოჯდა.

— აქეთ მოდით! აქეთ! — ეპატიჟებოდა ბერიკაცი. მოშორებით ორი სამფეხა დაბალი ტაბურეტი იდგა, — აი ამაზე დაბრძანდით, ეს კი ჩემია, აქა ვზივარ ხოლმე, იანკეცი კი ზღურბლზე დაჯდება. ასეა ხომ, იანკეცი? — ალერსიანად მიუბრუნდა პაპა ბიჭუნას, მივიდა და კვლავ გადაუსვა ხუჭუჭა თმაზე ხელი. — ასე ვზივართ აქ: მე კუთხეში, იანკეცი ზღურბლზე, სახლს რომ ვხედავდეთ. მე თვალს მაკლია... თუმცა ხომ გითხარით უკვე! რას იზამ... აბა, იანკეცი. გახედე, ფანჯარა დაკეტილია?

იანკეცმა სახლს გახედა და ნაღვლიანი ხმით უთხრა:

— დაკეტილია, დაკეტილია.

— დაკეტილია, დაკეტილია... — ჩაიბურტყუნა მოხუცმა ბლახიჩმა. მერე აიღო ტუჩდაკბილული მაიოლიკის დოქი და ნელა მივიდა ღვინის კასრთან. მერე ხელი მძიმედ დაჰკრა კასრს და საცობი ამოაგდო. შემდეგ სუნთქვა შეიქრა და ამოწრუპა ღვინო კასრიდან. ღვინო დოქში ჩაჩხრიალდა, მოხუცმა კი ხმადაბლა გააბა:

სიკვდილი კარს მომდგომია,
გათავდა ჩემი ამბავი...

იანკეცი ზღურბლზე იჯდა, საყვირი მუხლებზე ედო.

- მაშ მამაშენმა საყვირის დაკვრა იცის? — ჰკითხა პეტერ მაიციენმა.
- მამამ იცის. მხოლოდ ახლა არ უკრავს, — მიუგო ბიჭუნამ.
- რადა მერე?
- იმიტომ, რომ სუნთქვა აღარ ჰყოფნის.
- ასე მძიმედაა ავად?
- მძიმედ, მძიმედ, — მოისნა სიბნელიდან მოხუცის ხმა, — რას იზამ კაცი!..
- მაგრამ ხომ მორჩება, — თქვა პეტერ მაიციენმა.
- არა, არ მორჩება! — თავი გაიქნია იანკეცმა.
- ვინ გითხრა?
- თავად მითხრა.
- რა სჭირს ასეთი? — მიუბრუნდა მოხუცს პეტერ მაიციენი.
- ჭლექი სჭირს, ჭლექი!..
- ახლა ჭლექი აღარ არის მოუჩინელი.
- არჩენენ? — მიაძახა იანკეცმა.
- რასაკვირველია, არჩენენ.
- თქვენ იყავით ავად ჭლექით?

— არა, არ ვყოფილვარ.

— არ ყოფილხართ? — გააჭიანურა სიტყვა ბიჭმა და ყველგან შეხედდა, თითქოს უნდოდა ეთქვა: „მაშ რაღას ამბობთ?“

— ეჰ, რას იზამ კაცი, ასე კია და!.. — კვლავ თქვა ბერიკაცმა. ღვინის ლიკლიკი შეწყდა. მოხუცმა ბლაჟიჩმა დოქზე მიაკაკუნა და ჩაიბურტყუნა: — ახლა კი გვეყოფა!.. რამდენსაც დაასხამ, იმდენი დაილევა...

მან ხმაურით დააცო საცობი და აუჩქარებლად დაბრუნდა თავის ადგილზე. მერე აიღო ჭუჭყიანი ჭიქა, თითი ამოუსვა, სული შეუბერა, შარვალზე შეიწმინდა, პეტერ მაიცენს წინ დაუდგა და დაუსხა. ღვინო წყალ-წყალა სისხლისფერი იყო და მდორედ მოლიკლიკებდა.

— დალიეთ!

პეტერ მაიცენმა დალია და ჭიქა გვერდზე გადადო.

— მუავეა. რას იზამ კაცი, თუკი მზე აკლია!.. — თქვა მოხუცმა და ტაბურეტზე დაჯდა. ჩუმად დაისხა თავისთვის და დალია. ხელი უკანკალებდა, ღვინის წითელი ნაკადი გაჯაგრულ ნიკაპზე ჩამოედვარა. დაცლილი ჭიქა პეტერ მაიცენს დაუდგა წინ, თავად კი დაჯდა, იდაყვები მუხლებს დააყრდნო და სივრცეს მიაშტერდა.

მძიმე სიჩუმე ჩამოწვა. პეტერ მაიცენმა აღარ იცოდა, რა ეთქვა, და ისევ ბიჭუნას მიუბრუნდა.

— მამა მხრებზე შეგისვამს ხოლმე?

— არა, — გაიქნია ბიჭმა თავი, — კარგა ხანია, არა.

— დედა?

— დედა შინ არ არის.

— არ არის შინ დედა, არ არის... — ჩაიბურტყუნა ბერიკაცმა.

— დიდი ხანია, რაც არ არის! — ამოიოხრა ბიჭმა.

— დიდი ხანია არ არის, დიდი ხანია! — ამოიოხრა პაპამაც. — რას იზამ კაცი. ასე კია და!..

— მერე სად წავიდა? — იკითხა პეტერ მაიცენმა.

— წავიდა... წავიდა... — ბლაჟიჩმა ხელები გაშალა. — რას იზამ კაცი, წავიდა.. დალიეთ!..

კვლავ სიჩუმე ჩამოვარდა. პეტერ მაიცენს ისევ ნაღველი მოაწვა გულზე.

— ვაჟი ერთის მეტი არა გყავთ?

— რაო, ვაჟი?.. ოთხი მყავდა, ოთხი! — თავს აკანტურებდა ბერიკაცი. — სამი უკვე აღარა მყავს!..


— დაიღუპნენ?..

— დაიღუპნენ, დაიღუპნენ! რას იზამ კაცი, ასე კია და!..

— არა, არ არის მასე! — თქვა უცებ ბიჭმა, — ცეცხლში დაიწვინენ.

— ცეცხლში დაიწვინენ, ცეცხლში! — ამოიოხრა ბერიკაცმა და ჭიქა აავსო. — რას იზამ!.. დალიეთ!..

პეტერ მაიცენმა დალია და დაელოდა, ვიდრე ბერიკაციც დალევიდა. ეგონა, მოხუცი ბლაჟიჩი წვრილად მომიყვება თავისი ვაჟების ამბავსო, მაგრამ იგი ხმას არ იღებდა.



— როდის მოხდა ეგ ამბავი? — იკითხა პეტერ მაიცენმა, — როდესაც სახლი გადაწვეს?

— მაშინ, მაშინ...

— როგორ მოხდა?

— როგორ? ბიჭები შინ მოვიდნენ, მათ კი ალყა შემოარტყეს. არ დანებდნენ ბიჭები და ამიტომაც გადაწვეს სახლი... თუმცა მე საიდან მეცოდინება? მე მანამდე დამიჭირეს. როგორც კი ბიჭებმა ტყეს შეაფარეს თავი, მაშინვე რაბში¹ გამგზავნეს. დედა მარტო დარჩა შინ.

— ბებიაც დაიწვა, — დაუმატა იანკეცმა.

— ბებიაც, ბებიაც!.. — ამოიოხრა ბერიკაცმა — რას იზამ კაცი, ასეა კია და! დალიეთ!

— როდის მოხდა ეგ? რომელ წელს? — ცოტა იყუჩა და შემდეგ ჰკითხა პეტერ მაიცენმა.

— რომელ წელს? ორმოცდასამში. შობის წინადღეს.

— შობის წინადღეს! — აღმოხდა პეტერ მაიცენს.

— დიახ, სწორედ შობის წინადღეს... ბიჭები დედის სანახავად მოვიდნენ შინ. იფიქრეს, კუჭსაც გამოვიძღობთ და გავთბებით ცოტასო. თავად იცით, შენი სახლი მაინც შენი სახლია და დედასაც მუდამ გემრიელი სასუსნავი აქვს გადამალული... ჰოდა, ალყა შემოარტყეს და სახლი გადაწვეს... ასე დაიღუპა დედა თავისი სამი ვაჟით... ის კი, ახლა რომ ავადმყოფი წევს, ყველაზე უმცროსი ბიჭი, არ იყო მათთან. მეკავშირე გახლდათ და სადღაც ზღვისპირეთში იყო წასული... ჰოდა, ახლა მისი აღსასრულიც დადგა! — წყნარად ამოიოხრა მოხუცმა. მერე პეტერ მაიცენისაკენ დაიხარა და ძლივს გასაგონად ჩაუჩურჩულა: — სულს ლევს... სულს... — ხელი მოისვა პირისახეზე და ჩვეულებრივი კილოთი წარმოთქვა: — აბა, იანკეც, გახედე, ისევ დაკეტილია თუ არა ფანჯარა?

— დაკეტილია, — მიუგო ბიჭმა.

— დაკეტილია... — ბურტყუნებდა მოხუცი ბლაჟიჩი და ჭიქას უვსებდა პეტერ მაიცენს. — დალიეთ!.. რას იზამ კაცი!.. — მერე მაიოლიკის დოქი აიღო და ისევ კასრს მიადგა. ისევ გაისმა ყრუ დარტყმა და ამოვარდა საცობი, ისევ აჩხრიალდა ღვინო, ისევ მიუკაკუნა ბერიკაცმა დოქს და თავისთვის ჩაილაპარაკა: — აბა, რამდენსაც დაასხამ კაცი, იმდენი დაილევა! — მერე ისევ ხმადაბლა დაამღერა:

სიკვდილი კარს მომდგომია,
გათავდა ჩემი ამბავი...

პეტერ მაიცენმა გადაწყვიტა ამდგარიყო და წასულიყო, თუმცა გრძნობდა, რომ უხერხული იყო ახლა წასვლა.

— კარგად იყავით, დროა შინ წავიდე, — თქვა მან და წამოდგა.

— საით მიგეჩქარებათ? — უთხრა თითქმის შეშინებულმა ბერიკაცმა და დოქით ხელში მივიდა მასთან. — აკი თქვით, დასასვენებლად ვარო ჩამოსული?

¹ საკონცენტრაციო ბანაკი კუნ. რაბზე, სადაც ოკუპანტები ამწყვდევდნენ სამოქალაქო მოსახლეობისაგან წამოყვანილ მძევლებს.

— მართლაც ასე ვთქვი. მაგრამ დასვენება დასვენებაა და სამუშაო კი მაინც მაქვს.

— გასაგებია, ყოველ კაცს აქვს თავისი სამუშაო, ყოველ კაცს, — დაუკანტურა ბერიკაცმა თავი, თან ღვინოს უსხამდა. — ყოველმა კაცმა უნდა იმუშაოს, სიკვდილამდე უნდა იშრომოს... რას აკეთებთ, თუ არ გამიწყრებით, გკითხვით?

— ცოტ-ცოტას ვწერ.

— აჰ, წერთ? მაშ, ასე ვთქვათ, თქვენც თქვენი საწერი გაქვთ?.. მოხელე იქნებით ალბათ, არა? — ეკითხებოდა ბერიკაცი, თუმცა დიდი ცნობისმოყვარეობა არ ეტყობოდა. როგორც ჩანს, უფრო იმიტომ ლაპარაკობდა, რომ სტუმარი შეეჩერებინა. — ჰო, ახლა ყველა წერს... რას იზამ კაცი... დალიეთ!

— გმადლობთ, გმადლობთ! ყელი ჩავისველე უკვე.

— ჰოდა, ცოტა კიდევ დალიეთ! და დაბრძანდით!.. იანკეც, შენც სთხოვე სტუმარს.

— დაბრძანდით, — უხალისოდ უთხრა ბიჭმა.

— აი, ხომ ხედავთ. დაბრძანდით, რა! — გაიმეორა ბერიკაცმა.

პეტერ მაიცენი დაჯდა, მაგრამ ვერ მოისვენა, კვლავ ადგა და ბიჭთან მივიდა.

— გინდა გაგასეირნო?

— მინდა, — მიუგო ბიჭმა უხალისოდ.

— როგორ გასეირნებდა მამაშენი? მხრებზე შეგისვამდა ხოლმე?

— მხრებზედაც მისვამდა.

პეტერ მაიცენმა მხრებზე შეისვა ბიჭი, რამდენჯერმე აატარ-ჩამოატარა მარნის წინ, მერე კი ბილიკს ჩაუყვავა ქვემოთ. მაგრამ იანკეცმა შეაჩერა:

— დავბრუნდეთ უკან. ბიცოლა მოდის.

პეტერ მაიცენმა მოიხედა და დაინახა ის შავებიანი ქალი, წელან რომ მორევთან ნეკერჩხალას ემასლაათებოდა.

— რა ჰქვია ბიცოლაშენს? — ჰკითხა მან ბიჭს.

— მინკა ბიცოლა.

— აგერ, სარეცხს რომ რეცხავს, იმ დეიდას რაღა ჰქვია?

— ზმაგა დეიდა.

— ისიც შენი დეიდაა?

— არა, — მოუჭრა ბიჭმა, — დავბრუნდეთ უკან!

ქალი მოახლოვდა. მარცხენა ხელში კალათი ეჭირა, მარჯვენაში — პატარა კასრი.

— სად ასულხარ, იანკეც? — შორიდან დაუყვირა ქალმა.

— ამ ბატონს ვეთამაშები.

— თქვენ საიდან მოხვედით? — ჰკითხა ქალმა პეტერ მაიცენს, როცა ის მოახლოვდა. — შავი ხევიდან ხომ არა?

— როგორ მიხვდით? — გაუკვირდა პეტერ მაიცენს.

— ისე, ყური მოვკარი... გმადლობთ, რომ გაართეთ ეს ჩვენი საცოდავი ბიჭი!

— მამას სძინავს? — ჰკითხა იანკეცმა.

— სძინავს! — წყნარად მიუგო ქალმა, გატრიალდა და მარანში შევიდა.

პეტერ მაიცენმა ბილიკზე გაიარ-გამოიარა და უკან დაბრუნდა.



მარნის კართან საუბარს მოჰკრა ყური.

— მოხელეა-მეთქი, მოხელე, — ამბობდა მოხუცი ბლაცინი.

— რა მოხელე, რის მოხელე, — არ ეთანხმებოდა ქალი, — ისტორიებს წერს.

— აჰ, ისტორიებს წერს?

— წერს. ჩვენების ამბავსაც დაწერდა, რომ იცოდეს! — ამოიოხრა ქალმა.

— მერე რა დასაწერი ეგ არის? — თქვა ბერიკაცმა. — სამი ბიჭი დედის სანახავად მოვიდა შინ, ალყა შემოარტყეს და დედიანად გამობუგეს სახლში. საშინელი ამბავია, რა ისტორია ეგ არის.

— მაშ, თქვენი ფიქრით, რას ეძახიან ისტორიას?

— ისტორია... ისტორია... ისტორია დიდ საქმეებს ასახავს!

პეტერ მაიცენმა ბიჭი ძირს ჩამოსვა. იანკეცმა ხელი ჩაჰკიდა, მარანში შეიყვანა და ხელში ჭიქა ჩასჩარა.

— მამა გასეირნების მერე მუდამ ღვინოს სვამს ხოლმე, — აუხსნა ბიჭმა, — თქვენც ქშენა აგივარდათ იმასავით.

— დალიეთ, დალიეთ, თქვენი ჭირიმე!.. მყავე კია, რას იზამ კაცი! — მიატანა ბერიკაცმაც.

ქალმა იანკეცი საფეხურზე დასვა და მუხლებზე თეფშით ერბოკვერცხი დაუდო.

— მამამაც ჭამა ერბოკვერცხი? — ჰკითხა ბიჭმა.

— ჭამა, ჭამა, — თავი დაუქნია ქალმა და თავზე ხელი გადაუსვა. — ჭამე, გენაცვალე! — ქალი მიტრიალდა, წინსაფრით თვალეზი მოიმშრალა და პეტერ მაიცენტან მივიდა. — ახლა ახალ ისტორიას წერთ?

— ვწერ... ნელ-ნელა...

— იცით, ქალაქში რომ ვმსახურობდი, ბევრს ვკითხულობდი. ახლა კი კარგა ხანია არაფერი წამიკითხავს. ვერ ვიცლი. ან რა უნდა წავიკითხო! თუ ლამაზადაა დაწერილი — მაშასადამე, სიმართლე არ სწერია, ხოლო ცუდად დაწერილის წაკითხვა... არ მიყვარს! გარდა ამისა, წიგნი მაინც ახალგაზრდებისათვის არის. ახალგაზრდა ყველაფერს კითხულობს — კარგსაც და ცუდსაც, ყველაფერი აინტერესებს. ხოლო ასაკში რომ შევა კაცი... ეჰ, რა გითხრათ, ყველას თავისი ისტორია აქვს და რაღა დაბეჭდილი იკითხოს!...

— სწორია, ყველას თავისი ისტორია აქვს, — დაეთანხმა პეტერ მაიცენი.

— რა თქმა უნდა. შეიძლება ისიც კი ითქვას, რომ კაცი იმითომ ცხოვრობს ამქვეყნად, თავისი ისტორია გამოიაროს.

— ეჰ, რას იზამ კაცი! — ამოიოხრა ბერიკაცმა. — იჩქარე შენ, იჩქარე. ავადმყოფს მარტო ნუ დატოვებ.

ქალი დიდ კასრთან მივიდა და მიუკაკუნა.

— თავდება, თავდება! — შენიშნა მან. — მესაფლავეებს კი წყურვილს ვერ მოუკლავს კაცი.

— რამდენსაც დაასხამ, იმდენი დაილევა... — ამოიოხრა მოხუცმა ბლაცინიმ და ხელისგული შუბლზე მოისვა.

ქალმა პატარა კასრში ჩამოწრიტა ღვინო და კალათს ხელი წამოავლო.

— ესეც ასე. ახლა წავალ.

— მეც შინ წამოვალ, — განაცხადა იანკეცმა.



— რა გინდა შინ? — ალერსიანად ჰკითხა ბიცოლამ და თავზე ხელი გა-
დაუსვა.

— მეც უნდა ავიქარდე, — თქვა პეტერ მაიცენმა და წამოდგა.

— რა გეჩქარებათ! — შესძახა ბერიკაცმა და სტუმარს ხელი ჩაავლო. —
დარჩით!.. იანკეც, სთხოვე ბატონს, დარჩეს.

— დარჩით! — სთხოვა ქალმაც. — ნუ დატოვებთ ამათ მარტო.

ქალი წავიდა. სიხუმე გამეფდა. მარანში, თითქოს უფრო და უფრო რომ
ვიწროვდებოდა, აშკარად ჩამოწვა ნაღველი. იანკეცი გაუნძრევლად იჯდა
ზღურბლზე, მოხუცი ბლაჟიჩი სივრცეს მიშტერებოდა და ისე მღეროდა:

სიკვდილი კარს მომდგომია,
გათავდა ჩემი ამბავი...

„რალაც უნდა ვთქვა, — აწამებდა ეს ფიქრი პეტერ მაიცენს. — მაგრამ რა
უნდა ვთქვა, რა?“ ვერა და ვერ შეერჩია სათქმელი! სამაგიეროდ მისთვის ასე
კარგად ნაცნობი საკუთარი უძღურების გრძნობა დაეუფლა. შესცქეროდა ბლა-
ჟიჩს, იანკეცს, და გულდამძიმებული ფიქრობდა, რომ თავადაც ახლა ისევე
უმწეო იყო, როგორც პაპა და შვილიშვილი.

პეტერ მაიცენმა ჯიბეში სიგარეტები და ასანთი მოიძებნა. „ჰოდა, ერთად-
ერთი, რაც ასეთ დროს შემიძლია გავაკეთო — ეს არის!“ — მწარედ გამოუტყ-
და თავის თავს და რაც ძალა და დონე ჰქონდა ასანთის ღერი კოლოფზე გაჰ-
კრა.

ბერიკაცი შეკრთა და შეხვდა. წამით, ეტყობა, ვერც იცნო სტუმარი, მაგ-
რამ უცებ ფონს მოეგო, ნაღვლიანად გაიღიმა და ჭიქა შეუვსო.


— დალიეთ!.. დალიეთ!.. რას იზამ კაცი!..

პეტერ მაიცენმა ჭიქა აიღო და სულმოუთქმელად დალია. მერე ჭიქა ხელ-
ში გააჩერა და ჩახედა — თითქოს ვარდისფერ ნაღველში ეძებდა სიმხნევესა და
სიმშვიდეს.

— დიახ, ყველას უნდა სიცოცხლე, — წაილაპარაკა ბერიკაცმა. — ყველას
უნდა, ყველას! და ყველა კი კვდება. ყველა! რას იზამ კაცი, ასე კია და.

სიკვდილი კარს მომდგომია,
გათავდა ჩემი ამბავი...

„ნეტავ იმ ქალს მეც გავყოლოდი!“ — უთხრა თავის თავს პეტერ მაიცენ-
მა, მაგრამ იმწამსვე გაიფიქრა, რომ ახლა არ შეიძლებოდა წასულიყო, ის კი
არა და, არც უნდა ეფიქრა წასვლაზე. „მაგრამ რა უნდა ვაკეთო აქ? რა ვუ-
თხრა ამ ბერიკაცსა და ბიჭს? იქნებ არც ისე ცუდადაა საქმე. გავყოლოდი იმ
ქალს, მეტყოდა, რა ჭირს მართლა და მართლა ახალგაზრდა ბლაჟიჩს... ის
გოგოც შემოგვხვდებოდა გზაზე. გზა ხომ მორევს ჩაუვლის. აი მაშინ კი გა-
მომელაპარაკებოდა ალბათ. თუ საიდუმლოა რამე, ის ქალი მეტყოდა. ან რა
საიდუმლო უნდა იყოს? ან თუკი არის, ყველაფერში მე ხომ არ უნდა ჩავყო-
ცხვირი? განა დღეს საკმარისად არ გავიგე საიდუმლოებანი? განა ცოტა მაქვს
საფიქრალი ტემნიკარზე? საკმარისზე მეტი! მან მძლია და დამაშინა.“



მოხუცმა ბლაჟიჩმა ხმაურით დაუცო საცობი. პეტერ მაიცენმა დასველებული, თითქოს ეს ხმა მისი აზრების დასტური იყო.

ბერიკაცმა სიბნელიდან გამოხედა, ნელა დაჯდა თავის ტაბურეტზე და ჭიქა ღვინით შეავსო.

— დალიეთ!

— კმარა, მეყოფა!

— ალბათ შინ წასვლა გინდათ? რასაკვირველია, თუ სამუშაო გელით და საჩქარო საქმე გაქვთ...

— არა, არა, არსად არ მეჩქარება! — შეაწყვეტინა პეტერ მაიცენმა და თავადვე გაუკვირდა, ეს რა ვთქვიო.

„ღმერთმანი, აქ ზედმეტი ვარ. წავალ!“ მტკიცედ გადაწყვიტა მან, მაგრამ ფეხი ვერ მოიცივალა.

— დაუკარით, ბაბუ! — სთხოვა ბიჭმა და პაპას საყვირი გაუწოდა.

— ახლა? — ჰკითხა მოხუცმა და თავზე ხელი გადაუსვა.

— სული ხომ მოითქვი უკვე?

— მოვითქვი, — თავი დაუქნია ბერიკაცმა და საყვირი გამოართვა. — ფანჯარას თუ გახედე? ისევ დაკეტილია?

— დაკეტილია.

— დაკეტილია, რასაკვირველია, დაკეტილია, — მორჩილად წარმოთქვა ბერიკაცმა, — ბიცოლაშენი ხომ ჯერ შინ არ მისულა.

— ჯერ არ მისულა, დეიდა ზმაგას ელაპარაკება, — მშვიდად მიუგო იანკეცმა და ხეობისაკენ გაიშვირა ხელი.

— ობოლ გოგოს, — ამოიოხრა ბერიკაცმა.

— დეიდა არ არის ობოლი! — არ დაეთანხმა ბიჭი. — დიდებს ხომ არა ჰყავთ დედ-მამა, მხოლოდ ბავშვები ობლდებიან. მეც ობოლი ვიქნები, მამა რომ მომიკვდება.

— არა, არა! — აფუსფუსდა ბერიკაცი და ისევ ბიჭთან მივიდა. — მე ვთქვი, რომ დეიდა ზმაგაა-მეთქი ობოლი.

— ზმაგა? მერე ის ხომ დიდია! — არ დაეთანხმა ბიჭი.

— დიდია? რასაკვირველია, დიდია. მაგრამ დიდებიც არიან ხოლმე ობლდები. ზოგი კი მთელი სიცოცხლე ობოლია.

— მე არ მინდა დავობლდე დიდობაში! — განაცხადა იანკეცმა.

— რა თქმა უნდა, შენ არ იქნები ობოლი! — დაეთანხმა პაპა.

— რომ გავიზრდები, ჭაბუკი ვიქნები.

— რასაკვირველია, ჭაბუკი იქნები. დიდი ჭაბუკი. კარგი ჭაბუკი!

— ხოლო ომი თუ იქნება, პარტიზანად არ წავალ, — დინჯად თქვა ბიჭმა.

— ო...ო...ო! — გააჭიანურა სიტყვა ბერიკაცმა. — შენ ხომ მუდამ ამბობდი, პარტიზანი გავხდებიო.

— გავხდებოდი კიდევც, — დინჯად მსჯელობდა ბიჭი, — მაგრამ არ მინდა, ჩემი შვილები დავაობლო.

— ოჰ, — ჩაიფშლუკუნა ბერიკაცმა და თავი გააკანტურა. — მაშ ნეტა სად წახვალ, ჩემო ბიჭო? ახლანდელ ომს ვერსად დაემალეები კაცი. ყველგან მოგაგნებს, ყველგან! შინ მოგაკითხავს.

იანკეცი პაპას თვალებგაფართოებული მიშტერებოდა.

— რას იზამ კაცი! — ამოიოხრა ბერიკაცმა. — ხომ ხედავ, ისა სჯობს, სულ არ გყავდეს შვილი.

იანკეცმა ნერწყვი გადაყლაბა და განცვიფრებით იკითხა:

— ჰო, მაგრამ ხომ ყველას ჰყავს შვილები, ასე არ არის?

— რასაკვირველია, ყველას ჰყავს და მუდამაც ეყოლებათ, მაღლობა ღმერთს! მხოლოდ ომი აღარ უნდა იყოს მეტად.

ბიჭი გაოცებული მისჩერებოდა პაპას, თვალბზე ეტყობოდა, არ სჯეროდა მისი.

— დაუკარით, ბაბუ! — კვლავ სთხოვა მან.

ბერიკაცი წაბარბაცდა.

— ახლავე, — თავი დაუკანტურა და ბავშვს მხარზე დაადო ხელი. — რასაკვირველია, დავუკრავ.

— აბა, მიდით! — ბიჭმა მოუთმენლად აიქნია ხელი.

მოხუცი ბლახიჩი ნელა გატრიალდა და ოხვრით დაეშვა ტაბურეტზე. ისე დახედა საყვირს, თითქოს პირველად სჯეროდეს ხელში, ხელისგულით გადაწმინდა სატუჩე და სქელ, ჩალურჯებულ ტუჩებზე ენა მოისვა. მერე მთელი ძვერდით ჩაისუნთქა და ასწია საკრავი, მაგრამ აღარ ჩაუბერავს, პეტერ მაიცენისაკენ დაიხარა და ჩურჩულით გაუმეორა:


— ნუ გაჯავრდებით, ბატონო. ბავშვი მაინც ბავშვია!

— რასაკვირველია, რასაკვირველია! — მყის მიაგება პეტერ მაიცენმა, მაგრამ თავისი ნაჩქარევი და უადგილო პასუხისა შერცხვა და სისხლმა აასხა თავში. „ნეტა რა მემართება დღეს? — ბრაზით ჰკითხა თავს. — რატომ წესიერად ვერ მილაპარაკნია ამ ბერიკაცთან? რატომ არის, რომ ერთი ტკბილი სიტყვა ვერ მითქვამს ბავშვისათვის? ნუთუ მთლად წარმეკვეთა სასო!“

ბერიკაცი წელში გასწორდა, კეფა ძველი წნეხის ფუტურო ბოძს მიაცრდნო, თვალები დახუჭა, სუნთქვა შეიკრა და საყვირი აჟღერდა.

პეტერ მაიცენი თვალს არ აშორებდა ძველ საყვირს, ნახევრადბნელ მარანში უცნაურად აციალებულს. მისი ხმები კედლებს ეხლებოდა, უკან ბრუნდებოდა, ერთმანეთს ეჯახებოდა და დაფლეთილ ნახმევად წყდებოდა. ამ ნახმევს კი ახალ-ახალი ხმები შეუბრალებლად ალურსმავდა მიწურ იატაკს.

„ეს სიკვდილია! — შეაცახცახა პეტერ მაიცენს. — არა, უბრალო დამთხვევაა მხოლოდ, — შეეცადა დაემშვიდებინა თავი, — მაგრამ უბრალო დამთხვევაც რომ იყოს, მაინც მეტად უცნაურია! მე ხომ სწორედ მაშინ მომესმა საყვირის ხმა, როცა შთაგონებამ გამიარა და პირველად ამიტანა ეჭვმა და სასო-წარკვეთილებამ. ისე შემძრა კაცი, იძულებული გავხდი შინიდან გამოვსულიყავი. თავისკენ მიმიხმომ. რატომ? იმიტომ, რომ ჩრნილოგარს არ სურდა მისი გაგონება. რასაკვირველია, ჩრნილოგარმა მაიძულა წყნარ ბარში წამოსვლა! ახლა რაც არის, არის. პირველად ყველაფერი კარგად მიდიოდა, თითქოს შემეშველა საქმეშიც: საყვირმა ფიქრით ტემნიკართან წამიყვანა და გამიხარდა კიდევ. მაგრამ ტემნიკარი გამონაგონია, აქ კი სიმართლეა, ცხოვრებაა. არა, აქ ისტორია კი არ არის, როგორც მოხუცი ბლახიჩი იტყობდა. მისთვის ყოველივე, რასაც მოესწრო და რისი გადატანაც მოუხდა, საშინელი ამბავია და არა გამოგონილი ისტორია. ტემნიკარზედაც ასე იტყობდა, ეს საშინელი ამბავია და არა გამოგონილი ისტორიაო. ღმერთო ჩემო, იქნება არ არის გამოგონილი



ისტორია? განა ის შემადრწუნებელი ამბები, ადამიანი რომ სჩადის, არ შეიძლება გამოგონების საგნად იქცეს, თუკი ადამიანმა და კაცობრიობამ ჯერ მარიტად დაიწყეს ისეთი საქმეების ჩადენა, კალამსაც რომ არ ძალუძს აღწერა? ნუთუ ტემნიკარმაც გადალახა ის მიჯნა? თუ ასეა, მაშ ისიც იმ საყვირს დადევნებია, მე რომ შინიდან გამომიტყუა, რათა ჩემთვის აქამდე უნახავი საზარელი სურათები ეჩვენებინა“.

საყვირი დადუმდა. უკანასკნელი ხმები თანდათანობით მიწყდა მთრთოლვარე ნახმევად.

პეტერ მაიცენის წინ კვლავ ბერიკაცი და ბიჭი ისხდნენ.

კვლავ გული დაუსერა იმის ფიქრმა, ერთმანეთში მერევა მწარე სინამდვილე, ჩემი ფანტაზიის მწარე სამყარო და საკუთარი გამწარებაო.

ბიჭმა ფრთხილად გამოართვა ბერიკაცს საყვირი.

— ახლა კი ზღაპარი მომიყევით.

— ზღაპარი? — ჩაიხრიწინა პაპამ და ჭიქა დასცალა. — ჰო, რასაკვირველია.

— იცით კი, რა ზღაპარს მიაშობთ?

— ჯერ არა, — თავი დააკანტურა ბერიკაცმა და ხელი შუბლზე მიიღო, —

ან იქნებ ბატონმა გვიამბოს ზღაპარი?

— არა, მე ერთი ზღაპარიც არ ვიცი, — დაიბნა პეტერ მაიცენი.

— ერთიც არ იცით? — გაუკვირდა ბიჭს და თვალები ეჭვითა და სიბრაღულით აევსო.

— არც ერთი.

— იცი, იანკეც, ბატონი ისტორიებს წერს, — უთხრა ბერიკაცმა. — ისტორია კი ბავშვის საქმე არ არის. ბავშვების საქმე ზღაპრებია.

— ბაბუ! — შეევედრა იანკეცი, — მწყემსი გოგოსა და ნეკერჩხლის ზღაპარი მიაშბეთ.

პეტერ მაიცენმა ყურები ცქვიტა.

— მწყემსი გოგოსა და ნეკერჩხლისა? — ჩაიბურტყუნა მოხუცმა ბლახიმა ისე, რომ თვალები არ გაუხელია, — მერე ძალიან ნაღვლიანი რომ არის?

— ნაღვლიანია, მაგრამ ლამაზი ზღაპარია.

— კეთილი. მხოლოდ დაიცა, ცოტა სული მოვითქვა. მანამდე წადი და ნახე, ფანჯარა დაკეტილია თუ არა?

„მწყემსი გოგოსა და ნეკერჩხლისა? — ჩაფიქრდა პეტერ მაიცენი, — მე არ გამიგონია ასეთი ზღაპარი... იქნებ ეს ნეკერჩხალას ზღაპარია? იქნებ მოხუცმა ბლახიმაც დაინახა, ის გოგო რომ ნეკერჩხალს მოეხვია? იქნებ მან იცის იმ ხის ამბავი და ამიტომაც მოიგონა მასზე ზღაპარი... აჰ, არა! ეს შეუძლებელია. ისევ ამბავი ამბავს ემთხვევა... მაგრამ რა უცნაური დამთხვევაა. სწორედ რომ დაუჯერებელია. მწყემსი გოგო და ნეკერჩხალი? ნაღვლიანი, მაგრამ ლამაზი ზღაპარი? უნდა მოვისმინო ეს ზღაპარი. მაინც ხომ უნდა მოვიცადო ბერიკაცის გამოღვიძებამდე“.

პეტერ მაიცენი კედელს მიეყრდნო. თვალწინ თითქოს შავ ჩარჩოში ჩასმული სურათი ედგა, მშვენიერი და ცხადი სურათი. მაღალ ზღურბლზე, როგორც ხის ცხენზე, იანკეცი იჯდა. მუხლებზე საყვირი უბრწყინავდა და კულულებიც ამ კამკამა ჰაერში ისე უჩანდა, ოქროსი ჰქონდა თითქოს. ბიჭის უკან

მხატვარ-პრიმიტივისტების ან ბავშვების ნახატების დარად სივრცე მოჩანდა. მარჯვნივ გზა მიიკლავებოდა, მარცხნივ, შიშველ ფერდობზე, მუხა ხარობდა. ბიჭის ზემოთ, სურათის მთელ სიგრძეზე ფართო მოვარდისფრო-მოთეთრო რკალად გადაჭიმულიყო აყვავებული წიწიბურას მინდორი. მის ზემოთ მდებარე ბიბინებდა, მდებარე ხეები იდგა, ხოლო ხეებში წითელსახურავიანი სახლი მოჩანდა. სხვენის დაკეტილ ფანჯარას მზის ათინათები დასთამაშებდა. ყოველივე ამას ლურჯი ცა გადახურვოდა, ცაზე კი გაუნძრევლად ეკიდა თეთრი ღრუბელი.

„ღრუბელი! — ჩაიხურჩულა პეტერ მაიცენმა და ბავშვური სიხარულით აევსო გული. — ღრუბელი სულ აღარ მომგონებია. ხედავ, მობრუნებულა უკან. აი, რა კარგია — გამოიგონებ რაღაცას და თავადვე გჯერა საკუთარი გამონაგონისა“.

მან შეხედა ბიჭს და ბერიკაცს, თითქოს ღრუბელს მათთვისაც ხსნა უნდა მოეტანა.

„მაგრამ ეს ხომ ჩემი ღრუბელია! იგი მაიმედებს, რომ ბოლოს და ბოლოს დავამთავრებ ტემნიკარის ამბავს. ეს მისი ღრუბელიცაა. ტემნიკარი ჯერ კიდევ ცოცხალია, ცოცხალია. სადღაც შორს, ქვემოთ იგი თავისი უკანასკნელი ბრძოლისკენ მიიჩქარის...“

პეტერ მაიცენმა სახლს გახედა და მხერა აყვავებული წიწიბურას მინდორზე შეაჩერა. მისჩერებოდა პეტერ მაიცენი ამ მინდორს, თვალს არ აშორებდა, მაგრამ ის წამი მაინც გამოეპარა, როცა წიწიბურა თოვლად იქცა უცებ და ირგვლივაც ზამთარმა დაისადგურა.


დათოვლილ მინდვრის შუაგულში კი კაცი იდგა — ის ტემნიკარი იყო...

ტემნიკარი რობის წინ ფლატეზე იდგა, ციცაბო, თეთრ ფლატეზე. იდგა გაუნძრევლად, ვით შავი უსულო ქანდაკება და იმავე დროს შემზარავად ცოცხალი, როგორც შეიძლება იყოს ადამიანი, ვინც იცის, რომ რაღაც ორი-სამი საათის შემდეგ განგების ძალით იგი მოკვდება. ნაოჭებით დაღარულ პირისახეზე ნაცრისფერი ედო; თვალის ფოსოებშიდა ენთო ცინცხალი ნაპერწკლები; იქ ბრეზი ირეკლებოდა — მზეზე აბრწყვიალებული თოვლიანი მთის წვერო.

ტემნიკარმა მტკიცედ გაიქნია თავი და თვალები დახუჭა, ხოლო როცა გაახილა, მხერა დათოვლილი სათიბებიდან ხეობისაკენ გადაიტანა. იქ, მდინარის მეორე ნაპირას გადიოდა შუქ-ჩრდილის საზღვარი.

— მალე პირველი საათი იქნება! — მტკიცედ წარმოთქვა ტემნიკარმა. — კარგად ვიარე და, შეიძლება ითქვას, მიზანს მივალწიე! ბილიკზე გავალ და უკვე ადგილზე ვიქნები.

ტემნიკარი ქშინავდა, ზურგზე წურწურით ჩამოსდიოდა ოფლი. უნდოდა მათარა მიეყუდებინა და ყელი ჩაესველებინა, მაგრამ გადაიფიქრა: „არა, უნდა წავიდე, რომ იმ ძაღლ-თაპირმა თხუნელებმა არ მიმასწრონ!“



მან მარცხნივ მოუხვია, უნდოდა ფლატეს გასყოლოდა და ბილიკზე გასულიყო. ბილიკი კლდეს გადაკვეთდა და ჩარევის გამოქვაბულთან მიიყვანდა. ტემნიკარი ქვებს, გამხმარი ბალახის ღეროებს, ბუჩქებს, ფესვებს ებლაუჭებოდა და ისე მიიკვლევდა გზას. ხეშეში ხელისგულები გადატყავებოდა და დასისხლიანებოდა, მაგრამ ტკივილს ვერ გრძნობდა. არც ეცალა ამაზე ეფიქრა, ერთი აზრიდა აკვიატებოდა და უბურღავდა ტვინს: მარტინმა და მისმა კაცებმა არ მიმასწრონო. ეს ფიქრი თითქოს შოლტის ცემით ერეკებოდა. კარგა ხანია ასე მსუბუქად და ასე ღონივრად არ უგრძვნია თავი.

„კარგად მიმათრევთ, ბებერო ძვლებო, კარგად! თუ ასე განვაგრძეთ, დავამარცხებთ!“ — იმხნევებდა თავს.

ბილიკს რომ მიუახლოვდა, უცებ ადგილზე გაშეშდა.

„არა, ამ მხრიდან მისვლა არ შეიძლება, აქეთ მარტინი გაატარებს თავის ძაღლთაპირ თხუნელებს, ჩემს კვალს წააწყდებიან და ყველაფერი წყალში ჩამეყრება“.

თავისივე კვალს უკან გაჰყვა და ჩაფიქრდა, რომელი მხრიდან სჯობს ბილიკს მივადგეო.

„კლდე-კლდე! — გაუნათლდა უცებ გონება. — კლდე-კლდე, ისევე, როგორც ჩემი მწყემსობისას ავსულვარ გამოქვაბულში.“

აზრადაც არ მოსვლია, რომ სად თოთხმეტი წლის მწყემსი და სად სამოცდაათი წლის ბერიკაცი, წუთითაც არ დაეჭვებულა, ასვლას ვერ შეეძლებო. ხელად იპოვა ის ადგილი, საიდანაც ოდესღაც ადიოდა და აღმართს შეუდგა. მალე კლდის პირველ შვერილს მიაღწია და დასასვენებლად ჩაიმუხლა. ვიწრო იყო ეს შვერილი, თითქოს მისი ჭაბუკობის დროიდან დავიწროებულყო კიდევ, და ტემნიკარს უცებ ძველებურად შეეშინდა:

„ვაითუ ჩამოვვარდე?!“

„მაშინ რომ ჩამოვარდნილიყავ, კარგა ხანია გაქრებოდა შენი სახსენებელი! — უთხრა თავის თავს და კლდეს უფრო მიეკრა. — ახლა კი არა მაქვს ჩამოვარდნის უფლება. თუ ჩამოვვარდი — მარტო მე კი არა, ყველა დაიღუპება, ვინც გამოქვაბულშია. აბა, წინ გავსწიოთ!“

ტემნიკარმა მთელი ძალა ხელებში მოიკრიბა, ტანი აზიდა, მეორე შვერილამდე მიცოცდა და კვლავ სული მოითქვა. ორი-ოდეჯერ შეისვენა და მალე მშვიდობით გააღწია ბილიკზე.

„უჰ, მადლობა ღმერთს! — ხმამაღლა თქვა მან და თოვლში ჩაჯდა. მათარისაკენ ხელი გაიწვდინა და ორი დიდი ყლუპი მოსვა. მერე ულვაშები გაიწმინდა და მიმოიხედა.

„ახლა რაღასა ვიქმთ? — ჰკითხა თავის თავს. — სად უნდა დაველოდო მათ და როგორ მოვიქცე, რომ არ დამასწრონ და არ მიმაწვინონ? ისინი ხომ ხუთნი არიან!“

„იუსტინ გაჩნიკიც მარტო იყო, მაგრამ ცხრა კაცს გაუსწორდა!“ — უბასუხა უმაღვე ამ კითხვას ტემნიკარმა; მას მოაგონდა ის სახელგანთქმული კონტრაბანდისტი, უიარაღომ რომ დაამარცხა ცხრა ჩაფარი საზღვარზე: დიდ კლდესთან ვიწრო ბილიკზე ჩაუსაფრდა და ერთიმეორის მიყოლებით ჩაჰყარა ძირს. სამი სასიკვდილოდ დაშავდა და დანარჩენებსაც საკადრისი მიეზლოთ.

„დიდ კლდესთან დაველოდები, — გადაწყვიტა ტემნიკარმა. — იქ დამალვა ადვილია. ვერც დამინახავენ და ვერც ჩამიჩუმს გაიგებენ ჩემსას. დაწალიკებულები კლდე-კლდე ივლიან, ნელ-ნელა, თითო-თითოდ, რადგან ბილიკი ვიწროა და ქვემოთაც უფსკრულია. ხოლო ვინც ამას ვერ მოახერხებს, დაოთხილი გაცოცდება. გაცოცდება, ვით ვერაგი მხეცი, ჰოდა... მეც ისე დავცხებ, როგორც მხეცს ეკადრება!“

ამ ფიქრებმა ძალა შემატა ტემნიკარს.

— მაშ, მხეცს დავცხებ და არა ადამიანს! — მტკიცედ წარმოთქვა მან და წამოდგა.

საჩქაროდ უნდა მიედწია დიდ კლდემდე. გულდაჯერებული მიდიოდა და დროდადრო იმეორებდა: — მაშ, მხეცს დავცხებ და არა ადამიანს!

შესაფერი ადგილი შეარჩია კლდის უკან და ირგვლივ თოვლი დატკეპნა, რომ მოძრაობის საშუალება ჰქონოდა. მერე კლდეს მიეყრდნო, მათარას ხელი მიუწვდინა და მოსვა.

— ერთსაც მოვყლურწავ, მერე ველარ მოვასწრებ... — ჩაიბურღლუნა მან. უნდოდა მათარა კვლავ ქამარზე ჩამოეკიდა, მაგრამ გადაიფიქრა. — ეშმაკმა არ შემაცდინოს! — თქვა და მათარა გვერდით მოიღო თოვლზე.

მერე ჯიბეში ხელები ჩაიყო და მზით გაბრწყინებულ ბრეზის მთას მიაჩერდა.

„ხუთი საათისათვის მზე ჯერ კიდევ მალლა იქნება! ამ დროისათვის ალბათ ყველაფერი გათავდება!“

ტემნიკარმა ხეობაში გადაიხედა. შუქ-ჩრდილის საზღვარი მდინარეს გადასცდენოდა უკვე.

„სამის ნახევარია... — შუბლშეკრული ტემნიკარი შორეთს გასცქეროდა. — რად აღარ გამოჩნდნენ ის ძალღოთაპირი თხუნელები? აქამდე კუც ამოაღწევდა!“

მიაყურადა.

სიჩუმე იდგა, ისეთი ყრუ, დაძაბული სიჩუმე, ტემნიკარმა უნებლიეთ რევოლვერზე წაივლო ხელი. მერე დინჯად აიღო ნაჯახი და ჩვეულებისამებრ თითით მოუსინჯა პირი. უცებ ისე მოეჩვენა, თითქოს ზურგს უკან ვიღაც ედგა და თვალს არ აცილებდა: მტერი კი არა, მისი კარგი ნაცნობი, შინაური. მოიხედა. უკან ტიტველი, ნაცრისფერი კლდე აღმართულიყო.

„მარტო ვარ, მარტო!.. ჩასაფრებული ვზივარ დიდ კლდეს-



თან და ნაჯახალმართული ველოდები მტერს. ვინმეს რომ დაენახა, არ დაიჯერებდა... რა, თავად დავიჯერებდი თუ? —

ტემნიკარმა ნაჯახი გვერდზე გადადო და მათარას წაავლო ხელი. მაგრამ პირთან მიტანაც ვერ მოასწრო, რომ გახევდა და სუნთქვა შეიკრა: ლაპარაკი შემოესმა.

— მოდიან! — ჩაიჩურჩულა მან და ხელი ჩაიყო, რომ რეგოლვერი ამოეღო. ვერა და ვერ შეეჩვია იგი ამ იარაღს და არც მაინცადამაინც ენდობოდა. თუმცა, რომც მინდობოდა, ახლა მაინც არ შეიძლებოდა სროლა. „არა, ამ ეშმაკთან კავშირს ვერ დავიჭერ. ერთს რომ ჩამოაგდებ, მეორე გაგებარება. ნაჯახს დავარტყამ, ნაჯახს. ისე დავცხებ, როგორც მხეცს და არა ადამიანს“.

— ახლა, ბიჭებო, ჩუმად ილაპარაკეთ! — მოესმა კლდის მოსახვევიდან მარტინის ხმა, — ზამთარში შორს ისმის ლაპარაკი.

„შორს ისმის“, გაიმეორა ჩურჩულით ტემნიკარმა და ნაჯახი მოიმარჯვა.

— აბა, ერთხელ კიდევ გავაბოლოთ, — თქვა მარტინმა. — მე რე აღარ გვექნება ამისი დრო, სანამ ბეთლემს არ გავამგზავრებთ იმათ.

„არა, მეტად ვეღარ გააბოლებთ! — ჩაილაპარაკა ტემნიკარმა. — აღარ გელირსებათ... აღარ გელირსებათ...“

— მარტინ, ერთი მაინც მოგვაყლურწინე, — მოესმა ტემნიკარს ვიღაცის ხრინწიანი ხმა, — ჩვენც ხომ ადამიანები ვართ!

„ადამიანებიო?“ — მოიღუშა ტემნიკარი.

— დედაჩემი ამბობს, არა ხართ, ხი-ხი! — მიუგო მარტინმა.

„მართლაც არა ხართ, ადამიანები! — დაეთანხმა ტემნიკარი. — არა ხართ, სწორე უთქვამს დედაშენს. საცოდავი! ყოველთვის ჭკვიან ქალს ეძახდნენ. ქალიშვილობაში კარგი გოგო იყო. ტილჩკას სიკვდილის მე რე სულ მეტმასნებოდა, კინალამ ცოლად შევირთე. მაშინ მარტინი ჩემი შვილი იქნებოდა და ახლა... ახლა ნაჯახალმართული მის მოლოდინში ვიდგებოდი აქ!.. ღმერთო, საიდან მომდის ასეთი აზრები?.. არა, მაინც როგორ მოვიქცეოდი ნეტა, მარტინი რომ მართლაც ჩემი შვილი ყოფილიყო და იმათი მხარე დაეჭირა? — ბერიკაცს შეაყრუოლა ამის გაფიქრებაზე. — აი სანამდე მივედი, რაები არ მომდის თავში? ისე კი ასეთი რამ მართლა შეიძლებოდა! გამიგონია, რომ მომხდარა კიდევ!“

— აბა, მიხა, წინ წადი! — უბრძანა მარტინმა.

— რატომ მე უნდა წავიდე მაინცადამაინც? — ხრინწიანი ხმით იკითხა მიხამ.

— ვინმე ხომ უნდა იყოს პირველი, ყველანი ერთად ვერ წავალთ.

„ვინმე ხომ უნდა იყოს პირველი!“ — ჩურჩულით გაიმეორა ტემნიკარმა და ფეხი უფრო მოიმაგრა.

— ეს მეც ვიცი, — ბუზღუნებდა მიხა.

— მაშ რაღას წუწუნებ? — დაცინვით ჰკითხა მარტინმა, — თუ იმ ცოცხალმკვდრების გეშინია?

— არ მეშინია... მხოლოდ იცოდე, ძალიან ცდები, თუ გგონია, მათ იარაღი არა აქვთ.

— რასაკვირველია, უიარაღოდ არ არიან, — ჩაიფრუტუნა მარტინმა. — მაგრამ დღეს ხომ შობის წინა დღეა. აზრადაც არ მოუვათ, რომ ჩვენისთანა ხალხი ესტუმრებთა. წვანან ალბათ თავიანთ ბუნაგში. ჩვენც მალე კარს მივაღვებით.

— ეს კიდევ საკითხავია — ბურტყუნებდა მიხა.

„ეს კიდევ საკითხავია!“ — გაიმეორა ტემნიკარმა, თითქოს ეს ბედკრული მიხა მისი მომხრე ყოფილიყოს.

— რა კითხვა უნდა ამას! — მოუჭრა მარტინმა. — გამოკვებულთან მივიპარებით, ჯერ ხელყუმბარას შევუგდებთ, მერე კი შევვარდებით შიგ და გავუწყავთ დაუნდობლად...

„დაუნდობლად!“ — ჩაიბურტყუნა ტემნიკარმა. მან უნებლიეთ დახედა თავის ცივად აბზინებულ ნაჯახს.

— ყველა უნდა გაიყუყოს!

„ყველა უნდა გაიყუყოს!“ — გაიმეორა ტემნიკარმა.

— გვეყო! — ბრძანა მარტინმა, — წინ წადი და კრინტი აღარ დასძრა!

„კრინტი აღარ დასძრა!“ — გაიმეორა ტემნიკარმა, თითქოს ეს ბრძანება მასაც ეხებოდა.

— ჩუმად! — ჩაისისინა მარტინმა.


„ჩუმად!“ — გაიმეორა ტემნიკარმა.

ჩამოვარდა ცივი, გამყინავი სიჩუმე.

ტემნიკარის ხელები რკინის მარწუხებივით ჩასჭიდებოდა ნაჯახის ტარს. მზერა კლდის კიდისთვის მიეპყრო. აღარაფერს ფიქრობდა, აღარაფერს გრძნობდა და იმასღა ელოდა, პირველი ვინ გამოჰყოფსო თავს. დიდხანს ელოდა, დიდხანს, მთელი საუკუნე.

ბოლოს იმ ბედნავსი მიხას თავი გამოჩნდა.

— თუნდაც მამალმერთი იყო, მაინც დაგარტყამ! — ამონიშნა ტემნიკარმა და ნაჯახი მოიქნია. გაისმა სუსტი კვნესა, მიხა შეტორტმანდა. ტემნიკარმა მხრებში ჩაავლო ხელი და უცებ თავისკენ მიიზიდა, რომ ზურგს უკან გადაეგდო. მოტრიალდა, უნდოდა ერთხელ კიდევ დაერთყა ნაჯახი, მაგრამ თოვლზე სისხლი შეამჩნია. მიხვდა, ის საცოდავი მკვდარი იყო უკვე და თავადაც რაღაც ჩასწყდა მკერდში. თითქოს მისი სული სხეულს გაჰყროდეს. მაგრამ ამაზე ფიქრის დრო სადღა იყო. იმაზეღა უნდა ეზრუნა, რომ მეორეც პირველსათვის მიეყოლებინა. ტემნიკარი თვალს არ აშორებდა კლდის კიდეს.



— დავკრავ მხეცს და არა ადამიანს, — იმეტრებდა ნგებ ხრინწიანი ხმით.

გამოჩნდა მეორე თავი. ტემნიკარმა მოიქნია ნაჯახი და რაღაც საოცარი კმაყოფილებით იგრძნო, რომ კვლავ მიზანს მოახვედრა.

გამოჩნდა მესამე თავი. ეს თავი მიწას გასწორებოდა, რადგან ის მესამე ოთხზე მოცოცავდა. ტემნიკარი დაელოდა მის მოახლოებას და ნაჯახი აღმართა. მაგრამ ამ დროს კაცმა წამოდგომა იწყო. ტემნიკარმა ნაჯახი მოიქნია და თავში ჩაარჭო. გაისმა გულის გამგმირავი ყვირილი. კაცი წამოდგა. ტემნიკარმა ისევ მოიქნია ნაჯახი, მაგრამ კაცი წაბარბაცდა და ქვევითკენ გაფრინდა.

— გადავარდა! — გაისმა მარტინის ხმა.

— გადავარდა! — გაიმეორა ტემნიკარმა. მიხვდა, მარტინს ეგონა, იმ მესამეს თვალი აუჭრებდა და კლდიდან გადავარდაო. გულზე მოეშვა, თუმცაღა ქვეშეცნეულად გრძნობდა, სადაცაა ყველაზე საშინელი წამი დადგება და მისი აღსასრულიც მოვა.

— ასეც უნდა იყოს... ასეც უნდა იყოს... — გამოეხმაურა საკუთარი სული სადღაც შორიდან, თეთრ, გაყინული სიჩუმიდან.

გამოჩნდა მეოთხე. ტემნიკარმა აღმართა ნაჯახი, მაგრამ უცებ ხელი გაუშეშდა. იმ კაცმა დაინახა ტემნიკარი. ეს მხოლოდ წამით გაგრძელდა, მაგრამ ტემნიკარმა კარგად გაარჩია შიშისაგან გადმოკარკლული თვალები და დაღებულ პირი, სადაცაა ღრიალი რომ აღმოხდებოდა. ტემნიკარმა იგრძნო, რომ უნდა დაესწრო, სანამ ეს კაცი ღრიალს ასტეხდა, და საჩქაროდ ისევ მოიქნია ნაჯახი. მაგრამ კაცმა მოასწრო, გატრიალდა და უკან მიაწყდა. ტემნიკარმა ზურგშიღა მოახვედრა ნაჯახი, მერე წინ ისკუბა და კიდევ და კიდევ ჩასცხო. კაცი ჩაიკეცა. ტემნიკარმა წაიბორძიკა და ზედ დაეცა.

— ტემნიკარ! — გაისმა სიჩუმეში.

განცვიფრებულმა, არაადამიანურმა ყვირილმა ტემნიკარი თითქოს ზე აისროლა, მისგან ათიოდე ნაბიჯზე მარტინი იდგა. ისეთი სახე ჰქონდა, გეგონებოდა, მოჩვენებას ხედავსო.

— ა... ა... ა!.. — ჩაიხრიწინა ტემნიკარმა, ნაჯახი ასწია და მისკენ გაემართა.

— ტემნიკარ! ჰკუაზე ხომ არ შეიშალე! — დაუყვირა მარტინმა. — შესდექ! შესდექ!.. თორემ მოგკლავ! მოგკლავ!

— ვერ მომკლავ! — ხრიწინებდა ტემნიკარი.

იგრიალა თოფმა. ტემნიკარმა დაინახა ლულიდან გადმოფრქვეული ალი. რაღაცამ ცხლად გაუარა ბარძაყში, მაგრამ არ შეჩერებულა.

— შეჩერდი! — კვლავ დაუყვირა მარტინმა და ჩახმახი

დასხლიტა. მაგრამ, ეტყობა, ვერ მოასწრო კარგად დამინება, ხელი აუკანკალდა და ტყვიები ტემნიკარის ფეხებთან ჩაცვივდა თოვლში. — მოგკლავ, იცოდე! მოგკლავ!.. — ღრიალებდა მარტინი.

— ვერ მომკლავ! — მთელი ძალა მოიკრიბა და ჩაიხრიწინა ტემნიკარმა.

მარტინმა შიშით გადმოკარკლა თვალები, თითქოს ბებერი ტემნიკარი კი არა, ურჩხული უახლოვდებოდა, ტყვია რომ ვერ ჰკლავდა.

— შემიბრალებ! შემიბრალებ! — იბღავლა მან, უკან გატრიალდა, კლდის შვერილს მოეფარა და იქიდან შაშხანა გამოჰყო. — მოგკლავ, იცოდე, მოგკლავ!.. — ჰკიოდა იგი.

— ვერ მომკლავ! — ხრიწინებდა ტემნიკარი.

კვლავ იგრიალა თოფმა. ტყვიებმა სიცარიელე დასერეს. ტემნიკარმა მოიქნია ნაჯახი და მთელი ძალით დაარტყა შაშხანის ტარს. ასე ბევრჯერ შეურჭვია კლდეში ფოლადის სოლი.

გონდაკარგულმა მარტინმა ისევ იბღავლა.

ტემნიკარი უკვე წინ ედგა. ჰაბუკი კლდეს მიჰკვროდა, მთელი ტანით ცახცახებდა და სლუკუნებდა:

— შემიბრალებ, ტემნიკარ! შემიბრალებ...

ტემნიკარმა ნაჯახი გადააგდო, ლულას ხელი წაავლო და ერთი მოქნევით გამოგლიჯა მარტინს შაშხანა.

— შემიბრალებ, ტემნიკარ! დამინდე! — გაჰკიოდა მარტინი და ხელ-ფეხით იგერიებდა მტერს.

ტემნიკარმა ამოიღლიავა მარტინი, ბილიკის პირას მიიყვანა და ჩალის ძნასავით მოიქნია.


— ტემნიკარ! — გაჰყვიროდა განწირული ხმით მარტინი და ხელებით ებლაუჭებოდა, — ერთად გადავვარდებით!.. ერთად გადავცვივდებით!.. ერთად! ტემნიკა... ა... არ!

მოხუცმა იგრძნო, როგორ ეცლებოდა ფეხქვეშ მიწა.

„გათავდა! — შვებით გაიფიქრა მან, თვალები დახუჭა და შავ უფსკრულში გადაეშვა. დიდხანს მიფრინავდა ქვემოთ და ქვემოთ, რაღაცეებს ეხეთქებოდა და ბოლოს რომელიღაც კიდევ უფრო ღრმა უფსკრულმა უყო პირი. — გათავდა!“ — გაიმეორა მან და გონი დაკარგა.

თუმცა არ გათავებულა. რობთან თეთრ ფლატეზე ერთხელ კიდევ მოვიდა გონს. ცოცხალმკვდარს განძრევის თავი არ ჰქონდა. რის ტანჯვით გაახილა თვალი და ჩამავალი მზის სხივებით ალაპლაპებული ბრეზი დაინახა.

„ალბათ მალე ხუთი საათი იქნება...“ — იღუმალი სიხარულით გაიფიქრა. მძიმე, ძალზე მძიმე საქმე მოილია, ამას კი გრძნობდა, მაგრამ რა მოილია ან როგორ — ეს აღარ ახსოვდა. ისღა იცოდა, კარგი საქმე რომ იყო, ისეთი კარგი, ახლა შეეძლო არხეინად წოლილიყო და ძილისთვის მიეცა თავი.



ქართული
ლიტერატურის
სამეცნიერო ცენტრი

ტემნიკარი გრძნობდა, რომ მაგრად ჩაიძინებდა. მკერდი ისეთი ნეტარი სიმშვიდით აუღ-ჩამოუდიოდა, თითქოს ტილჩკა ეხვეოდა და ეუბნებოდა: „იძინე, ჩემო, ძალიან დაღლილი ხარ!“

ტემნიკარი ბრეზს გასცქეროდა. მრგვალი მთა ფართოვდებოდა და დიდდებოდა, ფართოვდებოდა და დიდდებოდა და ტემნიკარს თავის თბილ, ვარდისფერ შუქს აფრქვევდა. მან გაოცებით გაახილა თვალები, უნდოდა მზერა მოეგლო ფართო, დათოვლილი სათიბებისათვის, მაგრამ ვერ მოახერხა, რადგან მთელი ცა მათ დაეფარა.

„ოჰ, რა ბალახი აბიბინდება გაისად!“ — კმაყოფილებით გაიფიქრა და თვალები დახუჭა. ძილი უკვე ისე ახლოს ედგა, მის ალერსიან შეხებასაც კი გრძნობდა, ჰოდა, დაღლილ-დაქანცულმა ძლივს მოიკრიბა ძალა და ესღა წაიჩურჩულა:

— ღამე მშვიდობისა, ტილჩკა...

პეტერ მაიცენი შეკრთა და კინაღამ ტაბურეტიდან გადავარდა. მოხუც ბლაჟიჩის მისთვის მუხლზე ხელი დაედო და თვალებდაჭყეტილი შესჩერებოდა.

— მოკვდა, — წაიჩურჩულა მან.

— მოკვდა, — თავი დაუქნია პეტერ მაიცენმა.

— მოკვდა!.. — გაიმეორა ბერიკაცმა და შეშუპებულ ქუთუთოებზე ცრემლი გადმოეკიდა, — ფანჯარა ღიაა.

— ფანჯარა ღიაა, — გაიმეორა პეტერ მაიცენმა და უცებ მოისაზრა, რომ ბერიკაცი თავის ვაჟზე ეუბნებოდა და არა ტემნიკარზე.

— ასე გვქონდა დათქმული, — ჩურჩულებდა ბლაჟიჩი და უფრო და უფრო ახლოს იხრებოდა პეტერ მაიცენისაკენ. — ის რომ მოკვდებოდა, ბიცოლას ფანჯარა უნდა გაეღო. ჰოდა, ახლა... ახლა... — თავის კანტურით უთითებდა ფერდობისაკენ.

პეტერ მაიცენმა ამწვანებულ ხეებს შორის მიკუნჭულ, მზით გაჩახჩახებულ სახლს შეხედა. სხვენის სარკმლის მინებზე აღარ ცეკვავდა ჩამავალი მზის ათინათი. ფანჯარა ჩაშავებული, ჩამკვდარი ჩანდა. პეტერ მაიცენს შეაყრყოლა, თითქოს სიკვდილმა ჩაუარა გვერდით. ახალგაზრდა ბლაჟიჩი ამქვეყნად აღარ იყო. პეტერ მაიცენი წამოდგა, მაგრამ სათქმელი ვერ იპოვა. ხელიდა გაუწოდა თანაგრძნობის გამოსახატავად, მაგრამ ბერიკაცი, ეტყობა, ვერ მიუხვდა. ჭიქას დასტაცა ხელი და დოქიდან ღვინის ჩამოსხმა იწყო.

— ბაბუ, ფანჯარა ღიაა! — დაიყვირა იანკეცმა.

დოქი შეკანკალდა და ჭიქას მიეჯახა, ჭიქამ დაიწკრიალა და შეყანყალდა. მაგრამ ბერიკაცმა დროზე წაავლო ხელი, პეტერ მაიცენს დაუდგა და ჩაიჩურჩულა:

— ფენახში იმიტომ ვიყავით, რომ ბიჭს არ დაენახა.

— ბაბუ, ფანჯარა ღიაა! — გაიმეორა იანკეცმა და წამოდგა. — ახლა ხომ წავალთ შინ?



ბერიკაცმა გულში ჩაიკრა ბიჭი და კოჟურიანი თითები გადაუსვა თავზე.

— მიტკივა! — თავი გაიქნია ბიჭუნამ.

— ტკივა!.. — ჩაიხრიწინა ბერიკაცმა, — რასაკვირველია, ტკივა...

ხმა უცნაური ჰქონდა, ბიჭმა გაოცებით შეხედა. ბერიკაცი არ უშვებდა და თავზე უსვამდა ხელს.

— ბაბუ, დაუკარით!

ბერიკაცმა ნელა მოკიდა საყვირს ხელი და პეტერ მაიცენს მოხედა.

— დაუკარით! — ბიჭმა მოუთმენლად აიქნია ხელი.

— ახლავე, — ამოიოხრა პაპამ და გაიღიმა.

— აბა, ჩქარა!

ბერიკაცმა თვალეზზე ხელი მოისვა, ტუჩები მოილოკა და ნელა ასწია საყვირი.

პეტერ მაიცენი მილურსმულივით გაშეშდა.

ბერიკაცი მისკენ დაიხარა და ძლივს გასაგონად ჩასჩურჩულა:

— ეეჰ, ბატონო, ბავშვი მაინც ბავშვია!..

პეტერ მაიცენმა ძლივსლა მოიკრიბა ძალა, რომ თავი დაექნია.

საყვირი ამღერდა. მისი ხმები მარნის ცივ ბნელ კედლებს ისე აწყდებოდა, ვით ნაღველი გულს, როცა გამოსავალ გზას ვერ პოულობს.

პეტერ მაიცენმა ძლივს შეიკავა თავი. მასაც ნაღველით უძგერდა გული. საყვირის ხმა რომ მიწყდა, იგი მივიდა ბერიკაცთან და უსიტყვოდ მოჰკიდა ხელზე ხელი.

— აბა, ახლა კი ჩვენც წავალთ, — მორჩილად თქვა ბერიკაცმა, — დავკეტავთ მარანს და წავალთ.

— არა, არა! — არ დაეთანხმა იანკეცი. — ერთხელ კიდევ დაუკარით.

პეტერ მაიცენი მიტრიალდა და თავქუდმოგლეჯილი გავარდა გარეთ. მან გადასჭრა გზა, ზვარს გასცდა და მორევთანდა შეჩერდა. ნეკერჩხალა არსად ჩანდა. მწვანე ბალახზე თეთრი ზეწრები იყო გაფენილი. პეტერ მაიცენს მხოლოდ სამი ნეკერჩხალი შემოეგება წინ, ვით სამი პირქუში დიაცი, სამი შავი პარკა.

სწორედ ამ დროს კვლავ გაისმა საყვირის ხმა.

პეტერ მაიცენმა მიიხედა და მარანი ველარ მიამსგავსა მწვანეში ჩათვლემილ შავთვალა ქალწულს. ახლა იგი უზარმაზარ თავის ქალას ჰგავდა.

— ეს სიკვდილია! — შეაკანკალა პეტერ მაიცენს და თითქმის სირბილით გაშორდა წყნარ ბარს.

VI

ტყეშილა მოითქვა სული. მდინარესთან ჩავიდა, პერანგი გაიხადა და ხელპირი დაიბანა. მალე მთლად დამშვიდდა.

— აი ეს არის ცხოვრება, — წარმოთქვა მან. — ჩვეულებრივი, ყოველდღიური ცხოვრება, შემთხვევაა მხოლოდ არაჩვეულებრივი. თუმცაღა რა არ ხდება ცხოვრებაში!

პეტერ მაიცენმა სიგარეტი გააბოლა და გადაწყვიტა, აღარ ეფიქრა ამაზე, მხრებში გასწორდა და ჩქარი ნაბიჯით გაუყვა გზას. მზის სხივთა სვეტებს ახლა უკვე ფერი ჩაკრთობოდა და აშოლტილ ფიჭვებს შორის ირიბად ეცემოდა.

ნეკერჩხალთან ის გოგო გაახსენდა და შეჩერდა.

„ნეტა სად არის?.. ალბათ ბიცოლას მისახმარებლად წავიდა“.

მან ხელი გადაუსვა ხის სრიალა ტანს და გზა განაგრძო, მაგრამ იქვე შეჩერდა. ხეებს შორის რაღაც გაკრთა. დააკვირდა და ჩრნილოგარი შეიცნო. მხარზე ცელი გაედო და მისკენ მოდიოდა.

— ეს კოშმარილა მაკლდა! — შეჰყვირა პეტერ მაიცენმა, საჩქაროდ გადაუხვია გზიდან და სქელ ფიჭვს მოეფარა.

ჩრნილოგარმა ნელა, თითქმის უხმოდ ჩაუარა. ისე იყო ჩამომხმარი და გაძვალტყავებული, მართლაც ჩონჩხს ჰგავდა. რწევა-რწევით მიდიოდა, მისი ცელი მზის სვეტებს კვეთდა. ნეკერჩხალთან გლებმა რაღაც ჩაიბურტყუნა, მერე ხელი ჩაიქნია და გზა განაგრძო.

პეტერ მაიცენმა ინანა, გზიდან რად გადაუხვებოდა. საოცარმა ღვარძლიანმა სურვილმა აიტანა, — ჩრნილოგართან შეხვედრა მოუნდა.

„ნეტა როგორღა აჭიკჭიკდებოდი, რომ გაგეგო, წყნარი ბარი მოვიარე და მაინც ვიპოვე საყვირი?“

კინალამ გამოხტა ფიჭვებიდან, მაგრამ თავი შეიკავა. „ჯანდაბას, წავიდეს, კიდევ შეგხვდებით!“

პეტერ მაიცენი დაელოდა, სანამ ჩრნილოგარი მოსახვევს მიეფარებოდა და მერე შინისაკენ გასწია. მალე გზაჯვარედინზე გავიდა, აქედან ხეივანი იწყებოდა. რა მშვენიერი იყო დაისის მზის სხივებით გაბრწყინებული ხეივანი! მის ბოლოს ჯადოსნურ ციხე-დარბაზივით თეთრად მოჩანდა სახლი. ფანჯრები ჩახჩახებდა, ხოლო ფიჭვებს შორის მზის სვეტები ვეება ორღანის მიღებევით ბრწყინავდა.

პეტერ მაიცენი სიხარულის ღელვამ აიტანა.

ტემნიკარი უკვე ხეივანთან გავიდა. ამჟამად წელში გამართული მიდიოდა. ზღურბლზე ტილჩკა ელოდა. ქალს მწვანე ქვედაკაბა და შავი კოფთა ეცვა. თეთრი ხელები მალალ მკერდზე დაეჭდო. მაგრამ უცებ გაშალა ხელები და შეჰყვირა:

- დაბრუნდი, ერნეი?
- დავბრუნდი!.
- დიდხანს არ ჩანდი!
- დიდხანს.
- ყველაფერი მოასწარი?
- ყველაფერი!
- ყველაფერი! ოჰ, ერნეი!..

უცებ პეტერ მაიცენი ადგილზე გაქვავდა. ზღურბლზე ნეკერჩხალა იდგა. პეტერ მაიცენი მოულოდნელობისაგან ისე დაიბნა, უნებლიეთ შეჰყვირა: — ნეკერჩხალა!



ყმაწვილი ქალი შეკრთა და მაიცენს შეხედა. მის გამოხედვაში ნალველიც იყო და წყრომაც.

„ხომ წამომცდა, ნეკერჩხალთან რომ ვნახე!“ — მიხვდა პეტერ მაიცენი. — ნუ გეწყინებათ! — კვლავ დაბნეულად ჩაიბურტყუნა მან.

ნეკერჩხალამ ზღურბლს გადააბიჯა და პეტერ მაიცენს გვერდით ჩაუარა. მაღალმა აშოლტილმა გოგომ ნელა გაიარა ხეივანი. გრძელ, ოქროსფერ თმას საღამოს ნიაგი საბრძოლო ბაირადივით უფრიალებდა.

— ჰეი! — ზურგში ეცა პეტერ მაიცენს გამყინავი ხმა.

მის უკან ჩრნილოგარის ცოლი იდგა.

— ვინ არის ეს გოგო? — ხეივნისკენ მიუთითა პეტერ მაიცენმა.

— აბა სადა? — ქალმა კისერი წაიგრძელა.

ხეივანი ცარიელი იყო, ნეკერჩხალას თითქოს მიწამ უყო პირი.

— აბა სადა? — გაიმეორა ჩრნილოგარის ცოლმა და გაოცებით შეხედა პეტერ მაიცენს. ალბათ გაიფიქრა, ისევ რაღაც მოეჩვენაო.

პეტერ მაიცენი მიუხვდა და მეტი აღარაფერი უთქვამს. მხრებილა აიჩეჩა და სახლისაკენ წავიდა.

ჩრნილოგარის ცოლი უკან მიჰყვა.

— სად იყავით? — ჰკითხა ქალმა.

— წყნარ ბარში.

— წყნარ ბარში? — გაუკვირდა ქალს. — მერე ჩემი ქმარი არ შეგხვედრიათ?

— შემომხვდა! საყვირიც ვნახე.

— საყვირიც? — პირი დააღო ქალმა, — ვისი საყვირი?

— ბლაჟიჩის!

— მერე იქ იყავით?

— ვიყავი, ახალგაზრდა ბლაჟიჩი ეს-ეს არის მიიცვალა.

— მიიცვალა, — ამოიოხრა ქალმა და სამზარეულოს კარის წირთხლს მიეყრდნო.

— მიიცვალა, — ღვარძლი ველარ შეიკავა პეტერ მაიცენმა.

VII

პეტრე მაიცენმა მაგრად მიიხურა თავისი ოთახის კარი, ფანჯარასთან მივიდა და ხეივანს გახედა. იქაურობა განათებული და ცარიელი იყო.

— აკი ნეკერჩხალა აქ იყო! — წარმოთქვა მან. — რაღაი ჩრნილოგარის ცოლს არ უნახავს, მაშასადამე, მეძებდა. რად მეძებდა?.. ან საიდან იცის ჩემი ვინაობა, ან ის, რომ აქა ვარ? ბიცოლა ბლაჟიჩმა თუ უთხრა? მერე რად ეტყოდა? რა უნდა ამ გოგოს ჩემთან?

პეტერ მაიცენი ფანჯარას მოშორდა და ოთახში ბოლთის ცემას მოჰყვა.

„კიდევ ერთი უცნაური დამთხვევა მოხდა. ახლა ნეკერჩხალაა ჩარეული ტემნიკარისეულ ზმანებებში. იქნებ იმიტომ, რომ ზღურბლზე იდგა? ვინ იცის! ყველაფერი შესაძლებელია!.. მაგრამ მოვეშვათ ნეკერჩხალას და ზმანებებსაც. მე ხომ რეალურ მოთხრობას ვწერ. ჰოდა, ახლა ყველაზე რეალური ის იქნება, რომ მაგიდას მივუჯდე და სამუშაოს მოგვიდო ხელი“.



პეტერ მაიცენი მაგიდას მიუჯდა და საბეჭდი მანქანა მოიჩოჩა. ხუთიოდე ფრაზა რომ დასწერა, სწორებას შეუდგა, თუმცა მშვენივრად ესმოდა, რომ არც ერთი გროშადაც არ ვარგოდა. მაგრამ მანამდე არ მოშორებია მაგიდას, სანამ ვახშმად არ დაუძახეს.

სამზარეულოში ივანემეს. ჩრნილოგარი კუთხეში დაღვრემილი იჯდა, თავი ჩაეჭინდრა და ხმამაღლა ხვრებდა კერძს. მისი ცოლი ღუმელთან ფუსფუსებდა და ხშირ-ხშირად იწმენდდა წინსაფრით პირისახეს. პეტერ მაიცენი გრძნობდა, რაღაც ვერ იყო რიგზე და ინანა კიდევ, რატომ არ ვთხოვე, ვახშამი ჩემს ოთახში მოეტანათო.

ღუმელი აშკარად აწუხებდათ სახლის პატრონებს. პეტერ მაიცენი უხერ-ხულად გრძნობდა თავს და ამიტომ საჩქაროდ მორჩა ჭამას.

ჩრნილოგარის ცოლმა პეტერ მაიცენს ჭიქით ყავა დაუდგა წინ, პირისახე შეიმშრალა და ჰკითხა:

- ახლა უკვე იცით, როგორ დაამარცხა მან ისინი?
- ვინ მან? — ვერ მიუხვდა პეტერ მაიცენი.
- აი იმ გლეხმა, ვისზედაც თქვენ წერთ. ახლა იცით-მეთქი, როგორ დაამარცხა თეთრგვარდიელები?
- ვიცი, — მოუჭრა პეტერ მაიცენმა.

ჩრნილოგარის ცოლმა ცოტა იყუჩა და კვლავ ჰკითხა:

- მერე როგორ დაამარცხა?
- ოთხი ნაჯახით მიაწვინა, მეხუთეს კი თავადვე ჩაჰყვა უფსკრულში.
- ოჰ! — პირი დააღო ქალმა. — თავად რაღად ჩაჰყვა უფსკრულში? ან იქნებ იმ მეხუთემ ჩაიყოლია?

- არა!
- მაშ რად?
- იმიტომ, რომ ჩაჰყვა და იმიტომ, რომ ასე იყო საჭირო. მეტი არაფერი შემიძლია გითხრათ.

ჩრნილოგარის ცოლი გაჩუმდა, მერე კი კვლავ იკითხა შემკრთალი ხმით:

- ჰოდა, რა მოხდა მერე? რა ბედი ეწია მისიანებს?
- სახლი გადაუწვეს, ვაჟი და ქალიშვილი მოუკლეს, ცოლს კი მორზე წააგდებინეს თავი.

ქალმა შეჰყვირა და ქმარს შეხედა:

- გაიგონე?
- გავიგონე, — ჩაიბურტყუნა ჩრნილოგარმა და ქვემოდან ისე ახედა პეტერ მაიცენს, თითქოს გულში ნატრობდა, ნეტა ამასაც თავს წააცლიდნენო.
- შემზარავი ამბავია! — შეაკანკალა ქალს. — რომ სცოდნოდა, რაც მოუვიდოდა, ალბათ არ ჩაიდენდა ამ საქმეს.

- კარგად იცოდა, — შეესიტყვა პეტერ მაიცენი.
- იცოდა? — გაუკვირდა ქალს. — აბა საიდან უნდა სცოდნოდა?
- იცოდა. იცოდა კი არა, საკუთარი თვალითაც ნახა, როგორ მოხდა ეს. კლდეებისაკენ რომ მიდიოდა, თავისი სახლი გაახსენდა და თავის თავს ჰკითხა: რას უზამენ ჩემიანებს, თეთრგვარდიელებს რომ ამოვხოცავო... თვალწინ მაშინვე სიკვდილი და ცეცხლი დაუდგა.

ქალი თვალმოუშორებლივ მისჩერებოდა პეტერ მაიცენს, მერე ტუჩები მოიწმინდა.



— ის კი არა და, კინალამ უკან დაბრუნდა, — განაგრძო პეტერ მაიციენმა, — თქვენ გგონიათ, არ შეიძლებოდა ეს მომხდარიყო? ბევრს დაუპირებია გმირობის ჩადენა, მაგრამ შეშინებია და გზიდან გამობრუნებულა.

ქალმა ღუმელისაკენ იბრუნა პირი.

ჩრნილოგარმა ხმამაღლა ჩაახველა, ამოიოხრა და თქვა:

— იმან კი არაფერი არ ილო ყურად და მაინც წავიდა...

— არაფერი არ ილო ყურად... — თავი დაუქნია პეტერ მაიციენმა.

— ჰმ, მაშ ასე, — ნიკაპი მოიქექა გლეხმა. — ყველა ადამიანი ერთნაირი არ არის.

„ჰმ, — გაიფიქრა პეტერ მაიციენმა. — რაღაც მძიმე ცოდვა აწევს ამათ სულს. ვინ იცის, იქნებ... იქნებ ბლაჟიჩებისა? — გაუელვა უცებ თავში. — არა! — თავიდან მოიშორა ეს ფიქრი. — მე ხომ ორჯერ გადავუკარი სიტყვა შავ ხევზე, მოხუც ბლაჟიჩს კი წარბიც არ შეუხრია... ეგება თავადაც არაფერი იცის?“

მან შეხედა სახლის პატრონს და სასხვათაშორისოდ ჰკითხა:

— სალამოს მიცვალებულის გამოსამშვიდობებლად წახვალთ?

ცოლ-ქმარმა ერთმანეთს გადახედა.

— იქნებ კიდევაც წავიდეთ, — მიუგო ქალმა.

— ჰმ, მაშ ასე, — თქვა გლეხმა. — იქნებ კიდევაც წავიდეთ.

— მეც წავიდოდი, — თქვა პეტერ მაიციენმა. — ახლა კი უნდა ვეცადო და წავიმუშავო, თორემ მთელი დღე დამეკარგა. ხომ არ შეგაწუხებთ, ღამით რომ ვბეჭდო?

— არა, არა!

— ღამე მშვიდობისა!

პეტერ მაიციენი თავის ოთახში დაბრუნდა, უხაროდა, როგორც იქნა მარტო დავრჩიო. მაგრამ მისმა სიხარულმა დიდხანს არ გასტანა. მაგიდასთან რომ მივიდა და თავის ქალაღებებს დახედა, მაშინვე ნაცნობმა სევდამ აიტანა. ამ სევდას ახლა რაღაც ბუნდოვანი შეშფოთების გრძნობაც ახლდა თან, რაც წინათ არ განუცდია.


„ერთი ნახევარი საათით დავისვენებ, დავმშვიდდები და აზრებს მოვიკრებ!“

პეტერ მაიციენმა სიგარეტი გააბოლა, ზურგზე ხელები შემოიწყო და ცალკე დამწყვდეულ ტყვესავით თავის ოთახში ბოლთის ცემას მოჰყვა. მაგრამ ვერ იქნა და ვერ დაიმშვიდა გული, უფრო და უფრო უმძიმდებოდა. იღუმალი ნაღველი შიშად ექცა, ასე ეშინოდა ხოლმე ბავშვობაში, როცა ღამით სასაფლაოს ჩაუვლიდა მარტო.

„ეჰ, ნეტა რა მაგიყებს! — გაბრაზდა საკუთარ თავზე, — დღევანდელი განცდების ბრალია. როგორმე უნდა დავივიწყო ეს ამბები. აღარ მოვიგონო მოხუცი ბლაჟიჩი და იანკეცი. აღარც საყვირი. ჰო, უწინარეს ყოვლისა. საყვირი აღარ უნდა გავიხსენო, რადგან დღევანდელი განცდები მისი ბრალია. მან ამიშალა ფიქრები სიკვდილზე და შემახვედრა იმ ხალხს... მაგრამ საყვირი ახლა ტემნიკარსაც უჭირავს და კიდევ დაუკრავს ალბათ... რაო? ისევ საყვირის ხმა ისმის!“ — შეკრთა პეტერ მაიციენი და ყური მიუგდო.

სიჩუმე იდგა. ღამეს თითქოს სუნთქვა შეჰკვროდა.

„არა, ახლა კი ნამდვილად მომეყურა! — შვებით ამოიოხრა პეტერ მაიციენ-“



მა. — საყვირი ჩემს თავში ხმიანობს. შეუძლებელია ახლა მოხუცი ბლაჟიჩი უკრავდეს“.

ეს ფიქრი რომ თავიდან მოიშორა, პეტერ მაიცენმა გარკვევით დაინახა ბნელში ჩაფლული წყნარი ბარი, მარანი, თავის ქალას რომ ჰგავდა, შავი მორევი, შავი წიფელი და შავ მოლზე გაფენილი თეთრი ზეწრები, დაინახა შავი ტირიფები, ფერდობზე ამოსული შავი მუხა, აყვავებული წიწიბურას რუხი სარტყელი, შავ ხეებში ჩაფლული ბლაჟიჩის სახლი და სახლის წინ ბერიკაცი, თავის ნაღველს ბნელს რომ ატანდა.

„არა, არა! ამაზე საერთოდ არ უნდა ვიფიქრო!.. ახლა ტემნიკარი მყავს საფიქრალი, მხოლოდ ტემნიკარი!“..

პეტერ მაიცენმა ნებისყოფა მოიკრიბა და ფანჯარაში გაიხედა. უმთვარო ღამე იყო, მაგრამ ისეთი ნათელი და კაშკაშა, ხეთა ტანებიც კარგად მოჩანდა და დაცარიელებული რუხი ხეივანიც... მაგრამ ხეივანი ცარიელი არ იყო — იქ ჩქარი ნაბიჯებით მოდიოდა ვიღაცა.

„ნეკერჩხალაა?“ — მიხვდა პეტერ მაიცენი, აშოლტილი ტანი და მსუბუქი სიარული რომ იცნო. მაგრამ კარგად რომ დააკვირდა, დაინახა: ყმაწვილი ქალი მისკენ კი არ მიდიოდა, პირიქით, უკან მიიჩქაროდა, მერე კი ისე გაქრა, თითქოს თვალსა და ხელს შუა გადნა. ყველაფერი თვალისწამში მოხდა.

„ესეც მომეჩვენა?“ პეტერ მაიცენმა თვალეზი მოიფშვნიტა და ისევ გაიხედა ფანჯარაში. ხეივანში კვლავ გამოჩნდა შავი ლანდი: ხან ახლოვდებოდა, ხან კი შორდებოდა და ქრებოდა. ეს ყველაფერი ისევ თვალისწამში მოხდა.

„რა არის ეს?“ — ჰკითხა თავის თავს პეტერ მაიცენმა. იგი თვალს არ აშორებდა ხეივანს, მაგრამ ამაოდ — იქაურობა ცარიელი იყო, ჩრდილებიც არ იძროდნენ.

— მომეჩვენა, მომეჩვენა, — ჩაიჩურჩულა პეტერ მაიცენმა და ფანჯარას ზურგი აქცია. — დავიღალე და იმიტომ. ყველაზე ჰკვიანური ის იქნება, რომ დავწვებოდე და დავიძინებდე.

საჩქაროდ შეუდგა ტანთ გახდას, მაგრამ უცებ გადაიფიქრა. ღამისა ეშინოდა, თუმცა ამაში თავს არ უტყდებოდა.

„არა, უნდა ვიმუშავო! უნდა!“ არწმუნებდა თავს, მაგიდასთან რომ ჯდებოდა. აიღო და წაიკითხა ვახშობამდე დანაწერი. უმეტყველო, უფერული და უსისხლხორცო სიტყვები დაეწერა — პოეზიის მადლი ოდნავადაც არ ეტყობოდა, ისეთი მკვდარი და უცხო იყო. აიღო ფანჯარი და შეუდგა სწორებას, მაგრამ მალე სასოწარკვეთილებამ შეიპყრო.

— არა, არა და არა! — გულგატეხილი აქნევდა თავს. — არ გამოდის!.. ყველაფერი ასე ნათელი და დასრულებული იყო, ახლა კი... მერე ვინ არის დამნაშავე? ეს უცნაური გარემო? ეს დაღვრემილი გლეხი?.. თუ იმისი ცოლი...

პეტერ მაიცენი შეკრთა, — კარზე კაკუნი შემოესმა. დაელოდა. ახლა უფრო ხმამაღლა დააკაკუნეს და, სანამ სიტყვის თქმას მოასწრებდა, კარი ნელ-ნელა გაიღო.

— ნეკერჩხალა! — შეჰყვირა მან და თითქოს სკამიდან ვიღაცამ აისროლა. კარებში მშვიდად იდგა ტურფა ყმაწვილი ქალი. ოთახი საოცარი ნაღველით აივსო.

— მობრძანდით, გეთაყვა, — უთხრა პეტერ მაიცენმა. შეეცადა გაეღიმა, მაგრამ ვერ მოახერხა.

ნეკერჩხალამ თითი ტუჩთან მიიღო და წყნარად მიხურა კარი. მერე პეტერ მაიცენთან მივიდა და უსიტყვოდ გაუწოდა ხელი; რბილი, თბილი ხელისგული ჰქონდა და ნათელი, ნალვლიანი გამოხედვა.

— თქვენ მეძებდით? — ჰკითხა პეტერ მაიცენმა.

ყმაწვილმა ქალმა ქვედა კაბაზე მიკერებულ დიდი ჯიბიდან რვეული და ფანქარი ამოიღო, მაგიდას მიუჭდა და ჩქარა-ჩქარა წერას შეუდგა.

— მუნჯი ყოფილა! — უნებლიეთ ხმამაღლა აღმოხდა პეტერ მაიცენს. ნეკერჩხალამ თავი ასწია და ნალვლიანად დაუქნია.

პეტერ მაიცენი გაქვავებული ელოდა, რას დაწერდა ქალიშვილი. ქალი ადგა და რვეული გაუწოდა.

„მე ენა მომაჭრეს, — წაიკითხა მან, — ვარსკვლავი ამომშანთეს. იმასაც გაჩვენებთ. ბიცოლა ბლაჟიჩმა მიაშობ, ისტორიებს წერთ თურმე. სწორედ ღროზე მოხვედით. ყველაფერს გიამბობთ, რომ ჩემი ამბავიც დაწეროთ. ზმაგა გორიანეცი“.

პეტერ მაიცენმა ვერ შესძლო, ვერა და ვერ შესძლო ქალისთვის შეეხედა. რამდენჯერმე გადაიკითხა ქალის ნაწერი. მხოლოდ კარგა ხნის მერე ასწია თავი.

ყმაწვილი ქალი მისგან ორიოდ ნაბიჯზე იდგა. უცებ ტანში გასწორდა და ორივე ხელით მოიღეღა კოფთა: თეთრ, მკვრივ მკერდზე და გედივით ყელზე გარკვევით აჩნდა ხუთქიმიანი ვარსკვლავის ნაიარევი.

პეტერ მაიცენი გაქვავდა, გულიდა უცემდა ძალუმად.

ნეკერჩხალამ მკერდი დაიფარა. მზერაზე ეტყობოდა, პასუხს ელოდა; პეტერ მაიცენმა კი არ იცოდა, რა ეთქვა, სიტყვა გაუწყდა. ყმაწვილი ქალი უფრო ახლო მივიდა მასთან, რვეული გამოართვა და საჩქაროდ დაუწერა:

„მელაპარაკეთ! მე ლაპარაკი მესმის!“

— მელაპარაკეთ! მე ლაპარაკი მესმის! — ჩუმად წაიკითხა პეტერ მაიცენმა. — მელაპარაკეთ! მე ლაპარაკი მესმის, — გაიმეორა მან. მაგრამ სიტყვები გასწყდომოდა და დუმდა.

ნეკერჩხალა თვალს არ აშორებდა პეტერ მაიცენს, სიჩუმე უფრო და უფრო მძიმდებოდა. მერე ყმაწვილ ქალს დიდრონ თვალეში წყენა, ნალველი, რისხვა და ზიზღიც აესახა. ხელიდან გამოგლიჯა პეტერ მაიცენს რვეული და სწრაფად გატრიალდა კარისაკენ.

— ნეკერჩხალავ! ზმაგა!..

ქალიშვილს არ მოუხედავს, ისე გაიხურა კარი.

პეტერ მაიცენი არ დადევნებია, საკუთარი თავი მეტისმეტად პატარა და საცოდავი ეჩვენა ამ ქალის გვერდით. ფანჯარასთან მივიდა და გადაიხედა. დადხანს არ მოუწია ლოდინმა. ნეკერჩხალა მალე გამოჩნდა ხეივანში. შავი ლანდი ისე სწრაფად მიდიოდა, თითქოს უჩინარი ფრთები ესხა.

— წავიდა!.. — ამოიოხრა პეტერ მაიცენმა, როცა ყმაწვილი ქალი შავ ხეებს მიეფარა. — წავიდა! — გაიმეორა მან და გამოცარიელებული თვალეებით მიაჩერდა გამოცარიელებულ ხეივანს.

პეტერ მაიცენმა არ უწყობდა, რამდენ ხანს იდგა და ლამის სიბნელეს გას-
ცქეროდა. ხოლო როცა ბოლოს და ბოლოს ფანჯარას მოსწყდა, მიხვდა, რომ
აქ ერთ სიტყვასაც ვეღარ დასწერდა მეტს.

— მორჩა! — ჩაიბურტყუნა გულგატეხილმა, რაკი კარგად იცოდა, რასაც
მოსაწავებდა ეს უჩვეულო გრძნობა. ოთახი მიათვალეირ-მოათვალეირა და
ისეთი უცხო და პირქუში ეჩვენა იქაურობა, ლამის ამწუთსვე გაქცე-
ულიყო.

„ყველაზე ჭკვიანური ის იქნება, თუ ბარგს ავიკრავ და წავალ, — თქვა
თავისთვის, — მაგრამ რად უნდა წავიდე?“ — ეკითხებოდა თავის თავს სასო-
წარკვეთითა და ჯავრით და ბოლოს სცემდა ოთახში.

კარზე ისევ დააკაკუნეს. პეტერ მაიცენი ადგილზე გაქვავდა და სუნთქვა
შეიკრა.

„ნეკერჩხალაა! მობრუნდა! რა უნდა ვუთხრა?“ — ისეთმა მღელვარებამ
აიტანა, არც კი გამოხმაურებია კაკუნს.

კარი ნელა გაიღო და ჩრნილოგარი შემოვიდა.

პეტერ მაიცენმა კბილები გააკრაჭუნა: მეტის მოთმენა აღარ შეიძლე-
ბოდა, ახლავე, დაუყოვნებლივ უნდა აეკრა ბარგი. ეტყობა, ისეთი მძვინვარე
გამომეტყველება ჰქონდა, გლები კარებშივე შეჩერდა.

— ნუ გამიბრაზდებით... — აბლუკუნდა იგი და ძვალტყავა ნიკაპი
მოიქექა, — ნუ გამიბრაზდებით, რომ ხელს გიშლით...

— ზმაგა გორიანეცს თუ იცნობთ? — მიახალა პეტერ მაიცენმა.

— ზმაგა გორიანეცს?.. — შეუბრუნა კითხვა სახლის პატრონმა და გა-
ფანჩულ წარბებიდან აიხედა.

— ჰო! იმას, ენა რომ მოსჭრეს და ვარსკვლავი ამოშანთეს.

— მაშ, უკვე ყველაფერი გცოდნიათ!.. — ჩაიხრიწინა გლებმა.

— არა, ჯერ კიდევ არაფერი ვიცი! — მკვახედ მიუგო პეტერ მაიცენმა. —
და არც მინდა ვიცოდე! არც მინდა! — ყვიროდა იგი, უკვე თითქმის დაკარ-
გვოდა თავშეკავების უნარი. მერე მაგიდას მივარდა, თავის ქალაღლებს ხელი
დასტაცა და დაჭმუჭნა.

სახლის პატრონმა ჩაახველა და ჩამკვდარი ხმით ჰკითხა:

— იქნებ წერის საქმე ვერ მიგდით კარგად?

პეტერ მაიცენმა პასუხი არ გასცა. მან ქალაღლები ღუმელში შეჰყარა და
ასანთს გაჰკრა. ღუმელში გაისმა შრიალი, მერე — გუგუნო, ღმუილი,
კვნესა.

— გესმით, როგორ კვნესის?

— ვინ კვნესის? — შეეკითხა გლები.

— ტემნიკარი! — მიუთითა ღუმელზე პეტერ მაიცენმა. — რად არ უნდა
იკვნესოს? რაც უნდა იყოს, ცოცხალი ადამიანია!

— ჰმ, მაშ ასე! მართლა რომ გაგაგონათ, როგორ კვნესიან ცეცხლში ცო-
ცხალი ადამიანები...

— თქვენ თუ გაგიგონიათ? — ჰკითხა პეტერ მაიცენმა ისე, რომ არც
მიბრუნებულა მისკენ.

— გამიგონია...

— ბლაჟიჩების კენესა?

— ბლაჟიჩებისა... თქვენ ხომ უკვე ყველაფერი იცით. დი თქვენთან... მინდა მოგიყვეთ...

— უკვე გითხარით, აღარაფრის მოსმენა აღარ მსურს-მეთქი! — პეტერ მაიცენს თავადვე შერცხვა საკუთარი უხეშობისა. — ნუ გეწყინებათ, — ხმას დაუწია მან. — მაგრამ უნდა გესმოდეთ, რომ ჩემს საქმესაც ვერ ავუღივარ!

— მესმის... მესმის... — თავს აკანტურებდა გლეხი და თვალებში არ უცქეროდა.

პეტერ მაიცენმა კარადიდან ჩემოდანი გამოათრია, მაგიდაზე დადო და საქალაქელების ჩალაგებას შეუდგა.

— ნუთუ მიემგზავრებით? — შიშით ჰკითხა სახლის პატრონმა.

— არა, — იცრუა პეტერ მაიცენმა. — რაღაც დამრჩა შინ, ჩავალ და წამოვიღებ.

გლეხი გაჩუმდა. დიდხანს არ გაუღია ხმა. მერე კვლავ ჩაახველა და შიშით ჰკითხა:

— ნუ გამიჯავრდებით და კიდევ გკითხავთ — ტემნიკარზე თუ დაწერდით რამეს, თეთრგვარდიელებს რომ არ შეებოდა?

— არ ვიცი, — მოუჭრა პეტერ მაიცენმა.

— ჰმ, მაშ ასე... მაშინ გამცემად მიიჩნევდით მას, არა?

— მე რომ არ მიმეჩნია, ალბათ თავად მიიჩნევდა თავის თავს.

— ჰმ... მაშინ რაღას დასწერდით მასზე? როგორ დაამთავრებდით ამბავს?

— თავად მიხვდებოდა, როგორც უნდა დაემთავრებინა. ადრე თუ გვიან მოაგონდებოდა იუდა ისკარიოტელი, აიღებდა ბაწარს და თავს ჩამოიხრჩობდა.

— ჰმ. მაშ ასე... ეს არც მომსვლია აზრად...

— მაშ რა გეგონათ? — ჯიქურ შეხედა პეტერ მაიცენმა. — მე ხომ ჯერ კიდევ ვახშობისას გითხარით, ტემნიკარი სულდამძიმებული ვერ იცხოვრებდა და თავს მოიკლავდა-მეთქი.

— დიახ... დიახ... — აბლუკუნდა სახლის პატრონი და კვლავ თავი ჩაჰკიდა.

— ახლა კი კმარა! — თქვა პეტერ მაიცენმა. — მეყოფა!

— ნუ გამიბრაზდებით! — მიუგო გლეხმა, — როდის აპირებთ გამგზავრებას?

— ახლავე. ამწუთას.

— აჰ, ამწუთას... — გააჭიანურა სიტყვა გლეხმა. — იქნებ დილამდე დაგეცადათ?

— რაღა? — ჰკითხა პეტერ მაიცენმა და შეხედა.

— ისე... ღამით რომ არ გემგზავრათ...

— მე არ მეშინია!

— არა, მაგიტომ არა, უბრალოდ...

— არა, რაკი წასვლა გადავწყვიტე, აღარ დავაყოვნებ!

— ჰო, თუ ასეა, ხელს აღარ შეგიშლით. კეთილ მგზავრობას გისურვებთ!

— გმადლობთ! ჰო, არ დაგავიწყდეთ, დერეფნის კარს ნუ დაკეტავთ!

— კეთილი! — მიუგო სახლის პატრონმა და გავიდა.

პეტერ მაიცენმა საჩქაროდ შეკრა ბარგი და ლოგინზე წამოწვა, რომ დამ-
შვიდებით გაებოლებინა თამბაქო. იგი ჭერს მისჩერებოდა და ღამის ხმაურს
აყურადებდა. ოთახში ღამურა შემოფრინდა, სადღაც ახლოს ბუმ დაიჩხავლა.
პეტერ მაიცენს გულმა ძალუმად დაუწყო ცემა. მერე დერეფნის კარმა გაიჭ-
რიალა და ვიღაც გავიდა გარეთ. ფეხის ხმა ნელ-ნელა მიწყდა.

პეტერ მაიცენმა ფანჯარასთან მიიბრინა. ხეივანში სახლის პატრონის ლან-
დი მიიბრუნდა, გრძელ ხელში ფარანი ეჭირა. მისი ჩრდილი მოჩვენებასავით
მისრიალებდა შავ ხეებში.

„ნეტა სად მიდის? — გაიფიქრა შეშფოთებით პეტერ მაიცენმა. — ან ფა-
რანი რაღად უნდა? არც ისე ბნელი ღამეა“.

იგი მანამ გაჰყურებდა ხეივანს, სანამ ფარნის შუქი თვალს არ მიეფარა.
მერე ფანჯარაში სიგარეტის ნამწვი გადააგდო, ზურგჩანთა მოიკიდა, ჩემოდან-
სა და საბეჭდ მანქანას ხელი დაავლო და თითის წვერებზე გამოვიდა ოთა-
ხიდან.

სწრაფი ნაბიჯებით მიდიოდა ხეივანში; უცებ ისევ ფარანს მოჰკრა თვალი
და შეჩერდა. დაელოდა, სანამ თვალს მიეფარებოდა შუქი. მაგრამ შუქი აღ-
გილს არ ინაცვლებდა.

„რას ნიშნავს ნეტა ეს? მე ხომ არ მელოდება ჩრნილოგარი?“ — გაიფიქ-
რა პეტერ მაიცენმა უკმაყოფილოდ. ხეივანს გახედა, იქნებ როგორმე გვერდი
ავუაროო, მაგრამ რაკი არ იცოდა, სხვა მხრით საით წასულიყო, გზა გა-
ნაგრძო.

ფარანი გზაჯვარედინზე იდგა.

პეტერ მაიცენმა აუჩქარებლად მიმოიხედა. გლეხი არსად ჩანდა. ერთხელ
კიდევ მიმოიხედა და უცებ დაინახა: ჩრნილოგარი მუხაზე კონწიალებდა.

— თავი ჩამოუხრჩვია! — ჩუმად წაილაპარაკა პეტერ მაიცენმა. მაგრამ
თავხარი არ დასცემია, თავადვე გაუკვირდა საკუთარი სიმშვიდე. არც კი და-
ფიქრებულა, რად ჩამოიხრჩოო ჩრნილოგარმა თავი. უკვე ყველაფერი იცოდა.
პეტერ მაიცენმა ჩემოდანი და საბეჭდო მანქანა ფარნის გვერდით დადო და
სახლში შებრუნდა.

ჩუმად შეალო საწოლი ოთახის კარი და ბნელში თქვა, ჩრნილოგარმა თავი
ჩამოიხრჩოო. ქალმა შეჰკვივლა, მაგრამ ლოგინიდან არ ამდგარა. ეტყობოდა,
ამ ამბავმა სულაც არ გააკვირვა. მან შუქი აანთო, გამოცარიელებული თვალე-
ბით შეხედა პეტერ მაიცენს და ამოიკვნესა:

— ასეც ვიცოდი, ცუდად დაამთავრებდა!..

პეტერ მაიცენმა ცოტა ხანს იყუჩა და მერე მკაცრად ჰკითხა:

— მან გასცა ისინი?

— ჰაა? — დაიბნა ქალი.

— გეკითხებით, მან გასცა-მეთქი ბლაჟიჩები?

— არა! — ასლუკუნდა ქალი, — არ გაუცია... ოღონდაც... ოღონდაც...
იცოდა, რომ სახლს ალყა ჰქონდა შემორტყმული...

— ჰოდა, არ წავიდა და არ გააფრთხილა, ხომ?

— აკი უნდოდა წასვლა — დაიღმუვლა ქალმა, — მართლა უნდოდა წასვლა,
მაგრამ მე ვუთხარი, ტყუილად რად უნდა გასწირო-მეთქი თავი.

— აჰ, მაშ ასე, — თქვა პეტერ მაიცენმა და უნებლიეთ ხმამაღლა წამოს-
ცდა ნაფიქრი: — მაშ, თქვენც გაგიციათ ისინი!

— ოჰ! — ამოიკვნესა ქალმა, თითქოს ზურგში დანა ჩასცესო, — ოჰ! —
და ისე შეტოკდა, გეგონებოდათ, ღალატისა და თვითმკვლელობის მთელი სიმ-
ძიმე ახლალა დააწვაო ლოდად. მერე უცებ ჩაჩუმიდა, თითქოს გამოსავალი
იპოვაო.

— აკი მწყემსი ქალი წავიდა!

— მწყემსი ქალი! — გაოცდა პეტერ მაიცენი. — რომელი მწყემსი ქალი?
ნეკერჩხალა?

— ჰა? — ჰკითხა ქალმა.

— ის გოგო, ვისაც მერე ენა მოსჭრეს.

— თქვენ უკვე იცით? — ქალი ისე პირდაღებული შესცქეროდა პეტერ
მაიცენს, თითქოს მის წინ ჯადოქარი იდგა.

— ვიცი, — დაუდასტურა პეტერ მაიცენმა და უცებ შეკრთა, ახლალა მი-
ზვდა საკუთარ დანაშაულს — ეს ხომ მე ჩამოვახრჩობინე თავი! — ჩაიბურტყუ-
ნა მან. — მე ვარ დამნაშავე!..

— დიახ, თქვენა ხართ დამნაშავე!.. — შეჰყვირა ქალმა. — თქვენ და თქვე-
ნი ტემნიკარი! რად იგონებთ ასეთ სისულელებს? თქვენ რომ არა, იგი კიდევ
იცოცხლებდა! წყეულო სატანავ! — ქალმა ხელი დასტაცა მალვიძარას და პე-
ტერ მაიცენს ესროლა. საათი კარს მოხვდა და დაიმსხვრა. ზამბარა საწოლ-
ქვეშ შევარდა და ცოდვილი სულივით აცახცახდა.

პეტერ მაიცენს ტემნიკარის სახლში აწკრილებული ზამბარა მოაგონდა,
შეტრიალდა და ოთახიდან გავიდა.

— დაიცადეთ! — მიაყვირა ქალმა და პერანგისამარა დაედევნა, — დაიცა-
დეთ! დაიცადეთ!

პეტერ მაიცენი უკვე ზღურბლთან იდგა.

— საით გასწიეთ? — ქალმა ხელზე ხელი სტაცა.

— შინ მივემგზავრები. — მიუგო პეტერ მაიცენმა და ქალის ხელიდან გან-
თავისუფლებას შეეცადა.

— არა! — დაიყვირა განწირულივით ქალმა, — არა! თქვენ ხომ გამ-
ცემთ!

პეტერ მაიცენმა ძალით მოიშორა ქალი.

— ნუ გამცემთ, ნუ გამცემთ! — ქალი მივარდა და ორივე ხელებით შე-
მოეხვია. — ათი ათასს მოგცემთ! ოცი ათასს! ასი ათასს!.. ყველაფერს თქვენ
მოგცემთ! ყველაფერს! ოღონდ ნუ გამცემთ!

— ეს მე არ მეკითხება! — მკვახედ მიუგო პეტერ მაიცენმა და ხელი ჰკრა.

— ხომ არ გამცემთ?

— უკვე გითხარით, ეს მე არ მეკითხება-მეთქი! — გაუმეორა პეტერ მაი-
ცენმა.

— ო... ო... ო! — ქალი აქვითინდა და იატაკზე გაიშხლართა. პეტერ მაი-
ცენმა წამოაყენა და საწოლ ოთახში შეიყვანა.

— დაიცადეთ! — კვლავ დაიყვირა ქალმა. — ვინემ ხალხს დავუძახებდე,
მანამ მაინც დამიცადეთ!

— კეთილი, — მიუგო პეტერ მაიცენმა, — ქუჩაში დავიცდი.

პეტერ მაიცენი გამოვიდა სახლიდან, ზღურბლზე დადგა და ცივი ოფლით დაცვარულ შუბლზე ხელი მოისვა. თუმცა ახლა აღარ ეკვროდა სუნთქვა. ჰაერი აღარ იყო გაყენთილი იმ მომშხამავი ნაღველით, მთელი დღე რომ გულს უღევდა მას. პეტერ მაიცენი წელში გასწორდა, მთელი მკერდით შეისუნთქა ჰაერი და მაშინლა იგრძნო, როგორ დაცარიელებოდა სული, როგორ ჩაკვდომოდა ყველაფერი.

— მორჩა! — ჩაიბურტყუნა გულგატეხილმა, თუმცა თავადაც არ უწყოდა, რაზე ამბობდა, მორჩაო. — ყველაფერი დამთავრდა!

ნელ-ნელა წაჩანჩალდა ხეივნისაკენ. მარჯვნივ თუ მარცხნივ ტანაყრილი ხეები აღმართულიყო, მაგრამ პეტერ მაიცენს თავი არ აუწევია მათი კენწერობის შესახედად, რაკი კარგად იცოდა, ეს ხეები კუბოსთან მდგარ ყარაულებივით უძრავნი და პირქუშნი იყვნენ. არც ცისტვის გაუსწორებია თვალა, რაკი გრძნობდა, მაღალი იყო ცა, ძალზე მაღალი და ბნელი.

— მორჩა! — გაიმეორა მან, — ყველაფერი მორჩა!..

ფეხებს წინ მიჰყავდათ. ფარანთან იგი შეჩერდა, ჩემოდანზე ჩამოჯდა და უაზროდ მიაშტერდა ცარიელ სივრცეს.

ცოტა ხნის შემდეგ უკარნახა მხოლოდ გონების ხმამ, რომ სწორედ ჩამოხრჩობილის ფერხთით ჩამომჯდარიყო. თუმცა არაბუნებრივად და შემზარავად ეჩვენა აქ ჯდომა, მაინც არ შეძრწუნებულა. „გესმის, შენ ხომ იმ ჩამოხრჩობილის ფერხთით ზიხარ, ჩამოსახრჩობი ბაწარიც რომ თავად ჩაუღე ხელში“, — მკაცრად ჩასძახოდა გონების ხმა.

„არა, არა! — გაიქნია თავი პეტერ მაიცენმა. — ასეთ საქმეს ჩემისთანა უძლური კაცი ვერ იკისრებდა. ტემნიკარმა მიაჩეჩა ბაწარი, ტემნიკარმა.“

იმავე წამს ტემნიკარიც დაინახა. ტემნიკარი შუა ხეივანში იდგა, თავისი ძველი მაზარა და დახეული ფეხსაცმელები ეცვა, ქამარზე მათარა ეკიდა, ილიაში კი ნაჯახი ამოედო. იდგა თავით ფეხებამდე ნაცრისფერი, თითქოს საკუთარი სახლის ფერფლიდან აღმდგარიყოს. მაგრამ ფერფლისა კი არა, ლითონისა იყო, სისხლის ცეცხლში ნაწრთობი, შემართული და ამაყი, პირისახეზედაც სიმართლისათვის მებრძოლი კაცის დიდებული გამომეტყველება შეჰყინვოდა. ისეთი ვეება მოჩანდა, ხეებს ასცილებოდა სიმაღლით.

— მე კი... მე მინდოდა მასზე დამეწერა მოთხრობა, — ჩაიბურტყუნა დაღონებით პეტერ მაიცენმა. — მინდოდა უბრალო თავგადასავალი დამეწერა, უბრალო გლეხისა, ის კი თანდათან გაიზარდა, გაიზარდა და აგერ ახლა ჩემ წინაშე მთელი თავისი დიდებით წარმოსდგა. ჩემი კალამი მეტისმეტად უძლურია. მე იგი მხოლოდ ჩემს წარმოსახვაში შევქმენ და დაე დარჩეს იქვე.

პეტერ მაიცენმა დაბლა ჩაჰკიდა თავი. მთელი არსებით ცდილობდა არ ეფიქრა, რადგან დამძიმებული გული ისე საშინლად უცემდა დაცარიელებულ მკერდში, ვით უსულო რკინის ქანქარა პირქუშ კოშკში!

ტყეში ქარმა დაქროლა. პეტერ მაიცენის ფერხთით ფოთოლი დაეცა, ათრთოლდა, როგორც სასიკვდილოდ დაჭრილი ჩიტუნა და მიყუჩდა. მას მეორე ფოთოლი მოჰყვა, მერე მესამე, თითქოს ჩამოხრჩობილი სწყვეტდა ხეებიდან ფოთლებს და ქვევით ჰყრიდა. მაგრამ პეტერ მაიცენი მასზე არ ფიქრობდა.

გაისმა ნაბიჯების ხმა და პეტერ მაიცენი წამოდგა. დიდი სიამოვნებით



მოჰკიდებდა ხელს ახლა თავის ბარგს და გაქრებოდა აქედან. მაგრამ იმდღე-
ბული იყო მდგარიყო და ეცადა.

ფარნის შუქზე მოხუცი ბლაჟიჩი და ჩრნილოგარის ცოლი, ნეკერჩხალა და
პატარა იანკეცი დაინახა საყვირით ხელში. ერთი კი ახედეს ჩამოხრჩობილს
და უსიტყვოდ მიაჩერდნენ მერე პეტერ მაიცენს.

პეტერ მაიცენი ის იყო ზურგჩანთის ასაღებად დაინახა, რომ ბლაჟიჩის
დაღონებული ამოხვრა მოესმა:

— მორჩა ტანჯვას!..

— მორჩა ტანჯვას!.. — აქვითინდა ჩრნილოგარის ცოლი და მიწაზე და-
ეშხო, — ოჰ, მორჩა წამებას!

პეტერ მაიცენმა მიმოიხედა. გამჭვარტლული ფარის მბჟუტავი ოქროს-
ფერი შუქი დაჰფენოდა მოხუცს, ბავშვსა და ყმაწვილ ქალს. ხეივნის სიღრმეში
კი ტემნიკარი დაინახა, ამ უზარმაზარ ხეებზე ისევე მაღალი და ძალოვანი რომ
მოჩანდა.

პეტერ მაიცენმა რამდენიმე წამს უცქირა მას, მერე კი ჩემოდანსა და სა-
ბეჭდ მანქანას წამოავლო ხელი.

— აბა, მშვიდობით იყავით... — ძლივს ამოღერდა მან და ლამის სიბნე-
ლეს შეერია.

ლამე კი არც მაინცდამაინც ბნელი იყო. მალე ნაღველმა განდევნა სასო-
წარკვეთილება. პეტერ მაიცენმა თვალეზი მოიფშვნიტა და დაინახა, რომ ნაც-
რისფერ გზაზე გასულიყო. დინჯი ნაბიჯით დაადგა ამ გზას... სამყარო უსასრუ-
ლო ჩანდა, სიჩუმე ლამის ცას ასწვდენოდა. შორს, უსაზღვროების კიდეზე
ხალვლიანად ჟღერდა საყვირი, ცაზე კი, სადაც სიჩუმეს გაეშალა ფრთები,
მშვიდად მიცურავდა თეთრი ღრუბელი.

□